

ହତାଶ ପ୍ରେମିକ

୭

ଅନ୍ୟାନ୍ୟ ଗଳ୍ପ

ଶ୍ରୀପ୍ରଭାତକୁମାର ମୁଖୋପାଧ୍ୟାୟ

ପ୍ରଣୀତ

କଲିକାତା

ମାର୍ଚ୍ଚ, ୧୯୭୦

ମୂଲ୍ୟ ୧୫୦

সূচী

হতাশ প্রেমিক	১
অলকা	৩৬
কুকুমুমারীর গুলকথা	৬৪
হীরামাল	৮০
প্রেম ও প্রহার	১০০
ঔপন্যাসিক	১২৫
বিনোদিনীর আত্মকথা	১৪৮
অদৃষ্ট পরীক্ষা	১৮৮
জ্যোতিষী মহাশয়	২২২

হৃদয় প্রেমিক

(ডায়ের)

৩১শে চৈত্র। রাত্রি ১০টা।

হে ১৩২৮ সাল! আজ কি সত্য সত্যই তুমি আমাদের নিকট চিরবিদায় গ্রহণ করিতে আসিয়াছ? আজ নিশাশেষে, উষালোক প্রকাশের সঙ্গে সঙ্গে, সত্যই কি তুমি অনন্ত কালসাগরে বিলীন হইবে? তোমার পায়ে ধরি ২৮ সাল, এত শীঘ্র তুমি আমাদের পরিত্যাগ করিয়া যাইও না, আরও কিছুদিন অবস্থিতি কর—তোমায় যে আমি বুক ভরিয়া ভোগ করিতে পাইলাম না। ভাই ২৮ সাল, তোমায় আমি বড় ভালবাসি, তাই তোমার আসন্ন বিরহে আমার প্রাণ কাঁদিয়া উঠিতেছে। তুমি আমাকে স্মৃতি দাও নাই, দুঃখ দিয়াছ, তবু আমি তোমায় ভালবাসি। তুমি আসিবার কিছুদিন পরেই আমি আই-এ পরীক্ষা দিয়াছিলাম; কিন্তু যথাসময়ে গেজেটে নির্মলচন্দ্র মল্লিক নামটি খুঁজিয়া পাই নাই বলিয়াই যে আমার দুঃখ, তাহা তুমি মনে করিও না। বিশ্ববিদ্যালয়ের পরীক্ষায় ফেল হওয়াকে

আমি দুঃখ বলিয়াই গণ্য করি না। এ বৎসর ফেলু হইয়াছে, 'আগাম্য' বৎসর পাশ করিব। কিন্তু ভাই—২৮ সাল! অপূর্ণ একটা বিষয়ে যে ফেল তুমি আমায় করাইয়া দিয়াছ, ইহজীবনে তাহা তুমি কখনও সংশোধিত হইবার নহে! যাহাকে হারাইলাম, এ জীবনে তাহাকে ত আর পাইব না। তুমি আমার জীবনের সকল আলো সকল গান, সকল আশা সকল উৎসাহ হরণ করিয়া লইয়াছ তব তোমায় ভালবাসি। ভালবাসার ধর্ম্মই বৃদ্ধি এই!

ভাই ১৩২৮ সাল! তুমি যেদিন প্রথম আসিয়াছিলে, সেই শুভ বৈশাখের প্রথম প্রভাতে যখন তুমি এই ধরাধামে অবতীর্ণ হইয়াছিলে, সেদিন তুমি আমাকে কি দেখিয়াছিলে, আর আজ তুমি আমাকে কি দেখিয়া যাইতেছ! সেদিন আমি ছিলাম দুঃখক্লেশ-শূন্য, চিন্তালেশ শূন্য নব্য যুবক, হৃদয়াকাশ মেঘহীন, সুখ-রবির কিরণ-সম্পাতে সমুজ্জ্বল; আর আজ? চিন্তা আমার প্রিয় সহচরী, দুঃখ-ক্লেশ আমার অন্তপান, সুখরবি চির অন্তমিত, হৃদয়াকাশ ঘনঘোর মেঘে সমাচ্ছন্ন, দশদিক অন্ধকার—অন্ধকার!

মনে আছে ভাই সেই ১২ই আষাঢ়? ঐ তারিখে শৈলকে আমি শেষ দেখিয়াছি। ইহার কয়দিন পরেই সেই চিঠি-বিভাট; শৈলর পিতা আমাদের পাড়া হইতে পার্শ্ববাগানে উঠিয়া গেলেন। সেই শেষ দেখার ১২ই আষাঢ় তারিখটি আমার বুক রক্তের অক্ষরে লেখা আছে। আর লেখা আছে, বিলাতফেরত ইঞ্জিনিয়ার প্রবোধ গুপ্তের সহিত তাহার বিবাহের তারিখ—২২শে অগ্রহায়ণ ১৩২৮—ইহা আগুনের অক্ষরে আমার হৃৎপিণ্ডের ঠিক মাঝখানে

লিখিত হইয়া দিবারাত্র আমায় দণ্ড করিতেছে। স্মৃতরাং হে ১৩২৮ সাল, তোমায় আমি জীবনে কখনও ভুলিব না।

কিন্তু দোহাই ভাই, তুমি ভুল করিও না। তোমার উপর আমার কিছুমাত্র বিদ্বেষভাব নাই। সে ভাব থাকিলে কি তোমায় আমি এতখানি ভালবাসিতে পারিতাম?

কেন তোমায় ভালবাসিয়াছি, তাহাও বলি। ভালবাসিয়াছি, কারণ কাব্যাদি পড়িয়া এখন আমি নিঃসন্দেহে বুঝিতে পারিয়াছি, লোকে যাহাকে পাওয়া বলে, তাহাই প্রকৃতপক্ষে হারাণো;—এবং যাহাকে না পাওয়া বলে, তাহাই যথার্থ পাওয়া। সেই ২২শে অগ্রহায়ণ, শ্যামবাজারের প্রবোধ গুপ্তের পরিবর্তে যদি আমার সঙ্গে শৈলজার বিবাহ হইত, তবে সেই হইত তাহাকে আমার না পাওয়া। সে এখন আমার বধু হইত বটে, কিন্তু কালক্রমে আমার পুত্রকন্টার জননী হইত, এবং আমার গৃহিণী পদে প্রতিষ্ঠিত হইয়া, যথাসময়ে প্রৌঢ়ত্বে উপনীত হইত। কিন্তু তাহাকে পাই নাই বলিয়াই সে আমার হৃদয়মন্দিরে স্থিরযৌবনা চির-বধু—প্রেম প্রতিমার স্থায় বিরাজ করিবে। এই ত যথার্থ পাওয়া। তাই বলিতেছিলাম, আমি তাহাকে না পাইয়াই যথার্থ পাইয়াছি; এবং প্রবোধ গুপ্ত তাহাকে পাইয়া সম্যকরূপেই হারাইয়াছে।

ভাই ১৩২৮ সাল, নিতান্তই কি তুমি যাইবে? আমার এই ব্যাকুল প্রার্থনায়, আরও কিছুদিন—অন্ততঃ দুইটা দিন,—একটা দিনও কি থাকিতে পারিবে না? অহো স্বরণ হইয়াছে, বিধিলিপি আমাদের যেমন অনলঙ্ঘনীয়, তেমনই তোমাদেরও

পঞ্জিকালিপি লভন করিবার সাধ্য নাই—তোমায় ঘাঁইতেই হইবে।

তবে যাও ১৩২৮ সাল, সেই অনন্তধামে যাত্রা কর। তোমার স্মৃতিরক্ষাকল্পে “বর্ষ-বিদায়” নামক একটি কবিতা আমি আজ লিখিতে আরম্ভ করিয়াছিলাম, কিন্তু এখনও শেষ করিতে পারি নাই। আর শেষ করিয়া কোনও ফলও নাই, কারণ কোনও ভাল মাসিকপত্রে আর তাহা ছাপা হইবার উপায় নাই, কেন না সেগুলি আগামীকাল ১লা বৈশাখ কণওয়ালিস্ ট্রীটের বারান্দা আলোকিত করিবে।

১লা বৈশাখ, ১৩২৯।

স্বাগত হে নববর্ষ, তোমায় প্রণাম করি। লোকে বলে মুখ মনের দর্পণ স্বরূপ, কিন্তু তোমার মুখ দেখিয়া তোমার মনে কি আছে আমি ত কিছুই বুঝিতে পারিতেছি না। প্রভাতের সোণালি রৌদ্রে তুমি মুচকি মুচকি হাসিতেছ। আমার জন্ত স্নেহ আনিয়াছ কি দুঃখ আনিয়াছ তাহা তুমিই জান। কিন্তু তোমার এই সরল হাসি দেখিয়া, তোমাকে মন্দলোক বলিয়া আমার মনে হইতেছে না।

আজ প্রায় দশ মাসকাল তাহাকে দেখি নাই, তবু বাঁচিয়া আছি। আমার সে, অন্তের অকশায়িনী হইয়াছে, তবু আমি বাঁচিয়া আছি। শৈল আমার বাল্যসখী; তাহার আশ্রয় আমাদের পাড়াতেই থাকিত। এক সময় ছিল, যখন আমি প্রায় প্রত্যহ তাহাদের বাড়ী যাইতাম; তাহাকে পড়া বলিয়া দিতাম, তাহার খেলায় যোগদান

করিতাম। সেও যাবে মাঝে আমাদের বাড়ী আসিত। তার পর শৈল বড় হইল। তাহার মা তাহাকে আমাদের বাড়ীতে আর আসিতে দিত না; তাহাদের বাড়ী গেলে আমিও আর বড় একটা তাহার সাক্ষাৎ পাইতাম না। এই সময় বাবা ঢাকায় বদলি হইলেন; বাড়ীটা ভাড়া দিয়া আমরা ঢাকায় গিয়া প্রায় তিন বৎসর রহিলাম। কলিকাতায় ফিরিয়া গুনি, সে ইস্কুলের গাড়ীতে উঠিয়া পড়িতে যায়। গাড়ী হইতে ওঠা নামার কালে মাঝে মাঝে তাহার সহিত আমার চোখোচোখি হইতে লাগিল। যে ছিল কিশোরী, সে এখন নব যুবতী; আমার হৃদয় নিহিত সে বাল্যস্নেহ, উদ্দাম প্রণয়ে পরিণত হইল। হৃদয়ের আবেগ আর সহ্য করিতে না পারিয়া ইস্কুলের ঠিকানায় তাহাকে আমি চিঠি লিখিলাম। তখন জানিতাম না, মেয়েদের নামে চিঠি আসিলে প্রধান শিক্ষয়িত্রী প্রথমে তাহা খুলিয়া পাঠ করেন। ফলে, চিঠি শৈলর কাছে না পৌঁছিয়া তাহার বাবার কাছে আসিয়া পৌঁছিল। তাহার বাবা আমার বাবাকে উহা দেখাইলেন। বাবার নিকট কাণমলা ও মার নিকট গালি খাইলাম;—কয়েকদিন পরে অগ্র বাড়ী ভাড়া লইয়া শৈলর পিতা পার্শ্ববাগানে উঠিয়া গেলেন। বিলাতফেরত প্রবোধ গুপ্তের সঙ্গে অগ্রহায়ণ মাসে শৈলর বিবাহ হইল, সংবাদপত্রে পাঠ করিলাম। আমার হৃদয় শ্মশানভূমিতে পরিণত হইল।

১৭ই শ্রাবণ। বেলা ৯টা।

গত রাত্রে তাহাকে স্বপ্ন দেখিয়াছি। সে যেন একখানি

কল্কাপাড়ী শাউরী পরিয়া, পুস্তক ও খাতা হস্তে কলেজের গাড়ী হইতে নামিয়া, জুতা খুট খুট করিতে করিতে তাহাদের বাড়ীর মধ্যে প্রবেশ করিল ; প্রবেশের পূর্বে একবার আমার দিকে ফিরিয়া চাহিয়া, চকিতের ন্যায় একটু হাসিয়া গেল। ইহা পার্শ্ববাগানে কি শ্রামবাজারে, স্বপ্নে তাহা নির্ণয় করিতে পারি নাই।

স্বপ্নে তাহাকে দেখিয়া অবধি, জাগ্রতে তাহাকে একটবার দেখিবার জন্য আমার মন বড় চঞ্চল হইয়াছে। কিন্তু সে এখন পরম্পরী, প্রেমনয়নে তাহাকে দেখা কি এখন আর আমার উচিত ? আবার ইহাও মনে হইতেছে, শুধু একটবার চোখের দেখা বৈ ত নয়, তাহাতে দোষ কি ? এখন উঠি, কলেজের বেলা হইল।

১৯শে শ্রাবণ, রাত্রি ১০টা।

খবর লইয়া জানিয়াছি, শৈল এখন তাহার স্বামিগৃহে—শ্রাম-বাজারে। বাড়ীটাও সন্ধান করিয়া বাহির করিয়াছি। বাড়ীর প্রায় সম্মুখে একটা চায়ের দোকান আছে ; বেলা সাড়ে তিনটা হইতে পাঁচটা পর্যন্ত আজ সেখানে বসিয়া পাঁচ ছয় পেয়ালা চা পান করিলাম ; কিন্তু ইস্কুলের গাড়ীও সে রাস্তায় আসিল না, তাহাকেও দেখিতে পাইলাম না।

৯ই ভাদ্র।

হে আমার লাল রঙের নূতন ষ্টাইলো পেন, আজ তোমায় কেন কিনিয়া আনিয়া তোমার বুক লালকালী ভরিয়াছি, তাহা তুমি জান

হতাশ প্রেমিক

কি ? উপরের ঐ তারিখটি লিখিবার জন্ত । ঐ তারিখটি আমার জীবনে একটি লাল অক্ষরের তারিখ (red letter day)— আজ আমি তাহাকে দেখিয়াছি—প্রাণ ভরিয়া দেখিয়াছি । রাত্রি ৯টার সময় বায়স্কোপ হইতে বাহির হইয়া, ট্রামের জন্ত গ্রে স্ট্রীটের মোড়ে দাঁড়াইয়া ছিলাম, এমন সময় দক্ষিণ দিক হইতে আগত একখানি মোটর গাড়ীর প্রতি নজর পড়িল ; ভিড়ের জন্ত থামিয়াছে এবং ভেঁ। ভেঁ। শব্দ করিতেছে ; সেই গাড়ীতে ইংরাজী বেশে সজ্জিত প্রবোধ গুপ্তের পার্শ্বে বসিয়া—সেন্স । পরিধানে একখানি নীলাম্বরী বেনারসী শাড়ী । গ্যাসলট্রনের আলো তাহার সুন্দর মুখখানির উপর পড়িয়াছে ; সে মুখখানি যেন বড় গম্ভীর, যেন বড় বিষম—একটু যেন বিরক্ত—স্পষ্টই বুঝা যাইতেছে, এ বিবাহে সে সুখী হয় নাই । ভিড়ের জন্ত প্রায় দুই মিনিট কাল গাড়ীখানি সেই খানেই আটকাইয়া রহিল, এবং আমি প্রাণ ভরিয়া, নয়ন ভরিয়া তাহার রূপসুখা পান করিলাম । অবশেষে ভিড় কমিলে গাড়ীখানি গ্রামবাজারের দিকে চলিয়া গেল ; আমিও বউবাজার-গামী ট্রামে লাফাইয়া উঠিলাম । সারাপথ মনে মনে বলিতে লাগিলাম—ওরে ছুঁ দেশাচার, কি করিলি অভাগার, কার ধন কারে দিলি সে আমার হল না ?

রাত্রি প্রায় ১১টা বাজে । এইবার আলো নিবাইয়া শয়ন করি । হে আমার মানসী প্রিয়া, আজ স্বপ্নে আমায় একটিবার দেখা দিও—আমার সহিত ছুটি কথা কহিও । আমি বড় দুঃখী ।

১৩ই আশ্বিন। মধুপুর।

তাহার দর্শন-মণ্ডলুক হইয়া আজ মধুপুরে আসিয়াছি। সমস্ত পূজার ছুটি প্রবোধ গুপ্ত এই খানেই যাপন করিবে। তাহার বাঙ্গলাটি কোথায়, আজ বিকালে বাহির হইয়া অনুসন্ধান করিতে হইবে। প্রতিদিন সে শৈলকে লইয়া নিশ্চয়ই বেড়াইতে বাহির হইবে; প্রতিদিন তাহাকে দেখিব। লাল ঠাইলোটিও সঙ্গে আনিয়াছি।

১৬ই আশ্বিন। রাত্রি ৯টা।

তিনদিন বৃথা অন্বেষণের পর, আজ তাহার দর্শন পাইয়াছি। প্রবোধের সঙ্গে সে বেড়াইতে বাহির হইয়াছিল। কিন্তু চকিতের জ্বায় দেখা—আমরা বিপরীত দিক হইতে আসিতেছিলাম—সন্ধ্যাও আসন্ন হইয়াছিল। পরস্পরকে অতিক্রম করিতে যে সময়টুকু লাগে—সেইটুকু সময় মাত্র দেখা। তপ্ত সাহারার বুকের উপর একটি বিন্দুমাত্র বারি পতন।

১৭ই আশ্বিন। সন্ধ্যা।

আজও তাহাকে দেখিলাম, স্বামীর সহিত বেড়াইতেছে।

১৮ই আশ্বিন সন্ধ্যা	ঐ	ঐ
১৯শে	ঐ	ঐ
২০শে	ঐ	ঐ

হতাশ প্রেমিক

২১শে আশ্বিন।

রোজ রোজ আর ঐ ঐ লিখিতে ভাল লাগে না। কতক্ষণের জগুই বা দেখা, সিকি মিনিটও নহে ! আজ আমার ইচ্ছা হইতেছে, খোঁটা সাজিয়া উহাদের বাড়ী গিয়া চাকরি প্রার্থনা করি। যদি রাখে, তবে সারাদিন তাহাকে মনের সাধে দেখিতে পাই। কিন্তু হিন্দী যে জানি না ; আর চেহারাটাও যে আমার আদপেই কাটখোঁটা নহে !

২২শে আশ্বিন।

বায়ুভোজী বাবুরা চাঁদা করিয়া এখানে পূজা করিতেছেন। কলিকাতা হইতে কারিগর আসিয়া প্রতিমা নিৰ্ম্মাণ প্রায় সমাধা করিয়াছে। আমি ৫৮ চাঁদা দিয়াছি, এবং কাযকৰ্ম্মও অনেক করেছেছি। চাঁদার তালিকায় দেখিলাম, মিষ্টার ও মিসেস গুপ্ত ২০৮ চাঁদা দিয়াছেন। নিমন্ত্রণ পত্রে ঠিকানা লেখার ভার আমি গ্রহণ করিয়াছি। মিষ্টার ও মিসেস গুপ্তের নামে দুই খানি স্বতন্ত্র খাম লিখিয়াছি। প্রবোধ বাবুর খামের মধ্যে কেবল ছাপা নিমন্ত্রণ পত্র ; শৈলজার খামের মধ্যে নিমন্ত্রণ পত্রের সঙ্গে একটি ক্রোড়পত্র—তাহাতে প্রাণের আবেগে অনেক কথা লিখিয়া ফেলিয়াছি। গ্রে ষ্ট্রিটের মোড়ে সেই বেষে সেই যে তাহাকে দেখিয়া ছিলাম, তাহারও উল্লেখ করিয়াছি। শেষে লিখিয়াছি, “জানি না, তুমি আজিও আমায় মনে কর কি না। আমাদের সে বাল্য-প্রণয় যদি আজিও তোমার মনে থাকে, তবে সেইটুকু তুমি আমায় জানাইও। সেইটুকুই আমি কেবল জানিতে চাহি—এজীবনে

তোমার কাছে আমি আর কিছুই প্রার্থী নহি। যদি তোমার হৃদয়ের এক কোণেও আমার জন্য একটু স্থান থাকে, তবে বিজয়া দশমীর দিন বিকালে তুমি যখন ভাসান দেখিতে যাইবে, তখন তোমার সেই নীলাশ্বরী বারাণসী শাড়ীখানি পরিয়া যাইও। যদি আমায় ভুলিয়া থাক, অথবা আমার প্রতি বিরূপ হইয়া থাক, তবে অল্প কোনও শাড়ী পরিও।”

২৩শে আশ্বিন।

উভয় পত্র পকেটে লইয়া স্বয়ং পত্রবাহক হইয়া, আজ বেলা ৯টার সময় আমি প্রবোধ গুপ্তের বাঙ্গালায় গিয়াছিলাম। সৌভাগ্যবশতঃ শৈলজাকে তাহাদের ফুলবাগানে একা বেড়াইতে দেখিলাম। ফটক খুলিয়া, সাহসে ভর করিয়া, আমি তাহার দিকে অগ্রসর হইলাম, এবং পত্র তাহার হাতে দিয়া বলিলাম, “এই খানি তোমার—আপনার। আর এই খানি তোমার স্বা—স্বা—স্বামীর জন্যে।”—পত্র দিয়া প্রস্থান করিতেছিলাম। শৈল আমার মুখপানে চাহিতে আমি দাঁড়াইলাম। সে নিম্নস্বরে বলিল, “চলুন, বসবেন। তিনি এখনই বাড়ী ফিরবেন।” আমি বলিলাম, “না, আজ না, আমার অনেক কায আছে। তোমার চিঠিখানি তুমি নিজে খুলে দেখো। আমি যাই।” বলিয়া আমি চলিয়া আসিলাম। ফটকের নিকট পৌঁছিয়া, ফিরিয়া চাহিয়া দেখিলাম, খামখানি সে খুলিয়াছে; লাল নিম্নঙ্গণ পত্রের সঙ্গে আমার লেখা সাদা কাগজখানি স্পষ্ট দেখিতে

পাইলাম। একটা কার্য্য ত করিয়া বসিলাম—জানি না ইহার ফল এখন কিরূপ হইবে।

২৮শে আশ্বিন। বিজয়াদশমী। রাত্রি ১১টা।

উঃ, ভয়ানক সিদ্ধি খাইয়াছি। ইচ্ছা করিয়াই খাইয়াছি, কারণ সিদ্ধিলাভ করিয়াছি। বিষম নেশা হইয়াছে। উঃ, চোখে ভাল দেখিতে পাইতেছি না; লিখিতে পারিতেছি না! হাত কাঁপিতেছে। তবু একটা কথা আজ লিখিয়া রাখিতেই হইবে। সে আজ নীলাম্বরী বারাগমী শাড়ী পরিয়াই প্রতিমা বিসর্জন দেখিতে গিয়াছিল। উঃ, শোয়া যাক।

২৯শে আশ্বিন। রাত্রি ১০টা।

এ কি হইল! আজ বিকালে বেড়াইতে বাহির হইয়া, এ পথে সে পথে কোন পথেই তাহাকে দেখিতে পাইলাম না। একরূপ অবশ্য পূর্বেও ঘটিয়াছে; প্রত্যেক দিনই যে উহারা বেড়াইতে বাহির হইয়াছে তাহা নহে। তথাপি মনটা কেমন চঞ্চল হইল। ফিরিবার সময় উহাদের বাঙ্গলার নিকট দিয়া আসিলাম। দেখিলাম কোনও ঘরে আলো জ্বলিতেছে না। এই সময় মালী ফটকের নিকট আসিল। তাহাকে জিজ্ঞাসা করিয়া জানিলাম, সাহেব ও মেম সাহেব বেলা দ্বিপ্রহর ট্রেণে ‘কলকত্তা’ ফিরিয়া গিয়াছেন।

সহসা এ বজ্রাঘাত কেন? বিনা মেঘে? না মেঘ উঠিয়াছিল? প্রবোধ গুপ্ত কি কিছু জানিতে পারিয়াছে? শৈল হয়ত অসাবধানে আমার চিঠিখানা কোথাও ফেলিয়া রাখিয়াছিল, প্রবোধ তাহা

গোপনে দেখিয়াছে। হয়ত সে অপেক্ষা করিতেছিল, দেখি এ আজ কোন্‌ শাড়ী পরিয়া বেড়াইতে বাহির হয়। নীলাশ্বরী বারাগসী দেখিয়া সে বুঝিয়াছে—সে নিজে চন্দ্রশেখরের সজীব সংস্করণ মাত্র। আমার বড় ইচ্ছা করে শৈলজার সঙ্গে আমিও এক চন্দ্রালোকিত রজনীতে অগাধ জলে একবার সাঁতার দিই—এবং তাহাকে শৈ— বলিয়া ডাকি। কিন্তু সাঁতার যে জানি না!

এতক্ষণ তাহারা কলিকাতায় আহালাদিও শেষ করিয়াছে। প্রবোধ না জানি শৈলকে কত লাঞ্ছনা কত গঞ্জন, কত তিরস্কার করিতেছে। শৈল কি উত্তর করিতেছে? সে কি বলিতেছে—
আমরা এক বোঁটায় দুটি ফুল ফুটিয়াছিলাম, তুমি ছিঁড়িয়া পৃথক করিলে কেন?”

৪ঠা কার্তিক।

আজ তিন দিন কলিকাতায় ফিরিয়াছি, তিন দিনই শ্রামবাজারে গিয়া শৈলদের বাড়ীর সম্মুখস্থ রাজপথে ঘোরাঘুরি করিয়াছি, যদি কোনও সুযোগে একটবার তাহার মুখখানি দেখিতে পাই। কিন্তু পাই নাই। প্রবোধ গুপ্ত মোটরে বাহির হইতেছে দেখিয়াছি, কিন্তু সঙ্গে শৈল নাই। তাহাকে বোধ হয় সে একটা অন্ধকার ঘরে পুরিয়া ঢাবি বদ্ধ করিয়াছে—বোধ হয় অশেষ প্রকারে কষ্ট দিতেছে। হয়ত এই অপমানে শৈল নিজ প্রাণ নষ্ট করিতেও পারে। উঃ কি ভয়ানক।—তাহাই যদি হয়? নৃশংস জানোয়ার প্রবোধ গুপ্তকে আগি তাহা হইলে গুলি করিব।

৯ই অগ্রহায়ণ ।

আজ বিকালে ৪টার সময় সেই পথ দিমা যাইতেছিলাম। দ্বিতলে একটি জানালায় তাহার মুখখানি দেখিলাম। চারিচক্ষে মিলন হইবামাত্র জানালাটি সে বন্ধ করিয়া দিল। ভয়ে—সন্দেহ নাই; বাড়ীর কে কোথা হইতে দেখিবে, আবার লাক্ষ্মী গজনা স্মৃষ্ক হইবে। চোখ দুটি তার বড় স্নান দেখিলাম—বড় গনের কণ্ঠে আছে। হায় শৈলজা, কেন তুমি আমার হইলে না প্রিয়তমে ?

৭ই অগ্রহায়ণ ।

কলেজ পলাইয়া দ্বিপ্রহরে, বিকালে, সন্ধ্যায় আরও কয়েকদিন সেই রাস্তায় ঘুরিয়াছি, কিন্তু আর তাহার দেখা পাই নাই। কিন্তু একটা ফন্দি করিয়াছি। সেই বাড়ীর একজন ঝির সঙ্গে আলাপ করিয়াছি—তাহার নিকট শৈলর সংবাদটা মাঝে মাঝে পাইতে পারিব। আজ যখন শৈলদের বাড়ীর দিকে যাইতেছিলাম, তখন দেখিল ম একজন মধ্যবয়স্কা স্ত্রীলোক সন্দেশের একটা ঠোঙা হাতে করিয়া সেই দিকে যাইতেছে। তাহাকে দেখিয়াই আমি চিনিলাম, - কারণ মধুপুরে তাহাকে আমি অনেকবার দেখিয়াছি। দৌড়াগ্যবশতঃ গলির সে অংশটা তখন নির্জন ছিল। আমি সাহসে ভর করিয়া তাহার কাছে গিয়া বলিলান, “হ্যাঁগা, তুমি কি প্রবোধ বাবুর বাড়ীর ঝি ?”

সে বলিল, “হ্যাঁ, কেন বাবু ?”

“তোমার নাম কি ?”

ঝি একটু মূত্‌কি হাসিয়া বলিল, “আমার নাম শুনে আপনি কি করবেন? আমার কাছে আপনার কি দরকার তাই বলুন।”

“তুমি আমায় আর কখনও দেখেছ?”

“দেখেছি বৈ কি। মধুপুরে দেখেছি, সেখান থেকে ফিরে এখানেও কতদিন দেখেছি—আপনি আমার মনিববাড়ীর সামনে ঘুরঘুর করে ঘুরে বেড়ান, দেখেছি বৈ কি!”—বলিয়া সে আমার প্রতি একটা বিশেষভাবে চাহিয়া হাসিল। বোধ হয় এইরূপ চাহনিকেই কবি ও ঔপন্যাসিকেরা ‘কটাক্ষ’ আখ্যা দিয়া থাকিবেন।

কি প্রয়োজনের কথা তাহাকে বলি ভাবিতেছি, এমন সময় ঝি তাড়াতাড়ি বলিল, “কি দরকার শীগ্‌গির বলুন; এখনই কে কোথা দিয়ে এসে পড়বে।”

আমি। দেখ ঝি, সে অনেক কথা; একটু নিরিবিলিতে তোমার সঙ্গে কোথায় দেখা হতে পারে?

ঝি। নিরিবিলিতে? আচ্ছা, কাল বেলা ১২টার সময় আপনি এইখানে আসবেন।

আমি। এই গলির মোড় কি নিরিবিলি?

ঝি। দূর, তা কি বলছি? সেই সময় আমি মনিববাড়ী থেকে ছুটি পাই; ঘরে যাই। আপনাকে আমার ঘরে নিয়ে যাব।

আমি উৎসাহের সহিত বলিলাম, “সেই বেশ হবে ঝি। কাল ঠিক ১২টার সময় আমি এইখানে এসে দাঁড়িয়ে থাকুব।”

“বেশ। আসবেন।”—বলিয়া ঝি চলিয়া গেল।

সুতরাং স্থির করিয়াছি, আগামী কল্য কলেজ পলাইয়া, ঝির হিত তাহার বাসায় গিয়া সাক্ষাৎ করিব এবং শৈলজার সমস্ত খবর শুনিব।

১৮ই অগ্রহায়ণ।

বেলা সাড়ে ১১টার সময় কলেজ হইতে বাহির হইয়া, গ্রাম বাজারের ট্রাম ধরিয়া, ১২টার মধ্যেই যথাস্থানে পৌছিয়া দেখি, গামছা ঢাকা এক থালা ভাত হাতে করিয়া ঝি আসিতেছে। নিকটে আসিয়া সে আমাকে চুপে চুপে বলিল, “সঙ্গে সঙ্গে আসবেন না; একটু দূরে আমার পিছু পিছু আসুন।” আমি সেই ভাবেই তাহার অনুসরণ করিতে লাগিলাম। এ রাস্তা সে রাস্তা এ গলি সে গলি ঘুরিয়া ক্রমে একটা খোলার ঘরের দ্বারে আসিয়া পৌছিয়া, পশ্চাৎ ফিরিয়া বলিল, “আসুন।”

ভিতরে প্রবেশ করিয়া দেখিলাম; উঠানে একটা পেয়ারা গাছের ছায়ায় বসিয়া এক বৃদ্ধ ভাত খাইতেছে; চৌবাচ্চার কাছে বসিয়া দুইজন ঝি-শ্রেণীর স্ত্রীলোক বাসন মাজিতেছে; বারান্দায় নেকড়া ঢাকা দিয়া কাহার শিশু সন্তান ঘুমাইতেছে। ঝি বাম হস্তে আঁচলে বাঁধা চাবি লইয়া একটা ঘরের তালা খুলিয়া, প্রবেশ করিয়া আমায় বলিল, “ভিতরে আসুন।”

প্রবেশ করিতেই, কেমন একটা ভাপসা গন্ধ আমার নাকে গেল। ঘরখানা ক্ষুদ্র ও অন্ধকার। মোমোটো সিমেন্ট করা হইলেও,

সাঁং সাঁং করিতেছে। এক দিকে একটা তক্তপোষে মাহুর পাশে
রহিয়াছে, প্রান্ত ভাগে কতকটা বিছানা শুটানো ; অত্রদিকে দেওয়া
লের কাছে ইটের উপর একখানা তক্তা বসানো ; তাহার উপর
একটা বিবর্ণ ট্রাক এবং একটা আমকাঠের সিন্দুক পাশাপাশি
রক্ষিত। একটা জানালা ছিল, ঝি সেটাকে বাম হস্তে খুলিয়া দিল,
ঘরে একটু আলো হইল। পরে আমার দিকে ফিরিয়া বিনীতভাবে
বলিল, “গরীবের এই ভাঙ্গা তক্তপোষে বসতে বলতে পারি কি ?”
আমি বসিবার উপায়ান্তর না দেখিয়া, তাহাতেই বসিলাম ; সেটা
কাঁচ কাঁচ করিয়া উঠিল।

ঝি বাহিরে গিয়া হাত ধুইয়া আসিল। গামছায় হাত মুছিতে
মুছিতে বলিল, “পাণ সেজে দেবো কি ?”

আমি বলিলাম, “না, থাক্।”

“কেন, আমার সাজা পাণ খেতে কোনও দোষ আছে ? আমি
যদি আপনাদের বাড়ীরই ঝি হতাম, পাণ সাজতাম না ? কি ধরন,
আপনি যদি আমার মনিব বাড়ীতে বেড়াতে যেতেন, তারা পাণ
দিত, খেতেন ত ? সেও ত আমার সাজা পাণ। তবে শূদ্রের
ঘরে নারায়ণ শিলে থাকলে, ব্রাহ্মণেরা প্রণাম করে না।
স্থান মাহিত্র একটা আছে বৈকি !—আচ্ছা তবে সিগারেট
খান।”

বলিলাম, “দরকার নেই, থাক্।”

“বাজে সিগারেট নয় বাবু, ভাল সিগারেট—কাঁচি মার্কা—আম
আপনার জন্তেই কিনে রেখেছি। ভদ্রনোকেরা কাঁচি খায় তা কি

“আর আমি জানিনে?” বলিতে বলিতে সে কুলুঙ্গি হইতে এক প্যাকেট কাঁচি সিগারেট পাড়িয়া আমার কাছে রাখিল।

আমি বলিলাম, “সত্যি আমি সিগারেট খাই নে। আচ্ছা, তুমি দুঃখিত হবে, একটা পাণই বরং সেজে দাও।”

ঝি পিতলের ডাবর লইয়া পাণ সাজিতে বসিল।

আমি তাহাকে জিজ্ঞাসা করিলাম, “প্রবোধ বাবুর বাড়ীতে কতদিন আছ?”

“অনেক দিন।”

“কি কায করতে হয় সেখানে তোমায়?”

“বাবুর বিয়ে না হওয়া পর্য্যন্ত আমি দেশে বাবুদের বাড়ীতে ছিলাম। সেখানে সব কাযই করতে হত। বাবুর বিয়ের পর, দেশ থেকে আমি এখানে এসেছি। এখানে আমি কেবল বউগিল্লীর ঘরের সব কায করি, আর তাঁকে আগলাই। অল্প সব কাযের জন্তে অল্প ঝি আছে। আপনার সঙ্গে আমাদের বউমায় আগে থেকে চেনাওনো ছিল, নয় বাবু?”

ভাবিলাম, সর্বদা কাছে থাকে, শৈল হয় ত কোনও দিন প্রসঙ্গক্রমে আমার কথা উল্লেখ করিয়াছে। একটি দীর্ঘনিশ্বাস ফেলিয়া বলিলাম, “তা ছিল বৈ কি।”

ঝি বলিল, “ওঃ, বুঝেছি তা হলে।”

আমি সবিস্ময়ে জিজ্ঞাসা করিলাম, “কি বুঝেছ ঝি?”

ঝি প্রথমে একটু হাসিল। একটা এনামেলের ছোট পিরিচে ছইট সাজা পাণ আমার সম্মুখে রাখিয়া বলিল, “খান।” অল্প

একটি পাণ আলগোছে নিজের মুখে ফেলিয়া, একটি টিনের কোট-হাতে লইয়া আমাকে জিজ্ঞাসা করিল, “দোক্তা নেবেন?” আমি অসম্মতি জানাইলে, সে নিজে কিঞ্চিৎ দোক্তা খাইয়া বলিল, “তা, আমায় কি কথা জিজ্ঞাসা করবার জন্তে নিরিবিলিতে দেখা করতে চেয়েছিলেন বাবু?”

আমি বলিলাম, “তোমাদের বউগিন্নীর খবর বার্তা সব জানবার জন্তে আমার মন বড় ব্যাকুল হয়েছিল, তাই তোমার সঙ্গে নিরিবিলিতে দেখা করতে চেয়েছিলাম। আচ্ছা, একটা কথা জিজ্ঞাসা করি, তোমার বাবু হঠাৎ মধুপুর থেকে চলে এলেন কেন? প্রথমে শুনেছিলাম, কালী পূজো অবধি থাকিবেন।”

ঝি মাটির দিকে চাহিয়া নীরবে হাসিল। বলিল, “সে আর আপনার শুনে কাষ নেই!”

“কেন ঝি, শুনে কাষ নেই কেন?”

ঝি মুখ তুলিয়া বিনীতভাবে বলিল, “আমি ধরুন, সে বাড়ীর ঝি; আমার কি উচিত ঘরের কথা প্রকাশ করা? তা ছাড়া, যে কথা শুনে পিঠিমীতে কারু কোন উপকার হবেনা, মনের আপসোস বাড়বে বৈ কমবে না, নেবা আশুন অলে উঠবে, সে কথা শুনে লাভ? ওসব এখন—আপনাদের—মন থেকে মুছে ফেলাই উচিত।”

ঝির কথাগুলি মনে মনে আমি আলোচনা করিতে লাগিলাম। ‘আপনাদের’ শব্দটি সে ব্যবহার করিয়াছে; আমারও উচিত—এবং তাহারও উচিত—সে সব কথা মন হইতে মুছিয়া ফেলা, ইহাই

বির উপদেশ। বিকে সেই কথাটা স্পষ্ট ভাবে জিজ্ঞাসা করিব কি না তাহাই চিন্তা করিতে লাগিলাম।

আমি অবনতমুখে এই সকল কথা ভাবিতেছিলাম, সহসা বির কণ্ঠস্বরে চমকিয়া উঠিলাম—“কেন মিছে মন খারাপ করেন বাবু? সে সব আশা ত্যাগ করুন।”—পরক্ষণেই আমার রক্তটা চন্ ককিয়া গরম হইয়া উঠিল। কি আশ্চর্য্য, বি কি মনে করিয়াছে, আমি ইতরজনোচিত কোনও “আশা” সফল করিবার অভিপ্রায়ে তাহার সহায়তা-প্রার্থী হইয়া এই খোলার ঘরে উপস্থিত হইয়াছি? আমি গর্কভরে, একটু তীক্ষ্ণ স্বরে বলিলাম, “তুমি ভুল বুঝা না বি, আমার মনে কোনও কুমৎলব নেই। আমি তাকে ভালবাসি, কিন্তু সে অতি পবিত্রভাবে। তার সঙ্গে, তার বিয়ের ৫৬ মাস আগে থেকেই আমার দেখাশুনো বন্ধ আছে। তার কথা শোনবার জন্তে আমার মনটা বড়ই ব্যাকুল হয়েছিল, তাই তোমার সঙ্গে দেখা করতে এসেছি। অল্প কোনও উদ্দেশ্য নেই।”

বি বলিল, “আরে রাম রাম! আমিও সেভাবে বলিনি। শুধু এই বলেছি, যা হবার তা হয়ে গেছে, সে সব কথা ভেবে এখন আত্মাকে মিছে কষ্ট দেওয়া কেন? তা বেশ ত, আপনি কি জানতে চান জিজ্ঞাসা করুন, আমি যা জানি বলছি।”

কিন্তু আমার রাগটা তখনও পড়ে নাই। জিজ্ঞাসা করিবার কোনও কথা খুঁজিয়া না পাইয়া শুধু বলিলাম, “সে ভাল আছে ত?”

“হ্যাঁ, এখন ভালই আছেন।”

“বেশ। তা হলে এখন উঠি”—বলিয়া আমি দাঁড়াই।
উঠিলাম।

ঝি বলিল, “এখনি চলেই?”

“হ্যাঁ”—বলিয়া পকেট হইতে দুইটি টাকা বাহির করিয়া তাহার
বিছানায় রাখিয়া বলিলাম, “তোমার ছেলেকে সন্দেশ কিনে
দিও।”

ঝি মুচকি হাসিয়া বলিল, “ছেলেকে? ছেলে কোথা পাব
বাবু? আমার কি ছেলে আছে?”

“ওঃ। আচ্ছা, তোমার ভাইকে, কি যাকে হোক কিনে দিও।”

ঝি আমার মুখপানে ক্ষণকাল চাহিয়া বলিল, “বাবু, আপনি
কি রাগ করে চলেই?”

“না না, রাগ কিসের?”

“দেখুন, আমরা ইলাম মুখ্য স্ত্রী গেষ্টমাষ্টার! আমরা কি কথা
জানি? কি কথা বলতে কি কথা বলে ফেলি; তায় কি রাগ
করতে আছে?”

এইবার আমার মনটা একটু নরম হইল। বলিলাম, “না ঝি,
রাগ করিনি।”

“আচ্ছা, আবার কবে আসবেন বলুন।”

“আবার শীঘ্রই একদিন আসবো।”

“এই সময়, বুঝেছেন। বারোটা বাজলেই আমি মনিব বাড়ী
থেকে বেরুই। আপনি বরঞ্চ সোজা এই বাড়ীতেই আসবেন,
রাস্তাপথে আর দেখা করে কাষ নেই।”

“আচ্ছা, তাই আসবো।”—বলিয়া আমি কলেজে ফিরিয়া গেলাম। প্রকৃতির বন্দোবস্ত করিয়া গিয়াছিলাম, সুতরাং হাজিরার কোনও ব্যাঘাত হয় নাই।

রাত্রি ১০টায় এ ডায়েরি লিখিতে বসিয়াছিলাম, এখন প্রায় ১২টা বাজে। খানিক ভাবিতেছি, খানিক লিখিতেছি। বির অনেক আবোলতাবোল বাজে কথার মধ্যে দুইটি কথা প্রণিধানযোগ্য। ১ম—মধুপুর হইতে উহাদের অকালে তিরোধানের কারণ আমার শ্রবণযোগ্য নহে; তাহাতে আমার আপশোস বাড়িবে বৈ কমিবে না। ২য়—সে সব এখন আমাদের মন থেকে মুছে ফেলাই ভাল। তবে, তাহারও মনে মুছিয়া ফেলিবার যোগ্য জিনিষ আছে। মোছা কি যায় পাগলী? মুছিতে গেলে যে বুক ভাদিয়া যায়! যাহা হউক, মধুপুরে শাড়ী-সঙ্কেতে মনে যে আশার অঙ্ক-রোদগম হইয়াছিল; আজ বির কথায় তাহা পত্রশোভিত হইয়া উঠিল। ‘পত্র’—পল্লব অর্থেই লিখিয়াছি; কিন্তু এখন মনে হইতেছে, বির হাতে আমি যদি তাহাকে পত্র অর্থাৎ চিঠি পাঠাই, এবং সে আমাকে ঐ উপায়ে পত্র লেখে, তাহা হইলে যথার্থই আমাদের প্রেমতরু পত্রশোভিত হয়।

২২শে অগ্রহায়ণ।

আজ আবার বামা বির সহিত সাক্ষাৎ করিতে গিয়াছিলাম—তাহার নাম বামাসুন্দরী। শৈলর অনেক গল্পই সে করিল। বেশ স্পষ্টই বুঝিতে পারিতেছি, শৈলও আমার স্বতিকে তাহার অন্তরের

অন্তস্তলে গোপন করিয়া রাখিয়াছে। চিঠি পাঠাইবার প্রস্তাব করিলাম, কিন্তু বামা ত রাজি হয় না। বলে, “বউগিন্নীর সঙ্গে সেভাবের কোন কথা ত আজ পর্য্যন্ত আমার হয় নি ; চিঠি দিতে গেলে যদি তিনি রেগে চেষ্টা করে হিতে বিপরীত করে বসেন !” ঠিক বটে ! মনে যার যাই থাকুক, অল্প কাহারও কাছে ধরা পড়িয়া গেলে ত সেটা সুখের হয় না। আমি অনেক পীড়াপীড়ি করিতে অবশেষে বলিল, “আচ্ছা, আগে বেড়া নেড়ে গৃহস্থের মন বুঝে দেখি।”—অর্থাৎ আমার ২১টি কথা সে তাহার কাছে বলিয়া দেখিবে। আগামী পুরুষ দ্বিপ্রহরে আবার আমায় যাইতে বলিয়াছে।

২৪শে অগ্রহায়ণ।

আজ গিয়াছিলাম ; ঝি বলিল, গতকাল বিকালে কোশলে আমার নাম তাহার নিকট সে পাড়িয়াছিল। শৈল কাঁদিয়াছে, কিন্তু রাগ করে নাই। চিঠির কথা পাড়িতে সাহস হয় নাই, আজ কিংবা কাল সুবিধামত সে কথা পাড়িবে।

২৫শে অগ্রহায়ণ।

চিঠির কথা ঝি পাড়িয়াছিল ; সে আংশিকভাবে রাজি হইয়াছে, অর্থাৎ আমি চিঠি লিখিব, কিন্তু সে লিখিবে না— তাহার যাহা বক্তব্য তাহা ঝির মুখে বলিয়া পাঠাইবে মাত্র। সে বলিয়াছে, “তিনি অবিবাহিত, সুতরাং তিনি যাহা ইচ্ছা

তাহা করিতে পারেন। কিন্তু আমি এখন পরস্বী, আমার কি উচিত চিঠি লেখা !” আচ্ছা, আপাততঃ তাহাই হইবে—শনৈঃ পন্থা।

২৭শে পৌষ।

চিঠি ত একে একে অনেকগুলিই লিখিলাম; উত্তর ত একখানিরও মিলিল না। বীর মুখে উত্তর যাহা পাই তাহাতে কিছুমাত্র পরিতৃপ্তি হয় না; অথচ বখশিশ আকারে এই একমাসে চিঠির মাণ্ডলও দিলাম অনেক টাকা। ঝি বেটি আমার সঙ্গে চাতুরী করিতেছে কি না কিছুই বুঝিতে পারিতেছি না। আজ সে বলিয়াছে, আমার সন্দেহ-ভঞ্জনার্থ শৈলর কোন একটা নিদর্শন সে আমাকে আনিয়া একদিন দেখাইবে।

২৯শে পৌষ।

ঝি বলিল, শৈল বলিয়াছে, “তাকে চিঠি লিখি সে কি আমার অসাধ, কিন্তু আমি যে পরস্বী! তবে তাঁর সন্তোষের জন্তে এই একখানা কাগজে আমার নামটি লিখে দিচ্ছি, এইটি তাঁকে দিও।” এক টুকরা শাদা ফুলস্বাপ কাগজে লেখা রহিয়াছে, শ্রীমতী শৈলজাসুন্দরী গুপ্তা। বড় হইলে শৈলর হাতের লেখা আমি কখনও দেখি নাই—লেখাটি আমার চোখে এমন সুন্দর লাগিতেছে! যেন প্রায় পুরুষ মানুষের লেখা। হইবে না কেন, সে ত বোধোদয় পড়িয়া মা সরস্বতীর নিকট বিদায় লয় নাই; অনেক বয়স অবধি ইস্কুলে রীতিমত লেখা-

পড়া করিয়াছে। পাইয়া অবধি কাগজখানি অমূল্য নিধির মত আমি বুকে করিয়া রাখিয়াছি। কতবার যে সেখানি পড়িয়াছি বলিতে পারি না। ঝি আরও বলিল, কাগজখানি লিখিয়া দিদা স্বর বর করিয়া কাদিতে কাদিতে শৈল উঠিয়া গিয়াছিল। কথাটা শুনিয়া অবধি আমি ভাবিতেছি, এ কান্নার অর্থ কি? ইহার একমাত্র অর্থ যাহা আমার মনে হইতেছে তাহা এই— যাহাকে সর্ব্বস্ব দিতে পারিলেও তৃপ্ত হইত না, তাহাকে দিলাম কি না, কালির আঁচড় কাটা একটুকরা তুচ্ছ কাগজ! আর কিছু দিবার অধিকার আমার নাই!

অধিকার আছে শৈল, সবই দিবার অধিকার তোমার আছে। কিন্তু তুমি তাহা বুঝিবে কি? আমি কয়েকখানি আধুনিক বাঙ্গালা উপন্যাস পড়িয়াছি, তাহাতে লেখকগণ স্পষ্টই দেখাইয়াছেন, মৃদু পড়িয়া বিবাহ করিলেই যথার্থ বিবাহ হয় না; পরস্পরে প্রতি প্রেম থাকিলে তাহাই আসল বিবাহ। যে নরনারী প্রেমের বন্ধনে আবদ্ধ নহে, কেবলমাত্র লৌকিক বিবাহের বন্ধনই যাহাদের মধ্যে একমাত্র বন্ধন, তাহাদের পরস্পর সাহচর্য্যকে একটা অতি কদর্য্য আখ্যা দিয়াছেন। প্রেমের মিলনকেই তাঁহারা যথার্থ পবিত্র মিলন বলিয়া মনে করেন। বহিঃশক্তি ঝির হস্তে শৈলকে পাঠাইয়া দিব মনে করিয়াছি; পড়িলে সে বুঝিতে পারিবে, যে যাহাকে যথার্থ ভালবাসে, সে তাহাকে চিঠি লিখিলে কিছুমাত্র দোষের কার্য্য হয় না; বরং যথার্থ ভালবাসার পাত্রকে ত্যাগ করিয়া, অন্যপড়া বিবাহের স্বামীর ঘর করিতে থাকিলেই নারীর অধিকার

খর্ব হয়, নারীত্বের অপমান হয় এবং তাহার শুভ আশা কলকলিগু হইয়া যায়।

৫ই মাঘ।

আজ কয়েকখানি বাঙ্গলা উপন্যাস ও মাসিক পত্র বিক্র হস্তে শৈলকে পাঠাইয়াছি।

১০ই মাঘ।

বহিগুলি পড়িয়া শৈল বলিয়াছে বেশ বহি। আরও বহি চাহিয়াছে। আজ ঝিকে বিশেষ করিয়া বলিয়া দিয়াছি, শৈলর সঙ্গে একটবার আমি দেখা করিতে চাই—আমার প্রাণ বড়ই ব্যাকুল হইয়াছে। যদি কোনও নিভৃত স্থানে দশ পনেরো মিনিটের জন্তও একবার তাহার দেখা পাই, দুইটা কথা কহিতে পাই, তবে প্রাণে অনেকটা শান্তি পাই। ঝি বলিল, সে বলিয়া দেখিবে, কিন্তু শৈল এ প্রস্তাবে সম্মত হয় কি না খুব সন্দেহ।

১৪ই মাঘ।

ঝি বলিল, শৈল কিছুতেই রাজি হইতেছে না। বলিয়াছে আমরা মনে মনে দুজনে ত দুজনাই আছি, এ জন্মে ইহার অধিক আর কিছুই হইবার নয়। আজ শৈলকে একখানি খুব ভাল উপন্যাস পাঠাইয়া দিয়াছি। ইহাতে লেখক অকাট্যভাবে

প্রমাণ করিয়াছেন, (প্রেমহীন বিবাহের স্বামীর প্রতি বিশ্বাস ও সতীত্ব রক্ষার প্রবৃত্তি, নারীচিত্তের একটা সেকেন্দ্রে অন্ধ কুসংস্কার মাত্র।)

২২শে মাঘ।

নারীর অধিকার, বিবাহ বন্ধনের কুসংস্কার, প্রেমের স্বাধীনতা প্রভৃতি সম্বন্ধে নব্যমতের সমর্থক বাঙ্গলা উপন্যাস পড়িয়া পড়িয়া এতদিনে শৈলর মন ফিরিয়াছে। সে আমার সহিত একবার সাক্ষাৎ করিতে রাজি হইয়াছে। তবে আমার নির্দিষ্ট স্থানে সে আসিবে না; স্থান সে নিজে নির্বাচন করিবে। কোনও একটা উপায় স্থির করিতে পারিলেই সে আমায় জানাইবে।

সে ত রাজি হইয়াছে, কিন্তু তাহার সহিত আমার গোপনে সাক্ষাৎ করাটা উচিত হইবে কি না, আমি যে কিছুই স্থির করিতে পারিতেছি না। পূর্বোক্ত বহিঃগুলি আর একবার ভাল করিয়া পড়িয়া দেখিতে হইবে। যুক্তিতে বেশ বুঝিতে পারি যে এ কার্য কিছুমাত্র অগ্ৰায় নহে, কিন্তু জনগত সংস্কার এমনি জিনিষ, তাহার প্রভাব কিছুতেই কাটাইয়া উঠিতে পারা যায় না। এইখানেই স্ত্রীলোক ও পুরুষে প্রভেদ। যে প্রথমে আমায় চিঠি পর্যালোচনা লিখিতে অত আপত্তি করিয়াছিল, সে আজ আমার সঙ্গে গোপনে দেখা করিতে প্রস্তুত; আর আমি, গোড়ায় পাদ্রীগিরি করিয়া, কত কষ্টে তাহাকে জপাইলাম, কিন্তু শেষ

পৈঠায় পৌছিয়া জলে ঝাঁপ দিবার পূর্বে আমিই ইতস্ততঃ করিতেছি। আসল কথা, স্ট্রীলোকেরাই যথার্থ একষ্ট্রীমিষ্ট; আমরা পুরুষরা মডারেট হইয়া—তুই নৌকায় পা দিয়া—মারা গেলাম।

১৭ই ফাল্গুন।

ঝি বলিল, শনিবার বিডনস্ট্রীটের কোনও গৃহে একটা বিবাহ আছে, শৈল সেখানে নিমন্ত্রিত। সন্ধ্যার পূর্বেই সেখানে সে যাইবে—অবশ্য বাড়ীর গাড়ীতে। রাত্রি দশটায় মোটর আবার শৈলকে আনিতে সেখানে যাইবে। ঐ দিন সন্ধ্যায় ঠিক সাড়ে-সাতটার সময়, হেডয়ার পূর্ব দক্ষিণ কোণে ফুটপাথে আমায় দাঁড়াইয়া থাকিতে হইবে। বিডন স্ট্রীটের দিক হইতে একখানি ট্যাক্সি আসিয়া সেখানে দাঁড়াইবে; সেই গাড়ীতে নীলাধরী বারাণসী শাড়ী পরিহিতা একজন মহিলা থাকিবেন, এবং ঝিও থাকিবে। ঝি নামিয়া আমায় সঙ্কেত করিলেই আমি ট্যাক্সিতে উঠিয়া পড়িব। ট্যাক্সিতে যতক্ষণ থাকিব, শৈলর সহিত আমি একটুও কথা কহিতে পাইব না; কথা কহিলে, হিতে বিপরীত হইবে। সহরের বাহিরে কোনও নির্জন স্থানে সেই ট্যাক্সি আমাদের লইয়া যাইবে। কোথায় যাইতে হইবে ইত্যদি পূর্বেই ঝি ট্যাক্সিওয়ালাকে উপদেশ দিয়া রাখিবে। সেখানে, ঘড়ি ধরিয়া অর্দ্ধ ঘণ্টা কালমাত্র সেই শাড়ীধারিণীর সহিত আমি কথোকথন করিতে পারিব। তাহার পর ট্যাক্সি ফিরিয়া, হেডয়ার সেই

কোণে দাঁড়াইবামাত্র ট্যান্সি হইতে আমায় নামিয়া যাইতে হইবে
ঝি সেখানে উপস্থিত থাকিবে।

ঝিকে জিজ্ঞাসা করিলাম, “তুমি সে ট্যান্সিতে যাবে
না?”

“না। আমি সঙ্গে থাকলে আপনাদের কথাবার্তায় কি
সুবিধে হবে? আমার না থাকাই ভাল।”—বলিয়া সে আমার
প্রতি একটি বক্র কটাক্ষপাত করিল।

জিজ্ঞাসা করিলাম, “সে জায়গাটা কোথায়?”

ঝি বলিল, “তা বউ গিল্লী, এখনও আমায় বলেন নি। সেইদিন
আমায় জানাবেন। তবে বলেন, স্থানটি খুব নির্জন, কোনও বাধা
বিল্লের ভয় সেখানে নেই।”

কিন্তু আমার মনে একটু সন্দেহ উপস্থিত হইল। কি জানি,
ইহার ভিতর কোনও দাগাবাজি নাই ত? আমাকে বিপদে
ফেলিবার জন্ত ইহা একটা ফাঁদ নয় ত? আমি ঝিকে বলিলাম,
“দেখ, ও ভাবে ট্যান্সিতে উঠে কলকাতার বাইরে যেতে আমার
কিছুমাত্র আপত্তি নেই; কিন্তু আমি শুধু তোমার মুখের কথার
উপর নির্ভর করতে পারিনে।”

“কিসে নির্ভর করতে পারেন?”

“শৈল নিজে হাতে আমায় চিঠি লিখলে আমার মনে আর
কোনও সন্দেহ থাকে না।”

ঝি একটু ভাবিয়া বলিল, “কিন্তু, তিনি কি চিঠি লিখতে রাজি
হবেন?”

আমি বলিলাম, “তার হাতের চিঠি না পেলে আমি কিন্তু যাঁব না, একথা তাকে বোলো।”

বি বলিল, “আচ্ছা, বলে দেখি; তিনি কি বলেন। আপনি কাল একবার—উহঁ, পশু—পশু ত শুক্রবার? পশু একবার আসবেন। তিনি কি বলেন, আপনাকে জানান।

১৯শে ফাল্গুন।

শৈল আমায় চিঠি লিখিয়াছে। প্রিয়তম কিংবা প্রাণেশ্বর এরূপ কোনও সম্ভাষণ তাহাতে নাই। কেবল মাত্র লেখা আছে—

“শনিবার সন্ধ্যা ৭টায়া হেড়য়ার পূর্ব দক্ষিণ কোণে ফুটপাথে দাঁড়াইয়া থাকিও। আমি ট্যান্ডিতে আসিয়া তোমায় তুলিয়া লইয়া যাইব।

শ্রীমতী শৈলজামুন্দরী ঞুপ্তা।”

শৈলর সেই নাম স্বাক্ষরযুক্ত ফুলফ্যাপ কাগজের টুকরাটি বাহির করিয়া, হাতের লেখা মিলাইয়া দেখিয়াছি—সেই লেখা, সেই টান—কোনও প্রভেদ নাই! এখানি তাহারই স্বহস্ত লিখিত লিপি তাহাতে আর সন্দেহ নাই।

হৃদয়! তুমি শান্ত হও—সুখের আতিশয্যে ফাটিয়া যাইও না। আজ এখন রাত্রি ৯টা—আর ২২ ঘণ্টা। এ ২২ ঘণ্টা কি করিয়া কাটাঁইব জানি না। দেহ ক্ষণে ক্ষণে পুলকে শিহরিয়া উঠিতেছে। আত্মাদে পাগলের মত হইয়াছি। কত আশা, কত কল্পনাই যে মনোমধ্যে উদ্ভিত হইতেছে!

২৯শে ফাল্গুন ।

দশদিন ডায়েরি ছুঁই নাই—এ ডায়েরি রাখিবার আর আবশ্যকতা নাই—এ পৃথিবী যদি এই মুহূর্তে রসাতলে যায় তাহাতেও আমার কিছুমাত্র আপত্তি নাই ।

সেই শনিবারের কাল-সন্ধ্যায়, যথাসময়ে আমি হেড়য়ার পূর্ব দক্ষিণ কোণে ফুটপাথে গিয়া দাঁড়াইয়া ছিলাম । বিডন ষ্ট্রীটের দিক হইতে ট্যাক্সিও আসিয়াছিল, তাহাতে নীলাক্ষরী বারাগসী পরিয়া একজন বসিয়াও ছিল, বিটাও নামিয়া ছিল, আমিও ট্যাক্সিতে উঠিয়া বসিয়াছিলাম । ট্যাক্সি তখন কর্ণওয়ালিস ষ্ট্রীট দিয়া, ধর্মতলা পার হইয়া, গড়ের মাঠের দিকে ছুটিল । ইডেন গার্ডেনের কাছাকাছি গিয়া ইচ্ছা হইয়াছিল বলি, “এই রাগানেই নামা যাক এস, বেশ নিরিবিলি পাওয়া যাবে।” কিন্তু গাড়ীতে কথা কহিতে বারণ, পাছে হিতে বিপরীত হয়, এই আশঙ্কায় নীরব রহিলাম । ট্যাক্সি গঙ্গার ধার দিয়া খিদিরপুর অভিমুখে ছুটিল । তাহার পর, কোথা দিয়া কোথায় যে গেল আমি কিছুই নির্ণয় করিতে পারিলাম না । ওদিকটা আমি একেবারেই চিনি না । ক্রমে দেখিলাম, দুই ধারে খোলা মাঠ রাখিয়া ছুটিতেছি । সরকারী পাকা রাস্তা, কিন্তু একেবারে নির্জন,—রাস্তার পার্শ্বে আলোকস্তম্ভও নাই । ট্যাক্সি আর থামিতে চাহে না । অল্পমান হইল, প্রায় এক ঘণ্টা কাল আমরা ছুটিতেছি । অবশেষে ট্যাক্সি একটা বাগানের ফটকের কাছে থামিল । ভিতরে একটা বাগান বাড়ীর মত দেখা গেল, গাড়ী বারান্দায় আলো জলিতেছে । সে নামিয়া

নিম্নস্বরে আমায় বলিল, “আমুন।”—আমি কম্পিত বক্ষে নামিয়া তাহার অনুসরণ করিলাম। বাড়ীটার বারান্দায় উঠিবামাত্র নীল শাড়ী মুহূর্ত্ত মধ্যে অপস্থত হইল ; সভয়ে দেখিলাম, শিকারের খাকী পোষাক পরা পুরুষ মূর্ত্তি,—স্বয়ং প্রবোধ গুপ্ত—হস্তে চাবুক।

দেখিয়া, আমার মাথাটা বন বন করিয়া ঘুরিয়া উঠিল। পড়িয়া যাইবার ভয়ে আমি দেওয়াল ধরিলাম। বেশ বুঝিতে পারিলাম, ঐ শয়তানী এই বিশ্বাসঘাতকতা করিয়াছে।

প্রবোধ তখন মালী মালী বলিয়া চীৎকার করিতে লাগিল। মালী আসিয়া কক্ষদ্বার খুলিয়া, ভিতরে আলো জালিয়া দিল। প্রবোধ কঠোর স্বরে আমায় বলিল “এস।” মালীকে বলিল, “তুম্‌ আভি যাও।”

আমি কম্পিত পদে ভিতরে প্রবেশ করিলাম। দরজায় বন্ধ করিয়া, একটা চেয়ারে বসিয়া প্রবোধ বলিল, “কি প্রেমিকবর ? প্রেম করবে ?”

আমার মুখ দিয়া কথা সরিল না। আমায় কাঁপিতে দেখিয়া বলিল, “বস।”

আমি একটা চেয়ারে বসিলাম। প্রবোধ বলিল, “পট্টম্বর জীর প্রতি লোভ করলে, কি দণ্ড শাস্ত্রে বিহিত আছে জান ? নাসিকা ও কর্ণচ্ছেদন।”—বলিয়া পকেট হইতে একটা বৃহৎ শিকারীর ছুরী (hunting knife) বাহির করিয়া তাহার ফলা খুলিল।

দেখিয়া, আমার আত্মপুরুষ শুকাইয়া গেল। আমি কাঁদিয়া উঠিয়া হাত ষোড় করিয়া বলিলাম, “আমায় মাফ করুন, আমার কিছু

দোষ নেই। আপনার স্ত্রীই আমায় চিঠি লিখে ডেকে পাঠিয়ে ছিল।”

প্রবোধ হা হাঃ করিয়া হাসিয়া উঠিল। বলিল, “কৈ সে চিঠি?”

“এই যে”—বলিয়া বুকপকেট হইতে সেই অভিশপ্ত চিঠিখানা বাহির করিয়া আমি প্রবোধ গুপ্তের সামনে ফেলিয়া দিলাম।

প্রবোধ তাহা খুলিয়া বলিল, “তোমার বিশ্বাস, এই চিঠি শৈল তোমায় লিখেছে?—নির্বোধ! এ আমার হাতের লেখা। দেখ।” বলিয়া বুক পকেট হইতে ফাউন্টেন পেন বাহির করিয়া কি লিখিয়া চিঠিখানা আবার আমার সামনে ফেলিয়া দিল। দেখিলাম, যেখানে শৈল স্বাক্ষর ছিল, তাহার নিম্নে দ্বিতীয় স্বাক্ষর হইয়াছে শ্রীমতী শৈলজাসুন্দরী গুপ্তা। একই লেখা।

তখন বুঝিলাম, সেই কুলঙ্কাপের টুকরায় সেই স্বাক্ষরও ইহারই লিপ্ত। ঐ সর্বনাশী প্রথমাবধিই বিশ্বাসঘাতকতা করিয়াছে।

প্রবোধ বলিল, “শোন বলি। ছেলেবেলায় একটি মেয়ের সঙ্গে খেলা করেছ বলেই, বড় হয়ে, বিবাহের পরও, সে মেয়ে—বিশেষ হিন্দুর মেয়ে—তোমার প্রেমে হাবুডবু খাবে এ বিশ্বাস ত্যাগ কর। আমাদের বিবাহের পর, তোমার গল্প শৈল আমার কাছে করেছিল, ঢাকা থেকে ফিরে ইন্ডুলের ঠিকানায় তুমি তাকে যে চিঠি লিখেছিলে—যদিও সে চিঠি সে দেখেনি—সে চিঠির কথাও আমাকে বলেছিল। তারপর মধুপুরে বেড়াতে বেরিয়ে একদিন

আমায় বলেছিল, এই যে লোকটি গেল, ঐ সেই নির্মল। নির্মলের মনে যে এত মলা, তখনও আমি বুঝতে পারিনি। ভেবেছিলাম, পাচজনের মত তুমিও মধুপুরে পূজোর ছুটিতে শুধু বঝি বেড়াতেই এসেছ। তারপর পূজোর নিমন্ত্রণের সঙ্গে তোমার সেই প্রেমের চিঠি শৈল আমায় দেখালে। সে প্রথমে রাজি হয়নি, আমারই পীড়াপীড়িতে সে বিজয়া দশমীর বিকালে নীলাঙ্করী বারাগসী পয়ে বেড়াতে বেরিয়েছিল। আমি শুধু একটু আমোদ করবার জন্তেই শৈলকে দিয়ে ঐ কাণ্ডটি করিয়েছিলাম। তার পর সাহস পেয়ে পাছে তুমি আর কোনও রকমে তাকে বিরক্ত কর, এই ভয়ে, তারই অনুরোধে, পরদিন আমরা মধুপুর ত্যাগ করি। তার পর, তুমি কলকাতায় এসে বির সঙ্গে দেখা করলে। ঐ বির মা, আমার মায়ের ঝি ছিল, এখন ও আমার জ্বরী ঝি, অত্যন্ত বিশ্বাসী, সে এসে প্রথম দিনই তোমার সব কথা আমাদের ছুজনের কাছে প্রকাশ করে। তুমি বির হাতে যে সমস্ত চিঠি পাঠাতে, ঝি আমাকে নিয়ে গিয়ে দিত। আমি কোন কোন দিন আমোদ করে শৈলকে পড়ে শোনার চেষ্টা করতাম, কিন্তু সে কিছুতেই শুনত না, ছুটে পালিয়ে যেত। তার পর আজকের এ ব্যাপারের পরামর্শ শুনে শৈল আমায় জিজ্ঞাসা করেছিল, তাকে কি সাজা দেবে? আমি বলেছিলাম, শাস্ত্রেই আছে, এ অপরাধের দণ্ড নাসিকা ও কর্ণ-চ্ছেদন, তাই করব। শুনে সে আমাকে মিনতি করেছে, তা যেন আমি না করি। সুতরাং এ যাত্রা তোমার নাক কাণ বেঁচে গেল। কিন্তু সাবধান, ফের যদি কখনও তুমি আমাদের জিসীমানায়

আস, তবে তোমার নাক কাণ আমি নিশ্চয়ই কেটে নেবো। আজ তোমাকে, পরজীবীর পানে পাপচক্ষে চাইতে নেই এই উপদেশটি শিক্ষা দেবার জন্তে, একবল ঘা কতক চাবুক মেরে বিদায় করব।” —বলিয়া সে উঠিয়া দাঁড়াইয়া চাবুক হাতে লইল। আমার প্রতি ঘূর্ণিত লোচনে চাহিয়া, বজ্রগন্তীর স্বরে বলিল, “উঠে দাঁড়াও।”

আমি তৎক্ষণাৎ চেয়ার ছাড়িয়া উঠিলাম, কিন্তু দাঁড়াইলাম না। এক লম্ফে দরজার নিকট গিয়া, তাহা খুলিয়া, বারান্দা হইতে বাগানে লাফাইয়া পড়িয়া শ্বাশপণে ফটকের দিকে ছুটিলাম। ফটক হইতে বাহির হইয়া, সেই অন্ধকার পথে উর্দ্ধ্বাসে ছুটিলাম। কিয়ৎদূর গিয়া পথে হৌচট খাইয়া পড়িয়া গেলাম; কাপড় ছিঁড়িয়া গেল, শরীরে রক্তপাত হইল, একপাটি জুতা ছিটকাইয়া কোথায় গিয়া পড়িল। উঠিয়া ভাবিলাম, ট্যান্ডিতে প্রবেশ যদি আমায় ধরিতে আসে? তৎক্ষণাৎ অপর জুতাপাটি খুলিয়া ফেলিয়া, রাস্তা হইতে নামিয়া, খোঁড়াইতে খোঁড়াইতে মাঠের ভিতর প্রবেশ করিলাম। সাপে খাইবে কি বাঘে খাইবে তখন সে জ্ঞান আমার কিছুমাত্র ছিল না। কি একটা বড় গাছ দেখিয়া, তাহার গুঁড়ির আড়ালে চূপ করিয়া দাঁড়াইয়া রহিলাম।

কিয়ৎক্ষণ পরে দেখিলাম, বাগানের দ্বিক্ হইতে একখানা মোটর আসিয়া কলিকাতা অভিমুখে চলিয়া গেল। আমি তখন নয় পদে খোঁড়াইতে খোঁড়াইতে রাস্তায় আসিয়া আবার পথ চলিতে লাগিলাম। দেহ অবদন—চলি, আবার পথে বসি। এ

কোন স্থান, কলিকাতা হইতে কত দূর আসিয়াছি, কিছুই জানি না। বিশ্রাম করিয়া, আবার উঠিয়া অন্ধকারে পথ চলি।

এইরূপে ক্রমে রজনী প্রভাত হইলে, একখানি গ্রাম পাইলাম। শুনিলাম সেখান হইতে কলিকাতা হাঁটা পথে সাত ক্রোশ,—দুই মাইল দূরে স্টেশন আছে, সেখান হইতে রেল কলিকাতা যাওয়া যায়। টাকা পয়সাও সঙ্গে নাই যে স্টেশনে গিয়া টিকিট কিনিয়া বাড়ী আসিব। গত কল্য সন্ধ্যায় বাড়ী হইতে বাহির হইবার সময় এমন উন্মত্ত হইয়াছিলাম যে, মানিব্যাগটিও সঙ্গে লইতে ভুল হইয়া গিয়াছিল।

ক্ষুধায় পেট জলিতেছে। পা কটিয়াছে, ফুলিয়াছে, ব্যথায় আড়ষ্ট—চলিবার শক্তি নাই। তবু প্রাণের দায়ে, গ্রামের বাজারে ভিক্ষা করিয়া কিছু খাইয়া, ঘণ্টা দুই বিশ্রাম করিয়া আবার পথ চলিতে লাগিলাম। দ্বিপ্রহরে আর একটা গ্রাম পাইলাম। সেখানেও ভিক্ষা করিয়া কিছু খাইয়া, সন্ধ্যার সময় খিদিরপুরে পৌছিলাম।

বাড়ী পৌছিতে রাত্রি আটটা বাজিল। সেখানে পিতামাতার নিকট, দস্যুহস্তে পতিত হওয়ার যে কাল্পনিক কাহিনী বলিলাম, সেটা তাঁহারা বিশ্বাস করিলেন না; তবে সারারাত ও সারাদিন উৎকণ্ঠায় যাপন করার পর, আমাকে পাইয়া তাঁহারা ক্রোধ ভুলিয়া গেলেন। মা স্বহস্তে আমার গা মুছাইয়া ভাত বাড়িয়া খাইতে দিলেন। রাত্রেই কম্প দিয়া জ্বর আসিল। তিন দিন তিন রাত্রি জ্বর ঘোরে অচেতন ছিলাম। পশু হইতে জ্বর ছাড়িয়াছে। আজ কটি খাইয়াছি।

অলকা

কলিকাতার কোনও ছাত্রাবাসের একটি কক্ষে একদিন অপরাহ্নকালে বিনোদবিহারী নামক একটি যুবক তাহার কেওড়া কাঠের তক্তপোষ খানির উপর চিৎ হইয়া পড়িয়া উর্দ্ধদৃষ্টিতে কড়ি কাঠ গণনা কার্যে ব্যাপ্ত ছিল। পার্শ্ববর্তী কক্ষের ঘড়িতে টং টং করিয়া চারিটা বাজিল। ভৃত্য আসিয়া ঘরে ঘরে বাবুদের নিকট হইতে জলখাবারের ফরমাস ও পয়সা লইতে লাগিল; কিন্তু বিনোদের নিকট সে আসিল না; কারণ মাসখানেক হইতে, “অম্বল” হওয়ার অছুহাতে বাজারের খাবার খাওয়া সে ছাড়িয়া দিয়াছে।

সাড়ে চারিটা বাজিলে ভৃত্য খাবার লইয়া আসিল। অস্ত্রান্ত্র ছাত্রেরা খাবার খাইতে লাগিল; কেহ কেহ তরুপরিচা পান করিতে প্রবৃত্ত হইল। “পাণ নিয়ে আয়,” “সোরাইয়ে জল রাখিস্‌নি!” প্রভৃতি শব্দে বাসা মুখরিত হইয়া উঠিল। কিন্তু বিনোদ সেই ভাবেই শুইয়া আছে। শুইয়া শুইয়া সে কেবল আকাশ পাতাল চিন্তা করিতেছে।

বেচারী বিনোদ বড়ই বিপন্ন। তাহার বাড়ী কুমিল্লা জেলার

কোনও গ্রামে। আজ প্রায় দুইমাস কাল তাহার বাড়ী হইতে না আসিয়াছে টাকাকড়ি, না কোনও চিঠিপত্র। যা বাপ বাঁচিয়া নাই, খুড়া মহাশয় বাড়ীর কর্তা, তিনি স্থানীয় জমিদারী কাছারীতে দায়েবী-কৰ্ম করেন, অবস্থা ভালই। টাকাকড়ি এতদিন নিয়মিত ভাবেই ত তিনি পাঠাইতেন, হঠাৎ এ কি হইল? পূজার ছুটি হইতে আর দুই সপ্তাহ মাত্র বিলম্ব আছে। কলেজের বেতন দুইমাস বাকী পড়িয়াছে, আগামী কল্য তাহা দাখিল করিবার শেষ দিন,—না পারিলে, সে ‘ডিফল্টার’ হইয়া যাইবে, লেকচারে উপস্থিত থাকিলেও প্রতিদিন তাহাকে ‘অ্যাবসেন্ট’ করিবে, হয়ত পাসপোর্টেজ নষ্ট হইয়া যাইবে। একটা বৎসরই মাটি! মেসের টাকার জন্ত ম্যানেজার বাবু ত নিত্য অর্পমান করিতেছেন। এই দুইমাসে, বন্ধুগণের নিকট ১০।১২ ধার হইয়াছে। ছুটিতে তাহারা বাড়ী যাইবে, জিনিষপত্র কিনিবে, তাহারাও টাকার জন্ত তাগাদা লাগাইয়াছে। বাড়ী নিকটে নয়, তথাপি টিকিট কিনিবার টাকা থাকিলে একবার না হয় খোঁজ লইয়া আসিত যে ব্যাপারটা কি; তাহারও উপায় নাই। গ্রামস্থ দুইজন বন্ধুকেও বিনোদ পত্র লিখিয়াছে, তাহারাও কোনও জবাব দেয় নাই।

পাঁচটা বাজিল। অস্ত্রান্ত ছাত্রগণ কেহ বায়স্কোপ দেখিতে, কেহ গোলদীঘি বা গড়ের মাঠে বেড়াইতে বাহির হইয়া গেল। বিনোদ তখন উঠিয়া, সোরাই হইতে জল ঢালিয়া মুখ হাত ধুইয়া, ঢকঢক করিয়া সেই জল খানিকটা খাইয়া অঠরানল নির্লাপিত

করিতে চেষ্টা করিল। তাহার পর জামাটি গায়ে দিয়া, বাসু হইতে প্রাপ্য পাণ দুইটি মুখে ফেলিয়া বাহির হইয়া গেল। বড় রাস্তায় পড়িয়া সে উত্তরদিকে চলিতে আরম্ভ করিল। তাহাদের গ্রামস্থ এক ভদ্রলোক গোয়াবাগানে থাকিয়া কবিরাজী করেন, বিনোদকে স্নেহচক্ষে দেখিয়া থাকেন; তিনি যদি গোটা কতক টাকা ধার দেন তবে আগামী কল্য কলেজের বেতনটা সে দাখিল করিতে পারিবে। সেই আশাতেই বিনোদের এই অভিযান।

যথাসময়ে সে গোয়াবাগানে কবিরাজ মহাশয়ের বাটীতে উপস্থিত হইল। দেখিল, বৈঠকখানা জনশূন্য। গামছা কাঁধে, অত্যন্ত কৃষ্ণবর্ণ এক ভৃত্য-বালককে দেখিয়া জিজ্ঞাসা করিল, “কবিরাজ মহাশয় বাড়ী আছেন?”

বালক বলিল, “আজ্ঞে না, তিনি অঁচি গিয়েছেন।”

বিনোদ বুঝিতে না পারিয়া জিজ্ঞাসা করিল, “অঁচি? অঁচি কোথা? সেখানে কি জন্মে গেছেন?”

বালক বলিল, “উগী দেখতে গেছেন।”

বিনোদ বলিল, “ওঃ, রুগী দেখতে রঁচি গেছেন? ফিরবেন কবে?”

বালক বলিল, “আজ্ঞে, তা কিছু কয়ে যান নি।”

বিনোদ মনে মনে বলিল—“যাক—এ দফায় তা হলে নিশ্চিন্দ!” একটি দীর্ঘনিশ্বাস ফেলিয়া বৈঠকখানা হইতে নামিল। গলি পার হইয়া বিডন ষ্ট্রীটে আসিয়া পড়িল। সম্মুখেই হেড্‌য়া

খুঁজিগী। অশ্রুমনস্কভাবে, ধীরপদে, সে হেছয়ার তীরে গিয়া উপস্থিত হইল।

হেছয়া তীরস্থ বাগানখানির একটা বিশেষত্ব এই যে, ইহা বহুসংখ্যক পেন্সনপ্রাপ্ত গভর্নমেন্ট কর্মচারীর বৈকালিক বিচরণ-ভূমি। এ সময়ে গোলদীঘির চারিট ধার যেমন ক্ষিপ্ৰগামী কলেজের যুবকগণে ভরিয়া যায়, হেছয়ার তীরদেশে তেমনি মন্থরচরণ বৃদ্ধগণেরই বাহুল্য দৃষ্ট হয়। এখানে ইহারা কিয়ৎক্ষণ পাদচারণে ক্লাস্ত হইলে, কাষ্ঠমঞ্চ-নিয়ন্ত্র বেঞ্চগুলি অধিকার করিয়া বসিয়া পড়েন। বসিয়া নানা প্রসঙ্গের আলোচনায়, নানাবিধ গল্পগুজবে সময় অতিবাহিত করিয়া থাকেন। কোনও দিন বা কোনও দল, নিকটস্থ তিনকড়ি মোদকের দোকান হইতে প্রসিদ্ধ ‘কস্তুরী’ সন্দেশ আনাইয়া সকলে মিলিয়া আনন্দে ভক্ষণ করেন।

বিনোদ কিয়ৎক্ষণ ক্লাস্তপদে এদিক ওদিক একটু বেড়াইল। কিন্তু দেহেও বল নাই, মনেও উৎসাহ নাই;—স্মৃতরাং শীঘ্রই সে একটি বেঞ্চের প্রান্তভাগ খালি পাইয়া বসিয়া পড়িল। সেই বেঞ্চের অপর প্রান্তে বসিয়া একজন বৃদ্ধ ভদ্রলোক, চশমা চোখে দিয়া কি একখানি বহি পড়িতেছিলেন; বিনোদ এক নজর মাত্র তাঁহার পানে চাহিয়া, হেছয়ার নিম্নস্ত্রামল জলরাশির উপর দৃষ্টি বদ্ধ করিয়া রহিল।

দিবালোক ক্রমে ক্ষীণ হইয়া আসিতে লাগিল। বিনোদ-
জলের পানে একদৃষ্টে সেইরূপ তাকাইয়া, আপন সঙ্কটের বিষয়
চিন্তা করিতেছে। ক্রমে তাহার পরলোকগত মাতাপিতাকে
মনে পড়িল। তাঁহার বাঁচিয়া থাকিলে, আজ কখনও এমনভাবে
তাহাকে বিপন্ন হইতে হইত না। পিতা আগে যান; তাহার
পর, এই দুই বৎসর হইল মাতৃদেবীও স্বর্গারোহণ করিয়াছেন।
মার মৃত্যু সময়ে বিনোদ উপস্থিত ছিল; সেই দৃশ্য মনে পড়িবা-
মাত্র সে কিছুতেই আর নিজেকে সংবরণ করিতে পারিল না;
তাহার চক্ষু দিয়া বর বর করিয়া জল পড়িতে লাগিল।

হঠাৎ তাহার চমক ভাঙ্গিল—সেই বৃদ্ধ বাবুট কাছে সরিয়া
আসিয়া তাহার স্বন্ধে হস্তার্পণ করিয়া বলিতেছেন—“ছোকরা!”

বিনোদ লজ্জিত ভাবে তাড়াতাড়ি কোঁচার খুঁটে চক্ষু
মুছিয়া ফেলিয়া, ভারি গলায় বলিল, “আজ্ঞে!”

“কে তুমি, তোমার নাম কি?”

বিনোদ নাম বলিয়া, অবনত নেত্রে বসিয়া রহিল।

বৃদ্ধ অতি কোমল কণ্ঠে জিজ্ঞাসা করিলেন, “তুমি কাঁদছ
কেন? তোমার কি হয়েছে?”

বিনোদ কথা কহে না।

“বাড়ী কোথা তোমার?”

“কুমিল্লা জেলা।”

“এখানে কি কর? কোথা থাক?”

“ল কলেজে পড়ি। মেসে থাকি।”

“তোমার কি হয়েছে ? আমি বুড়ো মানুষ, আমায় বলনা, তাতে লজ্জা কি বাবা !”

এইবার বিনোদ মুখ তুলিল। বাবুটির পানে ভাল করিয়া চাহিয়া দেখিল; তাঁহার বয়স ৬০ বৎসরের কম হইবে না। উন্নতকায় গৌরবর্ণ পুরুষ, হাতের হাড়গুলি মোটা, বক্ষদেশ প্রশস্ত—ইনি যৌবনে একজন বলশালী লোক ছিলেন সন্দেহ নাই। মাথার চুলগুলির অর্ধেক সাদা হইয়া গিয়াছে। গুহ্ম শব্দে ক্ষৌরিত; গায়ে সাদা জিনের কোট, পরিধানে খান ধুতি, পায়ে প্যানেলার ছুতা, পঠিত বহিখানির ভিতর একটি আঙুল পুরিয়া, বইখানি মুড়িয়া হাতে ধরিয়া আছেন। বিনোদ মলাটে সেখানির নাম দেখিল “ভক্তিবোগ।”

বিনোদকে নীরব দেখিয়া বৃদ্ধ বলিলেন, “কুমিল্লা জেলায় বাড়ী বসে না ? আমি এক সময় কুমিল্লায় ডেপুটি ম্যাজিস্ট্রেট ছিলাম। সে অনেক দিনের কথা, বোধ হয় তখন তুমি জন্মাও নি। কুমিল্লা জেলায় অনেক স্থানেই আমি টুর করে বেড়িয়েছি। কোন্ জায়গায় তোমার বাড়ী বল দেখি ?”

এই বৃদ্ধ পূর্বে একজন ডেপুটি ম্যাজিস্ট্রেট ছিলেন শুনিয়া বিনোদের মনে একটু সন্দেহ উপস্থিত হইল। উত্তর করিল, “আজ্ঞে আমাদের বাড়ী স্নবর্ণগ্রামে।”

বৃদ্ধ বলিল, “স্নবর্ণগ্রাম ! কৈ মনে করতে পারছিনে।”

অতঃপর তিনি বিনোদকে তাহার পারিবারিক অবস্থা সম্বন্ধে এক আধাট করিয়া প্রশ্ন করিতে লাগিলেন। ক্রমে তাহার উপস্থিত

সব্বটের বিষয় সমস্তই অবগত হইয়া বলিলেন, “এই জন্যে তুর্ন কঁাদছিলে?”

এবার বিনোদের আত্মাভিমানে আঘাত লাগিল। সে একটু গৰ্ব্বিত ভাবেই বলিল, “না, সে জন্যে আমি কঁাদিনি! আমার মাকে মনে পড়েছিল, তাই চোখে জল এসেছিল।”

এতক্ষণে দিবালোক প্রায় নিবিয়া আসিয়াছিল। বেঞ্চখানিতে স্থান রহিয়াছে দেখিয়া, অপর দুইটী লোক আসিয়া তথায় উপবেশন করিল। বুদ্ধ দেখিলেন, সেখানে কথাবার্তার আর সুবিধা হইবে না। বলিলেন, “আমার সঙ্গে তুমি আসবে? কাছেই আমার বাড়ী, বেশী দূর নয়। তোমার সঙ্গে আরও কথা আছে।”

অপরচিত ব্যক্তির সঙ্গে যাইতে প্রথমে বিনোদের মনে একটু দ্বিধা উপস্থিত হইল। তারপর সে ভাবিল, “ইনি গুণ্ডাও নন, আমার কাছে টাকা কড়িও নেই, তবে আর ভয়টা কিসের?” বলিল, “বেশ ত, চলুন।”

বুদ্ধ উঠিয়া ধীরপদে বাগানের বাহির হইলেন, বিনোদ তাঁহার অনুসরণ করিল।

পথে যাইতে যাইতে বুদ্ধ বলিলেন, “আমার পরিচয় তোমায় এখনও দিইনি। আমার নাম শ্রীকেশবনাথ সরকার, আমরাও কায়স্থ। পূর্বে গভর্ণমেন্টের চাকরি করতাম, বছর পাঁচ ছয় হল পেন্সন নিয়েছি। দেশে শরীর ভাল থাকে না, তাই কলকাতাতেই থাকি।”

বিনোদ নীরবে কেশব বাবুর পশ্চাৎ পশ্চাৎ মাগিকতলা ষ্ট্রীট



দিয়া চলিয়া, ক্রমে একটি গলির মধ্যে প্রবেশ করিল। বাবুটি এক বাড়ীর দরজায় দাঁড়াইয়া, কড়া নাড়িতে লাগিলেন। উপর বারান্দা হইতে তরুণী কণ্ঠে শব্দ হইল, “কে?” কেদার বাবু বলিলেন, “আমি, মা, দরজাটা খুলে দিবে যাও।”

অর্ধমিনিট পরে, দরজা খুলিবার সঙ্গে সঙ্গে উচ্চারিত হইল, “বাবা, আজ যে এত দেরী?” বিনোদ দেখিল লণ্ঠন হস্তে একটা মেয়ে; পিতার সহিত একজন অপরিচিত ব্যক্তিকে দেখিয়া, সঙ্কুচিত হইয়া এক পাশে দাঁড়াইল।

“এই বাবুটির সঙ্গে কথা কহিতে কহিতে আজ একটু দেরী হয়ে গেল মা। এস হে বিনোদ।”—বলিয়া কেদার বাবু ভিতরে প্রবেশ করিলেন।

বিনোদ প্রবেশ করিলে, কেদার বাবু দরজায় থিল বন্ধ করিলেন। মেয়েটি লণ্ঠন লইয়া অগ্রসর হইল, দুইজনে তাহার পশ্চাৎ সিঁড়ি দিয়া উপরে উঠিতে লাগিলেন। বৃদ্ধ বিনোদকে লইয়া একটু কক্ষ প্রবেশ করিলেন, মেয়েটি অপর দিকে চলিয়া গেল। বিনোদ দেখিল কক্ষটি ক্ষুদ্র, তাহার এক পার্শ্বে একটা তক্তাপোষের উপর ফরাস বিছানা পাতা, তাহার উপরে দুইটা তাকিয়া বালিস, অপর পার্শ্বে একটি ক্ষুদ্র টেবিলের নিকট দুইখানি চেয়ার। কেদার বাবু বিনোদকে সেই টেবিলের উপর বসাইয়া ডাকিলেন “রাধে!”

বিনোদ মনে করিয়াছিল, যে মেয়েটি লণ্ঠন দেখাইয়া আনিয়াছিল তাহারই নাম বুঝি রাধে। কিন্তু দেখিল, সধবাবেশিনী গৌরবর্ণা

নাতিস্থলা এক রমণী, বয়স বোধ হয় চল্লিশ হইবে, প্রবেশ করিয়া মাথায় কাপড় টানিয়া দাঁড়াইলেন।

কেদার বাবু বলিলেন, “রাধে, এঁর নাম বিনোদবাবু— বিনোদবিহারী দত্ত, আমাদেরই কায়েস্থ। ল কলেজে পড়ছেন। আজ হেদোর ধারে আলাপ হল, তাই কথাবার্ত্তা কইবার জন্তে সঙ্গে করে এনেছি।” বিনোদের দিকে চাহিয়া বলিলেন, “ইনি আমার স্ত্রী।”

বিনোদ মনে করিল, “এত দেখছি ইংরাজি প্রথার ইন্ট্রোডাকশন! পর্দাটর্দাও মানেন না বোধ হয়—ব্রাহ্ম না কি?”

রাধারাণী বলিলেন, “বেশ। এখানেই কি আপনাদের বাড়ী?”

অপরচিতা রমণীর সঙ্গে কথা কহিতে বিনোদের কেমন লজ্জা করিতে লাগিল। মাথা নীচু করিয়া সে সংক্ষেপে প্রশ্নের উত্তর দিল।

কেদার বাবু বলিলেন, “রাধে, আমাদের একটু চা দিতে পার?—মার, এঁর জন্তে কিছু জলখাবার?”

রমণী বলিলেন, “চায়ের জল ত তৈরি নেই, চড়িয়ে দিই গে। জলখাবার আগে নিয়ে আসবো কি?”

কেদার বাবু বিনোদের গুঞ্চ মুখের দিকে চাহিয়া বলিলেন, “আগে খাবারটা খেয়ে নাও, কি বল? ততক্ষণ চা হোক।”

বিনোদ তাড়াতাড়ি বলিল, “না না, জলখাবার আমার জন্তে দরকার নেই। শুধু এক পেয়ালা চা হলেই চলবে।”

কেদার বাবু বলিলেন, “তা কি হয়? গৃহস্থের বাড়ীতে এসে একটু মিষ্টিমুখ না করলে তারা ছাড়বে কেন? চা—সে ত বিলাতী ফাঁকি, জলভাজা বৈত নয়!”—বলিয়া তিনি হাহা করিয়া হাসিয়া উঠিলেন। শেষে বলিলেন, “যাও, কিছু খাবার পাঠিয়ে দাও।”—রাধারাণী হাসিতে হাসিতে চলিয়া গেলেন।

অল্পক্ষণেই পাশের ঘর হইতে ষ্টোভ জ্বলিবার গৌ গৌ শব্দ উঠিল। তার পর সেই মেয়েটি একটি কাঁসার রেকাবীতে কয়েক টুকরা ফল এবং দুইটি বড় রসগোল্লা আনিয়া দাঁড়াইতেই কেদার বাবু বলিলেন, “রাখ মা, ঐ টেবিলের উপর রাখ।”

মেয়েটি খাবারের রেকাবী ও জলের গ্লাস টেবিলের উপর রাখিয়া ধীরে ধীরে চলিয়া যাইতেছিল, কেদার বাবু বলিলেন, “দাঁড়াও মা—এঁর সঙ্গে তোমার পরিচয় করিয়ে দিই। বিনোদবাবু, এইটি আমার মেসে অলকা। আর দেখ অলকা, ইনি খুব লেখাপড়া শিখেছেন। এম-এ পাস করেছেন, আইন পড়ছেন।”—বলিতেই মেয়েটি বিনোদের পানে চাহিয়া নমস্কার করিল। বিনোদও প্রতিনমস্কার করিয়া ভাবিল, ইহার মার সঙ্গে যে সময় সে পরিচিত হইয়াছিল, তখন তাঁহাকে নমস্কার করা উচিত ছিল, কিন্তু সেটা ত ভুল হইয়া গিয়াছে—ছিছি! কেদার বাবু বলিতে লাগিলেন, “আমার মেয়েটিও মুখ্য নয় বিনোদ বাবু। আসছে বছর ম্যাট্রিক দেবে—হিন্দু বালিকা-বিদ্যালয়ে পড়ে। বাপ হয়ে বলা উচিত নয়—বেশ বুদ্ধিগুণ্ডিও আছে।—আচ্ছা, যাও মা, দেখ দেখি চায়ের জল হল কি না। চল হে বিনোদ, খাবারটা ততক্ষণ থেয়ে নেবে চল।

তার পর হুজনে একসঙ্গে চা খেতে খেতে গল্প করা যাবে।”

অলকা চলিয়া গেল। বুদ্ধ বিনোদকে লইয়া গিয়া টেবিলের নিকট বসিলেন। খাবার থাইয়া, শীতল জল পান করিয়া বিনোদের দেহে যেন প্রাণ ফিরিয়া আসিল।

চা পান করিতে করিতে কেদার বাবু বলিলেন, “দেখ বিনোদ, তুমি যে বিশেষ রকম অর্থসঙ্কটে পড়েছ, তা আমি বেশ বুঝতে পারছি। তোমার কলেজের দু মাসের মাইনে, মেসের পাওনা, ধার শোধ করা, গোটা পঞ্চাশ টাকা এখনই তোমার প্রয়োজন। এ টাকা আমি এখনই তোমায় দিতে পারি। কিন্তু সেটা দানস্বরূপ হলে, তোমার তা কখনই ভাল লাগবে না। সেই জন্তে আমি প্রস্তাব করছি, তুমি আমার মেয়েটিকে দু’মাস পড়াও—তোমায় দু’মাসের বেতন স্বরূপ অগ্রিম ৫০০ আমি তোমায় দিচ্ছি। কেমন, তুমি রাজি আছ?”

বিনোদ প্রায় একমিনিটকাল চুপ করিয়া থাকিয়া ভাবিতে লাগিল। শেষে জিজ্ঞাসা করিল, “কতক্ষণ পড়াতে হবে? কখন?”

কেদার বাবু বলিলেন, “বিকেল বেলা একঘণ্টা। এই, চারটে থেকে পাঁচটা, কিস্তি পাঁচটা থেকে ছ’টা, যেমন তোমার সুবিধে হয়। তোমার কলেজ কখন?”

“সকাল বেলা। আর, এ ক’টা দিন পরে ত কলেজের ছুটিই হয়ে যাচ্ছে।”

“তা হলে, তোমার মত কি বল।”

বিনোদ বলিল, “আপনি যখন এই সঙ্কেটে আমায় উদ্ধার করছেন—আপনার আদেশ আমি শিরোধার্য্য করলাম।”

“আচ্ছা বেশ। তা হলে কাল থেকেই এস। ইংরেজি, সংস্কৃত আমি নিজেই ওকে পড়াই। এই সন্ধ্যার পর, চা খেয়ে ওকে নিয়ে রোজ বসি। বিকেলে চারটে থেকে পাঁচটা পর্য্যন্ত অঙ্কটা তুমি কষিও—অঙ্কে ও একটু কাঁচাই আছে। বস, টাকাটা আমি নিয়ে আসি।”—কয়েক মিনিট পরেই পাঁচখানি নোট আনিয়া তিনি বিনোদের সম্মুখে রাখিলেন।

বিনোদ টাকা কয়টি উঠাইয়া লইল। নিজ হৃদয়ের উচ্ছ্বাসিত কৃতজ্ঞতা অত্যন্ত অসম্পূর্ণভাবে প্রকাশ করিয়া, নমস্কারান্তে বিদায় গ্রহণ করিল।

বাসায় পৌঁছিয়া দেখিল, দেশ হইতে তাহার এক বন্ধুর পত্র আসিয়াছে। যে জমিদারের এষ্টেটে তাহার খুড়া মহাশয় চাকরি করিতেন, সেই জমিদার কর্তৃক আনীত তহবিল তছরপের মোকদ্দমায় তাহার খুড়া মহাশয়ের দেড় বৎসর জেল হইয়া গিয়াছে। পত্র পড়িয়া বিনোদ একটি দীর্ঘনিশ্বাস ফেলিয়া ভাবিল, খুব সময়েই কেদার বাবুর শ্রায় দয়ালু পরোপকারী মহাত্মার দর্শন সে পাইয়াছিল, নহিলে ত তাহাকে অথই জলে পড়িতে হইত!

পরদিন বিনোদ তাহার নূতন ছাত্রীকে পড়াইতে গেল। কেদার বাবু অধ্যাপনা সম্বন্ধে উপযুক্ত উপদেশাদি দিয়া, তাহার নিয়মিত

হেছ্যা ভ্রমণে বহির্গত হইলেন। পাঁচটা বাজিলে, অলকার মা তাহাকে চা ও জলখাবার আনিয়া দিলেন। প্রথমে কিঞ্চিৎ আপত্তি উত্থাপন করিয়া, অবশেষে জলযোগ সমাপনান্তে বিনোদ বাসায় ফিরিয়া আসিল।

এইরূপ দিনের পর দিন চলিতে লাগিল—এবং এ বয়সে এরূপ সান্নিধ্যের ফল যাহা হইবার তাহাই হইল। বিনোদের প্রথমে মনে হইল, তাহার ছাত্রীর স্বভাবটি বড় মধুর! তার পর মনে হইল তাহার দেহের গঠন—বিশেষতঃ চক্ষু দুইটি—বড়ই সুন্দর; মেয়েটি যেরূপ রূপবতী, বাঙ্গালীর ঘরে সেইরূপ সচরাচর দেখা যায় না। তার পর মনে হইতে লাগিল, তাহার কণ্ঠস্বরটি বড় মিষ্ট, শুনিলে আবার শুনিতে ইচ্ছা করে। তার পর মনে হইতে লাগিল, এ মেয়ে যাহার গৃহলক্ষ্মী হইবে, তাহার তুল্য সৌভাগ্যবান্ পুরুষ এ জগতে দুর্লভ। তাহার পর বিনোদ হঠাৎ আবিষ্কার করিয়া বসিল, অলকাকে সে অতিশয় ভালবাসিয়া ফেলিয়াছে। কেন না, যতক্ষণ জাগিয়া থাকে, তাহার চিন্তা এক দণ্ড মন হইতে অন্তর্হিত হয় না। তাহাকে ত চাই—নহিলে জীবনটী যে একান্ত বিষাদ হইয়া যাইবে। এখন উপায়? এ অবস্থা, মাস খানেকের মধ্যেই উপস্থিত হইল।

এ পর্য্যন্ত কিন্তু সে অলকার কাছে নিজ মনোভাব কিছুমাত্র প্রকাশ করে নাই। পড়ার সময় অলকার মা প্রায়ই কাছে আসিয়া বসিতেন। কেদার বাবুর সহিত সাক্ষাৎ সবদিন তাহার হইত না; যে সময়ে সে অলকাকে পড়ায়, সেই সময়টাই তাঁহার হেছ্যা ভ্রমণের জন্য নির্ধারিত।

মাসখানেক পরে একদিন পড়াইতে গিয়া শুনিল, অলকা রাড়ী নাই ; তাহার পিতা তাহাকে একটা ইরাজি থিয়েটারের বৈকালিক অভিনয় দেখাইতে লইয়া গিয়াছেন ।

অলকার মা আসিয়া, পড়িবার ঘরে বিনোদের কাছে বসিলেন । প্রথমে অলকার পড়াশুনার প্রসঙ্গেই কথাবার্তা হইল ; তার পর হঠাৎ তিনি বলিয়া বসিলেন, “হ্যাঁ বাবা, তোমার ত বয়স হল, বিয়ে থাওয়া করবে না ?”

বিবাহের প্রসঙ্গে বিনোদের লজ্জা হইল । সে মাথাটি নীচু করিয়া বলিল, “আমার অবস্থা সবই ত জানেন ।”

“অবস্থা কি চিরদিন মানুষের সমান থাকে ? আজ-বাদে কাল তুমি পাস করবে—অবস্থার কি উন্নতি করতে পারবে না ? আচ্ছা, আইন পাস করে’ কোথায় তুমি প্র্যাকটিস করবে স্থির করেছে ?”

“তা এখনও স্থির করি নি । প্র্যাকটিস করব কি না সন্দেহ । প্রথম ছ’ চার বছর বসে খাবার সংস্থান ত আমার নেই । বোধ হয় আমাকে চাকরির চেষ্টাই করতে হবে ।”

রাধারানী কিয়ৎক্ষণ চুপ করিয়া রহিলেন । শেষে বলিলেন, “দেখ বাবা, তোমাকে দেখে অবধি, একটা বাসনা আমার মনে উদয় হয়েছে ! আমার ইচ্ছে হয়, তোমাকে আমার পুত্রস্থানীয় করি । তুমি আমার অলকাকে বিয়ে কর না কেন ।”

এই প্রস্তাব শুনিয়া, বিনোদ যেন স্বর্গ হাত বাড়াইয়া পাইল । কিন্তু লজ্জায় তাহার মুখখানি রাঙা হইয়া উঠিল । জড়িত স্বরে বলিল, “সে ত আমার আশাতীত সৌভাগ্য ! কিন্তু, এখন আমার

অবস্থা কি তা ত আপনি জানেন। কেদারবাবু কি আমার মত একজন নিঃস্ব লোককে তাঁর জামাই করতে সম্মত হবেন?”

রাধারাণী হাসিলেন। বলিলেন, “তুমি যদি রাজি থাক ত বল; কর্তার সম্মতি আদায় করে’ নেবার ভার আমার উপর রইল। তবে সব কথা তোমায় ভেঙ্গেই বলি বাবা, লুকোছাপির কোনও দরকার নেই। আমি এখন তোমার কাছে যে প্রস্তাব করলাম, তা ঠুর সঙ্গে পরামর্শ করেই করেছি। ঠুরও খুব ইচ্ছে যে তোমার হাতে মেয়েটিকে সুঁপে দিয়ে নিশ্চিন্ত হন।”

বিনোদ অধোবদনে কয়েক মুহূর্ত চিন্তা করিল। পরে বলিল, “কিন্তু দেখুন, একটা কথা আছে। অলক বড় হয়েছেন। তাঁর মতামত—তা ছাড়া আমি উপার্জনক্ষম না হলে ত—”

রাধারাণী মুহূ হাসিয়া বলিলেন, “অলকার মতের জন্যে তুমি ভেবো না। অপর কথা, কর্তা পূর্বে একজন প্রথম গ্রেডের ডেপুটি ছিলেন, তা বোধ হয় তুমি শুনেছ। ঠুর প্রথমপক্ষের তিনটি ছেলে, একটি ঢাকায় ওকালতী করছে, আর দুজন ভাল করে লেখাপড়া শিখলে না, তারা দেশে থাকে, বিষয় সম্পত্তি দেখে। চীফ সেক্রেটারী সাহেব ঠুঁকে খুব ভালবাসেন। কর্তা সেদিন বলছিলেন সাহেবকে আমি বলে রেখেছি, ছেলেদের জন্তে আমি ত কিছুই চাইলাম না, আমার যে জামাই হবে তাকে একটি ডেপুটিগিরি দিতে হবে। সাহেব বলেছেন, আচ্ছা। সেদিন সাহেবের সঙ্গে উনি দেখা করতে গিয়েছিলেন, সাহেব জিজ্ঞাসা করলেন, তোমার মেয়ের কত বয়স হয়েছে? উনি বললেন, সতেরো। শুনে সাহেব ভারী খুসী।

বলেন, তুমি যে মূঢ় দেশাচারের ভয়ে অত্যাচার লোকের মত ছোট বয়সে মেয়ের বিয়ে দাও নি, লেখাপড়া শেখাচ্চ, এতে তোমার খুব সুৎসাহস প্রকাশ পাচ্ছে। তোমার যে জামাই হবে সে যদি বি-এ পাশ হয়, তবে তাকে আমার কাছে নিয়ে এস, লাটসাহেবকে বলে নিশ্চয়ই আমি তাকে ডেপুটি করে দেব। তাই আমি বলি কি বাবা, তুমি ত নিজেই নিজের কর্তা, কার মতামতের অপেক্ষা ত তোমায় রাখতে হবে না, আর বেশী দেবী না করে এই সামনে অষ্টাণ মাসেই শুভকর্শটা হয়ে যাক।”

বিনোদ মনে মনে ভাবিল, “একেই বলে, বিধাতা যখন মাপায়, তখন উপরোউপরি চাপায়। আধঘণ্টা আগে অলকাকে পাবার আশাই আমার পক্ষে, বামনের চন্দ্রস্পর্শের মত ছুরাশা ছিল—আর এখন শুধু অলকা নয়, সঙ্গে সঙ্গে ডেপুটিগিরি ফাউ।”

বলা বাহুল্য বিনোদ সানন্দে সম্মতি জানাইয়া বিদায় গ্রহণ করিল। রাধারাণীর বারম্বার অনুরোধসত্ত্বেও জলখাবার পর্য্যন্ত সে খাইল না। ক্ষুধা বলিয়া কোন জিনিষ যে পৃথিবীতে আছে, তাহা আজ সে যেন অনুধাবন করিতেই পারিল না।

কেদারবাবুর বাসা হইতে বাহির হইয়া সহসা বিনোদের মনে হইল, চলিতে তাহার পা দুখানা যেন ধুলিমলিন রাজপথে মোটেই ঠেকিতেছে না—সে যেন হাওয়ার উপর দিয়া ভাসিয়া চলিয়াছে। তাহার মাথার ভিতর হইতে আগুন ছুটিতেছে। নিকটে হেঁচুয়া পুকুরিণী

পাইয়া, ঠাণ্ডা হাওয়ায় মাথাটা একটু ঠিক করিয়া লইবার অভিপ্রায়ে তীরস্থ বাগানে প্রবেশ করিল। একখানি বেঞ্চে বসিয়া পড়িল ; কিন্তু বেশীক্ষণ থাকিতে পারিল না। উঠিয়া দুই তিনবাব হেড়ম্বাকে প্রদক্ষিণ করিল।

তখন সন্ধ্যা হইয়াছে ; একবার মনে হইল বাসায় যাই। কিন্তু ছুটিতে বাসা এখন খালি, একলা সেখানে চুপটি করিয়া বসিয়া থাকা অত্যন্ত অসহ্য হইবে ; রাত্রে যে ঘুম হইবে এমন অশাও দেখা যাইতেছে না। আজ শনিবার, তার চেয়ে বরং কোনও থিয়েটারে গিয়া বসিলে, রাত্রি দুইটা অধি একরকম করিয়া কাটিয়া যাইবে। পকেটে টাকা ছিল ; বিনোদ বাহির হইয়া বীডন ষ্ট্রিটের এক থিয়েটারে গিয়া প্রবেশ করিল।

দুইটা অঙ্ক হইয়া গেলে, বিনোদ বিলক্ষণ ক্ষুধা অনুভব করিল। বাহির হইয়া একটা দোকানে লুচি ডিম ও চপ খাইয়া, হাত ধুইয়া চা খাইতে বসিয়াছে, এমন সময় তাহার এক বন্ধু প্রকাশ বাবু সেখানে দর্শন দিলেন। ইনি এক সময় বিনোদের সহপাঠী ছিলেন। বিএ পাস করিয়া, স্বপ্তরের সুপারিশে সম্প্রতি ডেপুটি ম্যাজিস্ট্রেটের চাকরি পাইয়াছেন। ইহাকে দেখিবামাত্র বিনোদের মন প্রফুল্ল হইয়া উঠিল—প্রকাশকে “স্বজাতীয়” এবং অত্যন্ত অন্তরঙ্গ বলিয়া তাহার মনে হইল। মনে মনে বলিল, “তুমিও স্বপ্তরের রূপায় ডেপুটি—আমিও তাই।”

অভিনয় শেষে বাহিরে আসিয়া উভয়ের পুনরায় সাক্ষাৎ হইলে প্রকাশ বলিল, “এত রাত্রে বাসায় গিয়ে কি করবে? কাছেই

আমার স্বপ্নবাবী, সেইখানে কিছু খেয়ে, বৈঠকখানায় শুয়ে থাকবে চল।” অনেক দিনের পর বন্ধুর সহিত সাফাৎ, বিনোদ সহজেই সম্মত হইল।

বাড়ীতে পৌছিয়া, কক্ষিৎ জলযোগান্তে, বৈঠকখানার শয়্যার উপর বসিয়া উভয় বন্ধুতে কথাবার্তা হইতে লাগিল। এ কথা সে কথার পর, প্রকাশ বলিল, “কার মেয়েকে পড়াচ্ছ বলছিলে? কেদার সরকার কে?”

“আগে তিনি ডেপুটি ম্যাজিস্ট্রেট ছিলেন, এখন পেন্সন নিয়েছেন।”

প্রকাশ বলিল, “ওঃ, ডেপুটি কেদার সরকার? তাই বল! ঠিক ত আমি জানি—অর্থাৎ অস্তাত্ত ডেপুটিদের কাছে তাঁর খবর শুনেছি। তিনি একজন প্রথম গ্রেডের ডেপুটি ছিলেন, এখন রিটায়ার করেছেন ত?”

বিনোদ বলিল, “হ্যাঁ, তিনিই।”

প্রকাশ হাসিয়া বলিল, “নিশ্চয়ই তিনি। তাঁর সেই অবিষ্টাটিকে নিয়ে এইখানেই আজকাল আছেন বুঝি?”

ইহা শুনিয়া বিনোদ চমকাইয়া উঠিল। বলিল, “অবিষ্টা কি—রকম?”

প্রকাশ বলিল, “কেন হে, অবিষ্টা শুনে তোমার মুখ অমন ফ্যাকাশে হয়ে গেল কেন? তুমি তাঁর মেয়েটিকে বিয়ে করবার মতলব টংলব করেছ না কি?” বলিয়া কৌতুহলপূর্ণ দৃষ্টিতে বিনোদের দিকে সে চাহিয়া রহিল।

বিনোদ নিজেকে কতকটা সম্বরণ করিয়া লইয়া বলিল, “না, তুমি বোধ হয় ঠিক জান না। তুমি যা বলছ, তাঁদের আচার ব্যবহারে। সে রকম কোন লক্ষণই ত কোনও দিন দেখিনি আমি।”

প্রকাশ বলিল, “এখন আর কি দেখবে? এ বয়সে কি আর যুগুর পায়ে দিয়ে নাচবে? এখন যে—তপস্বিনী!”

বিনোদ ক্ষীণভাবে বলিল, “তুমি বোধ হয় ভুল শুনেছ। আমার ত তা মনে হয় না।”

প্রকাশ বলিল, “না হে! আমি খুব জানি। শুনেছি ওঁর স্ত্রী মারা গেছে অনেক দিন হইল। সে যাক—তুমি ও প্রাইভেট ট্যুসনি জোটালে কি রকম করে বল দেখি?”

বিনোদ তখন তাহার ট্যুসনি জুটিবার ইতিহাসটুকু বলিল। গতকল্য যাহা ঘটিয়াছে, তাহা গোপন রাখিল।

শুনিয়া প্রকাশ হাসিতে লাগিল। বলিল, “উঃ, বুড়ো কি কম চালাক! কেমন কৌশলটি করেছে দেখ। যুবতী মেয়েটা, তাকে পড়াবার জন্তে চব্বিশ বছরের একজন অবিবাহিত যুবক ছাড়া আর অল্প মাপ্তার খুঁজেই পেলো না! শাস্ত্রের কথা ঘি আর আগুন—বেশ জানে; কিছুদিনেই দুজনে দুজনার প্রেমে হাবডুবু খাবে; তখন তুমি বলবে ওকেই আমি বিয়ে করব,—জাত-ফাৎ আমি ডোন্টো কেয়ার করি। আচ্ছা, তোমায় গাঁথবার জন্তে মেয়েটাও বোধ হয় খুব উঠে পড়ে লেগেছে?”

তখন অলংকার সরলতা মণ্ডিত শাস্ত্র সংযত সুন্দর মুখখানি

বিনোদের মনে পড়িল। একটু উষ্ণার সহিতই সে বলিল, “ছিঃ—
এক মুহূর্তের জন্তেও সে তা করেনি।”

প্রকাশ বলিল, “করেনি, করবে। এই ত সবে মাংসখানেক
যত্নত্যাগ করছ বৈত নয়! আগে লোহা বেশ ক’রে লাল হোক,
তখন ত পিটবে। সাধু সাবধান! আচ্ছা, রাত প্রায় পুইয়ে এল,
এখন তুমি একটু শোও ভাই। আমি কিঞ্চিৎ নিদ্রার চেষ্টা দেখি।”
—বলিয়া প্রকাশ বাড়ীর মধ্যে প্রবেশ করিল।

বাকী রাতটুকু বিনোদ ছটফট করিয়াই কাটাইল—নিদ্রাদেবীর
কৃপালাভের জন্ত সে একটুও ব্যস্ত ছিল না। আর একটু হইলেই
ত না জানিয়া সে একজন ভ্রষ্টা রমণীর কণ্ঠাকে বিবাহ করিয়া
ফেলিয়াছিল! ছি ছি, তাহা হইলে কি কেলেকারীটাই হইত বল
দেখি! কেদার বাবুর উপর তাহার অত্যন্ত রাগ হইতে লাগিল।

তিনি যে বাড়ী লইয়া গিয়া জলখাবার খাওয়াইয়া তাহাকে টাকা
দিয়াছিলেন, সেটা তবে দয়া ধর্মের অনুরোধে নহে, তাহা স্বার্থ-
পরতা-প্রসূত একটা গভীর ষড়যন্ত্র মাত্র! দেশ হইতে এখন খুড়িমা
তাহাকে দুই মাসের টাকা পাঠাইয়াছেন। বিনোদ ভাবিল,
কেদার বাবুর পঞ্চাশ টাকাই সে মণিঅর্ডার যোগে তাঁহাকে ফেরৎ
পাঠাইয়া দিবে এবং কুপনে লিখিয়া দিবে, সমস্তই সে জানিতে
পারিয়াছে—ধর্মভ্রষ্টার কণ্ঠাকে সে বিবাহ করিতে পারিবে না—
ডেপুটিগিরির লোভেও নয়।

কিন্তু অলকার মুখখানি মনে পড়িবামাত্র, তাহার বুকের মধ্যে দারুণ বেদনা বাজিয়া উঠিল। অলকার মা বাপের অপরাধ যতই গুরু হউক, অলকার কি দোষ? হয়ত সে জানেও না যে তাহার জনক জননীর সম্বন্ধটা অবৈধ—অপবিত্র। আর পাঁচজনের মা বাপ যেমন, তাহার মা বাপও তেমনি, ইহাই সম্ভবতঃ বালিকার বিশ্বাস। তবে, তাহার কি অপরাধ? অলকার মা যাহা ইঙ্গিতে বলিয়াছেন তাহা যদি সত্য হয়—তাহা সত্যই ত! সে বিষয়ে বিনোদের মনে ত কিছুমাত্র সন্দেহ নাই—তবে এইরূপ নির্ভরভাবে এত্যাখানে—এই অপমানে তাহার বুকটি কি ভাঙ্গিয়া যাইবে না? একজনের অপরাধে আর একজন সম্পূর্ণ নির্দোষ প্রাণিকে শাস্তি দেওয়া কি ঘোর অধম্ম নহে? আর, গুণুই কি তাহাকে শাস্তি দেওয়া? নিজকেও ত সেই শাস্তি চিরজীবন ভোগ করিতে হইবে। এই আত্মনির্যাতনই বা কিসের জন্ত?

কিন্তু এ ভাব তাহার মনে বেশীক্ষণ আধিপত্য করিতে পারিল না। কেদার বাবুর উপর আবার তাহার বিষম রাগ হইতে লাগিল;—কেন তিনি এরূপ ভাবে তাহাকে ঠকাইতে চেষ্টা করিলেন? তাঁহাকে মহদন্তঃকরণ লোক বলিয়াই ত ধারণা ছিল—কিন্তু তিনি এত নীচ—ছি ছি ছি!

বিনোদ মনে মনে বলিতে লাগিল—“এইবার বুঝতে পেরেছি, হিন্দুধর্মের অতবড় মেয়ের এতদিন বিবাহ হয়নি কেন।—এইবার বুঝতে পেরেছি, দেশে কেন বাবুর থাকা হয় না—ছেলেরাই বা

অন্ত যায়গায় থাকে কেন। বুড়ো মিশে—ছি ছি। আবার ‘ভক্তিসংগ’ পড়া হয়।”

এই মত নানারূপ চিন্তা করিতে করিতে ভোর হইয়া আসিল ; কাক ডাকিতে লাগিল। ভোরের শীতল বায়ু জানালা দিয়া প্রবেশ করিয়া বিনোদকে তন্দ্রাতুর করিয়া, ক্রমে তাহার চেতনা হরণ করিল।

যখন তাহার ঘুম ভাঙ্গিল, তখন বাহিরে বেশ রোদ্দ উঠিয়াছে, প্রকাশ বিছানার পাশে বসিয়া তাহাকে জাগাইতেছে—“ওহে ওঠ ওঠ—বেলা হয়েছে। মুখ হাত ধুয়ে ফেল, চা তৈরি।”

বন্ধুগৃহে চা পানান্তে বিনোদ তাহার মেসের বাঁসায় প্রবেশ করিবামাত্র ভূতের নিকট শুনিল, একজন বৃদ্ধ ভদ্রলোক অনেকক্ষণ হইতে তাহার ঘরে বসিয়া তাহার জন্ত অপেক্ষা করিতেছেন। চেহারা ও পোষাক সম্বন্ধে প্রশ্ন করিয়া যাহা উত্তর পাইল, তাহাতে সে বুঝিতে পারিল, কেদার বাবু আসিয়াছেন। মনে মনে জলিয়া উঠিয়া ভাবিল, “জোচ্চোর বেটা! এসেছেন বোধ হয় সাততাড়া-তাড়ি একটা দিনান্তর করে ফেলবার মতলবে—শেষে আসল কথা প্রকাশ পেয়ে সব ফেঁসে না যায়! আচ্ছা করে’ হুকথা শুনিযে দিচ্ছি গিয়ে দাঁড়াও।”

হঠাৎ তাহার মনে এইরূপ বীররসের আবির্ভাব হওয়াতে, সিঁড়িগুলোকে সজোরে লাথি মারিতে মারিতে সে উপরে উঠিল

গেল। দ্বিতলে নিজকক্ষে প্রবেশ করিয়া, কেদার বাবুর মূর্তি দেখিবার মাত্র তাহার বীরত্ব কিন্তু অনেকখানি উবিয়া গেল। কেদার বাবুর চক্ষু বসিয়া গিয়াছে, বার্দ্ধক্য-রেখাক্রান্ত প্রশান্ত মুখমণ্ডলে যেন কি একটা বেদনার স্পষ্ট ছায়া—দেগিয়া বিনোদ কীতকটা থতমত খাইয়া গেল। সে অক্ষুট স্বরে বলিয়া উঠিল—“আপনি! আপনার শরীর কি ভাল নেই?”

কেদার বাবু বলিলেন, “না বাবা, শরীর আমার ভালই আছে। বস। তুমি কোথায় গিয়েছিলে?”

বিনোদ সংক্ষেপে বাসা হইতে গতরাত্রে তাহার অনুপস্থিতির কারণ বলিল।

কেদার বাবু বলিলেন, “আমি কাল বিকেলে অলকাকে এম্পায়ারে ম্যাকবেথ দেখাতে নিয়ে গিয়েছিলাম, সে ত তুমি শুনেই এসেছ। সন্ধ্যার পর বাড়ী ফিরে, আমার স্ত্রীর কাছে সকল কথা শুন্লাম।”

বিনোদ মনে মনে বলিল, “স্ত্রী! স্ত্রী বৈকি! ভগ্নামি দেখে আর বাঁচিলে!”

কেদার বাবু বলিলেন, “সকল কথা শুন্লাম। শুনে আমার মনটা বড় খারাপ হয়ে গেল। আমার স্ত্রী একটু অগ্রায় করেছেন। তিনি একটা বিশেষ প্রয়োজনীয় কথা তোমার কাছে গোপন করেছেন। তাই হুশিস্তায় সারারাত আমার ঘুম হয়নি। সেই বিষয়টি তোমায় জানাবার জন্তেই—”

বিনোদের মনে হইল, তবে ত প্রকাশ দাড়া বলিয়াছে তাহা

মিথ্যা নহে। এই বুদ্ধ লম্পট নিজ মুখে সে কথা স্বীকার করিতেও লজ্জা অনুভব করিতেছে না !

সে ব্যঙ্গস্বরে বলিল, “আজ্ঞে, বুঝা আপনি কষ্ট করেছেন। আপনার বাড়ী থেকে চলে আসবার পর ঘটনাক্রমে সে সকল কেছাই আমি জানতে পেরেছি। আপনার সেই মেয়েমানুষটিকে বলবেন—”

বুদ্ধ হঠাৎ তীরবেগে দাঁড়াইয়া উঠিয়া, ঘূর্ণিত লোচনে বলিলেন, “থবর্দার !”—বলিয়া তিনি রাগে হাঁপাইতে লাগিলেন।

বিনোদ গ্রীবা বাঁকাইয়া বলিল, “কেন ? মারবেন না কি ? গশাই, আপনাকে আমি স্পষ্ট কথা বলি। আপনি আমায় ডেপুটিই করে দিন আর লাট সাহেবই করে দিন, আপনার ঐ মেয়েকে বিবাহ করে’ আমি সমাজচ্যুত হতে প্রস্তুত নই।”

কেদার বাবু এবার অপেক্ষাকৃত সংযত স্বরে বলিলেন, “উত্তম কথা ! কিন্তু এই কথাই তুমি ভদ্রভাবে বলতে পারতে। তুমিও জেনো, তোমার মত এমন অসভ্য দুর্ভির্ষনীত চাষাকে মেয়ে দিতেও আমি প্রস্তুত নই।”—বলিয়া তিনি বাহির হইয়া গেলেন।

কেদার বাবু চলিয়া গেলে, বিনোদ অনেকক্ষণ চুপ করিয়া তক্তপোষের উপর বসিয়া রহিল। ভৃত্য আসিয়া বলিল, দশটা বাজে, কলের জল চলিয়া যাইবে, এই বেলা স্নান করিয়া লইলে হইত। বিনোদের মাথাটা ঘুরিতেছিল, একটু শীতল জলের

আকাঙ্ক্ষায়, সে স্নান করিতে নামিয়া গেল। কলের নীচে মাথা রাখিয়া অনেকক্ষণ ধরিয়া সে স্নান করিয়া থাইতে বসিল, কিন্তু থাইতে পারিল না।

কাল প্রায় সারারাত অনিদ্রায় কাটিয়াছে। শয্যায় গিয়া শয়ন করিল, কিন্তু নিদ্রা আসিল না কেবলই মনে হইতে লাগিল, “অলকাকে হারাইলাম। কি করিব, উপায় কি? এ অবস্থায় কেমন করিয়া তাহাকে বিবাহ করি? কিন্তু ‘কুস্থানাদপি কাঞ্চনম্, জীরত্বং দুক্কলাদপি’ আহরণ করিয়া লইতে দোষ নাই ইহাও প্রাচীন নীতিবচন। রাগের মাথায় বুড়াকে ওরূপভাবে অপমান করিয়া অত্যাচার করিয়াছি। সেটা ভাল হয় নাই। নীতি ও ধর্ম সকলের এক নয়। এমন হইতে পারে, ওরূপ কার্যকে তিনি কিছুমাত্র অত্যাচার বা অধর্ম বলিয়া মনে করেন না। শালগ্রাম শিলা সম্মুখে রাখিয়া মন্ত্র পড়িয়া বিবাহ হয় নাই বলিয়াই যে সে মিলন সর্বদোষের সর্বপাপের আকর, এমন নাও হইতে পারে। সে আকরে, অলকার ছায়া সুপবিত্র শুভ্র সুন্দর ফুলটির উদ্ভব হইয়াছে ত! সে ফুল, বুকের কাছাকাছি পাইয়াও আমি হারাইলাম—আমার অদৃষ্টে ধিক্।”

তরুণপোষের উপর এ পাশ ও পাশ করিতে করিতে এইরূপ চিন্তায় বিনোদ বেলা চারিটা অরধি কাটাইল। তখন উঠিয়া ভাবিল, ক্ষেত্রয়ার ধারে এতক্ষণ কেদার বাবু বেড়াইতে আসিয়াছেন; যাই, ওবেলার রুঢ় ব্যবহারের জন্ত তাঁহার নিকট ক্ষমা প্রার্থনা করিয়া আসি।

জামা পরিতে গিয়া, তত্ত্বপোষের নিম্নে নজর পড়িল, একখানা ইংরাজি খবরের কাগজ পড়িয়া রহিয়াছে। সেখানি তুলিয়া লইয়া দেখিল, ২০ বৎসর পূর্বে লাহোর হইতে প্রকাশিত Arya Pat-
•rika সংবাদপত্র। কেদার বাবুর হাতে আজ সকালে একখানা খবরের কাগজ বিনোদ দেখিয়াছিল—তিনিই তবে এখানা ফেলিয়া গিয়াছেন। কোঁতুহল বশতঃ কাগজের ভাঁজ খুলিতেই একটা সংবাদ তাহার চোখে পড়িল। সেটি আগাগোড়া বিনোদ পড়িল। পড়িয়া, জামা গায়ে দিয়া তাড়াতাড়ি বাহির হইয়া গেল।

বড় রাস্তায় পড়িয়া, হেড়য়ার দিকে প্রায় ছুটিয়াই সে চলিতে লাগিল। সেখানে তাঁহাকে না পাইয়া, তাঁহার বাড়ীর দিকে চলিল। কেদার বাবুর বাড়ীতে পৌঁছিয়া, উপরের ঘরে গিয়া দেখিল, তিনি বসিয়া অলকাকে পড়াইতেছেন। বিনোদকে দেখিয়া অলকা তাড়াতাড়ি সেখান হইতে উঠিয়া গেল। কেদার বাবু সবিস্ময় বিরক্তিতে তাহার মুখপানে চাহিয়া রহিলেন।

বিনোদ সহসা কেদার বাবুর পা ছুটি জড়াইয়া ধরিয়া কাতর-ভাবে বলিল, “আমায় মাফ করতে হবে। আজ সকাল বেলা আপনার প্রতি যে আচরণ আমি করেছি, তা নিতান্ত একটা ভুল সংবাদ শুনেই করেছিলাম। এই খবরের কাগজখানি আমার ঘরে আপনি ফেলে এসেছিলেন—এইটে পড়েই আমার সেই বিষম ভুল বুঝতে পারলাম। আমাকে আপনার পুত্রস্থানীয় বলে গ্রহণ করুন আর না করুন, আমার অজ্ঞানকৃত সেই অপরাধ আপনি ক্ষমা করুন।”

কেদার বাবু সম্মুখে তাহাকে উঠাইয়া বলিলেন, “কেন, কেন? তুমি কি শুনেছিলে বল দেখি? কার কাছেই বা শুন্লে?”

বিনোদ লজ্জায় অধোবদনে রহিল। তখন, প্রাতে বিনোদ কৰ্ত্তৃক উচ্চারিত একটা শব্দ কেদার বাবুর মনে পড়িয়া গেল। বলিলেন, “ওঃ বুঝতে পেরেছি। সব কথা শোন তা হলে। আমার প্রথমা স্ত্রীর মৃত্যুর পর, ছেলেদের মামার বাড়ী পাঠিয়ে আমি ছ’মাসের ফার্নো নিয়ে নানা স্থানে ঘুরে বেড়াই। লাহোরে এসে, অলকার মার সঙ্গে আমার আলাপ হয়—উনি পাঞ্জাবী কায়স্থের মেয়ে ছিলেন। বাঙ্গালী কায়স্থে পাঞ্জাবী কায়স্থে বিবাহ বাঙ্গলা দেশের ভট্টাচার্য্য মহাশয়েরা অনুমোদন করবেন না জেনে, সেই দেশেই আৰ্য্যসমাজের আশ্রয়ে আমি ঔকে বিবাহ করি। আৰ্য্যসমাজীরাও হিন্দু, কারণ তাঁরা বেদকে অশ্রান্ত বলেই স্বীকার করেন। ছুটি ফুরালে, আমি যখন অলকার মাকে নিয়ে কৰ্ম্মস্থানে ফিরে আসি, তখনও উনি বাঙ্গালা শেখেন নি। ঔকে অ-বাঙ্গালী দেখে, কুলোকে আমার নামে সে সময়ে মিথ্যা গুজব রটিয়েছিল বটে, কিন্তু আমি কোনও দিন তা গ্রাহ্য করিনি। অলকার মা বাঙ্গালী কায়স্থ নন, আর আমাদের বিবাহে বাঙ্গালী ভট্টাচার্য্য পৌরোহিত্য করেন নি, এই কথাটা আমার স্ত্রীর উচিত ছিল কালই তোমায় জানানো। সমস্ত জেনে শুনে যদি তুমি অলকাকে বিবাহ কর ত করবে, নচেৎ তোমায় ঠকিয়ে জামাই করা আমি উচিত মনে করিনে; সেই কথা জানাইতেই আজ

সকালে আমি তোমার বাসায় গিয়েছিলাম। তুমি একটু বস, অলকার মাকে সব কথা আমি বলে আসি ; কারণ ও বেলকার ঘটনা শুনে বাড়ীস্বদ্ধ সবাইকের মন খারাপ হয়ে রয়েছে।” •

• সকলের মনই ভাল হইয়া গেল। বিনোদ ও অলকার মন সকলের চেয়ে বেশী ভাল হইল। অগ্রহায়ণ মাসে, এই দুই জনের মন এত ভাল হইল যে, সোহাগে গলিয়া আদরে মিশিয়া দুইটি মন একটি হইয়া গেল।

কুকুমকুমারীর গুপ্তকথা

“ছোট বউ—ও ছোট বউ ! ছোট বউ কৈ ? ডাক না তাকে ।
থাবে কখন, রাত কি হয় নি ?”

জ্যৈষ্ঠমাস, পল্লীগ্রামের রাত্রি এক প্রহর অতীত হইয়াছে ।
কর্তাদের এবং বাড়ীর অন্তঃস্থ পুরুষগণের আহার সমাপ্ত হইয়াছে ।
রান্নাঘরে বসিয়া বড় গিল্লী হরিনামের মালা ফিরাইতে ফিরাইতে ঐ
কথাগুলি বলিলেন । বড় মেয়ে সাবিত্রী বলিল, “কোথায় পড়ে,
ঘুমুচ্ছে বোধ হয় । যা ত সুরি, খুঁজে তাকে উঠিয়ে নিয়ে আয় ।
সুরবালা গজর্ গজর্ করিতে করিতে ছোট বউকে খুঁজিতে গেল ।

একতালা, দোতালা, তিনতালার ঘরে ঘরে, বারান্দায় বারান্দায়,
নানা সম্ভব অসম্ভব স্থানে সুরবালা ছোট বউকে খুঁজিয়া বেড়াইল,
কিন্তু কোথাও তাহাকে দেখিতে পাইল না । অবশেষে ছাদের
সিঁড়িতে উঠিল—ছাদ অন্ধকার—দ্বারের নিকট দাঁড়াইয়া সভয়ে
অল্পক্ষণ কণ্ঠে হাঁকিল—“ছোট বউ, ও ছোট বউ !—কুমি, ও কুমি !
কুমি লো !—পোড়ারমুখী হতভাগী বাঁদরী—কৈ, এখানেও ত
দেখছিলেন !”—বলিয়া সে নীচে নামিয়া গিয়া ছোট বউয়ের ‘অপ্রাপ্তি
সংবাদ’ সকলকে জানাইল ।

শুনিয়া, গৃহিণীরা বড়ই উদ্বিগ্ন হইয়া উঠিলেন। মেবা গিন্নী—
কুমি বা কুকুমুমারী যাহার পুত্রবধূ—নিজে গিয়া বাড়ীময় অন্বেষণ
করিতে লাগিলেন। কিন্তু কোথাও তাহাকে পাইলেন না। বাড়ীর
সকলকে দ্রিষ্টাসাবাদ করা হইল, কিন্তু সন্ধ্যার পর ছোট বউকে
দেখিয়াছে এমন কথা কেহই বলিল না। তখন বড় গিন্নী বলিলেন,
—“ও মা, এ কি সর্বনাশ হল! আমার যে বুক কাঁপছে!”

বধূদের, কন্যাদের মুখ শুকাইয়া গেল। গৃহিণীদের মনে একটা
বোর আশঙ্কার ছায়া পড়িল। একজন উঠানের চারিদিকে ঘুরিয়া
আসিয়া বলিল, “সদর দরজা, দুই গিড়কী দরজা—সবই ত বন্ধ!”

ছোট গিন্নী বলিলেন, “রাত দশটা বাজে, দরজা বন্ধ হবে না?
সন্ধ্যার সময় ত সব দরজাই খোলা ছিল, তখন থেকেই ত সে বাড়ীতে
নেই!”

কর্তারা আহ্বাস্তে তখন নিজ নিজ শয়নকক্ষে প্রবেশ করিয়া-
ছেন। বয়স্ক পুত্রগণ কেহ কেহ বা শয়ন করিয়াছে, কেহ কেহ বা
বৈঠকখানা ঘরে বসিয়া বন্ধুবান্ধবসহ তখনও তাস পাশা চালাইতেছে।
গৃহিণীরা স্থির করিলেন, কর্তাদের খবর দেওয়া উচিত। বড় গিন্নী
তখন হরিণামের মালা হস্তে, দ্বিতলে স্বীয় শয়নকক্ষ অভিমুখে গৃহস্থান
করিলেন।

এই ছোট বউয়ের নাম কুকুমুমারী—বয়স এখন ১৬ বৎসর!
আজ তিন বৎসর সে শ্বশুরঘর করিতেছে। পিতার নাম হারাদন

বসু, পার্শ্ববর্তী গ্রামে তিনি একজন সম্পন্ন গৃহস্থ। এইটি তাঁহার
 একমাত্র কন্যা।

বাপ আদর করিয়া নেয়ের নাম রাখিয়াছিলেন কুম্ভকুমারী।
 কিন্তু গোড়াতেই যাহার কু, (মাঝেও কু) সে কি কখনও সু হইতে
 পারে? এই কারণেই হটক, অথবা জন্ম নন্দনের ফলেই হটক,
 বাল্যকালেই কুম্ভ অত্যন্ত দুঃ ও দুর্দমনীয় হইয়া উঠিয়াছিল! পাড়ার
 পুকুরে পুকুরে ছিপ হাতে করিয়া সে মাছ ধরিতে ভালবাসিত,
 ভাইদের খুড়ি নাটাই লইয়া ছাদে উঠিয়া বুড়ি উড়াইত, প্রতিবেশীদের
 বাগানে বেড়া ভাঙ্গিয়া ঢুকিয়া স্বচ্ছন্দে গাছে উঠিয়া ফল চুরি করিয়া
 খাইত। এই সকল কারণে পিতামাতার নিকট কুম্ভকে সময়ে
 প্রহারও খাইতে হইত কম নয়—এমন কি তার নামে পাড়ায় এই
 ছড়াই ওড়াইত হইয়া উঠিয়াছিল—

কুম্ভকুম্

তোয় পিঠে দুম্ দুম্ ।

একদিন এক সমবয়সী বালক, কুম্ভকের সহিত বিবাদ করিয়া
 উপরিউক্ত ছড়াটি বলিতে বলিতে এবং হস্তদ্বারা দুম্‌দুমনের ইঙ্গিত
 করিতে করিতে তাহাকে ধেপাইতে থাকে—কুম্ভকুম্ ছুটিয়া গিয়া
 তাহার গলা ধরিয়া, খুব খানিকটা ঝাকানি দিয়া, তাহাকে এমন
 পাক্সা দাঘিয়াছিল যে, ছেলেরা টাল খাইয়া পড়িয়া যায় এবং তাহার
 নাক হইতে বার বার করিয়া রক্ত বরিতে থাকে। এই সকল ব্যাপার

দেখিয়া শুনিয়া গ্রামের প্রবীণারা কুকুম সখ্যে যে সকল ভবিষ্যদ্বাণী করিতেন, তাহা স্মৃতিসঙ্গত নহে ; এবং সেগুলি কুকুমের পিতা মাতার কর্ণে যে মধুবর্ষণ করিত না ইহাও নিঃসংশয়ে বলা যায়।

••• পিতামাতার মেহ আদরে প্রতিপালিত হইয়া কুকুম ওরফে কুমি ক্রমে একাদশ বর্ষে পদার্পণ করিল। তখন তাহার বয়স পাত্র আবেষণ আরম্ভ হইল। মেয়েটি দেখিতে গ্রামবর্গ, তবে মুখশ্রী ভাল! চুল বেশ ঘন ও বড়। একমাত্র মেয়ে, বেশী দূরে বিবাহ দিতে পিতামাতার মন সাঁরল না। বৎসবখানেক খোঁজাখুঁজির পর একটি সুপাত্র মিলিল, পার্শ্ববর্তী গ্রামের যত্নাথ মিত্র মহাশয়ের পুত্র নিশ্চলকুমার। ছেলেটি গ্রামা বিদ্যালয় হইতে প্রবেশিকা পরীক্ষায় উত্তীর্ণ হইয়া তখন কলিকাতায় কলেজে এক-এ পড়িতেছে। দেখিতে শুভিতও ভাল। শুভদিনে শুভ-লয়ে বিবাহ হইয়া গেল। কুমি কাঁদিতে কাঁদিতে পাকীতে চড়িয়া স্বশুরবাড়ী গেল।

কুকুমের স্বশুরবাড়ী বৃহৎ বাড়ী। বাড়ীর পশ্চাতে প্রাচীর ঘেরা বৃহৎ বাগান। তাহার মধ্যে পুরদিগী ও বহুজাতীয় ফলবান্ বৃক্ষ। স্বশুরেরা তিন ভাই—হরিনাথ, যত্নাথ ও কুমুদনাথ—তিন ভাই একত্র আছেন। তিন গৃহিণী, তাঁহাদের প্রত্যেকের পুত্র, কন্যা, বধু, নাতি, নাতিনী ত আছেই, তাহা ছাড়া অত্যন্ত আর্থীয় স্বজনেরও অভাব নাই। চাষবাসও বিস্তৃত পরিমাণে আছে—চাকর কৃষাণ প্রভৃতির সংখ্যাও অল্প নহে। চাষের বসন্ত ও দোহাল গাই রাখিবার সুবিস্তীর্ণ পাকা গোহাল বাড়ীটি নিম্নাংশে

যাহা ব্যয় হইয়াছিল, তাহাতে অনায়াসে একটি ছোট খাট গৃহস্থ পরিবারের আবাস বাটী নির্মিত হইতে পারে।

ঋগুরবাড়ীতে এই জনবহুলতা দেখিয়া কুসুমের প্রাণ যেন হাঁফাইয়া উঠিল। বউ সাজিয়া ঘোমটা দিয়া চুপ করিয়া বসিয়া থাকিও তাহার পক্ষে বড়ই বিড়ম্বনা হইয়াছিল। তাই সে তৃতীয় দিন বিকালে, কাহাকেও কিছু না বলিয়া, এক স্নযোগমত ঋগুরালয় হইতে চম্পট দিল। পথঘাট তাহার অপরিচিত নহে, —প্রায় দেড় ক্রোশ হাঁটিয়া সন্ধ্যার প্রাক্কালে পিতৃভবনে গিয়া উপস্থিত হইল।

যক্ষ্মাক্ত কলেবরে, ধূলিধূসরিত বসনে মেয়েকে এই ভাবে গৃহে আসিতে দেখিয়া তাহার পিতামাতা হাসিবেন কি কাঁদিবেন, অথবা রাগই করিবেন, কিছুই স্থির করিতে পারিলেন না। বেহাই বাড়ীর হুশিচন্তা দূরীকরণার্থ তৎক্ষণাৎ লোক ছুটাইয়া দিলেন। অপর একজন গোরুর গাড়ী আনিতে গেল। স্বামী স্ত্রী উভয়ে মিলিয়া কত সঙ্গ লইয়া পুনরায় তাহাকে ঋগুরবাড়ী পৌছাইয়া দিলেন। কুসুমের পিতা তাহার ঋগুরগণের নিকট এবং মাতা অন্তঃপুরে গৃহিণীদের কাছে অনেক অনুনয় বিনয় ও তোষামোদ করিয়া তাঁহাদের রাগরোধ মিটাইয়া বাড়ী ফিরিয়া আসিয়াছিলেন।

সেই কুসুম এখন ষোল বছরের হইয়াছে। সেই এখন এ বাড়ীর ছোট বউ পদবী লাভ করিয়াছে। বয়োবৃদ্ধির সঙ্গে তাহার হুষ্ঠান অনেকটা কমিয়াছে বটে—কিন্তু এখনও সে আদর্শ

হিন্দু কুলবধু হইয়া উঠিতে পারে নাই। এই পাড়াতেই তাহার ছই তিনটি সখী আছে তাহারা এ গ্রামেরই মেয়ে। তাহাদের সঙ্গে কুমির বড় ভাব—তাহারা সর্বদাই এ বাড়ীতে আসে। কুসুমও মাঝে মাঝে খাণ্ডীর বিনা অনুমতিতে তাহাদের বাড়ী বেড়াইতে যায়। এ জন্ত তাহাকে যথেষ্ট বকুনি খাইতে হয়, কিন্তু কিছুতেই তাহার এ কু-অভ্যাস দূর হইল না।

বৈশাখের শেষে গ্রীষ্মের ছুটিতে কুসুমের স্বামী নিম্নলিখিত বাড়ী আসিল। কয়েক দিন পরে, এই পাড়া বেড়ানো লইয়া নিম্নলিখিত তাহাকে খুব বকিল। স্বামী জীতে রীতিমত বাগড়া হইয়া গেল। নিম্নলিখিতের এক বন্ধু তখন দার্জিলিং বায়ুপরিবর্তন করিতে গিয়াছিল। বাপ মার মত করিয়া রাগের ভরে নিম্নলিখিত ছই সপ্তাহের জন্ত দার্জিলিং চলিয়া গেল।

ইহার তিনটি দিন পরেই বাড়ীতে এই বিষয় বিজ্ঞাত! ছোট বউ কোথায় গেল ?

৩

দ্বিতলে উঠিয়া স্বামী সাক্ষাৎ জন্ত বড় গিল্লী শয়ন কক্ষের দ্বারে গিয়া দাঁড়াইলেন। পালঙ্কের নিম্নে জল চোকির উপর গুড়গুড়িতে তামাক সাজা রহিয়াছে—কলিকা হইতে অল্প অল্প ধূম উৎপন্ন হইতেছে, কিন্তু পালঙ্কে কেহ নাই। গৃহিণী দেখিলেন, সেই ঘরের কোণে একটি আমের ঝুড়ির নিকটে বড়কর্তা বসিয়া আছেন, তন্মধ্যস্থ আমগুলি বাহির করিয়া আলোয় ধরিয়া একে

একে পরীক্ষা করিতেছেন, এবং সুপক্ক গুলি পৃথক্ করিয়া রাখিতেছেন। এই আম বড় কর্তার বড় যত্নের—গোহাল বাড়ীর সংলগ্ন যে গাছটি আছে, এগুলি তাহারই ফল। বাগানের কোনও গাছের আম এগুলির তুল্য সুস্বাদু ও সুমিষ্ট নহে। এ আমগাছে কাহারও হাত দিবার পর্যন্ত ছকুম নাই। কর্তা স্বয়ং দাঁড়াইয়া থাকিয়া উপযুক্ত ফলগুলি পাড়াইয়া, নিজ শয়ন কক্ষে গুদামজাত করিয়া রাখেন এবং স্বহস্তে সাবধানে বিশেষ বিবেচনা পূর্বক্ যথাযোগ্য পাত্রে বণ্টন করিয়া দেন।

গিল্লী মুহূর্তকাল কর্তার কার্য্য দেখিয়া, ভিতরে প্রবেশ করিয়া অল্পচক্ষুরে বলিলেন, “ওগো, এখন আম বাছা রাখ, বড় বিপদ।”

আত্ম-নির্বাচনে কর্তা এমনই তন্ময় হইয়াছিলেন যে জীবর কথা তাঁহার কর্ণগোচরই হইল না।

গৃহিণী এবার একটু নিকটস্থ হইয়া বলিলেন, “ওগো শুন্হু? এ দিকে যে সর্ব্বনাশ হয়ে গেল!”

কর্তার তখন চমক ভাঙ্গিল। “কেন কি হয়েছে?” বলিয়া তিনি উঠিয়া দাঁড়াইলেন।

গৃহিণী পুনরুক্তি করিলেন, “সর্ব্বনাশ হয়েছে। ছোট বউকে পাওয়া যাচ্ছে না।”

কর্তা নিকটে সরিয়া আসিলেন। বলিলেন, “বল কি? কখন থেকে?”

গৃহিণী বলেন, “সন্ধ্যার আগে ত বাড়ীতেই ছিল। বাড়ীময়

খোঁজা হয়েছে, কোথাও সে নেই। সকলকেই জিজ্ঞাসা করা হয়েছে, সন্ধ্যার পর আর কেউ তাকে দেখে নি।”

কর্তা গুম্ হইয়া, নিজ কেশবিরল মস্তকে ধীরে ধীরে হস্ত সঞ্চালন করিতে করিতে দুই মুহূর্তকাল চিন্তা করিলেন। শেষে বলিলেন, “গা ধূতে গিয়েছিল কি? একনা গা ধূতে গিয়ে যদি ডুকে টুবে গিয়ে থাকে! কার সঙ্গে গা ধূতে গিয়েছিল খবর নিয়েছে?”

গৃহিণী বলিলেন, “না, তা ত নিইনি।”

কর্তা গম্ভীর স্বরে বলিলেন, “হুঁ:—একেই বলে জীবুদ্ধি! যাও, সেইটে আগে ভাল করে জানো।”

“আচ্ছা সবাইকে জিজ্ঞাসা করে’ দেখি।”—বলিয়া গৃহিণী প্রস্থান করিতেছিলেন। কর্তা বলিলেন, “আর শোন। যত্নকে, কুমুদকে আমার কাছে ডেকে দিয়ে যাও।” বলিয়া হরিনাথ বাবু বিছানায় বসিয়া উত্তেজিত চিত্তে গুড়গুড়ি টানিতে লাগিলেন।

এই তালায় অপর প্রান্তে মেঝেকর্তা ও ছোট কর্তার শয়ন গৃহ। বড় গিন্নী মেঝে কর্তাকে খবর দিয়া, ছোট দেবরের ঘরে প্রবেশ করিয়া দেখিলেন, তিনি বিছানায় পড়িয়া এক মনে একখানি বহি পড়িতেছেন। বাঙ্গালা উপন্যাসের ইনি একজন অক্লান্ত পাঠক—স্থানীয় লাইব্রেরীর সেক্রেটারি। “চমকপ্রদ” অথবা “লোমহর্ষণ” কোন উপন্যাসের বিজ্ঞাপন দেখিলেই ইনি তৎক্ষণাৎ লাইব্রেরীর জন্ত তাহা অর্ডার দিয়া থাকেন, এবং ভিপি আসিলে প্রথমে স্বয়ং তাহার রসস্বাদ গ্রহণ করিয়া তার পর লাইব্রেরী

ভুক্ত করেন। বড়গিন্নী ইঁহাকে সংবাদটা দিয়া, নিজে আসিয়া সকল বধু সকল কন্যাকে জিজ্ঞাসা করিলেন। কিন্তু আজ কোনও দলের সঙ্গে ছোট বউ যে গা ধুইতে গিয়াছিল এমন সংবাদ পাওয়া গেল না।

তিন কর্তা তখন একত্র হইয়া পরামর্শ করিতে লাগিলেন। বয়স্ক পুত্রেরাও আসিয়া যোগদান করিল। গৃহিনীরা, নবীনারা বাহিরে বসিয়া শুনিতে লাগিলেন।

বড়কর্তা বলিলেন, গা ধুইতে গিয়া খুব সম্ভব সে খিড়কীর পুকুরে ডুবিয়া গিয়াছে ; একা গিয়াছিল, তাহাতেই এ ছঃসংবাদ এতক্ষণ কেহ জানিতে পারে নাই। অথবা হয়ত বাগানে তাহাকে সাপে কামড়াইয়াছে, সেইখানেই সে মরিয়া পড়িয়া আছে। বাগানটা একবার ভাল করিয়া দেখা আবশ্যক।

পুত্রগণের মধ্যে সাহসী ও বলিষ্ঠ দুইজন, তখনই বাঁশের লাঠি ও হারিকেন লগ্নন লইয়া বাগানে ছুটিল। বাগান পুকুর ঘাটের চারিপাশ তন্ন তন্ন করিয়া খুঁজিয়া আসিল, কোথাও কোনও চিহ্ন নাই।

ছোটকর্তা বলিলেন, তাঁহার সন্দেহ হয়ত কোনও ছবৃত্ত বদমায়েস, পাঁচিল টপকাইয়া বাগানে আসিয়া তাঁহাকে বলপূর্ব্বক ধরিয়া লইয়া গিয়াছে। কিন্তু এটা কেহই সম্ভব বলিয়া মনে করিলেন না।
মেঝকর্তা—কুসুম বাঁহার পুত্রবধু—বলিলেন, “আমর বোধ হয়

ভুলি, কি খেঁদি, কি মনোরমা, পাড়ার কারু বাড়ীতে সন্ধ্যার আগে সে বেড়াতে গিয়েছিল, কোনও অভাবনীয় কারণে আসতে পারে নি। কিম্বা, হয়ত পালিয়ে বাপের বাড়ী চলে গেছে।”

অনেকেই বলিলেন, এতদিন পরে, আবার পলাইয়া বাপের বাড়ী যাইবে ইহা সম্ভব কি? তবে ভুলি খেঁদি বা মনোরমাদের বাড়ী গিয়া থাকিতে পারে। কিন্তু সেখানে আটকাইয়া পড়ারই বা কি কারণ ঘটিতে পারে? যদি হঠাৎ অসুখ বিসুখ করিয়া থাকে, তবে তাহারা কি এতক্ষণ খবর দিত না?

তিন কর্তায় এবং বড় গিন্নীতে মিলিয়া অনেকক্ষণ পরামর্শ হইল, কিন্তু এই রাত্রে, “আমাদের ছোট বউ তোমাদের বাড়ীতে আছে কি?”—এ সন্ধান লইতে প্রতিবেশীদের গৃহে লোক পাঠানো কাহারও মত হইল না—কারণ, আর একটা অব্যক্ত আশঙ্কা সকলেরই মনে জাগিতেছিল, এখন এ সম্বন্ধে কোনওরূপ গোলযোগ করা নিতান্ত নির্বুদ্ধিতার কার্য্য হইবে। তবে কুকুমের পিত্রালয় গোপনে লোক পাঠাইতে আপত্তি নাই—এবং তাহা পাঠানো হইল। ডিটেক্টিভ-উপস্থাস-ভক্ত ছোট কর্তা বারম্বার বলিতে লাগিলেন, নিশ্চয়ই ছোট বউ কোনও গুপ্তা বা ডাকাইতের হাতে পড়িয়াছে; পুলিশে সংবাদ দেওয়া আবশ্যিক; কিন্তু তাঁহার মতে কেহই মত দিল না।

রাত্রি দুইটার সময় কুকুমের পিত্রালয় হইতে লোক ফিরিয়া আসিয়া সংবাদ দিল, কুকুম সেখানে যায় নাই।

সে রাত্রে বাড়ীর অনেকেই আপন শয়ান গেল না। যে যেখানে পাইল পড়িয়া রহিল। বিষম ছশ্চিন্তা ও মানসিক উদ্বেগে রাত্রি শেষ হইল।

শেষ রাত্রে বড় কৰ্ত্তা মহাশয় ঘুমাইয়া পড়িয়াছিলেন। হঠাৎ তাঁহার নিদ্রাভঙ্গ হইল—ছোট ভাই কুমুদ তাঁহাকে ডাকিতেছেন “বড়দা—বড়দা উঠুন। ছোট বউয়ের সন্ধান পাওয়া গিয়েছে।”

বড়কৰ্ত্তা ধড়মড় করিয়া উঠিয়া বসিয়া বলিলেন, “অ্যা—অ্যা? কোথা?”

ছোট কৰ্ত্তা মুখখানা পেচকের মত গম্ভীর করিয়া বলিলেন, “আমার কথা তখন কেউ শুনলেন না। কে তাকে হত্যা করে, গোয়ালবাড়ীর ছাদের উপর লাস তুলে রেখে চলে গেছে।”

“অ্যা! লাস তুলে রেখে গেছে! খুন করেছে? কি সৰ্কানাশ! —তুমি কি করে জানলে?”

ছোট কৰ্ত্তা বলিলেন, “এই মাত্র আমি গাড়ুটি হাতে করে, মুখ হাত ধোবার জন্তে পুকুরবাটের দিকে যাচ্ছিলাম। গোয়ালবাড়ীর কাছে গিয়ে দেখি, ছাদের আলসের উপরটায় একখানা শাড়ীর আঁচল ভোরের হাওয়ায় ফুর ফুর করে উড়ছে। পাড় দেখেই আমি চিনতে পারলাম, ও শাড়ী ত গত মাসে আমিই ওর জন্তে কিনে এনেছিলাম।”

বড়কৰ্ত্তা কাপড় পরিতে পরিতে পালক হইতে নিম্নে অবতরণ

করিয়া বলিলেন, “গুধু শাড়ী দেখেছ? তবে লাসের কথা বল্লে যে!”

ছোট কৰ্ত্তা অত্যন্ত বিজ্ঞোচিত ভাব ধারণ করিয়া কহিলেন, “গুধু কাপড়খানা ছাদের উপর উঠবে কি করে বড়দা? কাপড় বখন রয়েছে, তখন লাসও নিশ্চয়ই ছাদের উপর আছে এই সবই ত রু কিনা! লাসটা আলসের জন্তে দেখা যাচ্ছে না।”

“চল চল, ছাদে উঠে ত দেখা যাক।”

ছোটকর্ত্তা বলিলেন, “না দাদা, অমন কাযটি করবেন না। এখন প্রথম কর্ত্তব্য পুলিশে খবর দেওয়া। লাস যে অবস্থায় আছে ঠিক সেই অবস্থায় পুলিশে এসে দেখুক। এই হচ্ছে নিয়ম—তবে ঠিক সুরতহাল হবে, ডিটেক্টিব এসে ক্রমে খুনের কিনারা করবে। ছাদে এখন আমাদের কারু ওঠা উচিত নয়।”

বড়কর্ত্তা বলিলেন, “আরে না না—কি বল তুমি! চল চল, ছাদে উঠে আগে আমরা দেখি গিয়ে।” বলিয়া কর্ত্তা গুধু পায়েই ছুটিলেন।

বাড়ীর অপর কেহ তখনও জাগে নাই—এমন কি ভৃত্যেরাও ঘুমাইতেছে। মেঝে ভাইকেও জাগাইয়া তিনজনে উঠানে নামিলেন। উঠান পার হইয়া গোহাল বাড়ীর নিকটবর্ত্তী হইয়া, সকলে দেখিলেন, ছাদের আলিসার উপর একখানা শাড়ীর প্রান্তভাগ বাতাসে উড়িতেছে বটে।

কিছু দূরেই একখানা মই পড়িয়াছিল। মেঝেকর্ত্তা সেখানা টানিয়া আনিয়া, ছাদে লাগাইয়া তাহাতে উঠিয়া

পড়িলেন। তিনি উপরে উঠিলে, বড়কর্তা জিজ্ঞাসা করিলেন,
“কি দেখছ?”

মেঝাকর্তা বলিলেন, “ছোট বউমাই ত বোধ হচ্ছে।”

ছোটকর্তা জিজ্ঞাসা করিলেন, “রক্তের চিহ্ন আছে?”

মেঝাকর্তা উত্তর করিলেন, “কৈ, সে রকম ত কিছু দেখছি নে।”

“ও বুঝেছি, তা হলে অস্বাধাত করে নি। বিষ প্রয়োগ কিম্বা
গলা টিপে মেরেছে।”—বলিয়া তিনিও মই বাহিয়া ছাদে উঠিয়া
পড়িলেন। পশ্চাৎ পশ্চাৎ বড়কর্তাও কষ্টেস্থষ্টে উঠিলেন।

তিনজনে দাঁড়াইয়া লাসের পানে একদৃষ্টে চাহিয়া রহিলেন।
হঠাৎ বড়কর্তা বলিলেন, “ওহে, নিশ্চয় পড়ছে যে!” বলিয়া তিনি
উচ্চস্বরে ডাকিলেন, “ছোট বউমা! ও ছোট বউমা!”

এই শব্দে, লাস পাশ ফিরিল, চক্ষু মেলিল, এবং তিন স্বপুরুষকে
তথায় সমবেত দেখিয়া, ধড়মড় করিয়া উঠিয়া বসিয়া, মাথায় ঘোমটা
টানিয়া দিল।

বড়কর্তা বলিলেন, “নারায়ণ! নারায়ণ! শ্রীগুরু রক্ষা করেছেন।
ওঃ”—বলিয়া হুই হস্তে মস্তক ধারণ করিয়া সেইখানেই বসিয়া পড়ি-
লেন। বসিয়া ছাদের ইতস্ততঃ দৃষ্টিপাত করিতে লাগিলেন।
দেখিলেন বহুসংখ্যক আমের আঁঠি ও খোলা পড়িয়া রহিয়াছে—
কতক বা গুরু ও পুরাতন, কতকগুলি বা সগোভুক্ত। দেখিয়া তিনি
এই “গুপ্ত রহস্যের” সূত্র পাইলেন।

মেঝাকর্তা ক্রোধের স্বরে বলিলেন, “বউমা, তুমি এখানে এলে
কি করে?”

বউ নীরব—বেশী করিয়া ঘোমটা টানিয়া দিল।

বড়কর্তা তখন উঠিয়া দাঁড়াইলেন। বলিলেন, “সে সব কৈফিয়ৎ পরে হবে এখন। আমি সমস্তই বুঝতে পেরেছি। এখন তোমরা সব নামো দেখি। আমিও নেমে যাচ্ছি। তারপর বউমা, তুমি আস্তে আস্তে, খুব সাবধানে নেমে এস। কিছু ভয় নাই তোমার মা! কেউ তোমায় বকবে না, কিছু বলবে না। বাড়ীর লোক এখনও কেউ উঠেনি—এই বেলা নেমে এস, কেউ দেখতে পাবে না।”

মেঝেকর্তা ছোটকর্তা নামিলেন, তৎপশ্চাৎ বড়কর্তাও নামিয়া গেলেন। মই নামিতে বউমা পাছে পড়িয়া যান, এই আশঙ্কায় মেঝা কর্তা একটু আড়ালে দাঁড়াইয়া অপেক্ষা করিতে যাইতেছিলেন। বড়কর্তা তাঁহার হাত ধরিয়া টানিয়া বলিলেন, “এস এস কিছু ভয় নেই। ও সব ওদের অভ্যাস আছে।” ভাইদের লইয়া তিনি গৃহের ভিতর প্রবেশ করিলেন।

বড়দাদার আচরণ ও কথাবার্তা উভয় ভ্রাতার নিকট গ্রাহ্য-লিকার মত বোধ হইতেছিল। তাঁহারা অবাক হইয়া, প্রশ্নপূর্ণ দৃষ্টিতে জ্যেষ্ঠের পানে চাহিয়া রহিলেন। বড় কর্তা তখন বলিলেন, “কাল বিকেলবেলা, আমি যখন বাগানে যাচ্ছিলাম, দেখলাম, মইখানা গোয়ালের পিছনে লাগানো রয়েছে। দেখে বন্সাম, মইখানা এখানে কে এনে রাখলে রে! কেঁচাকে ডেকে সেখানা সরিয়ে ফেললাম। তখন কি জানি যে ছোট বউমা সেই মই দিয়ে ছাদে উঠে বসে আছেন!”

এত বড় একটা “রহস্য” এত সহজে নীমাংসা হইয়া যায় দেখিয়া ছোটকর্তা ক্ষুব্ধ স্বরে জিজ্ঞাসা করিলেন, “মই দিয়ে ছোট বউনা গোয়ালের ছাদেই বা উঠতে যাবেন কেন ?”

বড় কর্তা বলিলেন, “কেন ? আমার পিণ্ডি চটকাতে, আর কেন ? আম খেতে উঠেছিল বোধ হয়। ছাদময় ত আমার খোলা আর আঁঠি ছড়ানো রয়েছে দেখলাম।”

এতক্ষণে বেশ ফর্সা হইল। গৃহিণীরা জাপিসেন, বাড়ীর সকলে জাপিল ; সকলে ব্যাপার কি জানিবার জন্য ছোটবউকে ঘিরিয়া বসিল। বড়কর্তার আশ্বাস সত্ত্বেও, বকুনি যে তাহাকে একেবারেই পাইতে হইল নী এমন নহে।

ক্রমে প্রকাশ পাইল, গত দিবস বিকালে মুখুন্দের মনোরমা এবং কুসুম, দুজনে আম খাইবার জন্য গোয়ালের পশ্চাতে মই লাগাইয়া ছাদে উঠিয়াছিল। গোটাকতক আম খাইয়া মনোরমা নামিয়া যায়, কুসুম বলে, এই আমটা খেয়ে নামছি। নামিবার সময় সে আর মই পায় নাই। লজ্জায় কাহাকেও ডাকিতেও পারে নাই। গাছের অনেকগুলো ডাল, বনপল্লব ও প্রচুর ফলের ভারে অবনত হইয়া গোয়ালের ছাদ প্রায় স্পর্শ করিয়াছে। ডালপালা সরাইয়া ছাদের সে কোণটায় কেহ গিয়া বসিলে, নিম্নের লোক তাহাকে দেখিতে পায় না। যতক্ষণ আলো ছিল, ততক্ষণ কুসুম সেই আম ঝোপের ভিতর লুকাইয়া বসিয়া ছিল। বেশ অন্ধকার হইলে, আবার ডালপালা সরাইয়া বাহির হইয়া খোলা ছাদে আসে। অনেক রাত্রি অবধি সেখানে চুপ করিয়া বসিয়া

শাকিবার পর, শেষে ঘুমাইয়া পড়িয়াছিল। জেরায় ইহাও প্রকাশ
 পাইল যে শুধু কুসুম ও মনোরমা নহে, এবাড়ীর অত্যাচার মেয়ে ও
 বধূরাও মাঝে মাঝে এইরূপ ভাবে ছাদে উঠিয়া গোপনে আত্মভঙ্গ
 করিয়া থাকে। তবে এদিন যে কুসুম ও মনোরমা ডাম খাইতে
 গিয়াছিল, একথা তাহারা জানিত না।

হীরালাল



হীরালাল জাতিতে ডোম। বুদ্ধ হইয়াছে, বয়স ৬০ বৎসরের কম হইবে না, আকার খর্ব, দেহখানি বোর কৃষ্ণবর্ণ, অধিক স্থূলও নহে কৃশও নহে। কিন্তু এত বয়স হইলেও, তাহার দেহে এখনও বিলক্ষণ বল আছে; একদিনে সে অনায়াসে ১০ ক্রোশ পথ চলিতে সমর্থ, তাহার চক্ষুর জ্যোতি আজিও অটুট আছে; প্রদীপের আলোকেও ছুঁচে হতা পরাইতে পারে।

গ্রামখানির নাম মাণিকপুর। গ্রামের যেটা ডোমপাড়া, যেখানে অত্যাগত ডোমেদের বাস, সেখানে হীর থাকে না। গ্রামের অপর প্রান্তে, শ্মশান হইতে অল্প দূরে, একখানি মাটির ঘরে সে একাকী বাস করে। তাহার জীপুত্র পরিবার কেহই নাই; একে একে সকলেই মরিয়াছে; লোকে বলে ভূতেদের সহিত হীরর বড়বন্দ আছে। শ্মশান হইতে ভূতেরা গভীর রাত্রিতে তাহার সহিত সাক্ষাৎ করিতে আসে, কথাবার্তা কয়। সেই কারণেই হীর নাকি ডোমপাড়ায় থাকে না। এবং কথাবার্তার অসুবিধা হয় বলিয়াই হীরর সম্মতিক্রমে সেই ভূতেরাই নাকি উহার জীপুত্র কণ্ঠকে একে একে মারিয়া ফেলিয়াছে; এবং সেই ভয়েই,

ডোমপাড়ায় হীরক যে সকল আত্মীয় স্বজন আছে, তাহারা কেহই আসিয়া হীরক সহিত বাস করিতে সম্মত নহে। কিন্তু আবার কেহ কেহ বলে, হীরক এই ভূত অপবাদ নিতান্ত মিথ্যা কথা; তবে সে একজন গুণী লোক বটে। অনেক রকম ঔষধ তাহার জানা আছে, মদ্রতন্ত্রে বাড়ফুঁকেও সে ওস্তাদ। অমাবস্তার রাত্রে জন্মলে সে ঔষধ তুলিতে যায়; গোথুরা সাপ মারিয়া তাহার বিষ নিষ্কাশিত করিয়া লয়—ইত্যাদি। যাহা হউক, ইহা সত্য যে পাঁচখানা গ্রামের ছোটলোক, বিশেষ বিশেষ রোগের জন্য হীরক কাছে বাড়াইতে অথবা ঔষধ লইতে আসে।

হীরক ঘরখানির দুই ধারে বাঁশের দুইটি মাচা বাঁধা আছে, একটিতে রাত্রে শয়ন করে, অত্রটিতে হাঁড়ি কলসীতে তাহার চাল ডাল এবং ঔষধপত্র থাকে। বাহিরের দাওয়ার একদিকে তাহার উনান পাতা আছে। অপর দিকে সে আপন জাতিকর্ম করে; কুলা ডালা ধুচুনি বুনিয়া, গ্রামে গিয়া বিক্রয় করিয়া আসে।

রাত্রি তখন প্রায় ১১টা। শ্রাবণ মাস, শুক্লপক্ষের ত্রয়োদশী; কিন্তু আকাশ মেঘাচ্ছন্ন বলিয়া চারিদিক অন্ধকার। মাঝে মাঝে টিপ টিপ করিয়া বৃষ্টি হইতেছে, আবার বন্ধ হইয়া বাইতেছে। হীরক ঘরের মধ্যে প্রদীপের আলোয় বসিয়া, একটা ধুচুনি বোনা শেষ করিতেছিল। দ্বার খোলা ছিল, প্রদীপের খানিকটা আলো দাওয়ার উপর গিয়া পড়িয়াছিল। হীরক হঠাৎ বাহিরে চাহিয়া দেখিল স্ত্রীলোকের মত কাপড় পরা কে একজন মানুষ তাহার দাওয়ায় দাঁড়াইয়া আছে। হীরক জিজ্ঞাসা করিল, “কে গা?”

মানুষটী আস্তে আস্তে ঘরের ভিতরে আসিয়া দাঁড়াইল। পাগ-
ধানে একখানি কক্সাপেড়ে বিলাতী শাড়ী, ঘোমটায় মুখখানি
ঢাকা। হীরু আবার জিজ্ঞাসা করিল, “কে গা তুমি?”

আগন্তুক আস্তে আস্তে সেখানে বসিল। বসিয়া অতি স্নিগ্ধস্বরে
প্রায় ফিস্ ফিস্ করিয়া বলিল, “হীরু, তুমি বাবা, আমার একটু
উপকার করবে?”

হীরু সবিস্ময়ে বলিল, “কি উপকার বল।”

স্ত্রীলোকটি পূর্ববৎ নিম্নস্বরে বলিল, “একটা ওষুধ”—বলিয়া সে
চূপ করিল।

হীরু বলিল, “কিসের ওষুধ চাই তোমার? কি ব্যারাম
হয়েছে?”

আগন্তুক একটু যেন ইতস্তত করিয়া বলিল, “আচ্ছা, তোমার
কাছে বিষ টিমও থাকে ত?

হীরু সন্দেহপূর্ণ তীক্ষ্ণদৃষ্টিতে সেই বস্ত্রাবৃত মূর্তির পানে চাহিয়া
রহিল। শেষে বলিল, “বিষ? বিষ কোথা পাব? কিছু ওষুধ বিষুধ
রাখি বটে। কিসের ওষুধ চাই তোমার, তাই বল না।”

স্ত্রীলোকটি বলিল, “ওষুধ না। বিষই দরকার। কেন আমার
সঙ্গে ছলনা করছ হীরু? তোমার কাছে অনেক বিষ আছে তা আমি
জানি। খানিকটে বিষ আমায় দাও, বিশেষ দরকার।”

হীরু তীক্ষ্ণস্বরে বলিল, “কেন, বিষ নিয়ে তুমি কি করবে?”

হীরু “বিষবৃক্ষ” পড়ে নাই, ইহা মনে নিশ্চয় জানিয়া, স্ত্রীলোকটি
বলিল, “শেয়ালের বড় উপদ্রব হয়েছে, বুঝেছ! রান্না ঘরের বেড়া

ফাঁক করে, রোজ রাত্রে শেয়াল চুকে, আমার হাঁড়ি খেয়ে যায়। দুটো শেয়াল মরে, এই রকম খানিকটা বিষ তুমি আমায় দিতে পার ?”

“... হীরা কিছুক্ষণ চুপ করিয়া রহিল। শেষে বলিল, “কেন মিছে কষ্ট করে এই আঁধার রেতে, এই জল কাদা ভেঙ্গে এসেছ তুমি ? বাড়ী যাও। ও সব কথার মধ্যে আমি কোনও দিন থাকিও নি, থাকবও না। পাঁচখানা গাঁয়ের মধ্যে, কোথাও কোনও দুর্গঘটনা হলে, তোমরা এসে আমাকেই নিয়ে টানাটানি কর কেন বল দেখি ? দুটো ওষুধ পালা জানি, তাই পাঁচজনে আমার কাছে আসে। বিষ টিষ রাখিও না, কাউকে দিইও না। কেন তোমরা মিছামিছি আমায় সন্দেহ কর ?”

রমণী বিস্মিতভাবে বলিল, “আমরা সন্দেহ করি ?”

“হাঁ, তোমরা সন্দেহ কর। তুমি কে তাও আমি জানি, কি জন্তে এসেছ তাও আমি জানি।”

সভয় কণ্ঠে প্রশ্ন হইল, “কে আমি ?”

“তুমি পুলিশ। তুমি পুরুষ মানুষ, ছিরিলোক সেজে এসেছ। নইলে এই আঁধার রাতে, এই শ্মশানের মোড়ডায়, ছিরিলোকের বাবার সাধি কি যে আসে ?”

রমণী এই কথা শুনিয়া দাঁড়াইয়া উঠিল। নিজ স্বাভাবিক কণ্ঠে বলিল, “আমি পুরুষ মানুষ ? গলার স্বর শুনে বুঝতে পারছ না আমি পুরুষ কি স্ত্রীলোক ?”

হীরা বিস্মিত হইল—স্ত্রীকণ্ঠস্বরই ত বটে ! তা ছাড়া স্বরটা যেন

হীকর পরিচিত বলিয়াও বোধ হইল। কার কণ্ঠস্বর তাহাই সন্দেহ করিতে চেষ্টা করিতেছিল। কিন্তু তাহাকে সংশয়াপন্ন মনে করিয়া স্ত্রীলোকটি বলিল, “এখনও সন্দেহ? তবে দেখ!”—বলিয়া সেই অবগুষ্ঠনবতী যুবতী, কম্পিত হস্তে ধীরে ধীরে নিজ বক্ষের বসন সম্পূর্ণ উন্মোচিত করিয়া দিল। নষ্ট প্রকৃতি স্ত্রীলোকের অসাধ্য কৰ্ম্ম নাই।

“রাম রাম!”—বলিয়া হীক মাথাটি হেঁট করিয়া বলিল, “মা, বস।”

রমণী উপবেশন করিল। হীক বলিল, “আজকাল পুলিশের ভারি উপদ্রব হয়েছে। তোমার ঘোমটা দেখে, তোমার ফিস ফিস কথা শুনে, তাই আমি সন্দেহ করেছিলাম, তুমি জাল মেয়েমানুষ, আসলে পুলিশের কোনও টিক্‌টিকি।”

স্ত্রীলোকটি অবগুষ্ঠনের ভিতর হইতে বলিল, “এখন ত তোমার সন্দেহ গেল। আমি যা চাই, আমায় দাও তবে।”—এখন আর ফিস ফিস করিয়া নহে, রমণী স্বাভাবিক কণ্ঠেই কথা কহিতে লাগিল।

হীক বলিল, “তুমি যা চাও, তা আমি তোমায় দিতে পারি। কিন্তু এ সব জিনিষের দাম খুব বেশী তা জান ত?”

রমণী বলিল, “জানি। পঞ্চাশ টাকা আমি এনেছি। এই নাও।”—বলিয়া নিজ কাটদেশ হইতে একটি “গেঁজে” খুলিয়া লইয়া, হীকর সম্মুখে রাখিয়া বলিল, “শুণে নাও।”

হীক বলিল, “তোমার শেয়াল মরলে, পুলিশ এসে যখন আমায় ধরে নিয়ে যাবে, তখন ও পঞ্চাশ ত তাদের পূজা দিতেই যাবে। আরও পঞ্চাশ চাই।”

স্রীলোক ক্ষুণ্ণস্বরে বলিল, “আরও পঞ্চাশ চাই? আর ত আমি নি। অত বেশী লাগবে তা ত আমি জানতাম না।”

“কাল টাকা এনে জিনিষ নিয়ে যেও।”

স্রীলোকটি কাতর কণ্ঠে বলিল, “কাল হলে চলবে না হীরা— আজই আমার চাই যে! তা ছাড়া, কাল আমার আসবার উপায়ও নেই।”

হীরা বলিল, “সে তুমি বুঝো, কিন্তু একশ’ টাকার কমে এ কাষ আমি পারব না বাছা, আমার সাফ কথা।”

রমণী ক্ষণকালমাত্র কি চিন্তা করিল। তার পর নিজ বাম প্রকোষ্ঠ হইতে স্বর্ণবলয় উন্মোচন করিয়া ধলিল, “এই নাও। এর দাম পঞ্চাশ টাকার বেশী। দাও, আমার জিনিষ দাও।”

হীরা বালাটি হাতে লইয়া, প্রদীপের আলোকে ধরিয়া ঘুরাইয়া ফিরাইয়া সেটি পরীক্ষা করিল। তাহার পর গেঁজে হইতে টাকাগুলি খুলিয়া সাবধানে নিঃশব্দে সেগুলি গণিয়া দেখিল ঠিক পঞ্চাশ টাকা আছে। টাকা এবং বালা মাচার উপর শয্যাতে লুকাইয়া, অপর মাচা হইতে একটি হাঁড়ি নামাইয়া লইল। তাহার ভিতর, গাছের কতকগুলো শুষ্ক শিকড়, কয়েকটা শিশি ও অনেকগুলো ছোট ছোট পুঁটুলি ছিল। একটা শিশি আলোতে ধরিয়া বেশ করিয়া পরীক্ষা করিয়া, এক টুকরা ছেঁড়া কাগজের উপর তাহা উপড় করিল। কাগজে পড়িল কিসের কতকটা গুঁড়া। শিশি ছিপি বন্ধ করিয়া কাগজের মোড়ক করিয়া, রমণীর হাতে দিয়া বলিল, “এই নাও। জুখের সঙ্গে মিশিয়ে দিও।”

রমণী জিজ্ঞাসা করিল, “এতেই হবে ত ? ছোটো শেয়াল মরবে ?”

হীরা বলিল, “যথেষ্ট হবে।”

রমণী মোড়ক লইয়া বলিল, “এ কি ?”

“শেঁখো বিষ। ভয়ানক জোর। যে শেয়ালকে খাওয়াবে, এক ঘণ্টার মধ্যে তার শরীরে কলেরার সমস্ত লক্ষণ প্রকাশ পাবে। দু তিন ঘণ্টার মধ্যেই শেষ। লোকে মনে করবে, সে কলেয়া হয়ে মরেছে বুঝে ? কলেয়া—মনে রেখ।”

“বেশ।” বলিয়া রমণী অঞ্চলের কোণে মোড়কটি বাঁধিয়া লইল, বিনা বাক্যব্যয়ে উঠিয়া ধীর পদে বাহির হইয়া গেল।

হীরা তখন আলোকটি নিবাইয়া দিল। দাওয়ায় বাহির হইয়া পথের দিকে চাহিয়া রহিল। দেখিল কিছুদূরে ষ্ঠেতবজ্রাবৃত্তা রমণী গ্রামাভিমুখে চলিয়া যাইতেছে। আর কয়েক পদ গিয়া রমণী দাঁড়াইল। নিকটেই একটা বটগাছ ছিল, তাহার ছায়াতল হইতে অপর একজন ষ্ঠেতবজ্র পরিহিত মল্লম্যমূর্তি বাহির হইল। ছাতা খোলার মত খট করিয়া একটা শব্দ হইল ; তখন গুঁড়ি গুঁড়ি বৃষ্টি পড়িতেছে। উভয় মূর্তি অগ্রপশ্চাৎ ব্যবধানে, গ্রামের দিকে চলিল। হীরা আস্তে আস্তে দ্বার বন্ধ করিয়া তাহাতে কুলুপ লাগাইয়া, টোকা মাথায় দিয়া পথে নামিয়া, নিঃশব্দে সেই ষ্ঠেতবজ্রমূর্তির অনুসরণ করিল।

সেই নিশাচর ও নিশাচরীর অনুসরণে, হীরা গ্রামের মধ্যে প্রবেশ করিল। কিছুদূর গিয়া, তাহাদিগকে একটা বাড়ীর সদর দরজার তালা খুলিয়া তাহার মধ্যে প্রবেশ করিতে দেখিল।

হীরু তখন মনে মনে বলিল, “ওঃ, তোমায় ঠিকই সন্দেহ করিয়া-
ছিলাম তা হলে !”

হীরু জানিত, ইহা ৩শশী মুখুয্যের বাড়ী—বুঝিল, যুবতী
তাহারই পুত্রবধু নীরদা ।

এই বাড়ীতে হীরু মাঝে মাঝে আসিয়া, নীরদাকে কুলাটা
ডালাটা বিক্রয় করে । গত দুই বৎসর যাবৎ ইহার স্বামী বিদেশে ।
হীরু শুনিয়াছিল, নীরদার স্বামী শীঘ্র বাড়ী আসিবে । চারি
বৎসরের একটি ছেলে মাত্র লইয়া, যুবতী একাকিনী এই গৃহে বাস
করে । তাহার চরিত্র সম্বন্ধে গ্রামে একটা কাণাঘুসা আছে, হীরুও
তাহা শুনিয়াছিল, কিন্তু বিশ্বাস করিত না । এবার তাহার চাক্ষুষ
প্রমাণ পাইয়া, আপন মনে সে বলিল, “তবে ঠিকই ত বলতো
লোকে ! যা করছিস, করছিস—তার উপর আবার এই ! ওরে
হারামজাদী !”

হীরু নিঃশব্দে আপন ঘরে ফিরিয়া আসিয়া, পা ধুইয়া, এক
ছিলিম তামাক সাজিয়া খাইয়া, মাচাটির উপর উঠিয়া শয়ন করিয়া,
অবিলম্বে নিদ্রিত হইয়া পড়িল ।

পরদিন প্রাতেও আকাশ তেমনি মেঘাচ্ছন্ন । মাঝে মাঝে
টিপ্ টিপ্ করিয়া বৃষ্টি পড়িতেছে ।

মাণিকপুর গ্রামের দুই ক্রোশ দূরে রেলওয়ে স্টেশন । বেলা সাত-
টার সময়, পশ্চিম হইতে একখানি প্যাসেঞ্জার গাড়ী আসিয়া স্টেশনে

দাঁড়াইল। মাণিকপুর গ্রামের ৮শী মুখুয্যের পুত্র বিনোদলাল একটা তৃতীয় শ্রেণীর কামরা হইতে ব্যাগ ও ছাতা হস্তে নামিয়া পড়িল। প্লাটফর্মে নামিয়া এদিক ওদিক চাহিয়া দেখিল, কোনও লোক তাহাকে লইতে আসিয়াছে কি না। কাহাকেও দেখিতে পাইল না। মনে মনে বলিল, “কেইবা আছে যে নিতে আসবে! বাইরে গিয়ে দেখি যদি গোকুর গাড়ীটাড়ী একখানা পাঠিয়ে থাকে।” এই সময় রুষ্টি আসিল। ছাতাটি খুলিয়া তখন সে টিকিট দিবার ফটকের দিকে অগ্রসর হইল। টিকিট খানি দিয়া, বাহির হইয়া দেখিল, ষ্টেশন প্রাঙ্গণে দুইখানি গোকুর গাড়ী দাঁড়াইয়া আছে; কিন্তু কোনও গাড়ীর গাড়োয়ানকে নিজ গ্রামের বলিয়া চিনিতে পারিল না। তথাপি তাহাদের জিজ্ঞাসা করিয়া সনেহভঞ্জন করিয়া লইল—তাহারা স্থানীয় গাড়োয়ান, ভাড়া জুটবার আশায় ষ্টেশনে আসিয়া দাঁড়াইয়া আছে।

বিনোদ একবার ভাবিল, একখানা গাড়ী ভাড়া করিয়া লয়। আবার ভাবিল, হয়ত একটা টাকা ভাড়া চাহিয়া বসিবে, সে টাকায় ছেলের জন্ত, গ্রামে প্রবেশ করিয়া এক হাঁড়ি রসগোল্লা কিনিতে পারা যাইবে। রৌদ্র নাই, ঠাণ্ডায় ঠাণ্ডায় এই দুই ক্রোশ পথ অতিক্রম করিতে আর কতক্ষণ লাগিবে? পথে কাদা হইয়াছে বটে, তা জুতা ঘোড়াটা খুলিয়া হাতে করিয়া লইলেই চলিবে। এইরূপ ভাবিয়া, বিনোদ ষ্টেশনের প্রাঙ্গণ পার হইয়া, জুতা ঘোড়াটি হাতে করিয়া লইয়া, নিজ গ্রামের পথ ধরিল।

এই বিনোদ লোকটির বয়স এখন ৩০ বৎসর। বেশ দৃষ্ট পুষ্ট

চেহারা, চোখ দুইটি বড় বড়, সৰ্বদাই প্রফুল্ল বদন। বাল্যকালে লেখাপড়ায় বড় মন দেয় নাই। ১৮ বৎসর বয়সে সেকেণ্ড ক্লাসে পড়িবার সময় তাহার পিতৃবিয়োগ হয়। বাজারে পিতার একখানি মণিহারির দোকান ছিল, তাহার আয়েই সংসার চলিত। জমিভগ্না ছিল—খুব বেশী নয়—তবে সম্বৎসরের ধানটা কলাইটা তাহা হইতে পাওয়া যাইত, কিনিতে হইত না। পিতার মৃত্যুর পর দোকানখানি হাতে পাইয়া, বৎসরখানেকের মধ্যেই বিনোদ তাহা লোপাট করিয়া ফেলিল। কিছুদিন ঘরে বসিয়া রহিল; কিন্তু দিন চলে না। সংসারে যদিও দুইটি বিধবা মাত্র—মা এবং পিসিমা—তথাপি দিন গুজরাণ করা কষ্টকর হইল। প্রতিদিনের বাজার খরচ, মা পিসিমার দশমী ছাদশীর খরচ, তাঁহাদের ত্রত পার্কণ, কাপড় চোপড়—নিজের জুতাটা জামাটা ছাতাটা সিগারেটটা, তার পরে জমিদারের খাজানা আছে—এ সব আসে কোথা হইতে? এ দিকে ছেলে ‘সোমন্ত’ হইল, মা পিসিমা তাহার বিবাহ দিবার জন্ত ব্যাকুল হইয়া উঠিলেন, কিন্তু যোত্রহীন নিরুপায় গ্রাম্য যুবককে ভাল মেয়ে কে দিবে? এই অবস্থায় পড়িয়া, বিনোদ কলিকাতায় গিয়া অনেক চেষ্টায় একটি সামান্য কেরানীগিরি যোগাড় করিয়া লইল। পাঁচ বৎসর সে চাকরি করিল। ইতিমধ্যে তাহার বিবাহ হইল; বেতনও কিছু বৃদ্ধি হইল। ছেলের বিবাহের বৎসরখানেক পরে, মারও বৈধব্য যন্ত্রণা শেষ হইল—একটি নাতির মুখও তিনি দেখিয়া যাইতে পারিলেন না।

২০ বৎসর চুকিয়াছিল, ৫ বৎসরে যদিও তাহার ৩০ বৎসর

হইয়াছে, তথাপি হুঃখ ঘুচে না। কলিকাতার মেসের খরচ, ট্রাম ভাড়া, বন্ধুবান্ধবের পাল্লায় পড়িয়া মাঝে মাঝে থিয়েটার বায়স্কোপেও যাইতে হয়, মাসে দুইবার বাড়ী যাওয়া আছে—বাড়ীর খরচের জন্ত মাসে ৫১৭ টাকার বেশী আর দিতে পারে না। ছেলেটা হইয়াছে, তার হুঃখ আছে, খাবার আছে, অসুখ করিলে বিস্কুট বালি আছে—৫১৭ টাকায় কি করিয়া চলিবে?

এই সময় বড় বাজারে অমৃতসর-নিবাসী এক শালের মহাজনের সহিত বিনোদের আলাপ হইল। আহাৰ ও বাসস্থান ছাড়া তিনি তাহাকে ৪০ টাকা বেতনে নিযুক্ত করিয়া অমৃতসরে লইয়া যাইতে চাহিলেন। কায়কর্মে পটুতা দেখাইতে পারিলে ভবিষ্যতে ব্যবসায়ের ২১ আনার অংশীদারও করিয়া লইবেন ভরসা দিলেন। আশায় লুক্ হইয়া, কলিকাতার চাকরিতে ইস্তফা দিয়া, বিনোদ সেই চাকরি গ্রহণ করিল। বাড়ী গিয়া দিন দশ বারো থাকিয়া, জীপ্তকে পিসিমার জিম্মায় রাখিয়া, দুই বৎসর পূর্বে আষাঢ় মাসে বিনোদ অমৃতসর চলিয়া গিয়াছিল, আর আজ ফিরিতেছে।

অমৃতসরে পৌঁছিবাব মাস দুই পরেই সে পিসিমার মৃত্যু সংবাদ পায়। মাত্র দুই মাসের চাকরি, মনিব ছুটি দিল না, বলিল ইচ্ছা করিলে চাকরি ছাড়িয়া চলিয়া যাইতে পার। বিনোদ পাড়া প্রতিবেশী অভিভাবক স্থানীয়গণকে চিঠি লিখিল; তাঁহারা এক-বাক্যে উত্তর দিলেন, আমরা রহিয়াছি ভাবনা কি? বউমাকে আগলাইবার জন্ত একজন প্রবীণা ঝি রাখিয়া দিব, নিজেরা সর্বদা দেখা শুনা করিব।—বিনোদের শ্বশুরবাড়ী গ্রাম হইতে অধিক

দূরে নহে ; কিন্তু তাহার স্বস্তর স্বাঙড়ী নাই, শালায়াও কেহ জীবিত নাই ; বিধবা খুড়স্বাঙড়ী তাঁহার নাবালক পুত্রকণ্ঠাগণ সহ সেখানে বাস করেন । তথাপি বিনোদ সেই খুড়স্বাঙড়ীকে পত্র লিখিল ; তিনি উত্তর দিলেন, “সি কি হয় বাবা ? তোমার বাপ পিতামহের ভিটায় সন্ধ্যা পড়িবে না এ কেমন কথা । নীরদা সেই খানেই এখন থাকুক । পরে তুমি সুবিধামত তাহাকে তোমার চাকরি স্থানে লইয়া যাইও ।”—নীরদা অমৃতসর গেলে বাপ পিতামহের ভিটায় কে সন্ধ্যা দিবে, সে সম্বন্ধে কেমনও সছপায় খুড়ীমা কিন্তু নির্দেশ করেন নাই ।

পাড়া প্রতিবেশীরা নিজেরা যত দৈখা শুনা করুন আর না করুন, প্রবীণা বি একটি তাঁহারা যোগাড় করিয়া দিয়াছিলেন । কিন্তু মাস দুই পরে নীরদার সহিত ঝগড়া করিয়া সে চলিয়া যায় । একটি ঠিকা বি রাখা হইল, সে হাট বাজার করিয়া, বাসন মাজিয়া দিয়া চলিয়া যায় ।

বিনোদ বাড়ী গিয়া স্ত্রীকে লইয়া আসিবে বলিয়া মাঝে মাঝে ছুটি চাহিয়াছিল, কিন্তু গভর্ণমেন্টের আপিস ত নহে, মহাজনী কারবার, আজ না কাল, এ মাসে না ও মাসে, এই করিয়া, এত দিনের পরে তাঁহারা বিনোদকে এক মাসের ছুটি দিয়াছিলেন ।

৩

“কে রে, হীরেনাল নাকি ? এখনও তুই বেঁচে আছিস ?”

হীরা ডোম তাহার দাওয়ায় বসিয়া ডালা বুনিতোছিল, চাহিয়া

দেখিল, ছাতা মাথায়, জুতা ও ব্যাগ হাতে বিনোদ রাস্তায় দাঁড়াইয়া ঐরূপ চীৎকার করিতেছে।

হীৰুকে নিরন্তর দেখিয়া বিনোদ রাস্তা হইতে নামিয়া হীৰুর কুটারের দিকে আসিতে আসিতে হাসিমুখে প্রশ্ন করিল, “কিরে হীৰু, এখনও বেঁচে আছিস্?”

এইবার হীৰুর কথা যোগাইল—“আছি বৈকি দাদা ঠাকুর। এস, দাবায় উঠে এস, প্রণাম করি।”

বিনোদ বলিল, “পায়ে যে কাদা রে হীৰু।”

বলিয়া রাস্তা হইতে নামিল। নিকটে একটা গর্তে বর্ষার জল দাঁড়াইয়া ছিল, সেইখানে শা ধুইয়া, হীৰুর দাওয়ায় গিয়া উঠিল। হীৰু তাহাকে প্রণাম করিয়া বসিবার জন্ত নূতন এক টুকরা বাঁশের চাটাই বিছাইয়া দিয়া জিজ্ঞাসা করিল, “এতদিন বাড়ী ছেড়ে কোথায় ছিলে দাদাঠাকুর?”

“অমৃতসরে চাকরি করছিলাম রে। কেন, যাবার সময় ত তোকে বলে গিয়েছিলাম। মনিষ ছুটি দেয় না, কায়েই আসতে পারি নি। এক মাসের ছুটি পেয়ে বাড়ী এসেছি।”

হীৰু গম্ভীর মুখে, অগ্নি দিকে চাহিয়া বসিয়া রহিল।

তাহার ভাব দেখিয়া বিনোদ জিজ্ঞাসা করিল, “হীৰু, তুই মুখখানা অমন হাঁড়ি করে বসে রয়েছিস কেন? ছবছর পরে দেখা, একটা কথা কচ্ছিস নে। হাঁরে, আমাদের বাড়ীতে কোনও খারাপ খবর আছে না কি? তুই আজকালের মধ্যে আমাদের ওদিকে গিয়েছিলি? আমার ছেলে, পরিবার সবাই ভাল আছে ত?”

হীরা গম্ভীর ভাবে বলিল, “অনেকদিন ওদিকে যাওয়া হয় নি।”

বিনোদ বলিল, “তা যাবি কেন! আমি বিদেশে যাবার সময় তোকে বলে গেলাম, হীরা, আমাদের বাড়ী সর্বদা যাবি, বউ একলা রইল, দেখবি শুনবি খোঁজ খবর নিবি। তুই বলি, তা আর খোঁজ খবর নেব না দাদা ঠাকুর, তোমার বাপ একদিন আমার যে উপকারটা করেছিলেন, আমি ত তোমাদের বিনিমাইনের বাঁধা চাকর। তুই এ কথা বলেছিলি কি না, বল।”

হীরা পূর্ববৎ গম্ভীর ভাবে বলিল, “মাঝে মাঝে আমি গেছি বৈকি। তোমাদের বাড়ীতে না গেলেও খবরটবর পাই। বউমাকে কালও আমি পথে দেখেছি। সবাই ভালই আছে।”

বিনোদ বলিল, “আচ্ছা হীরা, তুই বস—আমি এখন উঠি। বাড়ীতে হয়ত তারা কত ভাবছে।”—বলিয়া বিনোদ উঠিয়া দাঁড়াইল।

হীরা, বিনোদকে প্রণাম করিয়া, গম্ভীর মুখে বসিয়া রহিল। বিনোদ চলিয়া গেলে সে আপনার মনে বলিল, “হায়রে সংসার!”

আজ আর হীরা কুলা ডালা লইয়া গ্রামে বিক্রয় করতে বাহির হইল না। সমস্ত দিন ঘরে বসিয়া রহিল, তামাক খাইল, অনেক চিন্তা করিল।

সন্ধ্যা হইল, রাত্রি হইল। যখন প্রায় বারোটা, হীরা তখন

গতরাত্রে প্রাপ্ত সেই বাল্য এবং টাকা পঞ্চাশটি লইয়া কোমরে বাঁধিয়া, ঘর বন্ধ করিয়া, আস্তে আস্তে বাহির হইল।

গ্রামের ভিতরে গিয়া, ক্রমে বিনোদের বাড়ীর নিকট পৌঁছিল। বাড়ীর চারিদিক প্রদক্ষিণ করিয়া দেখিল, ভিতরে কোনও সাড়াশব্দ নাই, নিস্তব্ধ, কিন্তু উঠানের আমগাছে আলো পড়িয়াছে। খিড়কী দুয়ারের নিকটবর্তী প্রাচীরের একটা স্থান নির্দোষ করিয়া, কৌশলে তাহার উপর উঠিয়া, হীরু নিঃশব্দে ভিতরে লাফাইয়া পড়িল। ধীরে ধীরে অগ্রসর হইয়া গিয়া দেখিল, রান্নাঘরের নিকটে একটি হারিকেন লণ্ঠন মিট মিট করিয়া জ্বলিতেছে। হীরু ধীর পদে সম্মুখে গিয়া বলিল, “কি দিদিঠাকরণ, এখনও ঘুমাও নি?”

সহসা হীরুর আগমনে নীরদা ভয়ে একবারে কাঠ হইয়া গেল। কোনও কথাই সে বলিতে পারিল না। হীরু বলিল, “ভয় পেয়েছ দিদিঠাকরণ? আমি হীরু, ভয় কি?”

এইবার নীরদার মুখ দিয়া কথা বাহির হইল। সে বলিল, “হীরু, তুই চোরের মত এখানে কি করছিস? বাড়ী ঢুকলি কি করে?”

হীরু বলিল, “পাঁচিল টপকে এসেছি। কাল ওষুধ নিয়ে এলে, ওষুধের ফলটা কি রকম হইল তাই দেখতে এসেছি।”

নীরদা বিস্মিত হইবার ভাণ করিয়া বলিল, “ওষুধ? আমি আবার কবে তোর কাছ থেকে ওষুধ আনলাম? কি বলছিস পাগলের মত? মদ টদ খেয়েছিস্ বুঝি?”

হীরু একটু উত্তেজিত স্বরে বলিল, “জ্বাকামি রাখ না দিদি-ঠাকরণ! আমি সবই জানি। কাল রাতে তোমার গলার স্বর

শুনেই আমার সন্দেহ হয়েছিল যে তুমি। তারপর, অন্ধকারে পিছু পিছু এসে, তোমাকে, আর,—তাকে এই বাড়ী ঢুকতে ত দেখেই গেলাম। সে যাক। এখন বল দেখি, যেমন বলে দিয়েছিলাম, 'ছুধের সঙ্গে সেই গুঁড়োটা মিশিয়ে খাইয়ে দিয়েছ ত?'

নীরদা দেখিল, আর ভগামি করা নিষ্ফল। বলিল, "হ্যাঁ হীক, খাইয়ে ত দিয়েছিলাম। কৈ, এখনও ত কিছুই হল না। দিব্যি ত নাক ডাকিয়ে ঘুমুচ্ছে।"

হীক মৃদুস্বরে হাসিয়া বলিল, "ঘুমবেই ত। ওষুধ দিতে আমারই যে একটু ভুল হয়ে গিয়েছিল কি না!"

নীরদা শঙ্কিত ভাবে বলিয়া উঠিল, "কেন, কি দিয়েছিস?"

হীক বলিল, "তুমি বিষ চেয়েছিলে ত? বিষও আমার ছিল, কিন্তু একে বুড়োমানুষ, তায় রাত্তির কাল, বিষের গুঁড়ো না দিয়ে, ভুলে ঘুমের ওষুধ দিয়ে ফেলেছিলাম।"—বলিয়া হীক বাগভরে আবার হাসিল।

নীরদা তীক্ষ্ণ দৃষ্টিতে হীকর মুখ পানে চাহিল। ক্রোধ কম্পিত স্বরে কহিল, "তবে তুই আমার সঙ্গে প্রতারণা করেছিস বল? আমাকে ফাঁকি দিয়ে টাকা নিয়েছিস, জোচ্চোর কোথাকার!"

এই গালি শুনিয়া হীক রাগিয়া গেল। দস্তে দস্ত ঘর্ষণ করিয়া বলিল, "হ্যালো হারামজাদি শয়তানী নচ্ছারণী! হ্যাঁ! তোকে ফাঁকি দিয়েই ত টাকা নিয়েছি। এখন আমি যে জন্তু এসেছি, তা বলি শোন। নে, তোর গয়না কাপড় বাক্স থেকে বের করে,"

পুটুলি বেঁধে নে। তোকে, আজ রাতেই কলকাতায় যেতে হবে।”

নীরদা বিস্মিত হইয়া বলিল, “কলকাতায়? কলকাতায় আমি যাব কেন?”

হীরা ক্রোধ-কম্পিত স্বরে বলিল, “কলকাতায় যাবি নে ত কি এখানে থেকে স্বামী হত্যে ব্রহ্মহত্যে করবি হতভাগী? নে, কাপড় চোপড় গুছিয়ে নে; ভোর তিনটেয় গাড়ী। আমি তোকে ইষ্টিশনে পৌঁছে দিবে, টিকিট কেটে, গাড়ীতে বসিয়ে দিয়ে চলে আসব।”

নীরদা কয়েক মুহূর্ত্ত স্তব্ধ হইয়া রহিল। পরে বলিল, “হীরেনাল, তোর আশ্রয় ত কম নয়? তুই আমায় লুকুম করছিস? আমি যদি কলকাতায় না যাই?”

হীরা বলিল, “না যাস, এখনই বিনোদ দা’ ঠাকুরকে জাগিয়ে সব কথা তাকে বলে, তাতে আমাতে হুঁজনে মিলে তোকে খুন করে, উঠোনে গর্ত খুঁড়ে তোকে পুঁতে ফেলবো।”

হীরার ভঙ্গি দেখিয়া এবং তাহার কথা শুনিয়া নীরদা ভয়ে, কাঁপিয়া উঠিল। বলিল, “হীরা, আমি যদি দোষ করে থাকি আমার স্বামী তার বিচার করবেন। তিনি যদি আমায় ত্যাগ করেন, তখন আমি কলকাতায় যাব—যেখানে হয় যাব। তুমি কেন এর মধ্যে—”

হীরা বলিল, “আহা, নেকু! স্বামী তোমার বিচার করবেন! বেচারি অঘোরে পড়ে ঘুন্সে, তুমি যদি আজ রাতেই তার গলাটি

ছুরি দিয়ে কেটে দাও? যে বিষ খাওয়াতে পারে, সে কি আর গলা কাটতে পারে না? ওসব কথা আমি শুনবো না।' ভোর তিনটের গাড়ীতে তোমায় যেতেই হবে কলকাতা। না যদি রাজি থাক, বল, আমি সোরগোল সুরু করে দিই।”

নীরদা আর দাঁড়াইয়া থাকিতে পারিল না। তাহার শরীর অবশ হইয়া আসিতেছিল। সে ধপ করিয়া সেখানে বসিয়া পড়িল। প্রায় কাঁদিতে কাঁদিতে বলিল, “কিন্তু হীরা, কলকাতায় যে আমায় যেতে বলছ, সেখানে গিয়ে আমি কি খাব?”

হীরা বলিল, “তোমাদের দলের লোক সেখানে ঢের আছে। তারা যেমন ক’রে খায়, তুমিও সেইরকম করে খাবে।”

“কিন্তু হীরা, আমি যে কলকাতায় কখনও যাই নি, কাউকে চিনি নে। আমি কি করে সেখানে যাব, কি করে’ কি করব?”
—বলিয়া নীরদা চোখে আঁচল দিল।

কথাটা শুনিয়া হীরা একটুখানি ভাবিল। শেষে বলিল, “হ্যাঁ, তা বটে। আচ্ছা, চল, আমি নিজেই তোমায় সঙ্গে করে’ রেখে আসবো। রামবাগানে যে ডোমপাড়া আছে, সেই ডোমপাড়ায় আমাদের ক’জন আত্মীয় লোক থাকে। তাদের ধরে, তোমার একটা ঠায় ঠিকানা করে দিয়ে, আমি আসবো।”

নীরদা দেখিল, হীরা দৃঢ়প্রতিজ্ঞ, তাহার হাত হইতে নিস্তারের কোনই আশা নাই। তখন সে বলিল, “আচ্ছা, তাই চল তবে।”

হীরা বলিল, “তোমার স্বামীকে যা ঘুমের ওষুধ দিয়েছি, সে

যুম সহজে এখন ভাগবে না। কাল বেলা ৮টা ৯টা পর্য্যন্ত খুব ঘুমোবে। তোমার কোনও ভয় নেই, তুমি স্বচ্ছন্দে তোমার ঘরে গিয়ে তোমার কাপড় চোপড় গয়না গাঁটি গুলো বের করে নাওগে। আমি কিন্তু ঐ বারান্দায় দাঁড়িয়ে থাকবো।”

“কেন?”

“পাছে তুমি তোমার স্বামীর গায়ে হাত দাও, কি পালাও।”

নীরদা আর বিরক্তি না করিয়া উঠিয়া গেল। হীরু তাহার পশ্চাৎ পশ্চাৎ গিয়া বারান্দায় উঠিয়া, ঠিক দরজা আগলাইয়া দাঁড়াইয়া রহিল। খাটের উপর দেখিল, ছেলেটিকে পাশে লইয়া, বিনোদ নাসিকাগর্জন পূর্ব্বক অঘোরে ঘুমাইতেছে।

নীরদা বাস্তব পেটরা খুলিয়া নিজ বস্ত্রালঙ্কার বাহির করিয়া একটি পুটুলিতে বাঁধিতে লাগিল। হীরু বলিল, “এই নাও, তোমার বালা নাও, আর চল্লিশ টাকা—পুটুলিতে বেঁধে নাও। দশটা টাকা আমি রাখলাম পথ খরচের জন্তে।” নীরদা দ্বারের কাছে আসিয়া টাকা ও বালা লইল। পুটুলি বাঁধা হইলে, সেটা কাঁখে করিয়া হীরুর সহিত বাহির হইল।

হীরু, নীরদাকে লইয়া, প্রথমে নিজ কুটারে আসিল। বাস্তব খুলিয়া, সাফ ধুতি বাহির করিয়া পরিল, বহুকালের একটি পিরাণ ছিল তাহা গায়ে দিল, একখানি উড়ানি চাদর ছিল তাহা মাথায় বাঁধিল। জুতা পায়ে দিয়া, ছাতা লইয়া, ঘরের দ্বারে কুলুপ দিয়া নীরদার পশ্চাৎ পশ্চাৎ স্টেশনের দিকে চলিল।

পরদিন প্রাতে নিদ্রাভঙ্গে বিনোদ স্ত্রীকে না দেখিয়া অত্যন্ত ব্যাকুল হইয়া তাহার অনুেষণে ব্যাপ্ত হইল। ছেলেটা মা মা করিয়া কাঁদিতে লাগিল।

ক্রমে বিনোদ, অভাগিনীর পদাশ্রয়নের বৃত্তান্ত অবগত হইল, কিন্তু সেই রাত্রে কাহার সহিত কোথায় যে নীরদা অন্তর্দান করিল, তাহা সে কিছুই বুঝিতে পারিল না।

এ ঘটনার পর গ্রামে আর বাস করা অসম্ভব বিবেচনা করিয়া, বাস্তুভিটা ও জমি জমাগুলা আধা কড়িতে বিক্রয় করিয়া ফেলিয়া, ছুটি অন্তে ছেলেটিকে লইয়া বিনোদ অমৃতসর চলিয়া গেল। সেখানে পৌছিয়া বন্ধুবান্ধবের নিকট স্ত্রীর মৃত্যু সংবাদ প্রচার করিল। ছেলেটির কষ্ট দেখিয়া, পরবর্তী অগ্রহায়ণ মাসেই অমৃতসর-প্রবাসী একজন সদব্রাহ্মণ বাঙ্গালীর কন্যাকে সে বিবাহ করিল। তদবধি বিনোদ সেইখানেই বাস করিতেছে। চাকরিতে তাহার উন্নতি হইয়াছে; নিজের একখানি বাড়ীও সেখানে নিৰ্ম্মাণ করিয়াছে গুনিতে পাই।

প্রেম ও প্রহার

পদ্মাতীরবর্তী রায়গঞ্জ নামা এক পল্লীগ্রামে একটি খড়ে ছাওয়া মৃৎকুটারের দাওয়ায় বসিয়া, একদিন বেলা ৮টার সময় স্বামিন্দ্রীতে মিল্ললিখিত প্রকার দাম্পত্যালাপ হইতেছিল।

ভজ্জহরি গোপ মুখ হইতে হাঁকা নামাইয়া, চোখ ঘুরাইয়া উচ্চস্বরে বলিল, “খপদ্মার মাগী মুখ সামলে কথা কোন্, নইলে জুতিয়ে মুখ ছিঁড়ে দেবো।”

মোক্ষদামুন্দরী, স্বর আর এক পর্দা তুলিয়া উত্তর দিল, “ঈন্! রাগ দেখ পুরুষের! জুতিয়ে মুখ ছিঁড়ে দেবেন! জুতো পাবি কোথা তাই শুনি? বাপের জন্মে জুতো কখনও পায়ে দিযেছিস্ রে মিন্সে?”

দস্ত খিচাইয়া মিন্সে চীৎকার করিয়া উঠিল, “চোপ রও হারাম-জাদী শূয়রকে বাচ্ছি! তুই আমার বাপ তুল্লি এত বড় আম্পদা তোর?”

মোক্ষদা একটু দূরে সরিয়া বসিয়া বলিল, “তুলেছি, তুলেছি। ঝাঁটা তুলিনি এই তোর ভাগ্যি!”

“তোল্ না ঝাঁটা, তোর ক’গাছা ঝাঁটা আছে আমি দেখি

একবার। ঘুটে কুড়ুনীর বেটীকে বিয়ে করে এনে রাজার হালে রেখেছি, তুই আমায় ঝাঁটা দেখাবি বৈকি! নৈলে আর কলিকাল বলেছে কেন হয় রে!”

মোক্ষদা হাত উল্টাইয়া ব্যঙ্গভরে বলিল, “মরি মা মশারি ছিঁড়ে! কি আমার নাজার হালে নেখেচেন গোঃ। আমি নোকের বাড়ী খান ভেনে, বাগন মেজে, উঠোন ঝাঁট দিয়ে যাই ছটো আনি, তাই গুবর গুবর চলে; নইলে ঐ বাকর কি দিয়ে ভরাতিস্ বন্ দেখি? খেটে খেটে গতর আমার জল হয়ে গেল; উনি আমায় রাজার হালে রেখেচেন। যে পুরুষ পয়সা রোজগার করতে জানে না, তার অত তেজ কেন?”

ভজহরি বলিল, “নাঃ—আমি কি আর পয়সা রোজগার করতে জানি? যত জানিস তুই! আমি গেল বছর গ্রামপুয়ে বাবুদের বাড়ী খানসামাগিরি করতে যাইনি? আমার খোরাক পোষাক ৫ মাইনে হয় নি? তখন কেঁদে কেটে অনর্থ করেছিলি কেন? ‘ওগো আমি তোমায় ছেড়ে থাকতে পারবো না; তুমি চাকরি ছেড়ে দিয়ে বাড়ী এস, যা জুটবে তাই হুজনে ছুমুঠো খাব।’ কে বলেছিল রে মাগী?—নাঃ, আমি রোজগার করতে জামিনে! আমার মতন হুঁসিয়ার খানসামা এ অঞ্চলে ক’টা আছে শুনি? এ পাড়াগাঁয়ে আমাদের কদর ত কেঁউ বোঝে না, কাষেই বিষ হারিয়ে চোঁড়া হয়ে বসে আছি।”—বলিয়া ভজহরি কয়েক টান তামাক টানিয়া আবার আরম্ভ করিল—“আর তাও বলি—বাড়ীতে কি আমি বসেই থাকি? তুই খাটিস আর আমি খাটিনে? তুই

ছোটো ক্ষুদকুঁড়ো যা হয় নিয়ে আসিস বটে, কিন্তু আমি মাছ ধরে না আনলে খেতিস্ কি দিয়ে বল দেখি ? এদিকে মাছ না হলে নোলা যে একবারে খাবি খায় ; একটি গেরাস ভাত মুখে ওঠে না । মনে করি খোঁটা দেবোনা, তা, তোর স্বভাববর গুণে দিতে হয় ।”— বলিয়া ভজহরি ভুড়ুক ভুড়ুক করিয়া আবার তামাক টানিতে লাগিল ।

মোক্ষদা দেওয়ালের কাছে সরিয়া বসিয়া, পা দুইটা ছড়াইয়া দিয়া নিজ হাঁটু দুইটিতে সক্রমণ ভাবে হাত ব্লাইতে ব্লাইতে বলিতে লাগিল, “শ্রাকা মিন্সের শ্রাকামি দেখে আর বাঁচিলে ! ভারি খোঁটার কায করেছেন কিনা ! মাছ ধরে আনেন তবেই ত সংসারের সকল দুঃখই ঘুচে গেল । কাল থেকে আমার শরীলটে খারাপ, গায়ে গতরের ব্যথায় মরে যাচ্ছি ;—বল্লাম মুখুয্যেদের বাসন ক’খানা মেজে দিয়ে আয় ত ! তাতে অমনি বাবুর অপমান হল ! ‘অঁগা, আমি পুরুষ মানুষ হয়ে বাসন মাজবো ?’ আমি বল্লাম, যে পয়সা রোজগার করতে পারে না সে আবার পুরুষ মানুষ কিসের ? এইত বলেছি ! এতেই অমনি জুতিয়ে আমার মুখ ছিঁড়ে দিতে এলেন । এমন নোকের হাতেও আমি পড়েছিলাম, মাগো:—উঠতে বসতে আমায় নাতি ঝাঁটা মারে !”—বলিয়া মোক্ষদা চক্ষে অঞ্চল দিয়া কাঁদিত আরম্ভ করিল ।

ভজহরি তামাক খাইতে খাইতে, জ্বর পানে আড় চোখে আড় চোখে চাহিতে লাগিল । জ্বর অঁখি-জলে তাহার পৌরুষগর্ভ টলমল করিতে লাগিল, বুঝি বা ভাসিয়াই যায় । কান্না থামে না

দৈখিয়া বলিল, “বলি অত কান্না হচ্ছে কিসের জন্তে? তোকে মারিও নি, কিছুই না, ছোটো মুখের কথা বলেছি বৈত নয়! যাচ্ছি না হয়, বাসনগুলো মেজে দিয়ে আসছি। আর কাঁদতে হবে না, ওঠ।”

ছাঁকা ঘারের কোণে ঠেকাইয়া রাখিয়া, ভজহরি কাঁছে গিয়া জ্বর মুখ হইতে তাহার হস্ত ও অঞ্চল অপসারিত করিয়া লইয়া নিজ কোঁচার খুটে তাহার চক্ষু মুছাইয়া দিল। মিষ্ট কথায় তাহাকে সাহসনা করিয়া মুখ্যে বাড়ী যাইবার জন্ত প্রস্তুত হইল।

মোক্ষদা তখন বলিল, “থাক্, তোমায় আর যেতে হবে না, আমিই গিয়ে বাসন ক’খানা মেজে দিয়ে আসছি। যতক্ষণ শরীলে শক্তি আছে ততক্ষণ করি, তার পর যা হয় হবে।”

ভজহরি বলিল, “তোমার গায়ে গতয়ে রাসা, নাই বা গেলি তুই, আমিই যাচ্ছি। তুই এই রোদ্দুরে পিঠ দিয়ে একটু শুয়ে থাক। বাসন মেজে দিয়ে, গিল্লীমার কাছ থেকে আমি বরঞ্চ একটু তর্পিত তেল চেয়ে আনবো, তোকে বেশ করে মালিস করে দেবো, ব্যাথাটা অনেক কমবে তা হলে।”

স্বামী স্ত্রীতে এইরূপ কলহ নিতাই চলিত। মাঝে মাঝে কিলটা চড়টা চাপড়টাও যে না চলিত এমন নয়। তবে শাস্ত্র ত মিথ্যা হইবার নহে—দম্পতীর কলহ অবশেষে লঘু ক্রিয়াতেই পরিণত হইত বটে।

উপরে বর্ণিত ঘটনার দিন পনেরো পরে, একদিন উভয়ের কলহ

একটু সাংঘাতিক আকার ধারণ করিল এবং পূর্ব পূর্ব বারের শ্রায় লঘুক্রিয়ায় পরিণত হইল না।

মোক্ষদা ভ্রুঃখন্দা করিয়া দুই চারি পয়সা যাহা আনিত, তাহা হইতেই বাঁচাইয়া কিছু সঞ্চয় করিবার চেষ্টা করিত। সেই সঞ্চিত অর্থ কোথায় লুকানো থাকিত, তাহা ভজহরির অজ্ঞাত ছিল না। একদিন জ্বরী অল্পপাশ্চতি কালে, সে সেই গোপনীয় স্থান হইতে অর্থ অপহরণ করিয়া, ছিপে লাগাইবার জন্ত একটি পিতলের হইল কিনিবার অভিপ্রায়ে দুই ক্রোশ দূরবর্তী সহরে চলিয়া গেল।

হইল কিনিয়া সন্ধ্যার সময় বাড়ী ফিরিয়া, পুকুর ঘাটে গিয়া হাত পা ধুইয়া আসিয়া এক ছিলিম তামাক সাজিয়া ভজহরি পথশ্রম অপনোদন করিতেছিল, এমন সময় মোক্ষদা দত্তদের গোহালে সাঁজাল দিয়া বাড়ী ফিরিয়া আসিল। টাকা চুরি গিয়াছে ইহা সে পূর্বেই জানিতে পারিয়াছিল, এবং সন্দেহ ঠিক লোককেই করিয়াছিল। ফিরিয়া কুলঙ্গির উপরে সেই নূতন চক্চকে হইলটি দেখিবামাত্র মোক্ষদার মুখ, আগ্নেয় গিরির শ্রায়, বচনাগ্নি উদগীরণ আরম্ভ করিল। অপর পক্ষও নীরব রহিল না। অবশেষে রাগের বশে ভজহরি তাহার হুক হইতে অলস্ত কলিকা খুলিয়া লইয়া মোক্ষদার মুখ লক্ষ্য করিয়া ছুড়িয়া মারিল। আগুন মোক্ষদার মুখ দগ্ধ করিতে অসমর্থ হইয়া তাহার বস্ত্র ও গাত্রে ছড়াইয়া পড়িল। আগুন ঝাড়িয়া ফেলিয়া মোক্ষদা উন্মাদিনীর শ্রায় ছুটিয়া আসিয়া, ভজহরির হাত হইতে তাহার হুকটা কাড়িয়া লইয়া তদ্বারা সজোরে তাহার মস্তকে প্রহার করিল। হুকার খোলটা চুরমার হইয়া গেল; জাঁ মোক্ষদার

হাতেই রহিল। বাপ, বলিয়া ভজহরি মাথায় হাত দিয়া সেইখানে বসিয়া পড়িল। তখন সেই জাঁট দিয়া মোক্ষদা তাঁহার পিঠে পটাপট ঘা কতক বসাইয়া দিয়া, একটু সরিয়া, চালের খুঁট ধরিয়া দাঁড়াইয়া হাঁফাইতে লাগিল। এইবার ভজহরি কি ভাবে তাহাকে আক্রমণ করিবে, এবং ঐ আক্রমণ কি উপায়ে সে ব্যর্থ করিতে পারিবে ইহাই অবধারণ জন্ত সে সতর্ক হইয়া রহিল।

ভজহরি কিন্তু তাহাকে আক্রমণ করিল না। উভয় হস্তে মাথাটি চাপিয়া ধরিয়া উহ উহ করিতে করিতে সে উঠিয়া দাঁড়াইল। ধীরে ধীরে দাওয়া হইতে উঠানে নামিল; কিয়দূর অগ্রসর হইয়া ফিরিয়া দাঁড়াইয়া বলিল, “দাঁড়া শালী হুঁরামজাদি; তুই আমার মাথা কাটিয়ে দিয়েছিস, আমি চল্লাম থানায় লালিস করতে। তিনটি বছর তোকে যদি আমি জেল না খাটাই ত আমি গয়লার ছেলেই নই।” - বলিয়া সে বাহির হইয়া গেল।

ভজহরি চলিয়া গেলে, মোক্ষদা কিছুক্ষণ পূর্ববৎ ভাবে দাঁড়াইয়া হাঁপাইতে লাগিল। ক্রমে তাহার শ্বাসযন্ত্র সুস্থ হইলে, ধীরে ধীরে সেই খানে বসিয়া পড়িল। বসিয়া ভাবিতে লাগিল, “সত্যিই মিন্সের মাথা ফেটেছে না কি? হুঁকোর খোলের ঘায় কখনও মাথা কাটে?—ধেং! ও সব মিন্সের ঢঙ—ঢঙ! কিন্তু গেল কোথা? সত্যিই কি থানায় গেল না কি? হুঁঃ—থানায় আর যেতে হয় না। থানা প্রায় এখানে? ছকোশ দূর। এই রাত্রিরে সে আবার থানায় যাবে, তুমিও যেমন! দেখ না, এখনই ফিরে আসবে বোধ হয়।”

মনকে এই প্রকারে প্রবোধ দিয়া মোক্ষদা গৃহকার্য্যে আত্মনিয়োগ

করিল। কায করে, আর বাহিরে চাহিয়া চাহিয়া দেখে স্বামী ফিরিল কি না। কায শেষ হইয়া গেল, জ্যোৎস্নাভরা উঠানের পানে চাহিয়া মোক্ষদা চুপ করিয়া রোয়াকে বসিয়া রহিল। রাত্রি এক প্রহর হইল, দেড় প্রহর হইল, কৈ, স্বামী ত ফেরে না!

তখন মোক্ষদা স্থির করিল, নিশ্চয়ই মিসে থানায় গিয়াছে! মনে একটু রাগ হইল, ভয়ও হইল। ‘সেপাই’ আসিয়া সত্যই কি তবে তাহাকে থানায় ধরিয়া লইয়া যাইবে? মোক্ষদা উঠিয়া সদর দরজা বন্ধ করিয়া দিয়া আসিল!

ক্রমে তাহার ঘুম পাইতে লাগিল, অত্যন্ত ক্ষুধাও বোধ হইল। একবার ইচ্ছা হইল, স্বামীর জন্ত ভাত চাপা দিয়া রাখিয়া নিজে আহার করে। আবার ভাবিল, না থাক্, যদি আমায় ধরাইয়া দিবার জন্ত সিপাই সঙ্গে করিয়াই আনে, আসিয়া দেখুক, যে স্ত্রীর সহিত সে এমন ব্যবহার করিল, সে কিরূপ পতিব্রতা, স্বামীর খাওয়া হয় নাই বলিয়া নিজে উপবাসী আছে। তাই সে না খাইয়া, রোয়াকে আঁচল বিছাইয়া শুইল এবং ক্রমে নিদ্রিত হইয়া পড়িল।

মোক্ষদার যখন ঘুম ভাঙিল, তখন গভীর রাত্রি, চন্দ্র অন্ত গিয়াছে, শেয়াল ডাকিতেছে। তাহার বিশ্বাস, শেয়ালেরা প্রহরে প্রহরে একবার করিয়া ডাকে—রাত্রি কি এখন দ্বিতীয় প্রহর, না তৃতীয়? ক্ষুধার যেরূপ প্রাবল্য, তৃতীয় প্রহর হওয়ারই সম্ভাবনা। থানার লোকে সম্ভবতঃ স্বামীকে বলিয়াছে, এত রাতে গিয়া আর কি হইবে, তুই এইখানে শুইয়া এখন ঘুমা, কাল সকালে তখন তোর বউকে ধরিতে যাইব। কাল বেলা একপ্রহর আন্দাজ সে সিপাহী

লইয়া নিশ্চয়ই আসিবে। মোক্ষদা উঠিয়া, মুখে হাতে জল দিয়া, স্বামীর জন্ত ভাত তরকারি ঢাকা দিয়া রাখিয়া, অবশিষ্টাংশ নিজে লইয়া আহারে বসিল। মাছের চচ্চড়ি খাইতে খাইতে তাহার মনে হইল, “আমি মাছ খেতে ভালবাসি বলেই, বড় বড় মাছ ধরে আমায় খাওয়াবে বলেই, সে ছইল কিনে এনেছিল গো! তার জন্তে তাকে অমন করে ‘নাঙ্কনা’ করা আমার ভাল হয় নি।”— তাহার পর মনে হইল, ‘আমি ত খাচ্ছি, থানায় তাকে তারা খেতে টেতে দিয়েছে কি না কে জানে! হয় ত না খেয়েই সেখানে পড়ে আছে।’—এই কথা মনে হওয়ায় মোক্ষদার চক্ষু দুইটি সজল হইয়া উঠিল।

যাহাইউক, আহার সমাপ্ত করিয়া, মুখ হাত ধুইয়া, রোয়াকে চুপ করিয়া সে বসিয়া রহিল। কিছুক্ষণ পরে ঢুলিতে লাগিল; তাহার পর গুইয়া ঘুমাইয়া পড়িল।

৩

প্রাতে উঠিয়া নিজ কুটারের ‘বাসিপাট’ সারিয়া, মোক্ষদা পরগৃহে তাহার নির্দিষ্ট কায কৰ্ম্মগুলি করিবার জন্ত বাহির হইল। সে সব সারিয়া বাড়ী ফিরিতে প্রায় দেড় প্রহর বেলা হইল। আসিবার সময় তাহার মনটা কেমন ভয় ভয় করিতেছিল, খুব সম্ভব বাড়ী গিয়া দেখিবে যে সিপাহী সহ স্বামী ফিরিয়া আসিয়া তাহার অপেক্ষায় বসিয়া আছে। তাই বাড়ীতে সহসা প্রবেশ না করিয়া

দরজার ফাঁক দিয়া উকি দিয়া দেখিল,—কৈ, উঠানে বা রোয়াকে কেহই ত নাই !

মনিব বাড়ী হইতে মোক্ষদা ছুইট বেগুন আনিয়াছিল ; ঘর খুলিয়া সে ছুটি যথাস্থানে রাখিয়া দিল । অল্প দিন এই সময় সে উনান ধরাইয়া রন্ধন কার্যে ব্যাপৃত হয় । আজ আর রাঁধিবার জন্ত তাহার কোনও ব্যস্ততা দেখা গেল না । “আমি গুঁর জন্তে রেখে বেড়ে রাখি আর উনি সেপাই এনে আমায় ধরিয়ে দিয়ে আরাম করে ভাত খেতে বসুন ! হাঁঃ—রাঁধবে না আর কিছু । অত স্নেহে আর কাষ নেই !” স্তবরাং মোক্ষদা উনান ধরাইল না ।

বেলা ক্রমে ছুই প্রহর হইল, আড়াই প্রহর হইল ; না স্বামী না সেপাই, কৈ, কেহই ত আসে না ! এখন মোক্ষদার মনে হইল, তবে কি সে থানায় যায় নাই ? থানায় যদি না গেল, তবে গেল কোথায় ? বিবাগী হইয়া কোনও দিকে চলিয়া গেল নাকি ? যদি আর ফিরিয়া না আসে ?

এই সব ভাবনা চিন্তায়, দিবা অবসান হইল । এতক্ষণ পর্যন্ত মোক্ষদা কিছুই খায় নাই । স্বামীর জন্ত গত রাত্রে যে ভাত ঢাকা দিয়া রাখিয়াছিল ; তাহাই বাহির করিয়া খাইতে বসিল । ভাবিল, স্বামী যদি আসে, তাহাকে চারিটা গরম ভাত রাঁধিয়া দিবে ।

ভাত রাঁধিতে হইল না । স্বামী ফিরিল না । কাঁদিয়া কাটিয়া মোক্ষদা শেষে ঘুমাইয়া পড়িল ।

পরদিন প্রাতে উঠিয়া মোক্ষদা ভাবিল, ‘নাঃ ; এ কোন কাষের কথা নয় । থানায় গিয়ে খবর নিতে হচ্ছে, সেখানে সে আগার

নামে নালিস করতে গিয়েছিল কি না।’ তখনই ঘর দ্বার বন্ধ করিয়া, কিছু পয়সা আঁচলে বাঁধিয়া থানা অভিমুখে যাত্রা করিল।

থানায় গিয়া শুনিল, কোনও গ্রামের কোনও গোয়ালার্দ সে পর্য্যন্ত নিজ স্ত্রীর নামে নালিস করিতে আসে নাই। মোক্ষদা কাতর স্বরে বলিল, “তবে দারোগা বাবু আমার স্বামী গেল কোথায়?” কবে এবং কি অবস্থায় তাহার স্বামী অন্তর্দ্বান করিয়াছে, সমস্ত মোক্ষদার মুখে শুনিয়া দারোগা বাবু হুকুম দিলেন, “ওরে, সেই কাপড়ের পুঁটুলিটা মালখানা থেকে বের কর ত!”

পুঁটুলি খোলা হইলে দারোগা জিজ্ঞাসা করিলেন, “এ ধুতি এ গামছা তুই চিনিস?”

মোক্ষদা শঙ্কিত হইয়া বলিল, “এ ত তারই ধুতি তারই গামছা। তবে সে কোথায় গেল দারোগা মশাই?”

দারোগা জানাইলেন, গতকল্য প্রাতে একজন মাঝি আসিয়া এই ধুতি গামছা দিয়া গিয়াছে, এবং এজাহার করিয়াছে যে, রায়-গঞ্জের ঘাটে নৌকা বাঁধিয়া সে রান্নার যোগাড় করিতেছিল। রাত্রি যখন আন্দাজ এক প্রহর, তখন সে দেখিতে পাইল কালো মত লম্বা মত একটা লোক, তীরে আসিয়া এই ধুতি গামছা ছাড়িয়া রাখিয়া জলে ঝাঁপাইয়া পড়িল। লোকটা হয়ত আত্মহত্যা করিবার জন্তই ওরূপ করিয়াছে ইহা বিবেচনা করিয়া, মাঝি নৌকা খুলিয়া জলে জলে তাহার অনেক অনুসন্ধান করিল, কিন্তু কোথাও তাহাকে ভাসিয়া উঠিতে দেখিল না। তখন সেই ধুতি গামছা সে নৌকায় তুলিয়া রাখিয়াছিল।

ইহা শুনিয়া মোক্ষদা মূচ্ছিত হইয়া সেখানে পড়িয়া গেল।

দারোগা বাবু অনেক যত্নে ও চেষ্টায় তাহার চৈতন্ত্য সম্পাদন করাইয়া, “মৃতকের” নাম ধাম বয়স পেসা আত্মহত্যা করিবার কারণ প্রভৃতি জানিয়া লইয়া, তাহা ডায়েরিভুক্ত করিয়া, মোক্ষদাকে গৃহে ফিরিয়া যাইতে উপদেশ দিলেন।

কোনও মতে স্বামীর শ্রদ্ধা শান্তি সারিয়া মোক্ষদা সেই ভগ্ন-কুটীরেই বাস করিতে লাগিল। কোনও কায কর্ম করিতে ইচ্ছা হয় না, কেবল বসিয়া বসিয়া কাঁদিতে ইচ্ছা হয়। কিন্তু পেট বড় শত্রু—আবার দুঃখ ধান্দা করিতে মোক্ষদাকে বাহির হইতে হইল। মাথায় গায়ে সে আর তেল মাখে না, কক্ষ স্নান করে, দিনান্তে একমুঠা চাউল সিদ্ধ করিয়া খায়, খাইয়া নিজ কুটীরে দ্বার বন্ধ করিয়া শুইয়া শুইয়া কেবল কাঁদে। এগন কাঁদিয়াই তাহার স্মৃথ।

কিন্তু গ্রামের ছুট লোকে তাহার এ স্মৃথও বাদ সাধিল। মোক্ষদার বয়স এখনও ত্রিশ বৎসরের নিম্নেই। একাকিনী বাস করে। অনেক রাত্রে বদলোকে আসিয়া তাহার দ্বারে মৃদু মৃদু করাঘাত এবং স্তুতি মিনতি আরম্ভ করিল। নিতান্ত অতিষ্ঠ হইলে মোক্ষদা ঝাঁটা হস্তে বাহির হইত। তথাপি শান্তি নাই—ক্রমে সে উদ্ধাস্ত হইয়া উঠিল।

এমন সময় একদিন ও পাড়ার কাগারদের বিধবা বউ নিস্তারিণী

কলিকাতা হইতে গ্রামে ফিরিয়া আসিল। সে কলিকাতায় কোন্ বাবুদের বাড়ী ঝিগিরি চাকরি করে, বোম্বেপোর বিবাহ উপলক্ষ্যে একমাসের ছুটি লইয়া বাড়ী আসিয়াছে। তাহার কাছে কলিকাতার সব খবর শুনিয়া, মোক্ষদার মনে হইল, বদলোকেব হাত হইতে নিষ্কৃতি লাভের এখন একমাত্র উপায়, কলিকাতায় চলিয়া যাওয়া। নিস্তারিণী তাহাকে ভরসা দিল, একটি ভাল গৃহস্থ দেখিয়া, সেখানে মোক্ষদাকে নিযুক্ত করিয়া দিবে; কোনও কষ্ট হইবে না—স্বখে স্বচ্ছন্দে থাকিতে পারিবে।

মোক্ষদা বলিল, “কিন্তু দিদি, যে ভুলে গাঁ ছাড়লাম, সেখানেও যদি সেই ভয় থাকে? কলিকাতার লোকেরাই কি আর ধম্মপুস্তুর যুধিষ্ঠির?”

নিস্তারিণী বলিল, “সব রকম লোকই আছে। তা, তোকে এমন ভদ্র গেরস্তের বাড়ী দেখে রাখিয়ে দেবো, যেখানে সে সব আপদ বালাই থাকবে না।”

মাসান্তে, দুই একখানা তৈজস পত্র এবং সামান্ত গৃহোপকরণ যাহা ছিল বিক্রয় করিয়া, ঘরে দ্বারে তালা বদ্ধ করিয়া, নিস্তারিণীর সহিত মোক্ষদা কলিকাতায় চলিয়া গেল।

নিস্তারিণী যে বাড়ীতে চাকরি করিত, সে বাড়ীতে অপর ঝি প্রয়োজন না থাকায়, মোক্ষদার জন্ত সে একজন ভদ্র গৃহস্থ পরি-

বারের সন্ধানে রহিল। কয়েক দিন অন্বেষণের পর ঐরূপ একটা গৃহস্থের সন্ধান পাইল। শ্রামবাজারে রামদয়াল মিত্র মহাশয়ের বাড়ীতে একজন বিয় প্রয়োজন। মিত্র মহাশয় হাইকোর্টের একজন প্রবীণ উকিল; তাঁহার পুত্রগণ সকলেই উচ্চ শিক্ষিত এবং সচ্চরিত্র বলিয়া পাড়ায় খ্যাতি আছে। নিস্তারিণী সেই বাড়ীতে মোক্ষদাকে লইয়া গেল।

রামদয়াল বাবুর গৃহিণী, মোক্ষদাকে অল্পবয়স্কা এবং স্ত্রী দেখিয়া প্রথমে একটু আপত্তি করিয়াছিলেন। পরে যখন তাহার বৈধব্যের ইতিহাস, এবং গ্রামত্যাগের প্রকৃত কারণটা শুনিলেন, তখন সম্মত হইলেন। বাড়ীতে আরও দুইজন বি ছিল, তন্মধ্যে একটিকে বড় বধূমাতার শিশুসন্তানগুলির লালন পালনের ভার দিয়া, মোক্ষদাকে তাহার স্থানে মায় খোরপোষ ৪৮ বেতনে নিযুক্ত করিলেন।

রামদয়াল বাবুর গৃহিণী বুদ্ধিমতী, মিষ্টভাষিণী, এবং দয়ামায়া প্রভৃতি সদগুণাবলীর অধিকারিণী। তাঁহার সংসারে আশ্রয় পাইয়া, কোনও বিষয়ে মোক্ষদার কোনও অসুবিধা রহিল না। নিজ গ্রামে থাকিতে অন্নবস্ত্র সংগ্রহের জন্ত তাহাকে যে পরিমাণ কায়িক পরিশ্রম করিতে হইত, তাহার অপেক্ষা অনেক অল্প পরিশ্রমেই তাহার গ্রাসাচ্ছাদন নির্বাহ হইতে লাগিল; এবং মাসে মাসে তাহার বেতনের চারিটি টাকা গৃহিণী ঠাকুরাণীর নিকট জমা হইতে লাগিল।

গৃহিণী দেখিলেন, মোক্ষদা খুব পরিশ্রম করিতে পারে, মুখটি বজ্রিয়া আপন কায় কর্মগুলি করিয়া যায়, গোয়ালার মেয়ে হইলেও,

ভদ্র ঘরের বিধবাদের মতই নিষ্ঠার সহিত বৈধব্য-আচার পালন করিয়া থাকে ; তবে দোষের মধ্যে রাগটা একটু বেশী। অপর দুইজন বীর সহিত মাঝে মাঝে সে কোন্দল করে ; গৃহিণী তখন মধ্যস্থ হইয়া, কাহাকেও বা মুছ তিরস্কার করিয়া, কাহাকেও মিষ্ট কথায় বুঝাইয়া, ঝিটমাট করিয়া দেন।

এইরূপে মোক্ষদা তিন-বৎসর এই বাড়ীতে চাকরি করিল। এক একবার তাহার ইচ্ছা হইত, কিছুদিনের ছুটি লইয়া দিনকয়েকের জন্ত নিষ্ঠ গ্রামে ফিরিয়া যায় ; তাহার ঘর ছাড়ারের এখন কি অবস্থা তাহা দেখিয়া আসে ; কিন্তু আবার মনে হইত, আর সে শ্রমশানে ফিরিয়া গিয়া লাভ কি ?

শ্রাবণ মাসে অরে পড়িয়া মাত্র গৃহিণী কিছু দিন খুব ভুগিলেন, তাঁহার দেহ অত্যন্ত দুর্বল হইয়া গেল ; দাঁড়াইলে, মাথা ঘুরিয়া বসিয়া পড়েন। তাই পূজার ছুটির সময় রামদয়াল বাবু সপরিবারে মধুপুরে গিয়া গৃহিণীকে তিন মাস বায়ু পরিবর্তন করাইবার জন্ত প্রস্তুত হইলেন। তাঁহার এক এটর্নি বন্ধু কালীপদ বাবুও সপরিবারে মধুপুর যাইতেছিলেন,—সেখানে তাঁহার নিজ দুইখানি বাড়ী আছে, বাড়ী দুইখানি পাশাপাশি, তাহারই একখানি রামদয়াল বাবু ভাড়া লইলেন।

রামদয়াল বাবুর মধ্যম পুত্র চারুভূষণ বাবু ত্রিগ্লে দিওর কোম্পানীর বাড়ী কেশিয়ারি কর্ম করেন ; তাঁহার ছুটি অতি অল্প দিন মাত্র, তাই তিনি সপরিবারে বাড়ীতেই থাকিবেন, অপর সকলে

মধুপুরে যাইবেন স্থির হইল। বিয়েদের মধ্যে মোক্ষদা ও বিমলা মধুপুরে যাইবে; কামিনী কলিকাতায় থাকিবে।

গাড়ী রিজার্ভ করা হইল। যথা দিনে রামদয়াল বাবু সপরিবারে যাত্রা করিয়া, মধুপুরে পৌঁছিলেন।

এটর্নি বাবুরা তখনও পৌঁছেন নাই। বাড়ীতে পূজা, পূজা সারিয়া তবে তাঁহারা বাহির হইবেন।

কয়েক দিন মধুপুরে মোক্ষদার বেশ আনন্দেই কাটিয়া গেল। গৃহিণী যখন বিকালে পুত্রকন্যাগণ সহ বেড়াইতে বাহির হইতেন, মোক্ষদাও তাঁহার সহিত যাইত। তিন বৎসর কাল কলিকাতায় গৃহ মধ্যে আবদ্ধ থাকিয়া, তাহার প্রাণ হাঁফাইয়া উঠিয়াছিল। খোলা নাঠে বেড়াইতে পাইয়া মোক্ষদা বড় আরাম বোধ করিল।

পূজার পর এটর্নি বাবুরা সদলবলে আসিয়া পৌঁছিলেন।

সেদিন সন্ধ্যা বেলায় গৃহিণীর সহিত বেড়াইয়া আসিয়া মোক্ষদা দেখিল, বৈঠকখানা ঘরে তার মনিব এবং পাশের বাড়ীর এটর্নি বাবু বসিয়া কথোপকথন করিতেছেন। রামদয়াল বাবু বলিলেন, “আপনি তামাকখোর মানুষ; আমাদের ত ও পাট নেই;—আপনাকে একটা সিগারেট দিতে বল্‌বো কি?”—তিনি জানিতেন তাঁহার জ্যেষ্ঠ পুত্র সুধাংশু সিগারেট ব্যবহার করিয়া থাকে।

এটর্নি বাবু বলিলেন, “দরকার কি? আমার গুড়গুড়িটা আনিয়া নিচি।”—বলিয়া তিনি বাহিরের বারান্দার প্রান্তে গিয়া হাঁকিলেন, “ভজা—ও ভজা।”

পাশের ঘরে মোক্ষদা বসিয়া পাণ সাজিতেছিল, “ভজা” নামটা

শুনিবামাত্র সে কাণ খাড়া করিল। তার পর, একটি দীর্ঘনিশ্বাস ফেলিয়া, আবার নিজ কার্যে মন দিল।

দুই তিন বার ডাকাডাকির পর, ও বাড়ী হইতে সমুচ্চ স্বরে উত্তর আসিল—“আজ্ঞে।”

ও কি? কার কণ্ঠস্বর? মোক্ষদার মাথার ভিতর বন্ বন্ করিয়া ঘুরিতে লাগিল।

এটর্ণি বাবু হাঁকিলেন, “আমার গুড়গুড়িতে নিয়ে আয় ত ভজা!”

উত্তর আসিল, “আজ্ঞে যাই।”

মোক্ষদার আর পাণসাজা হইল না। সে তাড়াতাড়ি উঠিয়া দাঁড়াইল। চুণের আঙুল বস্ত্রপ্রান্তে মুছিয়া, কম্পিত পদে, দ্রুত দ্রুত বক্ষে সে বাহির হইয়া এমন স্থানে গিয়া দাঁড়াইল, যেখান হইতে বৈঠকখানা ঘরের মধ্য ভাগটি স্পষ্ট রূপে দেখা যায়।

কিয়ৎক্ষণ পরেই কুণ্ডলীকৃত নলনয় এক প্রকাণ্ড ফরসী হস্তে এটর্ণি বাবুর ভূত্য প্রবেশ করিল।

তাহার মুখের পানে এক নজর মাত্র চাহিয়া দেখিয়াই, মোক্ষদার হস্তপদ একবারে অবশ হইয়া আসিল। পড়িয়া যাইবার আশঙ্কায় সে দুই হাতে সম্মুখের দেওয়ালটায় ভর দিয়া চক্ষু মুদ্রিত করিল। সে ভাবে দাঁড়াইয়া থাকাও আর তাহার শক্তিতে কুলাইল না; ধীরে ধীরে সেইখানে বসিয়া পড়িল।

ভূত্যকে দেখিয়া, বৈঠকখানা ঘরে এটর্ণি বাবু বলিলেন, “কলকে কৈ রে? তামাক সেজে আনিস নি?”

ভজা বলিল, “আজ্ঞে তা তো আপনি বলেন নি !”

এটর্নি বাবু উকীল বাবুর দিকে ফিরিয়া বলিলেন, “বেটা গয়লাকু বুদ্ধি দেখলেন মশাই !” ভৃত্যকে বলিলেন, “যা তামাক সেজে নিয়ে আয়। আর, খানিকটে তামাক, গোটাকতক টিকে, দেশলাইয়ের বাস্ক, এই সবও নিয়ে আয়। এবার বুঝি ত ?”

“আজ্ঞে” বলিয়া—ভজহরি প্রস্থান করিল।

রামদয়াল বাবু বলিলেন, “আপনি এ রস্টটকে পেলেন কোথা ?”

এটর্নি বাবু বলিলেন, “সে মশায়, এক মস্ত ইতিহাস,—উপত্ভাস বলেও চলে।”

“কি রকম ?”

এটর্নি বলিতে লাগিলেন, “বছর চারেক আগে, ডিম্পেস্‌সিয়ার জন্ত ডাক্তারেরা আমাকে দিন কতক ষ্টীমারে বেড়াবার পরামর্শ দিয়েছিল, না ? তিন মাসের জন্তে একটা ষ্টীম লঞ্চ ভাড়া করে, পদ্মানদীর উপর আমি ঘুরে ঘুরে বেড়াইতাম। একদিন সন্ধ্যার পর, ঘাট থেকে কিছুদূরে নোঙর ফেলে ডেকে বসে আমি তামাক খাচ্ছি। টাঁদ উঠেছে, জলের শোভা দেখছি ; এমন সময় দেখলাম খানিক দূরে একটা মানুষ, একবার জল থেকে মাথা তুলছে, আবার ডুবছে। ষ্টীমারের ছজন খালাসিকে তখন বললাম—ওরে একটা মানুষ বোধ হয় ডুবে যাচ্ছে, দেখ দেখি যদি তোরা ওকে বাঁচাতে পারিস। তারা তখন, দড়ি বাঁধা ছটো লাইফ বেষ্ট নিয়ে লাফিয়ে পড়লো। কাছাকাছি গিয়ে সেই বেষ্ট ছটো ছুঁড়ে লোকটার কাছে ফেলে দিলে। একটা বেষ্ট

সে'ধরে ফেলে। তার পর খালাসীরা, নানা রকম কৌশল করে তাকে ষ্টীমারে এনে তুলে। রাম রাম—একেবারে উলঙ্গ ল্যাংটা, মশাই! খালাসীরা তাকে একটা লুঙ্গি পরিয়ে দিলে। অনেক জল খেয়েছিল, আমার সঙ্গে ডাক্তার বাবু ছিলেন, তিনি ওকে বমি টমি করালেন, ব্রাণ্ডি খাওয়ালেন, ক্রমে বেটা সুস্থ হয়ে উঠলো। তিনিই হন ঐ ভজহরি।”

রামদয়াল বাবু জিজ্ঞাসা করিলেন, “কি করে’ ডুবেছিল, তা কিছু বল্লে?”

“বল্লে, বৈকি। বল্লে আমার ‘ইস্তিরী’ মারা গেছে, সেই ‘শোগে’ আমি আত্মহত্যা করছিলাম। কাপড় কি হল জিজ্ঞাসা করায় বল্লে, ‘কাপড় গামছা ডাঙ্গায় রেখে আমি জলে ঝাঁপ দিয়েছিলাম। ভাবলাম, আমি ত মরছিই, ধুতিখানা গামছাটা এখানেই ফেলে রাখি, কোনও গরীবের কুড়িয়ে পেয়ে পরে বাঁচবে।”

রামদয়াল বাবু বলিলেন, “অদ্ভুত!”

এটর্নি বাবু বলিলেন, “অদ্ভুত বৈকি! আমি ভাবলাম, একাধারে এত পত্নীপ্রেম, আর এত বিশ্বপ্রেম ত দেখা যায় না! একে হাতছাড়া করা হবে না। চাকর স্বরূপ ষ্টীমারেই ওকে রাখলাম। মাস খানেক পরে কলকাতায় ফিরে এলাম। তার পর, ওর আমি বিয়ে দেবার চেষ্টা করেছি, বলেছি টাকা দিচ্ছি, দেশে গিয়ে আবার বিয়ে থাওয়া করে’ আয়। তা বেটা কিছুতেই রাজি হয়না। বলে, যার মুখে আগুন দিয়েছি, তাকে যে ভুলতে পারিনি হজুর! বিয়ে আর আমি করবো না!”

রামদয়াল বাবু বলিলেন, আশ্চর্য্য মানুষ ত !”

“আশ্চর্য্য বৈ কি !”

মোক্ষদা পূর্ব্ব স্থানেই ছিল, কিন্তু এসকল কথাবার্ত্তার একটা বর্ণও সে শুনিতে পায় নাই। মৃত স্বামীকে জীবিত মূর্ত্তিতে দেখিয়াই সে মুচ্ছিত হইয়া পড়িয়াছিল।

মোক্ষদার সহিত ভজহরির গোপনে দেখা সাক্ষাৎ হইয়াছে—কিন্তু কোনও পক্ষের মনিব পরিবারকে এ পর্য্যন্ত কিছুই জানানো হয় নাই। মোক্ষদার ভারি লজ্জা করে—ছিঃ এতদিন বিধবার মত থাকিয়া কেমন করিয়া বলিবে ও বাড়ীর ঐ ভজা আমার স্বামী ! লোকে যদি অবিশ্বাস করে, তখন সাক্ষী প্রমাণ কোথায় পাইবে ? ভজাও তাহার মনিবকে বলিতে সাহস করে না—তিনি শুনিলেও হয়ত বিশ্বাসই করিবেন না ; হয়ত ভাবিবেন, ও বাড়ীর ঐ স্ত্রী ঝিটার উপর তাহার লোভ পড়াতে ছুঁড়িকে রাজি করিয়া এই মিথ্যা দাবী উপস্থিত করিয়াছে ; এবং জুতিয়ে হাড় ভেঙ্গে দিবেন।

এখন আর মোক্ষদা গৃহিণীর সহিত বিকালে বেড়াইতে যায় না ; উভয় বাটীর লোকে বেড়াইতে বাহির হইলে সে স্বামীর সহিত নিভৃত সাক্ষাতের সুযোগ অন্বেষণ করে ; এবং মাঝে মাঝে সে সুযোগ পাইয়াও থাকে। উভয় বাটীর বাগানের সীমানার পশ্চাদ্-ভাগে একটা মস্ত কামিনী ফুলের ঝাড় আছে, তাহার আড়ালে বসিয়া উভয়ে প্রায়ই কিছুক্ষণের জন্ত কথাবার্ত্তা কহে।

প্রথম দিন মোক্ষদা জিজ্ঞাসা করিয়াছিল, “হাঁরে, তুই এমন কাষ কেন করতে গিয়েছিলি বল দেখি?”

ভজা বলিয়াছিল, “থানায় যাচ্ছি বলে” তোকে শাসিয়ে সেই যে বাড়ী থেকে বেরলাম ;—বুঝলি মুখী, খানিক দূরে গিয়ে ভাবলাম, তুই হলি আমার আপন ইস্তিরী তোকে জেলে দেওয়াটা ত ভাল হবে না, লোকে শুন্দে বলবে কি? গায়ে খুঁতু দেবে যে! তার চেয়ে বরং অস্ত্র রকমে তোকে জব্দ করাই ভাল। মাছ খেতে তুই বড় ভালবাসিস, মাছ না পেলে ধড়ফড়িয়ে মরিস, তাই ভাবলাম, দাঁড়া তোকে জব্দ করছি। তোকে বিধবা করে তোর মাছ খাওয়া বন্ধ করছি শালী!’—এই ভেবেই, ধুতি গামছা ডাঙ্গায় ছেড়ে রেখে পদ্মায় গিয়ে বাপ দিয়েছিলাম।”

“ধুতি গামছা ডাঙ্গায় ছেড়ে রেখে গিয়েছিলি কেন?”

“গায়েরই ঘাট ত! সেই ধুতি গামছা ওখানে দেখে, কেউ না কেউ চিনতে পারবে—আমার নাম যদি ভেসে নাও ওঠে, তা হলেও বোঝা যাবে যে জলে ডুবে আমি আত্মহত্যা করেছি। তবে ত তোর মাছ খাওয়া বন্ধ হবে!”

মোক্ষদা বলিল, “তোর কি বুদ্ধি রে! আচ্ছা যখন দেখলি যে বেঁচে আছিস, তখন বাড়ী এলিনে কেন?”

“চাকরি করছিলাম যে! ভেবেছিলাম, মাস কতক চাকরি করে’ কিছু টাকা জমিয়ে গিয়ে দেখিয়ে দেবো আমি রোজগার করতে পারি কি না। দেশে গিয়ে শুন্দলাম, তুইও কলকাতায় এসেছিস চাকরি করতে। সেই অবধি কত জায়গায় যে তোকে

খুঁজেছি তার ঠিক নেই। কার বাড়ীর বিকে পথে ঘাটে দেখলেই অমনি তার পিছু নিয়েছি। জিজ্ঞাসা করেছি হ্যাঁগা, রায়গঞ্জের মোক্ষদা গয়লানী কোথায় বি গিরি চাঁকরি করে জান কি? কেউ বলতে পারে নি।”

পরদিন বিকালে যখন কামিনী ঝাড়ের আড়ালে উভয়ের সাক্ষাৎ হইল, তখন ভজহরি কলাপাতায় জড়ানো একখণ্ড ভাজা মাছ বাহির করিল দেখিয়া মোক্ষদা জিজ্ঞাসা করিল, “মাছ আনলি কোথেকে?”

ভজহরি বলিল, “আজ চার বছর তুই মাছ খেতে পাসনি—আহা তোর কত কষ্ট হয়েছে! তাই তোর জন্তে এনেছি।”

“কোথা পেলি?”

“বামুন ঠাকুর আজ ভাতের সঙ্গে আমায় যে মাছ দিয়েছিল। সে মাছ আমি খাইনি, তোর জন্তে শুকিয়ে রেখেছিলাম। নে, থা।”—অল্প দূরেই একটা খাল ছিল। মোক্ষদা চারি বৎসর পরে স্বামীর প্রসাদ ভক্ষণ করিয়া, সেই খালের জলে হাত মুখ ধুইয়া আসিয়া, আবার গল্প করিতে বসিল।

প্রায় প্রতিদিনই উভয়ের এইরূপ সাক্ষাৎ হইতে লাগিল। প্রথম প্রথম ২।৪ মিনিটের অধিক উভয়ে একত্র থাকিত না। ক্রমে সাহস বাড়িয়া গেল, অন্ধকার হইয়া যাওয়ার পরও বসিয়া থাকিত।

উভয়ের বিরহাবস্থার সম্পূর্ণ বর্ণনা পরম্পরের নিকট তাহারা করিয়াছে। ক্রমে তাহাদের পরামর্শ হইয়াছে যে, এখন বিদেশে বিদায় চাহিলে তাহা মঞ্জুর হইবে না, মাস দুই পরে কলিকাতায় ফিরিয়া, উভয়ে কন্ম ত্যাগ করিয়া দেশে চলিয়া যাইবে, এবং উভয়ের

সঙ্কিত অর্থে গুটিকয়েক গাভী কিনিয়া, বাড়ীতে বসিয়া জাতি ব্যবসায় আরম্ভ করিবে।

প্রথম সাক্ষাতের দশবারো দিন পরে, একদিন যথানিয়মে মথাস্থানে দুইজনে মিলিত হইল। কলিকাতা হইতে ভজার মনিবের ইলিশ মাছ আসিয়াছিল। বামুন ঠাকুরের খোসামোদ করিয়া বেশ বড় একখানা পেটীর মাছ সেদিন ভজা সংগ্রহ করিয়া রাখিয়াছিল। সেই মাছ বাহির করিয়া বলিল, “খাসা মাছ রে! যখন ভাজছিল, গন্ধে বাড়ী মাত করে দিয়েছিল। কত বড় পেটখানা তোর জন্তে এনেছি ত্যাখ্ ত্যাখ্। আজ আমার সাধ হয়েছে আমি হাতে করে তোকে খাইয়ে দেবো। কাছে সরে আয়, হাঁ কর।”

মোক্ষদা হাসিয়া স্বামীর কাছটি ঘেঁসিয়া বসিল। ভজা আদর করিয়া বাম হস্তে স্ত্রীর গলাটি জড়াইয়া ধরিয়া তাহাকে মাছ খাওয়াইতে লাগিল।

কিন্তু এ দাম্পত্য লীলায় সহসা বাধা পড়িল। পশ্চাদ্দেশে কাহার প্রচণ্ড পদাঘাতে, ভজহরি ছমড়ি খাইয়া বিপুলবেগে মোক্ষদার গায়ের উপর পড়িয়া, উভয়েই ধরাশায়ী হইল। চমক ভাঙ্গিলে, উভয়ে চোখ চাহিয়া দেখিল, এটর্ণি বাবুর জ্যেষ্ঠ পুত্র বীরেন্দ্র বাবু, বীরবিক্রমে রক্তনেত্রে চাহিয়া আছেন।

তাহাকে দেখিবামাত্র মোক্ষদা এঁটো মুখে ষোঁটটা টানিয়া উঠিয়া দাঁড়াইল এবং অবিলম্বে সেখান হইতে পলায়ন করিল। ভজহরিও কষ্টে স্রষ্টে উঠিয়া দাঁড়াইল। বীরেন্দ্র বাবু ক্রোধ কম্পিত স্বরে বলিলেন, “তবে রে হারামজাদা! ভারি যে সাধুগিরি

ফলাতিস্!” বলিয়া তাহার গালে ঠাস ঠাস করিয়া কয়েকটা থাপ্পড় কষাইয়া দিলেন।

“ভজহরি হস্ত দ্বারা সে প্রহার রোধ করিতে চেষ্টা করিতে করিতে বলিতে লাগিল, “হুজুর, মারেন কেন? ও যে আমার ইস্তিরী—আপন বিয়ে করা ইস্তিরী হুজুর।”

বাবু বলিতে লাগিলেন, “তোমার বিয়ে করা ইস্তিরী বৈকি পাজি নছার গুয়ার! সে ত কবে মরে গেছে! ও ছুঁড়িটাকে আমি কি চিনি মনে করেছিস? ও তো উকীল বাবুর ঝি—বিধবা মামুষ! আর বদমাইসির জায়গা পেলিনে হতভাগা গাধা! ক’দিন থেকেই আমার সন্দেহ হয়েছে। সন্ধ্যোট হলোই তুইও দেখি এ দিকে আসিস্, আর ও বাড়ীর ঐ ঝি হারামজাদীও এই দিকে আসে। তাই আমি তাকে তাকে থেকে আজ এসে ধরেছি। চল বাবার কাছে, সব কথা গিয়ে তাঁকে বলি, রাস্কেল, তিনি তোমার কি শাস্তি করেন দ্যাখ্।”—বলিয়া বীরেন্দ্র বাবু হাঁফাইতে হাঁফাইতে বাসার দিকে অগ্রসর হইলেন। ভজহরি কাঁদিতে কাঁদিতে, কোমরটি দুই হাতে ধরিয়া, তাঁহার পশ্চাৎ পশ্চাৎ চলিল।

উভয় বাটার লোকেরা বৈকালিক ভ্রমণ হইতে ফিরিবামাত্র, কথাটা তাঁহাদের নিকট প্রচারিত হইয়া পড়িল। ভজহরি যে মোক্ষদাকে স্ত্রী বলিয়া দাবী করিতেছে, তাহাও তাঁহারা শুনিলেন। মিত্র গৃহিণী ও বড়বধূর নিকট মোক্ষদা কাঁদিতে কাঁদিতে সকল কথাই খুলিয়া বলিল। তাঁহারা বিশ্বাস করিলেন; কিন্তু উভয় বাটার পুরুষেরা উহা বিশ্বাস করিতে চাহিলেন না।

তখন রামদয়াল বাবুর বৈঠকখানায় ভজহরির বিচারের জন্ত ফুলবেঞ্চ বসিল। এটর্নি বাবু বলিলেন, “এর মীমাংসা ত সহজেই হতে পারে। ওহে সুধাংশু! দুজনকে তুমি আলাদা আলাদা জেরা কর না! ওদের কথা যদি মিথ্যে হয় জেরায় কতকক্ষণ টিকিবে?”

সুধাংশু বাবু তাহাই করিলেন। মোক্ষদাকে অন্তঃপুরে নিজ স্ত্রীর জিন্মায় বসাইয়া রাখিয়া, ভজহরিকে ডাকিয়া পাঠাইলেন। পদাঘাত জনিত কোমরের ব্যথায় কাতরাইতে কাতরাইতে সে আসিয়া মেঝেয় বসিল। সুধাংশু বাবু তাহাকে পুঙ্খানুপুঙ্খরূপে জেরা করিলেন যথা—তোদের বাড়ীতে ক’খানা ঘর, কোন্ কোন্ মুখো ঘর, কোন্ ঘরে কি কি থাকত, যে পুকুরে তোরা জল সরতিস, সে পুকুর বাড়ীর কোন দিকে, তার কটা ঘাট, সে পুকুরে যেতে হলে কোনও গাছের তলা দিয়ে যেতে হয় কি না, সেগুলো কি কি গাছ, যাদের বাড়ীতে মোক্ষদা কায়কর্ষ্য করত, তাদের নাম কি?—ইত্যাদি ইত্যাদি। ভজহরির উত্তরগুলি সুধাংশু বাবু লিখিয়া লইলেন।

তার পর মোক্ষদার ডাক পড়িল। তাহাকেও অবিকল ঐ প্রশ্নগুলি জিজ্ঞাসা করা হইল। উভয়ের উত্তরে বিশেষ কোনও পার্থক্য পাওয়া গেল না। ভজহরি তখন স্ত্রীর উপর সব সাব্যস্তের ডিক্রী পাইল।

যতদিন মধুপুরে থাকা হইবে, ততদিন এই দম্পতীর বাসের জন্ত মিত্র গৃহিণী তাঁহার বাসার আন্তাবলের পার্শ্বস্থ কক্ষটি নির্দিষ্ট করিয়া দিলেন। তাঁহারই পরামর্শে, শয়ন করিতে যাইবার পূর্বে মোক্ষদা একটা বাটীতে কর্পূর মিশানো খানিকটা তর্পিণ তৈল

লইয়া গিয়া, স্বামীর ব্যথিত কোমরে অনেকক্ষণ ধরিয়া উত্তমরূপে মালিস করিয়া দিল।

একমাস পরে কলিকাতায় ফিরিয়া, উভয়ে স্ব স্ব কর্মে ইস্তাফা দিয়া, সঞ্চিত অর্থ লইয়া দেশে চলিয়া গেল। তথায় কুটীরখানির জীর্ণসংস্কার করিয়া, একটি গোহাল ঘর তুলিয়া, গাভী কিনিয়া, জাতি ব্যবসায় সুরু করিয়া দিল। হৃদে যে কি পরিমাণ জল স্বচ্ছন্দে মিশানো যাইতে পারে, সে বিষয়ে উভয়ের কলিকাতার অভিজ্ঞতা খুব কাষে লাগিয়া গিয়াছিল।

ঔপন্যাসিক



কলিকাতার কোনও একটা মেসের বাসায়, নবীন ঔপন্যাসিক নগেন্দ্রবাবু বসিয়া তাঁহার নূতন উপন্যাসের শেষ প্রফ সংশোধন করিতেছিলেন। ভাদ্রমাস, রবিবার, বেলা নয়টা, আকাশে মেঘ থমথম করিতেছে, একটুও বাতাস নাই, মাঝে মাঝে তাঁহার ললাট হইতে ঘর্ম্মবিন্দু ঝরিয়া প্রফলীটের উপর পড়িতেছে। মাঝে মাঝে প্রফগুলার উপর দোয়াত চাপা দিয়া, পার্শ্বস্থ পাখা খানা উঠাইয়া লইয়া নগেন্দ্র বাবু নিজেকে বাতাস করিতেছেন;—আবার সংশোধন কার্য্যে মনোনিবেশ করিতেছেন। সম্মুখে পূজা, বহিখানি, এই সপ্তাহেই বাহির করা প্রয়োজন !

এই নগেন্দ্র বাবুর বয়স এখন ২৬ বৎসর মাত্র। নিবাস, পার্বন্যু জেলার কোনও এক দূর পল্লীগ্রামে। আই-এ পরীক্ষায় একবার ফেল করিয়া, আর পড়িবার সঙ্গতি হয় নাই—বাড়ীর অবস্থা ভাল ছিল না—অনেক চেষ্টা চরিত্র ও সহি-সুপারিসের বলে গ্রিন্লে ফিওর কোম্পানির আপিসে চারি বৎসর হইল সামান্য বেতনে কেরানী-গিরি কর্ম্মে প্রবৃত্ত হইয়াছিলেন ; এখন বেতন ও পদবৃদ্ধি হইয়াছে। অসচ্ছল অবস্থায় বিবাহ করা অনুচিত বলিয়া, দেশস্থ আত্মীয়গণের প্রবল অনুরোধ সত্ত্বেও আজি বিবাহ করেন নাই।

বাল্যকাল হইতেই নগেন্দ্র বাবুর মনে ঔপন্যাসিক হইবার একটা প্রবল আকাঙ্ক্ষা ছিল। চাকরিতে ভর্তি হইয়া প্রথম বৎসরে তিনি এক্ষেখামি উপন্যাস রচনা করিয়া, মাসিকপত্রে প্রকাশিত করিবার চেষ্টা করিয়াছিলেন; কিন্তু কোঁও সম্পাদকই তাহা গ্রহণ করিতে সম্মত হন নাই। এই কারণে বাবুর খানেক ধরিয়া তিনি ভগ্নোত্তম হইয়া বসিয়া ছিলেন। তাঁর পর বঙ্গসাহিত্যে উপন্যাসের “আর্ট”-এর যুগ আরম্ভ হইল; এবং যাহারা “আর্ট” মূলক উপন্যাস লিখিতে লাগিলেন, তাঁহাদের পুস্তক (বিশেষ করিয়া বিদ্যালয়গামী বালক ও তরুণ যুবকগণের মধ্যে) ছ ছ করিয়া বিকাইতে লাগিল। এই উপন্যাসগুলি, নানা কাগজে যতই “অশ্লীল” বলিয়া গালি খাইতে লাগিল, ততই ইহাদের কাটতি বাড়িতে লাগিল।

ইহা দেখিয়া, নগেন্দ্র বাবুও আবার খাতা বাঁধিলেন। ৩৪ মাস পরিশ্রম করিয়া আর্টমূলক একখানি উপন্যাস লিখিলেন। ইহাতে তিনি দেখাইলেন, স্ত্রীলোকের সতীত্ব এমন কোনই মূল্যবান জিনিষ নহে, যাহার জন্ত প্রাণপাত করিতে হইবে। পুরুষেরা যে স্ত্রীলোকের সতীত্ব সতীত্ব বলিয়া চীৎকার করিয়া থাকে, তাহার মূলে ঘোর স্বার্থপরতা ছাড়া আর কিছুই নাই। শাস্ত্র ও সমাজে মিলিয়া ষড়যন্ত্র করিয়া এতকাল স্ত্রীজাতির প্রতি যে অত্যাচার করিয়া আসিয়াছে, এ নূতন আলোর যুগে আর তাহা চলিবে না। পুরুষের যেমন যা-খুসী করিবার অধিকার আছে, স্ত্রীলোকেরও সেইরূপ অধিকার থাকাই জায়সঙ্গত—ইত্যাদি। লিখিলেন বটে, তাহাতে আর্টও কিছু রহিল বটে, কিন্তু আর্টের “নগ্নচিত্র” তাহাতে

তেমন ভাল ফুটিল না। হাজার হোক ভদ্রলোকের ছেলে, কতকটা লেখাপড়াও শিখিয়াছেন, তাই একটু সঙ্কোচের হাত এড়াইতে পারিলেন না। কিন্তু তৎসঙ্গেও, একজন উত্তমশীল প্রকাশক বহিখানি ছাপাইবার ভার লইলেন; পুস্তকের মধ্যে আটের যেটুকু অভাব ছিল, প্রকাশক তাহা বিজ্ঞাপনের দ্বারা পরিপূরণ করিয়া, বৎসর না ঘুরিতেই প্রথম সংস্করণ কাটাইয়া দিয়া দ্বিতীয় সংস্করণ বাহির করিলেন। কিছু টাকাও নগেন্দ্র বাবুর পকেটগত হইল।

এইরূপে উৎসাহ পাইয়া, নগেন্দ্র বাবু তাঁহার এই তৃতীয় উপন্যাস-খানি রচনা করিয়াছেন। এবার, পূর্ব সঙ্কোচ অনেকটা কাটাইয়া উঠিয়াছেন—বেশ “নির্ভীক” ভাবেই এবার আটের “নয়টিত্র” অঙ্কিত করিয়াছেন। এই উপন্যাসে তিনি দেখাইয়াছেন, আমাদের মূখ্য অন্ধ সমাজ যাহাদিগকে পতিতা বলিয়া দূরে ঠেলিয়া রাখিয়াছে, তাহারাই যথার্থ স্বর্গের দেবী—তাহাদের হৃদয়গুলি কুমুমের মত কোমল ও পবিত্র—দয়া মায়া, স্নেহ মমতা, পরহঃখকাতরতা, আত্ম-মর্যাদাবোধ প্রভৃতি সদগুণাবলীতে তাহারা ভূষিত; অপর পক্ষে, গৃহস্থ মেয়েদের মন অতি নীচ, অতি সঙ্কীর্ণ; তাহারা নিতান্ত স্বার্থপর, ক্রোধী, কটুভাষিনী—এক কথায়, তাহাদের হাড়ে হাড়ে বজ্জাতী।

নগেন্দ্র বাবু বসিয়া বসিয়া প্রফ দেখিতে লাগিলেন, ক্রমে দশটা বাজিল, সাড়ে দশটা বাজিল। ঝি আসিয়া স্নানের জন্ত তাগাদা জানাইল; নগেন্দ্র বাবু সে কথা কাণে তুলিলেন না। ক্রমে সন্ধ্যার নামক একজন স্নদর্শন যুবা আহ্বারান্তে পাণ চিবাইতে চিবাইতে

আসিয়া তাঁহার পাশে বসিল। বলি, “দাদা, আর বাকী কত?”
—সুধীরও এই বাসাতেই থাকুক।

নগেন্দ্র বাবু অসংশোধিত কাগজগুলি গণিয়া বলিলেন, “আর চার নীট আছে।”

সুধীর বিনীত স্বরে বলিল, “স্নান আহ্বার করে’ ওগুলো দেখলে হত না?”

নগেন্দ্র বলিল, “দেৱী হয়ে যাবে যে ভাই। আজকেই তারা পেজ বেঁধে অর্ডার প্রফ দেবে বলেছে, সেই জন্তেই আজ রবিবার হলেও ছাপাখানায় লোক বের করেছে। কালই তারা ছাপা শেষ করতে চায়। বইখানা যাতে এই হপ্তার মধ্যে বেরিয়ে যায়, তার জন্তে প্রকাশক তাদের কড়া তাগাদা দিচ্ছেন।”

সুধীর বলিল, “আচ্ছা দাদা, এক কাষ করুন না। আপনি স্নানাহার করতে যান, প্রফ যতগুলো দেখা হয়েছে, আমি এখনই গিয়ে ছাপাখানায় দিয়ে আসছি। ততক্ষণ তাদের কাষ চলুক। বলে’ আসবো, আর ষণ্টা হুইয়ের মধ্যে বাকীটুকু দিয়ে যাব।”

নগেন্দ্র বলিল, “এই রোদ্দুরে হু’হবার তুমি সেই দর্জিপাড়া হাঁটাইটি করবে? তার চেয়ে বরঞ্চ, আধঘণ্টা খানিক বস, শেষই করে দিই—একেবারে নিয়ে যেও।”

সুধীর বলিল, “না দাদা, হু’বার প্রেসে যেতে আমার কোন কষ্ট হবে না। আপনি উঠুন, স্নান করে’ ভাত খান। কলের জল ত বহুক্ষণ চলে গেছে, চৌবাচ্চার জলও তলানি পড়ে গেছে। ভাতও প্রায় শুকিয়ে উঠলো।”

এই সুধীর কলেজের একজন ছাত্র এবং নগেন্দ্র বাবুর একজন পরম ভক্ত। কেহ নগেন্দ্রনাথের লেখা নীতিবিগহিত বলিয়া নিন্দা করিলে সুধীর তাহার সহিত কোমর বাঁধিয়া তর্কে লাগিয়া যায় ; বলে, “তোমরা সব পেঁচার জাত, এতকাল অন্ধকারেই অভাস্ত ছিলে ; এখন সাহিত্যের এই নবযুগের আলো দেখে কিচির মিচির আরম্ভ করেছ।” আরও কত কি বলে।

ভক্তের এই সনির্বন্ধ অনুরোধ উপেক্ষা করিতে না পারিয়া, নগেন্দ্র উঠিল। সংশোধিত শীটগুলির পত্রাঙ্ক মিলাইয়া, পিনে গাঁথিয়া, সুধীরের হস্তে দিয়া, স্নানার্থ প্রস্তুত হইতে লাগিল। সুধীর প্রফগুলি লইয়া প্রেসে দিতে গেল।

২

নগেন্দ্রনাথের নূতন উপন্যাস “সমাজদোহী” প্রকাশিত হইয়াছে। সপ্তাহ খানেক পরে, আফিসের ফেরৎ একদিন বিকালে নগেন্দ্র তাহার প্রকাশকের দোকানে আসিয়া দর্শন দিল। প্রকাশক মহাশয় তখন তাঁহার খাসকামরায় বসিয়া চা পান করিতেছিলেন, সংবাদ পাইয়া নিজে আসিয়া নগেন্দ্রকে অভ্যর্থনা করিয়া লইয়া গিয়া, চেয়ারে বসাইয়া বলিলেন, “এক পেয়ালা চা দিক ?” নগেন্দ্র সম্মতি জানাইলে প্রকাশক মহাশয় হাঁকিলেন, “ওরে, নগেন বাবুকে এক পেয়ালা চা দে ; আর আমার জেগেও আর এক পেয়ালা আনিস।”

নগেন্দ্র জিজ্ঞাসা করিল, “সমাজদোহী কিরকম বিক্রী হচ্ছে ?”

প্রকাশক বলিলেন, “বেশ টানছে। এই এক সপ্তাহ ত’ বই বেরিয়েছে? এরই মধ্যে প্রায় ২৫০ গেছে। পূজোর মধ্যে ৪৫শো কেটে যাবে বোধ হয়।”

শুনিয়া নগেন্দ্রের মনটি পুলকিত হইয়া উঠিল। জিজ্ঞাসা করিল, “লোকে কেমন বলছে?”

প্রকাশক বলিলেন, “তা—ভালই বলছে। কিন্তু কেউ কেউ আবার বলছে, অগ্র সব জায়গা ভাল হয়েছে, কিন্তু গণিকা-চরিত্র-গুলো ভাল হয়নি।”

নগেন্দ্র একটু শ্লেষের হাসি হাসিয়া জিজ্ঞাসা করিল, “রুচি-বাগীশ মহাশয়েরা বুঝি?”

প্রকাশক ধীরে ধীরে উত্তর করিলেন, “না, তারা রুচিবাগীশ দলের লোক নয়। বরং একটু—অর্থাৎ—ইয়ে দলের! তারাই ত বেশীভাগ খদ্দের কি না। তারা বলছে, ‘মশাই, নগেন বাবু ঐ যে গণিকা চরিত্রগুলি এঁকেছেন, ও সাফ কল্লনা। তাদের চাল চলন কি ঐরকম, না তাদের কথাবার্তা ঐরকম রবিঠাকুরী ধাঁজের? নগেন্দ্রবাবু বোধ হয় জ্যাস্ত গণিকার সঙ্গে কখনও কোনও কারবার করেন নি; তাই তাদিকে এমন অদ্ভুত করে এঁকেছেন। চিত্রগুলি যদি বাস্তব হত, তা হ’লে বইখানি আরও বেশী হৃদয়-গ্রাহী হতে পারতো।’ এই কথা তো তারা বলে।” বলিয়া প্রকাশক মহাশয় অবনত মুখে চা পান করিতে লাগিলেন।

নগেন্দ্র এই সমালোচনা খণ্ডন করিতে পারিল না। বাস্তবিকই ত, গণিকাচরিত্র অঙ্কিত করিতে সে নিজ অভিজ্ঞতার কিছুমাত্র

সাহায্য পায় নাই। নাটকে উপন্যাসে গণিকাদের বর্ণনা, এবং লোক মুখে কিছু কিছু শুনা কথা মাত্রই ত তাহার অবলম্বন! এই সকল কথা ভাবিতে ভাবিতে নগেন্দ্র চা পান শেষ করিল।

“নগেন্দ্রকে নীরব দেখিয়া প্রকাশক বলিলেন, “আপনি যদি ঐ সব দলে মাঝে মাঝে একটু আধটু মেশেন, তাতে আর ক্ষতিটা কি? বিলাতী ঔপন্যাসিকেরা, যারা দরিদ্রপল্লীর গল্প লিখবেন, তাঁরা রীতিমত দরিদ্র সেজে তাদের পল্লীতে গিয়ে বাস করে’, তাদের সঙ্গে মেলামেশা করে’, নিজস্ব অভিজ্ঞতা সঞ্চয় করে’ এনে নভেল লেখেন শুনেছি।”

আর কিছুক্ষণ কথাবার্তার পর নগেন্দ্র উঠিল। প্রকাশক বলিলেন, “আমার কথাটা ভেবে দেখবেন তা হলে?”

“হ্যা—ভেবে দেখব বৈকি।” বলিয়া নগেন্দ্র বিদায় গ্রহণ করিল।

৩

সেই দিন রাত্রে আহারের পর, বাসার নির্জন ছাদে বসিয়া, নগেন সুধীরকে তাহার প্রকাশকের মন্তব্য ও প্রস্তাবটা জানাইল। শুনিয়া, সুধীর প্রথমটা শিরিয় উঠিল; বলিল, “ছি ছি, তাও কি হয়?”

নগেন্দ্র সুধীরকে বুঝাইল, উদ্দেশ্য যখন মন্দ নহে, উদ্দেশ্য যখন কেবলমাত্র অভিজ্ঞতা সঞ্চয়—জ্ঞান আহরণ, - তখন আর ইহাতে দোষটা কি? কিছুক্ষণ তর্ক বিতর্কের পর সুধীর স্বীকার করিল যে, বর্তমান ক্ষেত্রে ওরূপ কার্য্য দোষাবহ হইবে না বটে। জিজ্ঞাসা

করিল, “তা, আপনি তাদের সঙ্গে কি করে মিশবেন? কাউকে ত আপনি জানেন না!”

নগেন্দ্র হাসিয়া বলিল, “তাদের সঙ্গে আলাপ পরিচয়ের জন্তে কোনও সুপারিশ বা পরিচয় পত্র আবশ্যক হয় না হে! কিঞ্চিৎ অর্থ থাকলেই হল। কিন্তু, আমি যে মৎলবটি সিক করেছি, তাতে বোধ হয় টাকারও কোনও আবশ্যক হবে না।”

সুধীর কৌতূহলী হইয়া জিজ্ঞাসা করিল, “কি রকম?”

নগেন্দ্র বলিল, “আমাদের ব্রজনাথ মল্লিক—আমাদের চা বাগান গুলিতে যিনি কোদাল আর কন্ডল সরবরাহ করেন, তিনি বছর দুই আগে আমাকে একবার তাঁর বাগান পার্টিতে নিমন্ত্রণ করেছিলেন। সেখানে, ঐ দলের একটি স্ত্রীলোকের সঙ্গে আমার আলাপ হয়েছিল। এমন তার স্বভাব, এমন কথাবার্তা যে, সে আর তোমায় কি বলব! সে আমায় তার ঠিকানা দিয়েছিল; তার সঙ্গে গিয়ে দেখা সাক্ষাৎ করবার জন্তে বিশেষ করে’ অনুরোধ করেছিল। ভাবছি, তাকেই চিঠি লিখে তার সঙ্গে গিয়ে দেখা করি। তার মন যে রকম উঁচু, কখনই সে আমার কাছে টাকা চাইবে না। কিছুদিন মাঝে মাঝে সেখানে যাতায়াত করলে, তাকেও বেশ চিন্তে পারবো, ঐ দলের আরও কত স্ত্রীলোক ত সেখানে যাওয়া আসা করে, তাদেরও চাল চলন, কথাবার্তা, জীবন যাত্রা প্রশালী ‘ষ্টাডি’ করবার বেশ সুযোগ পাব।”

সুধীর কিয়ৎক্ষণ বসিয়া ভাবিল। শেষে বলিল, “কিন্তু দাদা, মানুষের মন; শেষে হিতে বিপরীত ঘটয়ে বসবেন না ত?”

‘ ‘ নগেন হাসিয়া বলিল, “সে ভয় নেই। আমি তার গোড়া মেরে রেখে তবে গিয়ে কার্য্যক্ষেত্রে অবতীর্ণ হব।”

স্বধীর কৌতুহলী হইয়া জিজ্ঞাসা করিল, “কি করে দাদা?”

‘ ‘ নগেন বলিল, “সে তুমি কাল জানতে পারবে।”

নগেন্স রাতে শয়নঘরে খিল বন্ধ করিয়া এই পত্রখানি লিখিল—
স্নেহের ভগিনী,

তোমার স্মরণ আছে কি না জানি না, প্রায় ছই বৎসর পূর্বে কাশীপুরের এক বাগানে এক রাতে তুমি মূজরা করিতে গিয়াছিলে সেইখানে তোমার সহিত আমার পরিচয় হইয়াছিল। রাত্রি একটু অধিক হইলেই, সমবেত স্ত্রীপুরুষ সকলেই স্তম্ভাপানে হতজ্ঞান অবস্থায় ভূমিতে লুটাইতেছিল, কেবল তুমি এবং আমি স্বাভাবিক অবস্থায় ছিলাম! তুমি স্বতঃপ্রবৃত্ত হইয়া আমার সহিত আসিয়া আলাপ করিয়াছিলে, এবং আমাকে ক্ষুধায় অত্যন্ত কাতর দেখিয়া তুমি নিজে উত্তোগিনী হইয়া পাকশালা হইতে খাবার আনাইয়া পরম যত্নে আমায় খাওয়াইয়াছিলে। আশা করি এখন তোমার সব কথা মনে পড়িবে।

সে রাতে তোমার ঠিকানায়ুক্ত একখানি কাগজ তুমি আমায় দিয়াছিলে, এবং অনুরোধ করিয়াছিলে যে, আমি যেন একদিন গিয়া তোমার সঙ্গে সাক্ষাৎ করি। আমি তখন তোমায় মৌখিক সম্মতি জানাইয়াছিলাম, যদিও মনে মনে স্থির জানিতাম যে,

তোমার অনুরোধ আমি কখনও পালন করিব না। কারণ, তখন ওরূপ কার্য্যকে আমি অত্যন্ত নীতি-বিগর্হিত বলিয়া মনে করিতাম। তাই আমার সে মৌখিক প্রতিশ্রুতি এতদিন রক্ষা করি নাই। কিন্তু এখন নবযুগের নূতন আলোকে আমার মতের পরিবর্তন হইয়াছে। তোমার সহিত সাক্ষাৎ করিতে এখন আমি অভিলাষী হইয়াছি। তোমার ব্যবহারে ও তোমার সঙ্গে সেই অন্তর্লক্ষণ আলাপেই আমি বুঝিয়াছিলাম যে, জগতের চক্ষে তুমি একজন পতিতা নারী হইলেও তোমার অন্তঃকরণ অতি কমনীয় সৌন্দর্য্যে মণ্ডিত। আজ স্বীকার করিতে বাধ্য নাই, আমি তোমাকে দেখিয়া অত্যন্ত মুগ্ধ হইয়াছিলাম। কিন্তু তাহা কোনও কুভাবের বশবর্তী হইয়া নহে ;—ফুলের সৌন্দর্য্যে, পাখীর কলগানে মনুষ্য-হৃদয় যে কারণে মুগ্ধ হয়, আমিও সেই কারণেই মুগ্ধ হইয়াছিলাম। (আর, এ পত্রখানিও কোনও কুভাব প্রণোদিত হইয়া আমি যে লিখিতেছি না, উপরে যে শব্দে তোমায় সম্বোধন করিয়াছি তাহা হইতেই তুমি বুঝিতে পারিবে।) দুই বৎসর হইতে চলিল, কিন্তু আজিও তোমাকে আমি ভুলিতে পারি নাই। তোমার সেই ঢল ঢল সুন্দর মুখখানি আমার মানস পটে অঙ্কিত হইয়া আছে। তাই তোমার হৃদয়খানি আরও কাছাকাছি পাইবার জন্ত—সেখানির পরিচয় আরও নিবিড়ভাবে লাভ করিবার জন্ত,—আমার মনে প্রবল বাসনা জন্মিয়াছে। আমি জানি তোমাদের জীবন বড় নিঃসঙ্গ—বড় একা—কেহ তোমাদের আপনান্ন হয় না—বা তোমাদিগকে যথার্থ আপনান্ন কেহ করে না

—হাটের বিকিকিনি মাত্র। আমার অভিলাষ, আমি তোমার বন্ধু হই, সখা হই, আত্মীয় হই—এই জন্তই আমি তোমার দর্শন কামনা করিতেছি ; অত্ৰ কোন অভিপ্রায়ে নহে। ইতি—
.. পুনশ্চ—খামে পত্র দিও।

আশীর্বাদক

শ্রীনগেন্দ্রনাথ রায়।

ঠিকানা—২৭ নং দুর্গাচরণ ঘোষের লেন,
বউবাজার, কলিকাতা।

পরদিন প্রাতে এই পত্রখানি পড়িয়া সুধীর একেবারে মোহিত হইয়া গেল। বলিল, “দাদা, সামান্য একখানা চিঠি লিখেছেন, তাতেও জিনিয়সের ছাপ! এই ঠিক হয়েছে। সকল কথা গোড়া থেকে স্পষ্ট করে বলা রইল, ভালই হ’ল।”

দুইদিন ধরিয়া নগেন্দ্রনাথ পত্রোত্তরের জন্ত ব্যাকুল প্রতীক্ষায় কালাযাপন করিল। তৃতীয় দিনে পত্রোত্তর আসিল।

পত্রখানি সুলিখিত নহে, সুরচিত নহে, বানান ভুল অত্যন্ত বেশী। সংশোধনান্তে নিম্নে উহার প্রতিলিপি আমরা প্রকাশ করিলাম :—

মহাশয়,

আপনার সুধামাখা পত্রখানি পাইয়া আমি যে কি পর্য্যন্ত

সুখিনী হইলাম তাহা এই সামান্য পত্রে লিখিয়া কি জানাইব।
 ১. আপনি অধিনীর সহিত সাক্ষাৎ করিতে ইচ্ছুক হইয়াছেন ইহা
 আমার পরম সৌভাগ্য। আপনি যে কথা লিখিয়াছেন তাহা
 সমস্তই আমার স্বরণ আছে। সেই বাগানে আপনার সহিত
 সাক্ষাতের পর আপনার নাম আমি জপমালা করিয়াছি জানিবেন।
 আপনি দয়া করিয়া আগামী মঙ্গলবার দিবস সন্ধ্যার পরে আসিবেন,
 আমি তৃষিতা চাতকিনীর দ্বায় আপনার আশাপথ চাহিয়া থাকিব।

আপনার চিরাধিনী

শ্রীমতী প্রভাবতী দাসী।

এই পত্র যথাসময়ে নগেন্দ্রনাথ, সুধীরকে দেখাইল। সুধীর
 পত্র পড়িয়া নাসিকা কুণ্ঠিত করিল। বলিল, “আপনার কাছে
 তার কথাবার্তা শুনে আমার মনে কেমন ধারণা হয়েছিল যে,
 স্বীলোকটি বেশ শিক্ষিত। রাম রাম, এত দেখছি নিতান্ত মূর্থ!”

সুধীরের এ উক্তি শুনিয়া নগেন্দ্র মনে মনে যেন একটু বিরক্ত
 হইল। বলিল, “বেথুন কলেজে পড়বার সুযোগ ত কখনও পায়
 নি, কায়েই এ রকম চিঠি সে লিখেছে। কিন্তু বেশী লেখাপড়া না
 জানলেই যে মানুষ একেবারে অপদার্থ হয়ে গেল তা মনে করা
 ভুল সুধীর।”

সুধীর একটু অপ্রতিভ হইয়া বলিল, “না, তা মনে করিনি
 দাদা। তবে শুধু এই বলছিলাম যে, ভাষাটা—”

নগেন্দ্র বাধা দিয়া বলিল, “চিঠির ভাষার কথা ছেড়ে দাও।

তার মুখের ভাষা শুনলে তাকে আর মূৰ্খ বলে মনে হবে না। এমন কি, তাকে—সে যা, তাই বলেই মনে হবে না।”

নগেন্দ্র মনে মনে স্থির করিল, মঙ্গলবার সন্ধ্যার সময় সে ত নিজে যাইবেই, স্বধীরকেও লইয়া গিয়া, উহার এই ভ্রান্ত ধারণা দূর করিয়া দিবে।

ঠিক এক সপ্তাহ কলিকাতা হইতে অনুপস্থিতির পর, আজ মঙ্গলবার প্রাতে, তবলা বাঁয়া বেহানা-হাৰ্মোনিয়ম বিছানা বাল্ল ভূতা ওস্তাদজি ও কুকুর সহ, নর্তকী প্রভাবতী মফঃস্বল হইতে মুজরা করিয়া তাহার বাসায় ফিরিল। এ বাড়ীখানি তাহার নিজের নহে, এগ্রিমেন্ট করিয়া লওয়া; দ্বিতলের সমস্ত কক্ষগুলি সে নিজে অধিকার করিয়া আছে। দ্বিতলের কক্ষগুলিতে দুইজন ভাড়াটিয়া আছে—ইহারাও নর্তকী, তবে তাহাদের তেমন পশার নাই। যে আসরে প্রভার ৫০ টাকায় বায়না হয়, সে আসরে ইহারা ১০ টাকার বেশী পায় না। এই কারণে ইহারা মনে মনে প্রভার বিলক্ষণ ঈর্ষা করে; কিন্তু প্রভা বাড়ীওয়ালী, মুখে কিছু প্রকাশ করিতে সাহস করে না। একতলায় পাকাদি হয়, ভূতেরা থাকে।

প্রভাবতী দ্বিতলে উঠিয়া, সম্মুখে কুস্তমকে দেখিয়া জিজ্ঞাসা করিল, “কি ভাই, বাড়ীর খবর সব ভাল ত?”

কুসুম বলিল, বাড়ীর খবর ত এক রকম ভালই। কিন্তু পাড়ায় আজকাল বড় ভয় হয়েছে দিদি।”

প্রভা জিজ্ঞাসা করিল, “কেন, কি হয়েছে?”

কুসুম বলিল, “বড় গুণ্ডার উপদ্রব হয়েছে। পশু রাত্রে একটা গুণ্ডা, বাবু সেজে যামিনীর ঘরে এসেছিল। ছুরি দেখিয়ে, তার গহনাগুলি সব কেড়ে নিয়ে, পালিয়ে গেছে।”

“সে চেষ্টামেচি করেনি?”

“তার মুখ বেঁধে ফেলেছিল, চেষ্টাবে কোথেকে? ভাগ্যিস একটু পরে একজন ভাড়াটে সে ঘরে গিয়ে পড়েছিল, সে তার মুখ থেকে কাপড়ের বাঁধন খুলে দিলে, নইলে দম বন্ধ হয়েই মরে যেত।”

“পুলিশে খবর দেওয়া হয়েছিল?”

“হ্যাঁ হয়েছে বৈকি। তা, সে চোরকে পুলিশ আর কোথায় খুঁজে পাবে?”

প্রভা জিজ্ঞাসা করিল, “আমার চিঠিপত্র কিছু এসেছিল?”

কুসুম বলিল, “হ্যাঁ এসেছিল একখানা। তোমার ঘরের দর-দার ফাঁক দিয়ে ভিতরে ফেলে দিয়েছি।”

এমন সময় অপর ভাড়াটিয়া সারদাসুন্দরী হাঁপাইতে হাঁপাইতে টিঁড়ি উঠিয়া বলিল, “এই যে প্রভা দিদি, এই আসছ বুঝি? ডাও আগে হাঁপ ছাড়ি। ছুটতে ছুটতে বাড়ী এসেছি।”

প্রভা ও কুসুম যুগপৎ জিজ্ঞাসা করিল, “কেন? কেন? কি হচ্ছে সারদা?”

“ওগো ঐ গলিতে পুলিশে পুলিশে ছেয়ে গেছে। গলি দিয়ে যে যাচ্ছে তাকে ধরছে। তাই দেখে আমি ভয়ে ছুটতে ছুটতে অন্য পথ দিয়ে পালিয়ে এসেছি।”

প্রভা জিজ্ঞাসা করিল, “কেন, এত পুলিশ কেন?”

“খুন হয়েছে যে গো!”

“কে খুন হল?”

“কামিনী।”

“অ্যাঃ—কামিনী খুন হয়েছে? কি করে খুন হল? কে খুন করলে?”

“শুনলাম, কাল রাতে একজন গুণ্ডা, বাবু সেজে কামিনীর ঘরে এসেছিল। তারপর অনেক রাতে, কামিনীকে খুন করে,’ তার গয়নাগাঁটি সব নিয়ে সরে পড়েছে। গায়ের গয়না ত নিয়েছেই, আঁচল থেকে লোহার সিন্ধুকের চাবি নিয়ে লোহার সিন্ধুক খুলে, বাকী গয়না, টাকা কড়ি যা ছিল সমস্ত নিয়ে গেছে।”

শুনিয়া প্রভাবতী ও কুসুম উভয়েই হায় হায় করিতে লাগিল। আর দুই চারি কথার পর, প্রভা ত্রিতলে উঠিয়া নিজ শয়ন ঘরের চাবি খুলিল। খুলিয়া, ভিতরে প্রবেশ করিবামাত্র দেখিতে পাইল, কুসুম কথিত ডাকের চিঠিখানা মেঝের উপর পড়িয়া রহিয়াছে।

চিঠিখানা কুড়াইয়া প্রভা শিরোনামা দেখিল, হস্তাক্ষর অপরিচিত। চিঠিখানা টেবিলের উপর রাখিয়া, ভৃত্যকে চায়ের জল চড়াইতে আদেশ দিয়া, মুখ হাত ধুইয়া, বস্ত্রাদি পরিবর্তন করিল।

বাজার আনিবার জন্য ঠাকুরকে টাকা দিয়া, চা পান করিতে করিতে চিঠিখানা খুলিল।

চিঠি পড়িয়া, প্রভার মুখ শুকাইয়া গেল, তাহার হাত পা ঠক ঠক করিয়া কাঁপিতে লাগিল। ছুটিয়া বারান্দায় বাহির হইয়া, কম্পিতকণ্ঠে ডাকিল, “কুসুম ও কুসুম, ও সারদা, তোরা শীগ্গির আয়।”

কুসুম ও সারদা, উভয়েই একত্র বসিয়াছিল। এই ডাক শুনিয়া তাহারা পরস্পরের মুখ চাওয়া চাওয়ি করিয়া একটু হাসিল। পরে বাহির হইয়া বলিল, “কেন বাড়ীউলি দিদি? ডাকছ?”

উপর হইতে পূর্ববৎ আত্মকণ্ঠে উত্তর আসিল—“শীগ্গির আয়—সর্বনাশ হয়েছে।”

কুসুম ও সারদা তখন মুখের হাতুরেখা গোপন করিয়া, মুখে উদ্বেগ ও ভয়ের চিহ্ন লইয়া ছুটিতে ছুটিতে উপরে উঠিয়া গেল। গিয়া দেখিল, মেঝের উপর চা ঢেউ খেলিতেছে, প্রভার কুকুর তাই চাটিয়া চাটিয়া থাইতেছে; পেয়ালা ও পিরিচ টেবিলের উপর হইতে পড়িয়া ভাঙ্গিয়া গিয়াছে, প্রভা চক্ষু কপালে তুলিয়া, তাহার ফরাস বিছানায় বসিয়া হাঁপাইতেছে।

কুসুম ও সারদা প্রবেশ করিয়া জিজ্ঞাসা করিল, “কি দিদি, কি হয়েছে?”

প্রভা চিঠিখানা তাহাদিগকে ঠেলিয়া দিয়া বলিল, “পড়ে দেখ।”
কুসুম তখন চিঠি লইয়া পড়িল।

মেছুয়াবাজার ।

ঐচরণকমলেশু—

প্রাণপ্রিয়সি, একদিন কোনও স্থানে তোমার মুজরো গুলিয়া আমি প্রাণে এতই আনন্দ পাইয়াছিলাম, যদিও আমি একজন সামান্ত গুণ্ডা, সেই অবধি মনে মনে তোমায় অত্যন্ত ভালবাসি ও ভক্তি করি। তাই এ পত্র তোমায় লিখিতেছি। আমাদের দলের অপরাপর গুণ্ডা লোকেরা জানিতে পারিয়াছে যে, মফস্বল হইতে মুজরা করিয়া অনেক টাকা লইয়া মঙ্গলবার দিবস তুমি কলিকাতায় ফিরিবে ; তাহারা পরামর্শ করিয়াছে রাত্রে তাহারা তোমার নিকট বাবু সাজিয়া যাইবে এবং তোমাকে হত্যা করিয়া তোমার অলঙ্কার ও টাকা কড়ি সমস্ত অপহরণ করিবে। তোমার গলায় ছুরী দিবে ইহা আমার সহ্য না হওয়াতে, এই পত্র লিখিয়া তোমায় সাবধান করিয়া দিলাম। এ পত্র পড়িয়া তুমি পুড়াইয়া ফেলিবে, কারণ ইহা আমাদের দলের লোকের হস্তগত হইলে বিশ্বাসঘাতকতার দণ্ড তাহারা আমাকেই হত্যা করিবে সন্দেহ নাই। ইতি—

তোমার প্রেমাকাজক্ষী অধম ভৃত্য

ত্রীশুণ্ডা ।

চিঠি পড়িয়া কপটী কুসুম ছই চক্ষু কপালে তুলিয়া বলিল, “তাই ত বাড়ীউলি দিদি, কি হবে ?”

সারদা পেচকের মত গম্ভীর স্বরে বলিল, “এখন উপায় ?”

প্রভাবতী শুইয়া পড়িয়াছিল। তাহার মুদিত চক্ষু হইতে অশ্রু

গড়াইতে লাগিল। কুকুরটি চা পান শেষ করিয়া তাহার পদতলে আশ্রয় গ্রহণ করিয়াছিল।

সারদা কঁাদ কঁাদ স্বরে বলিল, “হ্যাঁ ভাই কুসুম, যদি আমাদিগেও খুন করে? এইবেলা কোথাও পালাই চ’।”

কুসুম বলিল, “পালিয়ে যাব কোথা? কোনও চুলো কি আছে? আর, আমাদের আছেই বা কি ভাই, যে নেবে? খানকতক পিতলের গহনা, এনামেলোর ডিশ, আর ফেঁসোর গদি! তবে, প্রভা দিদির বোধ হয় পালানোই উচিত। সাতদিনের বায়না নিয়ে মফঃস্বলে গেছে, অনেক টাকা কড়ি নিয়ে আজ তার ফিরে আসবার কথা, তা কের্মন করে তারা টের পেয়েছে ভগবান জানেন। দিদি, ও দিদি, ও রকম করে পড়ে থাকলে কি হবে ভাই? ওঠ, একটা পরামর্শ যুক্তি করা যাক।”—বলিয়া সে সারদার পানে চাহিয়া, অলক্ষিতে একটু হাসিল।

প্রভা উঠিয়া বসিল। বলিল, “আমার চাকরকে ডাক ত।”

ভৃত্য নিম্নতলে বসিয়া মশলা বাঁটিতেছিল, কুসুমের ডাক শুনিয়া, হাত ধুইয়া উপরে আসিল।

প্রভা বলিল, “একঠো ট্যাক্সি বোলাও—জল্দি।”

সারদা ও কুসুম জিজ্ঞাসা করিল, “এখন কোথা যাবে দিদি?”

প্রভা বলিল, “লালবাজার। পুলিশ কমিশনের সাহেবকে গিয়ে চিঠিখানা দেখাই। তিনি আমার প্রাণরক্ষা করেন কিনা দেখি।”

ট্যাক্সি আসিবার শব্দ শুনিয়া, প্রভা উঠিয়া তাহার কেশবেশে একটু পারিপাট্য সাধন করিয়া লইল। তাহার পর জুতা মোজা

পরিয়, কুকুরকে বাঁধিয়া রাখিয়া সিঁড়ি দিয়া নীচে নামিয়া গেল।

সারদা ও কুসুম দ্বিতলে নামিয়া গেল। সারদা বলিল, “পুলিসে গেল, আমার কিন্তু ভয় করছে ভাই।”

কুসুম বলিল, “একটু বাড়াবাড়ি হয়ে গেল।”

সারদা বলিল, “তখনই ত তোকে আমি বারণ করেছিলাম, তুই কি শুনলি? বলি, ‘এ দেখছি ছবছ তরুবার অখিল, কোনও কুম্ভপ্রায় নেই, পবিত্র প্রেম করতে আসছেন। দাঁড়াও একটু মজা করা যাক!’—

“মজা ত করলি, কিন্তু শেষে আমরাই জাল করার দায়ে পড়ে যাব না কি?”

কুসুম বলিল, “ঈস্! আমাদের কে ধরে? কিছু প্রমাণ আছে? হাতের লেখা ত আর আমাদের কার নয়।” :

সারদা বলিল, “সেই ভরসায় কি নিশ্চিন্দি থাকা যায় ভাই?”

“তুই তবে বসে বসে ‘চিন্দি’ কর। আমি যাই, নেয়ে নিই গে, আবার কলের জল চলে’ যাবে।”—বলিয়া কুসুম তাহার ঘাট সাবান ও গামছা লইয়া প্রস্থান করিল।

সন্ধ্যার পূর্বেই নগেন্দ্র আপিস হইতে ফিরিয়া আসিল। আপিসের বস্ত্র পরিবর্তন করিয়া বলিল, “ওঃ আজ কি গরমটাই গেল! আপিসে যেমে একবারে নেয়ে উঠেছিলাম। স্নান করি ফেলি।”

সুধীর বলিল, “দাদা, এই অবেলায় স্নান করবেন ? তার চেয়ে না হয় ভিজ্জে গামছা দিয়ে—”

নগেন্দ্র বলিল, “না না—কিছু হবে না !”—বলিয়া সে নিজ সাবানদানী ও তোয়ালে লইয়া নীচে নামিয়া গেল।

স্নান করিয়া আসিয়া, সাবধানে কেশ বিছাস করিয়া, নগেন্দ্র খাবার খাইয়া চা পান করিল। সুধীরকে বলিল, “ওহে তৈরি হয়ে নাও।”

সুধীর বলিল, “আমি—আমার আর যাবার দরকার আছে কি ? হয় ত একজন তৃতীয় ব্যক্তি উপস্থিত থাকলে সে নিজের জীবন কাহিনী—”

নগেন্দ্র বলিল, “জীবন কাহিনী কি আজই তাকে জিজ্ঞাসা করবো ? আজ একটু আলাপ পরিচয় করে আসা মাত্র। চল চল। অন্ততঃ আজকের দিনটে ত চল। অর্থাৎ না হয় আমি একাই যাব।”

সুধীর অগত্যা কাপড় বদলাইতে গেল। ফিরিয়া আসিয়া দেখিল, নগেন্দ্রের ঘরখানি সৌগন্ধে ভুর ভুর করিতেছে। নগেন্দ্র, জামাই বাবুট সাজিয়া বসিয়া বসিয়া সিগারেট ফুঁকিতেছে। প্রভাবতীকে উপহার দিবার জন্ত হাতে একখানি “সমাজদ্রোহী” পুস্তক। উভয়ে তখন বাসা হইতে বাহির হইল। বড় রাস্তায় পৌছিয়া নগেন্দ্র বলিল, “ওহে একখানা ট্যান্ডি ধরা যাক।”

সুধীর বলিল, “কত দূরই বা ? মিছামিছি আর ট্যান্ডি কেন দাদা ?”

নগেন্দ্র বলিল, “ওহে, গরমটি কি রকম দেখুছ? হেঁটে গেলে, ঝামে ভিজ়ে, ভিজ়ে বিড়ালটি হয়ে দেখানো পৌছব। থেমো গন্ধে কি সে বেচারীর মাথাটি ধরিয়ে দেবো?”

রাস্তা হইতে একটি ট্যাক্সি ধরা হইল। দশমিনিটের মধ্যে ট্যাক্সি ঠিকানায় পৌছিল।

নগেন্দ্র ট্যাক্সি হইতে নামিয়া, দরজার উপর বাড়ীর নম্বরটি দেখিল। ঠিক হইয়াছে জানিয়া, তথাপি ভিতরে প্রবেশ করিতে একটু ইতস্ততঃ করিতে লাগিল। এমন সময় একজন ভৃত্যকে বাহির হইতে দেখিয়া নগেন্দ্র জিজ্ঞাসা করিল, “এজি দেখো, প্রভাবতী বিবি হিয়া রহতা হায়?”

ভৃত্য বলিল, “হ্যাঁ বাবু, তেতালায় আছেন।”

ছুইবন্ধু তখন অঙ্গনে প্রবেশ করিল। নির্জন অঙ্গন পার হইয়া সিঁড়ি উঠিয়া, দ্বিতলে এবং ক্রমে ত্রিতলে উঠিল। দেখিল, একটি কক্ষে বিদ্যুৎ আলোক জ্বলিতেছে, পাখা চলিতেছে, ফ্যাসা বিছানায় একজন স্ত্রীলোক একটি কুকুর কোলে করিয়া বিমর্ষ বদনে বসিয়া আছে। ছুইবৎসর পরে দেখিলেও, নগেন তাহাকে চিনিতে পারিল।

অগ্রে অগ্রে নগেন্দ্র, পশ্চাতে সুধীর। দ্বারের নিচে উপস্থিত হইয়া নগেন বলিল, “প্রভাবতী—ভাল আছ ত?”

প্রভাবতী দাঁড়াইয়া উঠিয়া বলিল, “আপনারা কে? চিনতে পারছেন ত?”

নগেন্দ্র বলিল—“চিনতে পারছেন?”—বলিয়া হাসিতে হাসিতে দ্বারের মধ্যে প্রবেশ করিল। সুধীর তখনও বাহিরে দাঁড়াইয়া।

প্রভাবতী রুদ্ধস্বরে বলিল, “কি রকম ভদ্রলোক মশাই আপনি ? বলা নেই, কওয়া নেই, ঘরে ঢুকে পড়লেন যে ?”—বলিয়া চীৎকার করিয়া উঠিল—“পুলিস, পুলিস।”

পন্ন মুহূর্তে, পাশের ঘরখানির বন্ধদ্বার খুলিয়া গেল। চারিজন কনেষ্টবল তন্মধ্য হইতে ছুটিয়া বাহিরে আসিয়া “শালা গুণ্ডা”— বলিয়া, এক এক জনের উভয় হস্ত, দু’দুজনে ধরিয়া ফেলিল।

প্রভা বলিল, “এই লোক গুণ্ডা হয়। হামকো খুন করনে আয়া হয়।”

নগেন্দ্র বলিল, “প্রভা, এ কি কাণ্ড ? আমি নগেন্দ্র—নগেন্দ্র— এদের বল—”

প্রভা বলিল, “নগেন্দ্র তোমার কুন্দনন্দিনীর কাছে যাও। এখানে কেন মরতে এসেছ ? পাহারাওয়াদা, এই দুনো আদমি গুণ্ডা হয়, হামকো খুন করনে আয়া হয়। পাকড়কে লে যাও।”

“চল্ বে চল”—বলিয়া ধাক্কা দিতে দিতে কনেষ্টবলদ্বয়, ঔপস্থাসিক ও তাঁহার ভক্তকে থানায় লইয়া চলিল।

সেখানে হাজত ঘরে সারারাত্রি বন্ধ থাকিয়া, পরদিন প্রাতে থানার ইন্স্পেক্টর বাবুর সম্মুখে তাহার নীত হইল ! নগেন্দ্র কিছু মাত্র গোপন না করিয়া, আত্মপরিচয় সহ আমূল বৃত্তান্ত ইন্স্পেক্টর বাবুকে নিবেদন করিল। সৌভাগ্যবশতঃ প্রভাবতীর স্বাক্ষরিত পত্রখানি নগেন্দ্রের পকেটেই ছিল, সেখানি বাহির করিয়া ইন্স্পেক্টর বাবুকে সে দেখাইল। প্রভাকে উপহার দিবার জন্ত যে বইখানি লইয়া গিয়াছিল, তাহাও দেখাইল।

ইন্স্পেক্টর বাবুটি শিক্ষিত লোক, এবং ভদ্রলোক। নগেন্দ্রের কথায় তাঁহার সম্পূর্ণ বিশ্বাস জন্মিল। একটু হাসিয়া উভয় আসামীকে তিনি মুক্তি প্রদান করিলেন।

যাইবার সময় নগেন্দ্র ইন্স্পেক্টর বাবুর হাতটি ধরিয়া বলিল, “দোহাই মশাই, ব্যাপারটা যেন খবরের কাগজে না ওঠে। তা’হলে আমার মান ইজ্জৎ ত যাবেই, বই বিক্রিও বন্ধ হয়ে যাবে।”

ইন্স্পেক্টর বাবু গম্ভীর ভাবে বলিলেন, “আচ্ছা খবরের কাগজে যাতে ব্যাপারটা না ওঠে, আমি তার ব্যবস্থা করব এখন। কিন্তু, সাবধান, আপনি আর ওসব পাড়ায় হাঁটবেন না।”

নগেন্দ্র বাসায় ফিরিয়া আসিল। রাত্রে অনুপস্থিতির কৈফিয়ৎ স্বরূপ বাসার লোককে বলিল, খিদিরপুরে নিমন্ত্রণ ছিল, আহাৰ শেষ হইতে অধিক রাত্রি হইয়া গেল, ট্রাম পাওয়া গেল না, তাই উভয়ে সেইখানেই শয়ন করিয়া ছিল। তাড়াতাড়ি স্নানাহার শেষ করিয়া নগেন্দ্র আপিসে চলিয়া গেল। পরদিন নিজ গ্রন্থাবলী একসেট ইন্স্পেক্টর বাবুকে “ভক্তি উপহার” স্বরূপ পাঠাইয়া দিল।

বিনোদিনীর আত্মকথা

প্রথম পরিচ্ছেদ

বালা-কাহিনী ।

আমার নাম শ্রীমতী বিনোদিনী দাসী । হাল সাকিম কলিকাতা । মৃত্যু নিকট, জানিয়া, আমি নিজ জীবনকাহিনী লিপিবদ্ধ করিতেছি । ইহা যদি কোনও দিন জনসমাজে প্রচারিত হয়, তবে আমার মত অবস্থাপন্ন বঙ্গরমণীগণ সাবধান হইতে পারিবেন, ইহাই আমার আন্তরিক আশা ও অভিপ্রায় । পিতৃ-কুল, স্বশুরকুল কোনও কুলই আমি উজ্জ্বল করি নাই—সুতরাং তাঁহাদের প্রকৃত নামধামগুলির পরিবর্তে আমি কাল্পনিক নামধামই ব্যবহার করিয়াছি । তবে আমার আসল নাম বিনোদিনীই বটে ।

আমি, বলিতে গেলে, জন্মজুর্ভাগিনী । আমার শৈশবেই, প্রথমে মাতা এবং বৎসর না গুরিতেই আমার পিতা পরলোকগমন করেন । আমার অগ্র কোনও নিকট আত্মীয়জন ছিল না, কেবল এক জ্যেষ্ঠা মহাশয় ছিলেন, তিনি পুরুষিয়াতে চাকরী করিতেন । তিনিই আসিয়া গ্রামস্থ লোকের সাহায্যে আমার পিতার শ্রাদ্ধশান্তি সম্পন্ন করেন । জিনিষপত্র কতক বেচিয়া, কতক বিতরণ করিয়া, পৈতৃক বাড়ীতে তাল লাগাইয়া, আমাকে

সঙ্গে লইয়া পুরুলিয়াতে চলিয়া যান। তখন আমার বয়স চারি বৎসর মাত্র।

জ্যোঠা মহাশয়ের একটি পুত্র ছাড়া তিনটি কন্যা ছিল। পরে গুলিলাম, আমাকে পৌছিতে দেগিয়া জ্যোঠাই-মা নাকি বলিয়া ছিলেন, “বেশ হ’ল, এবার গণ্ডা ভর্তি হ’ল।”

আমার জ্যেষ্ঠভ্রাতা বোন তিনটির নাম—নীহারবালা, শৈলবালা এবং ননীবালা। শৈল ছিল আমার সমবয়সী—কিন্তু তথাপি তাহার সহিত আমার তেমন ভাব হয় নাই। আমি কোথা হইতে উড়িয়া আসিয়া জুড়িয়া বসিলাম বলিয়া শৈলবালা আমার হিংসা করিত; জ্যোঠাই-মা আমাকে লুকাইয়া মাঝে মাঝে তাহাকে এটা ওটা খাওয়াইতেন বলিয়া আমি তাহার হিংসা করিতাম। আর একটু বয়স হইলে যখন আমরা বালিকা-বিত্তালয়ে ভর্তি হইলাম, তখন সে আমার চেয়ে ভাল পড়া বলিতে পারিত, ভাল প্রাইজ পাইত বলিয়া আমি তাহার হিংসা করিতাম; এবং তার চেয়ে আমার রং ফরসা বলিয়া সে আমার হিংসা করিত।

নীহারদিদি আমাদের চেয়ে দুই বৎসরের বড় ছিল। ১৩ বৎসর বয়সে তাহার বিবাহ হইল। জ্যোঠা মহাশয়ের পূর্বসঙ্কিত যাহা কিছু ছিল, তাহার বেশী ভাগই এই বিবাহে নিঃশেষিত হইয়া গেল। জ্যোঠাই-মা তাঁহাকে বলিয়াছিলেন, “একটির বিয়েতেই যা কিছু ছিল, সব খরচ ক’রে ফেল্লে, বাকীগুলির বেলায় কি উপায় করবে, তা কিছু ভেবেছ?” জ্যোঠা মহাশয় বলিয়াছিলেন,

“উপায় করবার মালিক আমিও নই, তুমিও নও। যে উপায় করনেওয়ালা, সেই উপায় করবে, তুমি দেখে নিও।”

নীহারদিদির ত কিনারা হইয়া গেল, এবার আমার এবং শৈলর পালা। একঘোড়া ভাল পাত্রের সন্ধান করিবার জন্য জ্যেষ্ঠা মহাশয় নানা স্থানে চিঠি লিখিলেন; দুই বৎসর ধরিয়া এইরূপ অন্বেষণ চলিল, কিন্তু একঘোড়া ত দূরের কথা, মনের মত অথচ দামে সস্তা একটি পাত্রও মিলিল না। আমাদের দুই বোনকে তেরো বছরের ধিঙ্গি দেখিয়া, জ্যেষ্ঠাই-মা সর্বদা ত্রিয়মাণ হইয়া থাকিতেন এবং এক এক দিন জ্যেষ্ঠা মহাশয়ের প্রতি চোখা চোখা বাক্যবাণ প্রয়োগ করিতেন।

দ্বিতীয় পরিচ্ছেদ

শচীন আসিল।

এই সময় নীহার দিদির স্বশুর, জ্যেষ্ঠা মহাশয়কে পত্র লিখিলেন যে, তাঁহার কনিষ্ঠপুত্র শচীন্দ্রনাথ (জামাই বাবুর ছোট ভাই) গত ভাদ্র মাস হইতে ম্যালেরিয়া জরে ভুগিয়া ভুগিয়া অস্থিচৰ্ম্মসার হইয়াছে; কলেজে তাহার পার্সেণ্টেজ গিয়াছে, সে এবার পরীক্ষা দিতে পাইবে না; ডাক্তার বায়ুপরিবর্তন করাইতে উপদেশ দেন; এতএব বৈবাহিক মহাশয়ের যদি অসুবিধা না হয়, তবে শীতের

কয়টা মাস শচীন পুরুলিয়াতে থাকিয়া তাহার স্বাস্থ্যের উন্নতি করিতে পারে।

জ্যেষ্ঠাই-মার সহিত পরামর্শ করিয়া, জ্যেষ্ঠা মহাশয় শচীন্দ্রনাথকে আহ্বান করিলেন। পরে জানিয়াছিলাম, নিঃস্বার্থভাবে পরোপকার করিবার জন্য তাঁহারা এ কার্যে প্রবৃত্ত হন নাই; এই উপকারটুকুর বদলে, শচীনের পিতাকে চক্ষুলাজ্ঞার ফেরে ফেলিয়া সস্তায় শচীনকে জামাই করিয়া লইতে চেষ্টা করাই তাঁহাদের গোপন অভিসন্ধি ছিল। নীহার দিদি অনেক দিন পিত্রালয়ে আসেন নাই; তাঁহাকেও শচীনের সঙ্গে পাঠাইয়া দিতে অনুরোধ করা হইল। যথাদিনে দেবর সহ নীহার দিদি আসিয়া পৌঁছিবেন।

শচীনের বয়স তখন ১৮।১৯ বৎসর, রংটি বেশ পরিষ্কার, মুখ-চোখও সুগঠিত—এক কথায়, বেশ স্ত্রী যুবা পুরুষ। তবে রোগে ভুগিয়া তাহার দেহকান্তি অনেকটা ম্লান হইয়া গিয়াছিল। মাসখানেক পুরুলিয়ায় থাকিয়াই, শচীন তাহার স্বাস্থ্য, বল, কান্তি আবার ফিরিয়া পাইল। জ্যেষ্ঠাইমার সঙ্গে মাঝে মাঝে নীহার দিদির পরামর্শ হইতে লাগিল, শচীনের সহিত শৈলবালার বিবাহটি হইলেই বেশ হয়। শৈল আমার চেয়ে তিন মাসের বড় ছিল, স্মৃতির প্রথম দাবী তাহারই সন্দেহ নাই; আমার কিন্তু সে কথাটা গুনিতে ভাল লাগিত না। সন্ধ্যাবেলায় তুলসী-তলায় প্রদীপ দিয়া প্রণাম করিতে করিতে আমি মনে মনে বলিতাম—“হে ঠাকুর, শৈলর সঙ্গে যেন শচীনের বিবাহ না হয়।”

প্রার্থনা আশ্চর্য্যভাবে অতি সত্ত্বর সফল হইয়া গেল। এক

ভদ্রলোক সপরিবারে পুরুলিয়াতে বায়ুপরিবর্তনে আসিয়াছিলেন ; শৈলকে দেখিয়া এবং তাহার কোষ্ঠী নিজ পুত্রের কোষ্ঠীর সহিত মিলাইয়া শৈলকে তাহার এমনই পছন্দ হইয়া গেল যে, একরূপ বিনা পণেই অগ্রহায়ণ মাসেই শৈলকে তিনি নিজ পুত্রবধু করিয়া লইলেন ।

তখন “আমিই শুধু রইলুম বাকী ।” (ননীবালা ৮ বৎসরের বালিকানাত, তাহার কথা ধর্তব্য নহে) । শৈল পুরুলিয়াতে স্বশুর-বাড়ীর বাসায় থাকিতে লাগিল ; মাঝে মাঝে অল্পসময়ের জন্য এ বাড়ীতে আসিত । তাহার স্বামী, কলেজ কামাই হইবে বলিয়া বিবাহের এক সপ্তাহ পরেই কলিকাতায় চলিয়া গিয়াছিল ।

এখন জোঠাই-মা ও নীহার দিদিতে পরামর্শ হইত, “বিনির সঙ্গে শচীনের বিয়েটি হ’লে বেশ হয় ।” যে দিন কথাটি আমি শুনিলাম, সে দিন কাণে যেন আমার মধুবর্ষণ হইল ।

পরামর্শ, ক্রমে মেয়ে-মহল ছাড়াইয়া, পুরুষ-মহলে পৌছিল । পৌষ মাসে, জোঠা মহাশয় শচীনের পিতাকে পত্র লিখিয়া, আমার সহিত শচীনের বিবাহ প্রস্তাব করিলেন ।

এই পত্র রওয়ানা হইবার পর হইতে, শৈল আসিয়া শচীনকে আমার বর উল্লেখ করিয়া আমায় “ক্ষেপাইতে” সূচক করিল ; দিদির মুখে ঐরূপ শুনিয়া আট বছরের ননীবালা ছুঁড়ীটাও, এ বলিয়া ক্ষেপাইত । শৈল তবু শচীনের অসাক্ষাতে বলিত ; নিম্নোদ্ধ ননীবালা একদিন তাহার সামনেই বলিয়া ফেলিল । শুনিয়া, শচীন আমার দিকে চাহিয়া, ফিক করিয়া একটু হাসিয়া,

সেখান হইতে চলিয়া গেল। আমি লজ্জায় মরিয়া গেলাম—
ছি ছি !

প্রত্যুত্তর আসিল। শুনিলাম, দিদির স্বপ্নের লিখিয়াছেন,
মেয়েটির রূপগুণের কথা বধুমাতার ‘প্রমুখা’ পূর্বাধিই তিনি
‘শ্রুত’ আছেন ; পুত্রের বিবাহ দিতে তাঁহার অমত নাই, তবে
“ন্যাসংখ্যা” কত টাকা জ্যেষ্ঠা মহাশয় দিতে পারিবেন, তাহা
জানিতে চাহিয়াছেন।

কয়েক দিন কর্তা গিল্লীতে পরামর্শ চলিল। অবশেষে জ্যেষ্ঠা
মহাশয় উত্তর দিলেন, (চিঠিখানি রওনা হইবার পূর্বে লুকাইয়া
আমি দেখিয়াছিলাম)—“বড় মেয়েটিকে যখন আপনার শুল্কবধু
করিয়াছিলাম, তখনই আমার সঞ্চিত অর্থ প্রায় নিঃশেষ হইয়া
গিয়াছিল। তার পর সম্প্রতি আর একটি মেয়ে পার করিয়াছি।
তবে, এ বৈবাহিক মহাশয়ের কৃপা ও উদারতাগুণে, এবার অল্পেই
রেহাই পাইয়াছি—তাই লাতুকটার বিবাহে আমি এক হাজার
টাকা ব্যয় করিতে পারিব—নচেৎ তাহাও আমার উপস্থিত
ক্ষমতায় কুলাইত না। জানিবেন এই টাকাও সমস্ত আমার ঘরে নাই,
কিছু ঋণগ্রস্ত হইতে হইবে। আশা করি, নিজগুণে”—ইত্যাদি।

আমার ঘাড়ের যে বি ভূত চাপিল, শটীন শটীন করিয়া আমি
পাগল হইয়া উঠিলাম। সুবিধা পাইলেই আড়াল হইতে আমি
তাহার পানে চাহিয়া থাকিতাম। আমার এই “চুরি ক’রে
চাওয়া” দুই এক দিন শৈল আসিয়া ধরিয়া ফেলিয়া আমার ঠাট্টাও
করিয়াছিল।

আজকালকার নভেলে দেখিতে পাই হিন্দুদের “খেড়েকেট” মেয়েরা প্রায়ই অমুক “দার” সহিত অবাধে মেলামেশা করিয়া কোর্টশিপ চালাইতেছে ; সেই “দাদা”র সহিত কাহারও বা বিবাহ হইতেছে, কাহারও বা ফস্কাইয়া বাইতেছে। আমাদের বাড়ীতে কিন্তু সেরূপ হইতে পাইত না। শৈল, আমি, দুই জনেই ‘সোমন্ত’ মেয়ে, শচীনের সামনে বাহির হইতাম, তাহার সহিত আবশ্যকমত দুই একটি কথা কহিতাম বটে, কিন্তু ঐপর্য্যন্ত। জ্যেষ্ঠাইনার সর্বদা সজাগ সাবধানতা ও কড়া শাসনে, শচীনের সহিত আমাদের কিছুমাত্র মেলামেশার অবসর ছিল না। তথাপি শচীন এমনই দুষ্ট যে, সুযোগ পাইলেই, অন্তের অলঙ্কিতে আমার পানে চাহিয়া হাসিত। এক দিন বৈকালে, ঘটনাক্রমে তাহার সহিত আমার নির্জনে সাক্ষাৎ হইয়াছিল। সে দিন শচীন শুধু হাসিয়াই ক্ষান্ত থাকে নাই—আমার গাল টিপিয়া দিয়াছিল। আমি রাগিয়া উঠিয়া বলিয়াছিলাম, “ও কি ?” শচীন হাসিয়া বলিয়াছিল, “দোষ কি ? আমি যে তোর বর।” আমি মনের আচ্ছাদ মনেই গোপন করিয়া, কৃত্রিম ক্রোধভরে সেখান হইতে পলাইয়া গিয়াছিলাম।

শচীনকেই আমার স্বামী কল্পনা করিয়া, অবোধ বালিকা আমি কত সুখের স্বপ্নই যে দেখিতাম, তাহা লিখিয়া শেষ করিতে পারিব না। এমন সময় আমার সাধের স্বপ্ন ভাঙ্গিয়া চূরমার হইয়া গেল। শচীনের পিতা উত্তর দিলেন, তিন হাজার টাকার কম কিছুতেই তিনি পুত্রের বিবাহ দিতে পারিবেন না।

শচীনকেও বাড়ী ফিরিয়া যাইতে তিনি কড়া হুকুম জারী করিলেন।

পরদিন শচীন তাহার জিনিষপত্র বাঁধিয়া, আমাদের বাড়ী হইতে বিদায় গ্রহণ করিল। যাত্রার পূর্বে, একটবার তাহার সহিত আমার দৃষ্টি-বিনিময়ের সুযোগ হয় নাই। সে চলিয়া যাওয়ার পর, আমি দ্বিতলের একটি জানালা দিয়া তাহাকে একবার দেখিতে চেষ্টা করিলাম। দেখাও হইল। তাহার উৎসুক চক্ষু সেই জানালার মাঝেই আমাকে খুঁজিতেছিল বোধ হয়। তাহার সেই ছলছল চোখ দুটি আজিও আমি ভুলিতে পারি নাই। সে দৃষ্টি-পথের অতীত হইলে, আমি বিছানায় পড়িয়া, বালিসে মুখ গুঁজিয়া কাঁদিতে লাগিলাম। তখন নীচে সবাই গৃহকার্য্যে ব্যস্ত—কেহ আসিয়া এ অবস্থায় যে আমায় দেখিতে পাইবে, এ সম্ভাবনামাত্র আমার মনে উদয় হয় নাই। কিন্তু অল্পক্ষণ পরেই আমার পৃষ্ঠদেশে কাহার হস্তস্পর্শ অনুভব করিলাম। মুখ তুলিয়া চাহিয়া দেখি, শৈল। শৈল আমার অশ্রুমাখা মুখ দেখিয়া ব্যঙ্গভরে বলিল, “বাঃ, বেড়ে! এতদূর!

বিদ্রহ-কাতরা

বিনোদিনী রাই

পর্যাণে বাঁচে না বাঁচে!”

—বলিয়া গা ছুলাইয়া নৃত্যের ভঙ্গিতে বাহির হইয়া গেল। কথাটা শৈল বাড়ীতে প্রচারও করিয়া দিয়াছিল।

তৃতীয় পরিচ্ছেদ

আমার বিবাহ ।

মাসখানেক পরে শুনলাম, পাত্র ঠিক হইয়াছে, সোণাপুরে তাঁহার বাড়ী, নিঃসন্তান, দ্বিতীয় পক্ষ, বয়স ৪০ বৎসর, গ্রামে ঘি ও ময়দার দোকান আছে, অবস্থা স্বচ্ছল । এক দিন পাত্র আমাকে দেখিতে আসিলেন, দেখিয়া পছন্দও করিলেন । অল্প টাকায় হইবে বলিয়া, জ্যেষ্ঠামহাশয় এই পাত্রই স্থির করিয়াছিলেন । হেঁ বৈশাখ আমার শুভ (?) বিবাহ হইয়া গেল ; আমি স্বশুরবাড়ী গেলাম । আমি তখন চৌদ্দ বছরে পড়িয়াছি ।

সেখানে গিয়া দেখিলাম, আমার স্বশুর-স্বাণ্ডী নাই । বিধবা পিসম্বাণ্ডী আছেন, তিনিই ঘরের গৃহিণী ।

স্বামিভক্তি, স্বামিপূজা, স্বামিসেবাই নারী-জীবনের সর্বপ্রধান কর্তব্য, এই শিক্ষাই আবাল্য পাইয়া আসিতেছিলাম । এক দিন মনে মনেও যে আমি অগ্র পুরুষকে কামনা করিয়াছিলাম, সে জগৎ লজ্জায় ধিকারে মরিয়া যাইতাম । শচীন এক দিন আমাকে স্পর্শ করিয়াছিল, আমার গাল টিপিয়া দিয়াছিল, তাহা পূর্বেই বলিয়াছি । মনের ক্ষোভে আনার ইচ্ছা করিত, এক খণ্ড লোহা পোড়াইয়া বেশ লাল করিয়া, তাহা গালের উপর টিপিয়া ধরিয়া, ঐ স্থানটা অগ্নিশুদ্ধ করিয়া লই ।

স্বামী আমাকে যথেষ্ট মনোযোগ করিতে লাগিলেন ; কিন্তু আমার

পোড়া মন এমনই অপদার্থ যে, শচীনকে আমি ভুলিতে পারিলাম না। শচীনের চিন্তাও যে আমার পক্ষে মহাপাপ, তাহা বেশ জানিতাম; কিন্তু মনকে বেশে আনিতে পারিতাম না। এই সময় “চন্দ্রশেখর” পুস্তকখানি আমার হাতে পড়িল। জ্যোষ্ঠামহাশয়ের গৃহে থাকিতে আমরা সকল বোনই লেখাপড়া ভাল রকমই শিখিয়াছিলাম; কিন্তু জ্যোষ্ঠামহাশয় মেয়েদের উপাশ্রয় পড়ার বিরোধী ছিলেন বলিয়া, উপাশ্রয় বেশী পড়িবার সুযোগ আমরা পাই নাই। তাই এতখানি বয়স পর্য্যন্ত চন্দ্রশেখর আমার অপঠিত ছিল।

বহিখানি পড়িয়া দেখিলাম, আমার অবস্থার সঙ্গে অনেকটা মিলিয়া যায়। কপালদোষে বিবাহের পূর্বেই কোনও মেয়ের যদি অল্প পুরুষের প্রতি মন গিয়া থাকে; তবে বিবাহের পর তাহার কর্তব্য কি, তাহা চন্দ্রশেখর পড়িয়া বেশ বুঝিতে পারিলাম। অধিকাংশ হিন্দু মেয়েই পতিভক্তি বিনা-সাধনায় লাভ করিয়া থাকে বটে, কিন্তু আমার মত দুর্ভাগিনী যাহারা, তাহাদের ঐ বস্তুটি লাভ করিবার জন্ত কঠোর সাধনায় রত হইতে হইবে,—হাল ছাড়িয়া দিলে চলিবে না, ইহাই চন্দ্রশেখরের উপদেশ বলিয়া বুঝিলাম এবং তদনুসারেই নিজ জীবনের গতি নিয়ন্ত্রিত করিব স্থির করিলাম।

আমি সর্বদা বিষন্ন থাকি দেখিয়া, স্বামী একদিন বলিলেন, “সমবয়সী সঙ্গী সাথী একটিও নেই, একলা তোমার বড় কষ্ট হয়, না?” —শচীনের কথা তখনও তিনি জানিতে পারেন নাই, পরে জানিয়াছিলেন।

আমি বলিলাম, “না, কষ্ট আর কি?”

তিনি বলিলেন, “কষ্ট হয় বৈ কি। তোমার যদি দুই একটি যা কি নন্দ থাকত, তাদের সঙ্গে হাসিতে গল্পে দিন কাটাতে পারতে। কিন্তু সে সব কিছুই ত নেই। আচ্ছা একটা কায না হয় কর না।”

“কি?”

“বই পড়তে তুমি খুল ভালবাস। একখানি বই পেলে, তুমি খুব আগ্রহের সঙ্গে সেখানি পড় দেখতে পাই। আমাদের গ্রামে একটি ভাল লাইব্রেরী আছে। অনেক বাঙ্গালা বই আছে, কত সব মাসিকপত্র আসে,—নূতন নূতন বইও প্রায় তারা কিনে আনায়। আমি সেই লাইব্রেরীর মেম্বর হব,—যত তুমি পড়তে পার, তত বই তোমায় এনে দেবো। তা হ’লে তোমার সময় কাটাবার বেশ একটা উপায় হবে; কি বল?”

• আমি উৎসাহের সহিত এ বিষয়ে সম্মতি জানাইলাম।

স্বামী মেম্বর হইলেন, এবং লাইব্রেরী হইতে কৃত্রিম সিন্ধের চক্চকে মলাটযুক্ত নূতন নূতন উপগ্রাস-গ্রন্থ আনাইতে লাগিলেন। প্রথম প্রথম নিজে তিনি দুই একখানা বই পড়িতে আরম্ভ করিয়াছিলেন বটে, কিন্তু তাঁহার ভালো লাগে নাই বলিয়া, সে চেষ্টা আর করিতেন না। তিনি ছিলেন “দাতাকর্ণ” যুগের মানুষ। আমি কিন্তু সেগুলি গোত্রাসে গিলিতে লাগিলাম।

এইরূপ কিছুদিন চলিতে চলিতে আমার মনে ধীরে একটা পরিবর্তন আসিতে লাগিল। আমি বেশ বুঝিতে পারিলাম, এত

কাল মা-দিদিমা'র কাছে পতিভক্তি সম্বন্ধে যে শিক্ষা আমি পাইয়া আসিয়াছি, তাহা নিতান্তই ভুল শিক্ষা। পতির প্রতি যদি যথার্থ ভালবাসা থাকে, তবে সে ক্ষেত্রে একটু আধটু ভক্তি বা সেবা করিলেও ততটা দোষ নাই। কিন্তু যে পতিকে অন্তরের সহিত ভালবাসি না, তাঁহাকে ভক্তি করা নিজেকে অপমান করা মাত্র। দেখিলাম, আজকালকার বড় বড় লেখকগণের মতে, বন্ধিমবাবু নিতান্তই সেকেলে লেখক। প্রাণ যাহাকে চায়, তাহাকে লাভ করিতে পারিলেই নারীর “নারীত্ব” সফল হয়, তাহার জীবন-যৌবন ধন্য হয়, সকল যুবতীরই এই বিষয়ে যত্নবতী থাকা উচিত। নব্য-যুগের নবীন-আলোক-আগমনীকারক এই ঔপন্যাসিকগণের মধ্যে কাহারও হস্তে যদি ‘চন্দ্রশেখর’ সংশোধনের ভার থাকিত, তবে তিনি নিশ্চয়ই গভীর জলে সন্তরণকালে, প্রতাপকে দিয়া শৈবলিনীকে ওরূপ দারুণ শপথ করাইতেন না। তাহাদিগকে গঙ্গাপার করিয়া দিয়া, কোনও নিভৃত কুটারে স্থাপন করিয়া আটের “নয়চিত্র” আঁকিয়া অর্দ্ধশিক্ষিত যুবক ও বোধদয়-বিহীন যুবতীগণকে মোহিত করিয়া দিতেন।

সে যাহা হউক, আমিও মুর্থ সেকেলে স্ত্রীলোকদের মত, পতি ভক্তিকে জীবনের সার বলিয়া আর গ্রহণ করিলাম না; শচীর চিন্তাকে আর বিষবৎ বর্জন করিবার চেষ্টা করিলাম না; এক দিন নিজগালে লোহা-পোড়াইয়া ছেঁকা দিবার বাসনা করিয়াছিলাম বলিয়া, নিজ মূর্ত্তায় মনে মনে লজ্জিত হইলাম।

আমি অনেক সময় ভাবিতাম, শচীকে বিবাহ করিয়াছে কি না।

মনে করিতাম, করিয়া থাকে, করুক;—আমার শচীন আমার অন্তরের ধন; আপন অন্তর মধ্যে তাহাকে লুকাইয়া আমি নিত্য তাহার পূজা করিব। কিন্তু এ জীবনে আমার “নারীত্ব” বিফল হইয়া গেল, ইহাই বড় আক্ষেপের বিষয়।

একবার পুরুলিয়ায় গিয়া নীহার দিদির দেখা পাইলাম। গুণিলাম, শচীন কলিকাতায় আইন পড়িতেছে; এখনও বিবাহ করে নাই, বিবাহে তাহার মন নাই। ছেলে এম-এ, বি-এল পাশ করিলে পর বিবাহের বাজারে তাহাকে নীলামে তুলিবেন, এই অভিপ্রায়ে পিতাও পীড়াপীড়ি করেন না। পিতার অভিপ্রায় যাহাই হউক, শচীনের যে বিবাহে কোণও আগ্রহ নাই, ইহা হইতে বুঝিতে পারিলাম, আমি যেমন তাহাকে ভুলিতে পারি নাই, সে-ও তেমনই আজিও আমাকে ভুলে নাই। মনে বড় আশ্লাদ হইল।

এবার পুরুলিয়ায় একটা অপ্রীতিকর ব্যাপার ঘটিয়াছিল। আমি মাসখানেক সেখানে থাকিবার পর স্বামী আমাকে আনিতে গিয়াছিলেন; সেই সময় তিনি জানিতে পারিয়াছিলেন যে, শচীন আমাদের বাড়ীতে থাকিত, তার সঙ্গে আমার বিবাহের কথা হইয়াছিল, আমি আড়ালে থাকিয়া লুকাইয়া লুকাইয়া শচীনকে দেখিতাম, এবং বিবাহ ভাস্কিয়া গিয়া সে চলিয়া যাওয়ার পর আমি কাঁদিয়া ভাসাইয়া দিয়াছিলাম। ননীবালা তাঁহাকে এই খবরগুলি দিয়াছিল,—সম্ভবতঃ শৈলরই শিক্ষানুসারে। সেই অবধি স্বামী মাঝে মাঝে শচীন সম্বন্ধে আমাকে রূঢ় কথা বলিতেন, একটা কুৎসিত সন্দেহও তাঁহার মনে জাগিয়াছিল। বলা বাহুল্য, তাঁহার

এ আচরণে, তাঁহার প্রতি ভক্তি ত আমার ছিলই না - একটু স্নেহ-মমতা যাহা ছিল, তাহাও অন্তর্হিত হইল।

চতুর্থ পরিচ্ছেদ

গঙ্গান্নান।

সেবৎসর আশাঢ় মাসে সূর্য্যগ্রহণের সঙ্গে আরও কি কি সব যোগ একত্র হইয়াছিল; পিসীমা আমার স্বামীকে ধরিয়া বসিলেন, “চল বাবা, কলকাতায় গিয়ে গঙ্গান্নান করে আসা যাক।” গঙ্গাহীন দেশে আমাদের বসতি, গঙ্গান্নানের সুযোগ আমাদের ছলভ, স্ততরাং স্বামী সম্মত হইলেন।

সমস্ত রাত্রি রেলগাড়ীতে কাটাইয়া, পরদিন বেলা নয়টার সময় আমরা শিয়ালদহ স্টেশনে নামিলাম। বেলা দুশটায় গ্রহণ লাগিলে, এক ঘণ্টাকাল স্থিতি। পরামর্শ ছিল, প্রথমে আমরা জগন্নাথ ঘাটে গিয়া গ্রহণের স্নান সারিয়া, তা’র পর সোজা কালীঘাটে চলিয়া যাইব। সেখানে একটা বাসা ঠিক করিয়া, মা’কে দর্শন করিয়া, আহালাদির ব্যবস্থা হইবে। দুই তিন দিন সেই বাসায় থাকিয়া পশুশালা, যাজুঘর, থিয়েটার, বায়স্কোপ প্রভৃতি দেখিয়া দেশে ফিরিব।

শিয়ালদহে ঘোড়ার গাড়ী ভাড়া করিয়া আমরা গঙ্গার ঘাটের

দিকে চলিলাম। আমি পূর্বে কখনও কলিকাতায় আসি নাই ; গাড়ীর খড়খড়ির ফাঁক দিয়া কলিকাতার বিরাট বিশ্বস্তর মূর্তি দেখিয়া আমি ভয়ে অভিভূত হইয়া পড়িলাম।

যতই আমরা গঙ্গার ঘাটের নিকটবর্তী হইতে লাগিলাম, পথে মানুষের ভিড় ততই বৃদ্ধি পাইতে লাগিল। অবশেষে গাড়ী আর অগ্ৰসর হইতে পারিল না,—আমাদের নামিতে হইল। স্বামী বলিলেন, উহা বড়বাজার—গঙ্গার ঘাট আর বেশী দূরে নহে, এইটুকু পথ হাঁটিয়া যাইতে হইবে।

গাড়ী বিদায় করিয়া, আমাকে মধ্যে রাখিয়া, স্বামী ও পিসীমা সেই ভিড়ের মধ্য দিয়া অগ্ৰসর হইলেন। প্রথমটা আমরা তিন জনেই হাত ধরাধরি করিয়া চলিয়াছিলাম। কিন্তু ভিড় বাড়িয়া আমাদেরকে বিচ্ছিন্ন করিয়া দিল। অনেক কষ্টে আমরা পুনরায় একত্র হইলাম। কিন্তু হইলে কি হইবে, খানিক অগ্ৰসর হইয়া দেখি, রাস্তার মাঝখানে দড়ি খাটাইয়া, মেয়ে পুরুষের পথ পৃথক্ করিয়া দিয়াছে। থাকী কোটের বুকে লাল কাপড়ের ফুল আঁটা কয়েকজন যুবক দড়ি ধরিয়া দাঁড়াইয়াছে। স্বামী আমাদের লইয়া পুরুষগণের রাস্তা দিয়াই অগ্ৰসর হইবার চেষ্টা করিলেন, কিন্তু সেই বাবুরা বলিয়া উঠিল—“শা-লক্ষ্মীরা এই দিকে—এই দিকে”—এবং বলপূর্বক আমাদের পৃথক্ করিয়া দিল। পুরুষের সারি পুরুষ দিগের ঘাটে যাইবে, স্ত্রীলোকের সারি স্ত্রীলোকদিগের ঘাটে যাইবে, এই প্রকার বন্দোবস্ত হইয়াছে, ইহা পূর্বে আমার স্বামী জানিতেন না ; এখন জানিয়া তিনি চীৎকার করিয়া আমাদের

বলিয়া দিলেন, “চান ক’রে উঠে ঘাটের চাঁদনিতে তোমরা দাঁড়িয়ে থেক, কোথাও যেও না, এক পা নোড়ো না, ভিড় কম্লে আমি গিয়ে তোমাদের নিয়ে আসবো।” পিসীমা উচ্চস্বরে উত্তর করিলেন : “আচ্ছা।”

প্রথমটা আমি পিসীমার হাত ধরিয়া ছিলাম—ক্রমে ভিড়ের চাপে হাত ছাড়িয়া গেল। পিসীমা একটু পিছাইয়া পড়িলেন। আমি মাঝে মাঝে পশ্চাৎ ফিরিয়া তাঁহাকে দেখিতে লাগিলাম। খানিক পরে আর আমি তাঁহাকে দেখিতে পাইলাম না।

ক্রমে ভিড়ের চাপ আরও বাড়িয়া উঠিল। তখন আর আমি চলিতেছিলাম না, ভিড় আমাকে ঠেলিয়া লইয়া যাইতেছিল। ভিড়ের চাপে মাঝে মাঝে পা দু’টি আমার রাস্তা ছাড়িয়া শূণ্যে উঠিয়া পড়িতেছে,—সেই অবস্থায় কিয়দূর অগ্রসর হইয়া, পা আবার মাটিতে ঠেকিতেছে। ভাগ্যিস ইহা স্ত্রীলোকের ভিড়—এই ভিড় পুরুষের হইলে কি কেলেঙ্কারী হইত, ছি ছি !

গুনিয়াছিলাম, ঘাট অধিক দূরে নহে ; কিন্তু অনেকক্ষণ চলিলাম, চালিত হইলাম বলিলেই ঠিক হয়। কোথায় যাইতেছি কিছুই বুঝিতে পারিলাম না। অবশেষে একটা ঘাটে গিয়া উপস্থিত হইলাম। তখন প্রাণটা যেন হাঁফ ছাড়িয়া বাঁচিল। দেখিলাম, ঘাটের উপরে চাঁদনি রহিয়াছে ; বুঝিলাম, স্নানান্তে এইখানেই অপেক্ষা করিতে হইবে।

গঙ্গাতীরে দাঁড়াইয়া পিসীমা’র আশায় চাহিয়া রহিলাম। অনেকক্ষণ অপেক্ষা করিলাম, কিন্তু তাঁহাকে দেখিতে পাইলাম

না। তখন আমি জলে নামিলাম; অল্প সন্ধ্যার সঙ্গে আমিও স্নান করিতে লাগিলাম, এবং চারিদিকে চাহিয়া পিসীমাকে খুঁজিতে লাগিলাম। আসিবার সময়, ভিড়ের মধ্যে ২৩জন স্ত্রীলোকের সর্দিগম্ভী হইয়াছিল; দেখিয়াছিলাম, থাকী কোটের উপর লাল ফুল পরা যুবকেরা ভিড় সরাইয়া তাহাদিগকে কাঁধে করিয়া কোথায় লইয়া গিয়াছিল। ভাবিলাম, পিসীমারও কি সেইরূপ হইল না কি? আহা, বড় মানুষ, দুর্বল শরীর—হায়, এইরূপ অপঘাত মৃত্যুই কি শেষে তাঁর অদৃষ্টে লেখা ছিল।

যাহা হউক, আমি স্নান করিয়া তীরে উঠিয়া, চাঁদনিতে গিয়া দাঁড়াইলাম। তখনও ছড় ছড় করিয়া স্নানার্থিনী রমণীরা আসিতেছে। আমি ভিজা কাপড়ে সেইখানে দাঁড়াইয়া, হুক হুক ব্যাকুলহৃদয়ে পিসীমা'কে খুঁজিতে লাগিলাম।

ক্রমে দেখিলাম, স্নানার্থিনীদিগের প্রবাহ মন্দীভূত হইল, স্নান করিয়া যাহারা ফিরিয়া যাইতেছে, তাহাদের সংখ্যা বাড়িতে লাগিল। তবে আর পিসীমার আসিবার আশা কি? ভয়ে আমার কান্না পাইতে লাগিল, হাত পা ঠক ঠক করিয়া কাঁপিতে লাগিল, আমি সেইখানে শাণের উপর বসিয়া পড়িলাম।

বোধ হয়, পুরা আধন্টাকাল আমি এই ভাবে সেই চাঁদনিতে বসিয়া রহিলাম। কখনও মুখ ঢাকিয়া কাঁদি, কখনও ব্যাকুল নয়নে চারিদিকে চাহিয়া দেখি। স্বামী যে বলিয়াছিলেন, স্নানান্তে আসিয়া আমাদের লইয়া যাইবেন, তিনিই বা বিলম্ব করিতেছেন

কেন? এইরূপ হুঁচিন্তায় ক্রন্দনে ও অশ্রুধারা কটকট গেল, তাহা আর আমার হ'ল রহিল না।

আমি মুখ ঢাকিয়া বসিয়া কাঁদিতেছিলাম, হঠাৎ আমার কাণে গেল, “কে গো তুমি বসে কাঁদছ? তুমি কি হারিয়ে গেছ?”

পরিচিত কণ্ঠস্বর—আমি চমকিয়া মুখ তুলিয়া চাহিলাম। যাহা দেখিলাম, তাহাতে হঠাৎ আমার চক্ষুকে বিশ্বাস করিতে পারিলাম না। যদি ইহা স্বপ্ন না হয়, তবে আমার সম্মুখে দাঁড়াইয়া—শচীন। গায়ে তার থাকী রঙের কোট, বকে লাল কাপড়ের ফুল সেফ্টিপিন দিয়া আঁটা, পায়ে বুট জুতা, ধুতিখানি মালকোঁচা বাঁধা। আমরা উভয়ে অবাক হইয়া পরস্পরের মুখপানে চাহিয়া আছি, হঠাৎ শচীন বলিয়া উঠিল, “বিনোদিনী?”

তিন বৎসর পরে আবার তাহাকে দেখিলাম। সজল নেত্রযুগল তাহার পানে স্থাপন করিয়া বলিলাম, “শচীন!”

শচীন বলিল, “ব্যাপার কি, শীঘ্র বল। এখানে তুমি কি করে এলে?”

আমি ব্যাপারটা তাহাকে বুঝাইয়া দিলাম। সে শুনিয়া বলিল, “কিন্তু এটা ত জগন্নাথঘাট নয়, এ সে বাবুঘাট! বুঝিছ, ভিড়ের মধ্যে পড়ে জগন্নাথঘাট ছাড়িয়ে তুমি এত দূরে চলে এসেছ। তোমার স্বামী তোমায় জগন্নাথঘাটেই খুঁজবেন, এখানে ত আসবেন না!”

আমি ব্যাকুলভাবে বলিয়া উঠিলাম, “তা হ'লে কি হবে শচীন?”

শচীন বলিল, “ভয় কি? আমি একটা ব্যবস্থা করছি।

তোমার স্বামীকে খুঁজে দিতে পারি না পারি, দেশে ত তোমায় পৌঁছে দিতে পারবো! তুমি এক কায কর। এইখানে একটু বসে থাক, আমি একখানা গাড়ী ডেকে আনি। খবদার, এখান থেকে এক পা নোড়ো না, তা হ'লে আর আমি তোমায় খুঁজে পাব না।—” বলিয়া সে ক্ষিপ্তপদে ভিড়ের মধ্যে অদৃষ্ট হইল।

প্রায় দশ মিনিট পরে শচীন গাড়ী আনিয়া আমায় বলিল, “এস। গাড়ীতে ওঠ।”

আমি উঠিলে, গাড়োয়ানকে “জগন্নাথঘাট” আদেশ দিয়া, শচীন গাড়ীতে উঠিয়া বসিল। আমি যে দিকে বসিয়াছিলাম, তাহার উল্টা দিকে সে বসিল। ‘ ‘

গাড়ী জগন্নাথঘাটের উপরে আসিয়া দাঁড়াইল। শচীন নামিয়া, গাড়ীর নম্বর তাহার পকেটবুকে টুকিয়া লইয়া গাড়োয়ানকে বলিল, “তুম্ হিঁয়া খাড়া রহো। হাম আভি আতা হ্যায়।”—বলিয়া সে ঘাটের দিকে নামিল।

প্রায় দশ মিনিট পরে শচীন ফিরিয়া আসিয়া বলিল, “আমি ঘাটে গিয়ে ‘মশাই, কার পরিবার হারিয়েছে—কার পরিবার হারিয়েছে’—বলে কত চীৎকার করলাম, কৈ, কেউ ত কোন উত্তর দিলে না। তোমার স্বামী এখানে নেই। বোধ হয়, তোমায় খুঁজে না পেয়ে তিনি চলে গিয়ে থাকবেন।”

কি বলিব, কি করিব, আমি কিছুই বুঝিতে পারিলাম না। আমার চিন্তাশক্তি লুপ্ত হইয়াছিল। আমি মাথাটি হেঁট করিয়া নীরবে বসিয়া রহিলাম।

শচীন রাস্তায় দাঁড়াইয়া কি ভাবিল। তাহার পর গাড়ীর খড়খড়িগুলা একে একে সব উঠাইয়া দিয়া, গাড়োয়ানকে বলিল, “চলো বউবাজার।” বলিয়া সে উঠিয়া গাড়ীতে বসিল। গাড়ী চলিতে লাগিল।

পঞ্চম পরিচ্ছেদ

বন্ধুর আশ্রমে।

আমি যে দিক্‌টায় বসিয়াছিলাম, শচীন এবারও তাহার বিপরীত দিকেই বসিল। বসিয়া বলিল, “বিনি, তুই বড় হয়েছিস। আমি প্রথমটা তোকে দেখে চিন্তেই পারিনি রে!”—পুরুলিয়াতে ইদানী শচীন আমাকে, শৈলকে ‘তুই’ বলিয়াই কথা কহিত।

উত্তর করিলাম, “চিরকালই কি ছোট থাকবো?”

শচীন বলিল, “তোরা বিয়ের খবর আমি বউদিদির কাছেই শুনেছিলাম। ছেলেপিলে হয়েছে?”

“না।”

“কেন?”

এই ‘কেন’র আমি কি উত্তর দিব, কিছুই স্থির করিতে পারিলাম না, নীরবে অবনত মুখে বসিয়া রহিলাম।

খড়খড়িগুলা কোন কোনও পাখী ভাঙ্গা ছিল, তাই সেগুলি

বন্ধুত্বাকা সঙ্গেও ভিতরে কিছু আলো ছিল। আমি একবার নুখ তুলিয়া দেখিলাম, শচীন আমার পানে মুগ্ধদৃষ্টিতে চাহিয়া আছে।

আমি জিজ্ঞাসা করিলাম, “গাড়ী কোথায় যাচ্ছে?”

“আমার বাসায়।”

“তোমার ত মেসের বাসা। সেখানে পাঁচজন পুরুষমানুষের মধ্যে আমায় রাখবে কোথায়?”

শচীন বলিল, “না রে, সেখানে কি তোকে রাখবো? আমার জিনিষপত্র কতক নেবার জন্ত যাবি। তার পর আর এক যায়গায় নিয়ে গিয়ে তোকে খাওয়াব-দাওয়াব, তার পর হুজনে পরামর্শ ক’রে যা করতে হয় করা যাবে।”

ভাবিলাম, শচীন আমায় কোথায় লইয়া চলিল? ভয়ে আগার বৃকের ভিতরটা গুরু-গুরু করিতে লাগিল।

শচীন খড়খড়ির ফাঁক দিয়া রাস্তার পানে চাহিয়া ছিল। কিৎক্ষণ পরে হাঁকিল, “এই কোচম্যান, ঐ সামনে বাড়ী রাখ্‌থো।”

গাড়ী দাঁড়াইল। শচীন বলিল, “তুমি চুপটি ক’রে গাড়ীর মধ্যে ব’সে থাক। আমি উপরে গিয়ে, আমার বাস্ক আর বিছানাটা নিয়ে আসি।”

গাড়ীর দরজা খুলিয়া শচীন নামিয়া গেল। পাঁচ মিনিট পরে পদশব্দ শুনিতে পাইলাম। খড়খড়ির ফাঁকে দেখিলাম, এক জন চাকর একটা মাঝারি আকারের বাস্ক ঘাড়ে করিয়া আনিয়াছে। বাস্কটা সে গাড়ীর ছাদে তুলিয়া দিল। শচীন তাহাকে বলিল, “বিছানা আউর সোরাইঠো লে আও জলদি।” চাকর চলিয়া গেলে

গাড়োয়ান জিজ্ঞাসা করিল, “আব কাঁহা জানে হোগা বাবু?” শচীন বলিল, “শেয়ালদা ষ্টেশনকে পাশ।” চাকর ফিরিয়া আসিলে বিছানার বাঙিলটা ছাদে দিয়া, সোরাই হাতে করিয়া শচীন গাড়ীতে উঠিয়া বসিল। গাড়ী আবার চলিতে লাগিল।

শচীন বলিল, “শেয়ালদা ষ্টেশনের কাছে যাত্রিনিবাস ব’লে একটা বাঙ্গালী হোটেল আছে। কেউ পরিবার নিয়ে এলে, তাদের থাকবারও স্বতন্ত্র বন্দোবস্ত আছে। তোমার স্বামীকে খোঁজবার জন্তে ২১ দিন যে কলকাতায় থাকতে হবে, সেইখানেই তোমায় রেখে দেবো। আর কোনও স্থান নেই। সেখানকার কোনও ঝি-টি তোমায় যদি জিজ্ঞাসা করে, ত’বে তুমি আমাকে স্বামী ব’লেই পরিচয় দিও। নইলে, তারা অজ্ঞ লোক, অকারণ একটা মন্দ কিছু ভাবতে পারে। বুঝেছ?”

আমি চুপ করিয়া রহিলাম। বুঝিতে চেষ্টা করিতে লাগিলাম, শচীনের মতলবটা কি?

কিছুই স্থির করিতে পারিলাম না। অবশেষে তাকে জিজ্ঞাসা করিলাম, “তোমার খাওয়া হয়েছে?”

শচীন বলিল, “সকালে এক পেয়লা চা আর একটু মোহন-ভোগ খেয়ে ভলটিয়ারি করতে বেরিয়েছিলাম। তুমি ত তাও খাওনি, তোমার খুব ক্ষিদে পেয়েছে বোধ হয়?”

আমি বলিলাম, “মেয়েমানুষের আবার ক্ষিদে!”

শচীন বলিল, “নাঃ, তারা ত আর মানুষ নয়!”

আমি বলিলাম, “ক্ষিদে-তেষ্ঠী তাদের দমন করতে শিখতে হয়।”

শচীন বলিল, “বিনি, তুই এই নবযুগের নূতন আলোর দিনে বলি, মেয়েমানুষকে ক্ষিদে-তেষ্ঠা দমন করতে শিখতে হয়? কেন তারা দমন করবে? কি অপরাধে, শুনি? ও সব মতটত মহাভুল—অত্যন্ত সেকেলে। ‘নারী-সমগ্রা’র ত এখন মীমাংসাই হয়ে গেছে। দেহধর্মের বা মনোধর্মের কোনও ক্ষুধা দমন করার চেষ্টাই মহামূর্থতা; তার তৃপ্তি সাধনই পুরুষের যথার্থ পুরুষত্ব, নারীর আদর্শ নারীত্ব।”

আমি হাসিয়া বলিলাম, “তুমি কি বই লেখ না কি?”

“কেন?”

“বইয়ে এই রকম সব কথা দেখতে পাই।”

শচীন বলিল, “লিখি না, পড়ি। আজকাল কত সব ভাল ভাল বই বেরুচ্ছে, সে সব তুই পড়েছিস? হ্যাঁ—তুই যখন পুর্নলিয়াতে ছিলি, তখনই ত তোরা ক’ বোনে বেশ লেখাপড়া করতিস দেখেছি।”—বলিয়া কয়েকখানা পুস্তকের নাম করিয়া সে জিজ্ঞাসা করিল, “এই সব বই তুই পড়েছিস?”

আমি বলিলাম, “পড়েছি। ছ’বার তিনবার ক’রে পড়েছি।”—বহিগুলির নাম আজ সাত বৎসর পরে উল্লেখ করা নিম্প্রয়োজন, কারণ, যদিও তখন সেগুলি সাহিত্যাকাশের ধ্রুবনক্ষত্র, নবযুগের বিজয়স্তম্ভ, মনস্তত্ত্বের মনুমেণ্ট বলিয়া বিঘোষিত হইয়াছিল, লেখকগণ “অমর” আখ্যা লাভ করিয়াছিলেন, সেগুলির নাম এখন আর শুনা যায় না। এমন কি, গুরুদাস বাবুদের ক্যাটলগে অথবা চৈতন্ত লাইব্রেরীর পুস্তক-তালিকাতেও দেখিতে পাই না।

শচীন জিজ্ঞাসা করিল, “আচ্ছা, নারীর অধিকার সম্বন্ধে তোর মত কি, বল। আমাদের সেই মা-দিদিমাদের, বন্ধিমবাবু-টাবুদের মতই ঠিক, না আজকাল এই এঁদের মতই ঠিক?”

আমি বলিলাম, “আজকালকার মতই ত আমার ঠিক বলে মনে হয়।”

শচীন পুলকিত হইয়া বলিল, “বেশ বেশ! শুনে সত্যি বড় সুখী হলাম, বিনি”—বলিয়া সে আমার ঝঙ্কদেশ চাপড়াইয়া দিল। আজ এই প্রথম সে আমায় স্পর্শ করিল।

ক্রমে গাড়ী যাত্রিনিবাসের সম্মুখে আসিয়া দাঁড়াইল। শচীন আমাকে গাড়ীতে রাখিয়া, ঘর ঠিক করিতে গেল। ক্রিয়ৎক্ষণ পরে হোটেলের একজন ভৃত্য সহ ফিরিয়া আসিল। ভৃত্য গাড়ীর ছাদ হইতে বাক্স-বিছানা নামাইল। গাড়ীভাড়া চুকাইয়া দিয়া শচীন আমাকে নামাইয়া লইল। আমি ঘোমটা দিয়া, তাহার স্ত্রী সাজিয়া, তাহার পশ্চাৎ পশ্চাৎ তেতালায় উঠিতে লাগিলাম। মনে হইতে লাগিল, যাহা সাজিয়াছি, সতাই যদি আমি তাহাই হইতাম, তবে আমার চেয়ে সৌভাগ্যবতী পৃথিবীতে আর কে থাকিত?

উপয়-ঘরে প্রবেশ করিয়া ঘোমটা তুলিলাম। দেখিলাম, ঘরখানি মাঝারি আকারের; একধারে একখানি কেওড়া-কাঠের তক্তপোষ, অপর দিকে একটি ছোট গোল টেবিল, একখানি চেয়ার, দেওয়ালে একটি আরসি টাঙ্গানো। রাস্তার ধারে চিক-ফেলা ছোট বারান্দাটি এই ঘরখানিরই নিজস্ব; অন্য কোনও ঘরের সহিত তাহার সম্পর্ক নাই।

চাকর বিছানা-বান্ধ নামাইয়া জিজ্ঞাসা করিল, “বাবু, খাবার-টাবার কিছু আনতে হবে কি?”

শচীন বলিল, “আনতে হবে বৈ কি। তোদের ম্যানেজার বাবু ত বন্ধে, এত বেলায় ভাত কোথা পাব। এই টাকা নেও”—বলিয়া, কি কি আনিতে হইবে, শচীন তাহা বলিয়া দিল।

চাকর টাকা লইয়া চলিয়া গেল। এক জন মধ্যবয়স্ক, কপালে উকিপুরা ঝি আসিয়া বলিল, “বউমা, চানটান করবে কি?”

আমি বলিলাম, “না, এই তো আমরা গঙ্গান্নান ক’রে আসছি।”

ঝি বলিল, “কত দিন তোমাদের থাকা হবে?”

শচীন বলিল, “দুই এক দিন। কা’ল কি পরশু আমরা দেশে ফিরে যাব। এই সোরাইটেতে জল ভ’রে এনে দাও ত ঝি!”

ঝি আমার দিকে চাহিয়া বলিল, “দেখ বউমা, খাবারটাবার দরকার হ’লে, আমাকেই বরং আনতে দিও। খোড়া বেটারা আমাদের বাঙ্গালী-পছন্দ খাবার কি কিনতে জানে?”—বলিয়া সোরাই লইয়া চলিয়া গেল।

শচীন জামা ছাড়িয়া, বিছানার বাগিলের দড়ি খুলিতেছিল; বলিল, “দেখ, আমি-ন্নান করবো। যদিও সকালবেলা বাসা থেকে ন্নান ক’রে বেরিয়েছিলাম, সেই ভিড়ের মধ্যে ভলন্টিয়ারি ক’রে ঘামে সর্বান্ন ভিজে গেছে। তুমি আমার কোটটা আর গেঞ্জিটা ঐ বারান্দায় টাঙ্গিয়ে দাও। আর এই চাবি নাও, বান্ধ থেকে আমার ধুতি, তোয়ালে, সাবান বের করে দাও।”

বান্ধ খুলিয়া জিনিষগুলি বাহির করিয়া দিলাম, শচীন স্নানার্থ

গমন করিল। আমি নিজ বস্ত্রের প্রতি চাহিয়া দেখিলাম, আধ-ময়লা একখানি মিলের সাড়ী পরিয়া সমস্ত রাত্রি বেলে আসিয়াছিলাম, তাহাই পরিয়া গঙ্গান্নান করিয়া গায়েই শুকাইয়াছি ; এরকম পেতনীর মত বেশে শচীনীর সাম্নে থাকিতে আমার লজ্জা করিতেছিল। তাই আমি তার বাক্স হইতে একখানি ধোয়া কালোপেড়ে দেশী ধুতি বাহির করিয়া পারিলাম। সোরাইয়ের জলে মুখটা, হাত দু'খানা ধুইয়া ফেলিলাম ; শচীনীর চিরুণী-বুদ্ধ লইয়া, দেওয়ালে টাঙ্গানো সেই আর্সির সাম্নে দাঁড়াইয়া চুলগুলি ঠিক করিয়া লইয়া, শচীনীর জন্য অপেক্ষা করিতে লাগিলাম।

শচীন ভিজা তোয়ালে কাঁধে করিয়া ফিরিয়া আসিয়া, হাসিভরা চোখে আমার প্রতি চাহিয়া বলিল, “বাঃ, ধুতি প'রে কি সুন্দর দেখাচ্ছে রে তোকে ! ও ধুতির আজ জন্ম সার্থক হ'ল !”—তাহার কথা শুনিয়া আমি লজ্জায় রাঙা হইয়া উঠিলাম।

চাকর খাবার আনিল। ঝি আসন, থালা প্রভৃতি দিয়া গিয়াছিল। শচীনকে খাবার দিলাম। আহা-রাস্তে তক্তপোমের উপর বসিয়া সে পাণ ও সিগারেট সেবন করিতে বসিল।

তাহার পাতে আমি থাইতে বসিলাম। আমার খাওয়া হইলে, শচীন বলিল, “এইবার আমি বেরুই, তুমি দোর বন্ধ ক'রে শুয়ে একটু ঘুমোও।”

জিজ্ঞাসা করিলাম, “তুমি কোথা যাবে ?”

“থানায় থানায় গিয়ে একবার খোঁজ নিতে হবে, তোমার স্বামী কোনও থানে ডায়েরি করিয়েছেন কি না। যদি করিয়ে থাকেন,

তবে তাঁ'র ঠিকানাও পাব। কিংবা পুলিশকে জানিয়ে আসতে পারবো, তুমি অমুক ঠিকানায় আছ।”

আমি ভীত হইয়া বলিলাম, “আমি এখানে একলা থাকবো?”

“দিনের বেলা, ভয় কিসের?”—বলিয়া শচীন বাহির হইয়া গেল।

ষষ্ঠ পরিচ্ছেদ

বুকের হার।

আমি ঘুমাইলাম। কা'ল সারারাত্রি জাগরণ, আজ ভিড়ে কষ্টের পর, শরীর আমার অবশ হইয়া গিয়াছিল—থুব ঘুমাইলাম।

ঘুম ভাঙ্গিলে দেখিলাম, বেলা পড়িয়া গিয়াছে। মুখ-হাত ধুইয়া, শচীনের অপেক্ষায় বসিয়া রহিলাম।

সন্ধ্যা হইল, ঝি আসিয়া ঘরে বাতি জালিয়া দিয়া গেল। প্রায় চটোর সময় শচীন ফিরিল। বলিল, “কোনও থানায় কেহ আমার সম্বন্ধে কোনও ডায়েরি করায় নাই। অবশেষে সে কালীঘাটে গিয়াছিল। প্রত্যেকটি যাত্রীবাসী তন্ন-তন্ন করিয়া খুঁজিয়া আসিয়াছে, কোথাও আমার স্বামীর সন্ধান পায় নাই।

চাকরকে ডাকিয়া শচীন দুই পেয়ালা চা আনিতে আদেশ করিল।

একটা সিগারেট ধরাইয়া শচীন বলিল, “এখন উপায় ? তোমায় কি তোমার স্বামীর বাড়ীতে নিয়ে গিয়ে রেখে আসবো ?” আমাকে নীরব দেখিয়া সে বলিল, “যদি বল, আমাদের বাড়ীতে, নীহার বউদির কাছেও তোমায় রেখে আসতে পারি !”

তথাপি আমি চূপ করিয়া আছি দেখিয়া শচীন বলিল, “কি ভাবছ তুমি ?”

“আমি ভাবছি, তুমি আমায় স্বামীর বাড়ীতেই রেখে এস, আর নীহারদির কাছেই রেখে এস, তুমি আমায় কুড়িয়ে পয়েছ, এক দিন এক রাত তোমার সঙ্গেই আমি ছিলাম, এক কথা শুন্লে আমার স্বামী কি ভাববেন ?”

চা আসিল। শচীন এক পাত্র লইয়া অন্য পাত্র আমায় দিতে চাহিল। আমি চা খাই না শুনিয়া সে নিজেই উভয় পাত্র গ্রহণ করিয়া বলিল, “এতে আর দোষটা কি ? এক জন ভদ্রলোক যদি এ রকম অসহায় অবস্থায় কোনও বিপন্ন স্ত্রীলোককে পায়, সে কি তাকে তার বাড়ী পৌছে দেবে না ?”

আমি বলিলাম, “কিন্তু তুমি যে !”

“কেন, আমি কি দোষ করেছি ?”

“তুমি না কর, আমি যে করেছিলাম। আর, সে কথা যে আমার স্বামীর কাণেও উঠেছে।”

শচীন বিস্মিত হইয়া জিজ্ঞাসা করিল, “কি কথা ?”

আমার ভারি লজ্জা করিতেছিল, তথাপি কোনও মতে আমি বলিলাম, “বিয়ের পর, আমার স্বামী একবার পুকলিয়াতে এসে-

ছিলেন। ননীবালা তখন ন' বছরের। আমার স্বামী রঙ্গ ক'রে তাকে জিজ্ঞাসা করেছিলেন, 'তোমার বিনোদ দিদি আমাকে কি রকম ভালবাসে বল দেখি।' ননী বলেছিল, 'না, তোমাকে ভালবাসে না, শচীনদাকে ভালবাসে।' স্বামী জিজ্ঞাসা করেছিলেন, 'শচীনদা কে?' ননী বলেছিল, 'সেই যে আমাদের বাড়ী থাকতো। তার সঙ্গে বিনোদ দিদির বিয়ে হবার কথা হয়েছিল কি না। দিদি লুকিয়ে লুকিয়ে তাকে দেখত, ছ'জনে হাসাহাসি করত, তার পর যখন বিয়ে ভেঙে গেল, সে চ'লে গেল, দিদি সেদিন কেঁদে একবারে কুলুক্ষেত্র করেছিল! তার পরেই ত তোমার সঙ্গে দিদির বিয়ে হ'ল কি না!'

শচীন বলিল, "আচ্ছা ছুঁ মেরে ত! তা, এ রকম সব কথা সে বানিয়ে বলবে কেন?"

"বানিয়ে বলবে কেন?"

"তবে কি সত্যিই তুমি—"

"সত্যিই আমি"—বলিয়া মুখ নত করিলাম; বোধ হয়, আমার গাল দুটিও রাঙা হইয়া উঠিয়াছিল।

শচীন কয়েক মুহূর্তকাল নীরব থাকিয়া বলিল, "তা হ'লে আমিও বলি। সেই পুরুলিয়াতে, যখন আমি সেখানকার জল-হাওয়ার গুণে দিন দিন স্তম্ভ সবল হয়ে উঠছিলাম, তোমায় যে আমি কি চোখে দেখেছিলাম, তা বলতে পারিনে। বাবা যখন চিঠি লিখলেন যে, তিন হাজার টাকার কমে তিনি কিছুতেই আমার বিয়ে দেবেন না, আমায় চলে আসতে হুকুম দিলেন, তখন আমার মাথায় যেন

বজ্রাঘাত হ'ল। তোমার আশা জন্মের মত ছেড়ে, আমিও চোখের জল ফেলতে ফেলতেই সেখান থেকে চলে এসেছিলাম। এত দিনেও কি আমি তোমায় ভুলতে পেরেছি? এ তিন বছরের মধ্যে রোধ হয় এমন একটি দিন যায় নি, যে দিন তোমার কথা আমার মনে পড়েনি।”

শচীর মুখে এই কথা শুনিয়া, পুলকে আমার অঙ্গ শিরিয়া উঠিল। স্বামীর আশা আমি একপ্রকার ত্যাগই করিয়াছিলাম। একেই ত শচীন সম্বন্ধে আমার প্রতি তাঁহার সন্দেহ! শচীন যদি তাঁহাকে খুঁজিয়াও পায়, অথবা সঙ্গে করিয়া আমায় দেশে রাখিয়া আসে, তথাপি তিনি যে আমায় আর গ্রহণ করবেন, এ সম্ভাবনা অতি অল্প। তবে আর মিছা কেন সে চেষ্টা? বিশেষ, সেই স্বামী! কেন? মন্ত্র পড়িয়া বিবাহ হইয়াছিল বলিয়া, নিজেকে তাঁহারই পায়ে বলি দিতে হইবে নাকি? “নারী-সমগ্রা”র ত মীমাংসাই হইয়া গিয়াছে; “নারীর অধিকার” সম্বন্ধে এখন ত আর কোনও সন্দেহই নাই।

কিয়ৎক্ষণ চুপ করিয়া থাকিয়া, শচীন আর একটি দীর্ঘনিশ্বাস ফেলিয়া বলিল, “বাবা আমার বিয়ে দেবার জন্তে কৃত চেষ্টা করেছেন, কিন্তু তোমায় ভুলতে পারিনি বলেই আমি বিয়ে করতে রাজি হই নি। কিন্তু তুমি ত বেশ মনের স্নেহে স্বামীর ঘর করছিলে!”

আমি বলিলাম, “তা তুমি বলবে বৈ কি!”

শচীন ভারি গলায় বলিল, “বল্‌বো না কেন? তবে কি, তুমিও কি আমায় ভুলতে পারনি, বিনোদ?”

ইচ্ছা হইল বলি, “ভোলা কি যায় প্রিয়তম ?”—কিন্তু লজ্জায় শেষ শব্দটি উচ্চারণ করিতে পারিলাম না। চোখের জল চোখে চাপিয়া মাথাটি হেঁট করিয়া বলিলাম, “ভোলা কি যায় ? পতিভক্তি পতিসেবা করবার জন্তে আমি কত চেষ্টা করেছি, পারি নি। বিজয়ার রাতে যখন তাঁ’কে প্রণাম করেছি, মনে হয়েছে, যেন তোমায় প্রণাম করছি। তিনি যদি কখনও আমায় আদর করেছেন, তখন চোখ বুজে কল্পনা করেছি, যেন তুমিই আমায় আদর করছ।”

শচীন দীর্ঘনিশ্বাস ফেলিয়া চূপ করিয়া বসিয়া রহিল। তাহার চোখেও বোধ হয় জল আসিতেছিল, ল্যাম্পের আলোকে সে ছ’টি চক্চকে দেখাইল।

ঝি আসিয়া জিজ্ঞাসা করিল, “ঠাকুর ভাত অনুবে কি ? রান্না বাগ্না হয়ে গেছে।”

রাত্রি প্রায় তখন ৯টা। শচীন ভাত আনিতে বলিল। ঝি, ঠাকুরকে বলিয়া, আবার ফিরিয়া আসিল, ঠাই করিয়া, আসন বিছাইয়া দিল। ক্ষণকাল পরে ঠাকুর অন্নব্যঞ্জনাদি সাজাইয়া দুই খালা ভাত আনিয়া, ঘরে রাখিয়া চলিয়া গেল।

আহারান্তে শচীন বলিল, “আচ্ছা, তুমি খাওয়া-দাওয়া কর, আমি তবে এখন বাসায় যাই। তুমি খেয়ে দরজা বন্ধ ক’রে শুয়ে থেক। কা’ল সকালে আবার আমি আসবো ; কি করা উচিত, হু’জনে ব’সে পরামর্শ করা যাবে।”

আমি বলিলাম, “তোমার বিছানা ত এখানে। সেখানে গিয়ে তুমি শোবে কিসে ?”

শচীন বলিল, “সেখানে আর একটা তোষক, বালিস আমার আছে।”

আমি বলিলাম, “তা যেন আছে। কিন্তু, আমি কি এখানে একলা কখনও থাকতে পারি? আমার ভয় করবে না বুঝি?”

শচীন বলিল, “তোমার ভয় করবে?”

আমি অভিমানের স্বরে বলিলাম, “না, করবে না! আচ্ছা, তুমি যাও না, কা’ল এসে দেখবে, চোরে আমায় গলা টিপে মেরে রেখে গেছে।”—বলিয়া আমি চোখে আঁচল দিয়া ফোঁপাইতে লাগিলাম। ইহা আমার অভিনয় নহে,—এই অপরিচিত নির্ঝাঙ্কব স্থান্য রাত্রিতে একা থাকিতে হইবে গুনিয়া সতাই ভয়ে আমার শরীর কাঠ হইয়া গিয়াছিল।

আমাকে কঁাদিতে দেখিয়া শচীন বলিল, “ছিঃ, কেঁদ না। একলা যদি তোমার ভয় করে, আমি থাকছি না হয়, তা’র জগে আর কি? কেঁদ না, কেঁদ না, চুপ কর!”—বলিয়া চক্ষু হইতে আমার হস্ত অপসারিত করিয়া লইল।

আমি চক্ষু মুছিয়া বলিলাম, “আমি ত জন্মের মতই গেছি। বাপ নেই, মা নেই, স্বামীর ঘরে আমার জায়গা নেই। এখন তুমিও যদি আমায় ত্যাগ ক’রে যাও, তা হলে আমার দশা কি হবে?”

শচীন আমার একখানি হাত ধরিয়া ফেলিয়া, আবেগ-কম্পিত স্বরে বলিল, “তোমায় আমি ত্যাগ করবো, বিনোদ? কখনই নয়। আজ তিন বৎসর তোমার নাম জপ ক’রে কাটিয়েছি। দেবতা যদি সদয় হয়ে তোমায় মিলিয়ে দিলেন, তোমায় আমি ত্যাগ

করব? নিশ্চয়ই না। তোমাকে আমি বুকের হার ক'রে রেখে দেবো।”

শেষের দিকের কথাগুলো বলিবার সময় শচীনের গলা ভারি হইয়া উঠিয়াছিল।

আমি বুঝিলাম, বিধাতা সদয় হইয়া এত দিনে আমার “নারীত্ব” সফল করিয়া দিলেন।

সপ্তম পরিচ্ছেদ

শচীনের মৃত্যু।

তাহার পর তিনটি বৎসর কাটিয়া গিয়াছে। সে দিন—সেই সর্ব্বনাশের দিন—সোমবার, ২২শে বৈশাখ! তিনটি বৎসর মাত্র শচীনকে পাইয়াছিলাম, সুখের মুখ দেখিয়াছিলাম,—কিন্তু সে সুখে আমার বাজ পড়িল।

এক দিন তুমি বলিয়াছিলে, আমায় তোমার বুকের হার করিয়া রাখিবে—রাখিয়াছিলেও তাই—তবে আজ তোমার সেই কত সাধের কত যত্নের বুকের হারকে, পথের ধূলায় ফেলিয়া দিয়া কোথায় চলিলে, প্রাণাধিক?

আর কি লিখিব? কিছুতেই কিছু হইল না। ভোর রাতে, আমার জগৎ অঁধার করিয়া, আমাকে অকূল সাগরে ভাসাইয়া, শচীন চক্ষু বুজিল। আমি উচ্চস্বরে কাঁদিয়া উঠিয়া, মাটিতে লুটাইয়া

পড়িলাম। সে চীৎকার শুনিতে পাইয়া, নবীন বাবুর স্ত্রী কমলা দিদি, কেদার বাবুর স্ত্রী নিরুপমা ছুটিয়া আসিয়া আমায় তুলিয়া, জড়াইয়া ধরিল।

সারাটা দিন যে কি করিলাম, কি হইল, সে সকল আমি ভাল স্মরণ করিতে পারি না। দাহকার্য্য সমাধা হইবার পর নিমতলার ঘাটে আমায় স্নান করাইয়া, কমলা দিদি আমার হাতের কাচের চুড়িগুলি ভাঙ্গিয়া, সঁথির সিন্দূরের দাগ গঙ্গামৃত্তিকা ঘষিয়া ধুইয়া দিয়া, ভিজা কাপড় ছাড়াইয়া, আমায় সাদা থান পরাইয়াছিল, তাহা বেশ স্মরণ আছে। তাহার পর গাড়ী করিয়া আমায় বাড়ী আনিয়াছিল এবং পীড়াপীড়ি করিয়া সন্ধ্যাবেলা আমায় একটু গরম দুধ খাওয়াইয়াছিল, তাহাও আমার মনে আছে।

দুই তিন দিন পরে কমলা দিদি বলিল, “যা অদৃষ্টে ছিল, তা তো হয়ে গেল। তোমার স্বপ্তুরকেই না হয় একখানা চিঠি লেখ। এ বিপদ শুনিলে কি এখনও তাঁর মনে দয়া হবে না?”

শিয়ালদহ যাত্রিনিবাস হইতে যখন এই চোরবাগানের বাড়ীতে দুইখানি ঘর ভাড়া লইয়া আমরা আসিয়া স্বামী-স্ত্রী পরিচয়ে বাস করিতে লাগিলাম, তখন সে বাড়ীর অগ্র ভাড়াটিয়া গৃহস্থদের নিকট প্রকাশ করিয়াছিলাম যে, বাপ-মার অমতে আমার স্বামী আমাকে বিবাহ করায়, তাঁহার পিতা তাঁহাকে ত্যজ্যপুল্ল করিয়াছিলেন; তখন তিনি চাকরী যোগাড় করিয়া এখানে কলেজে পড়িতে থাকেন, বিবাহের পর এ কয় বৎসর আমি আমার বিধবা মার কাছে থাকিতাম; স্বামী মাঝে মাঝে গিয়া আমায় দেখিয়া

আসিতেন। সম্প্রতি মার মৃত্যুতে নিরাশ্রয় হইয়া পড়ায় তিনি আমাকে কলিকাতায় আনিয়াছেন। আমার এই কথা ভবিষ্যদ্বাণীর মত হইয়াছিল। তখন অবশ্য শচীর পিতা কিছুই জানিতে পারেন নাই; পরে জানিয়াছিলেন এবং জানিয়া শচীকে সত্যই তিনি তাজ্যপুল করিয়াছিলেন।

কমলার প্রশ্নের উত্তরে বলিলাম, “তাই না হয় লিখি তাঁকে চিঠি।”

কমলা বলিল, “তোমার স্বামী টাকা-কড়ি কি রেখে গেছেন, বল দেখি?”

আমি বলিলাম, “কি আর রেখে যাবেন, দিদি? নতুন উকীল, এই ত এক বছরমাত্র পাশ ক’রে ছোট আদালতে বেরুচ্ছিলেন। যা আনছিলেন, তাতে ভাত-কাপড় ঘরভাড়া কুলোতো না, তাই সন্ধ্যাবেলা প্রাইভেট টিউসনি করতেন। আমার গায়ে ২৩ খানি যা গহনা ছিল, তাও তাঁর অসুখের সময় বিক্রী করে ডাক্তার দেখাতে হ’ল। সবই ত জান দিদি!”

কিন্তু কাহাকেও আমি পত্র লিখিলাম না, কোন্ মুখে লিখিব? কি করিয়া নিজ জীবিকা অর্জন করিতে সমর্থ হইব, ইহাই আমি দিবারাত্রি বসিয়া বসিয়া চিন্তা করিতাম। অবশেষে স্থির করিলাম, কোনও ভদ্রপরিবারে বি-গরি করিয়া, জীবনের অবশিষ্ট দিনগুলো কাটাইয়া দিব।

যে নাপিতানী আমাদের কামাইতে আসিত, তাহারই সাহায্যে আমি একটি চাকরীর যোগাড় করিলাম। জিনিষপত্র যাহা :

বক্রয় করিয়া, ঘরভাড়া মিটাইয়া দিয়া, সেই নাপিতানীর সহিত আমি গিয়া ঝি-গিরি কর্ষে প্রবৃত্ত হইলাম। অদৃষ্টে শেষে এও ছিল!

গৃহস্বামী প্রৌঢ়বয়স্ক ভদ্রলোক, তাঁহার কয়লার আড়ত ছিল। বড় ছেলে মণিমোহনকে তিনি একটি স্বতন্ত্র কারবার করিয়া দিয়াছিলেন। সে-ও দুই পয়সা আনিত। গৃহে তাহার স্ত্রী ও দুইটি শিশুসন্তান ছিল। তাহার আর দুইটি ভাই ছিল, তাহারা তখন নাবালক। সাংসারিক অবস্থা বেশ স্বচ্ছল। গৃহিণী আমায় বেশ যত্ন করিতেন; কিন্তু বউছুঁড়ী আমাকে দেখিতে পারিত না। সর্বদা আমার কাষে দোষ ধরিত এবং কড়া কড়া শুনাইয়া দিত। তাহার কারণ বোধ হয়, অশ্লু সকলে আমায় ঝি বলিয়া ডাকিলেও, তাহার স্বামী মণিবাবু আমায় নাম ধরিয়া ডাকিতেন। এক দিন আমি আড়ালে থাকিয়া শুনিলাম, গৃহিণী তাঁহার ছেলেকে তিরস্কার করিতেছেন। মণিবাবু বলিলেন, “আহা, ভদ্রলোকের মেয়ে, এক দিন একজন উকীলের পরিবার ছিল, অবস্থাগতিকে এসে ঝি-গিরি করছে, ওকে ঝি ঝি ব’লে ডাকাটা কি উচিত হয় মা?” আমার প্রতি মণিবাবুর এই অনুকম্পায়, তাঁহার প্রতি কৃতজ্ঞতায় আমার মনটি ভরিয়া উঠিল।

কিন্তু ছয় মাস যাইতে না যাইতেই মণিবাবুর এই অনুকম্পা ভিন্ন আকার ধারণ করিল। এক দিন, অস্ত্রের অসাক্ষাতে, তিনি আমার হাতে একখানি চিঠি গুঁজিয়া দিলেন।

অষ্টম পরিচ্ছেদ

আবার ভাগ্য পরিবর্তন ।

আরও এক বৎসর কাটিয়াছে । এ একবৎসর আমি কলিকাতায় যে পল্লীতে বাস করিয়াছি তাহার আর নামোল্লেখ করিব না । “পিতৃ আদেশে কারবার সম্পর্কে এক সপ্তাহের জন্ত বোম্বাই যাইতেছি” বলিয়া সেই যে মণি চলিয়া গেল, আর ত আসিল না ! যখন দেখিলাম, দুই সপ্তাহ কাটিয়া গেল, সে আর আসে না, তখন সংবাদ জানিবার জন্ত গুপ্তচর লাগাইলাম । দুই তিন দিন পরে চর আসিয়া জানাইল, বোম্বাই যাইবার কথা ডাঃ মিথ্যা, মণিবাবু কোথাও যান নাই, বরাবর কলিকাতাতেই আছেন, তাঁহার একজন নূতন জুটিয়াছে । আমি তখন হতাশ হইয়া পড়িলাম । বুঝিলাম, সে আমাকে জন্মের মত ত্যাগ করিয়াছে ! বিছানায় পড়িয়া কাঁদিতে লাগিলাম ; তাহার বিরহে নহে, কারণ, তাহার প্রতি আমার এতটুকুও শ্রদ্ধা বা স্নেহ ছিল না । তাহাদের বাড়ী থাকিতে, তাহার প্রতি আমার যে শ্রদ্ধাটুকু এবং প্রথম প্রথম তাহার প্রতি যে আকর্ষণটুকু জন্মিয়াছিল, এখানে আসিয়া, এই এক বৎসর তাহার ব্যবহারে, দিনে দিনে আমার মন হইতে সে সব বিলুপ্ত হইয়া গিয়াছিল । আমি কাঁদিতেছিলাম, আমি কি ছিলাম, কি হইলাম ভাবিয়া—আমার উপায় এখন কি হইবে ভাবিয়া ।

বাড়ীউলী এবং এই গৃহের অন্ত্যন্ত ভাড়াটিয়া স্ত্রীলোকগণ আমার কাছে আসিয়া সর্বদা আমায় সাহায্য দিত এবং উপায় নির্দেশ করিত।

ক্রমে আমার টাকা ফুরাইল। পেটের জ্বালা বড় জ্বালা। তখন বাধ্য হইয়া, তাহাদের নির্দিষ্ট উপায়ই আমাকে অবলম্বন করিতে হইল।

* * * *

নানারূপ ভাগ্যপরিবর্তনের মধ্য দিয়া, আমার জীবন অতি বাহিত হইতে লাগিল। কিছুকাল বা; দিনের পর দিন কালিয়া পোলাও মাছের মুড়া চলে; সর্বদা গহনা পরিয়া, বারাগসী শাড়ীর বাহার দিই; আবার কিছু কাল বা ঐ সমস্ত বন্ধক দিয়া টাকা ধার করিয়া ব্যয় নির্বাহ করি; ছই পয়সার কুচা চিংড়ি আনাইয়া “বাটিচর্চড়ি” করিয়া ভাত খাই। ভাগ্যের চাকা আবার ঘুরিয়া যায়, গহনাপত্র খালাস করিয়া আনি, আবার কালিয়া পোলাও মাছের মুড়া, বন্ধে বসিয়া থিয়েটার দেখা আরম্ভ হয়। এইরূপে জীবনের আরও সাতটি বছর কাটিয়া গেল। কিন্তু সুখে কাটিল কি?

জীবনের শেষের সাতটি বৎসর কি দুঃখেই যে আমার কাটিল, তাহা সেই সর্বলোকসাক্ষী ব্যতীত আর কে জানিবে? শেষের বৈ কি, কারণ ডাক্তার বাবু বলিয়াছেন, আমার এই রোগ শিবের অসাধ্য—তিন মাসের মধ্যেই আমার ইহলোকের সকল যন্ত্রণা দূর হইয়া যাইবে। ইহলোকের যন্ত্রণা ত শেষ হইবে;—কিন্তু পরলোক?

পরলোক আছে কি না কে জানে? যদি থাকে? তবে সেখানে আমার কি দণ্ডের ব্যবস্থা আছে, ভাবিতে বুক কাঁপিয়া উঠে, দেহের স্বপ্নাবশিষ্ট রক্তও যেন জল হইয়া যায়।

এদিকে তিন বৎসর আমি অনুবন্ধের ক্রেশ পাই নাই—বরং সাধারণ গৃহস্থবধুর অপেক্ষা সে বিষয়ে প্রাচুর্য্যই ভোগ করিয়াছি। আমি নিঃস্ব নহি। কিন্তু মনের সুখ? গহনা গায়ে দিয়া, আড়ং ধোলাই জড়িপাড় শাড়ী ব্লাউজ পরিয়া থাকিয়াও, মনে সর্বদা অসহ্য যন্ত্রণা অনুভব করিয়াছি। ডাক্তার বাবু বলেন, শুধু শারীরিক অত্যাচার নহে, ঐ মানসিক অশান্তিও আমার এই ক্ষয় রোগের একটা প্রধান কারণ।

দশ বৎসর পূর্বে গ্রহণে যখন গঙ্গান্নান করিতে আসিয়াছিলাম, তখন হারাইয়া না গিয়া, গঙ্গায় যদি ডুবিয়া যাইতাম, তাহা হইলে উঃ—কি সৌভাগ্যই আমার হইত। ডুবিলাম না—“নারীর অধিকার”—অর্থাৎ নিজের পায়ে নিজে কুড়ুল মারিবার অধিকার—লাভ করিলাম।

কলিকাতায় প্রথম তিন বৎসর, শচীনের স্ত্রী সাজিয়া যে তিন বৎসর যাপন করিয়াছি, সেই সময়টা আমার সুখেই কাটিয়াছিল সত্য। কিন্তু সে-ও অনাবিল সুখ নহে। আধুনিক মতানুযায়ী, আমি আমার “নারীত্ব সফল” করিতেছিলাম বটে, কিন্তু মনের ভিতরে ভিতরে একটা গ্লানি সর্বদা বহিয়া যাইত, তাহার হাত হইতে কিছুতেই নিষ্কৃতিলাভ করিতে পারিতাম না। আমাদেরই মত গরীব যে কয়টি গৃহস্থপরিবার সে বাড়ীতে ঘরভাড়া লইয়া

বাস করিত, তাহাদের নিকট আমাদের যে কাল্পনিক পরিচয় দিয়াছিলাম, তাহা তাহারা সম্পূর্ণভাবেই বিশ্বাস করিয়াছিল— অবিশ্বাসের কোনও কারণই বর্তমান ছিল না। তথাপি আমার মনে হইত, হায়, ইহারা যাহা, আমি ত তাহা নহি !

যাক্, সে সকল কথার অনুরোধে আবার ফল কি ? এখন আমার এই হৃঃসময় লজ্জাময় জীবন-কাহিনী সমাপ্ত করিয়া ডাক্তারবাবুকে অনুরোধ করিয়াছি, আগার মৃত্যুর পর ইহা যেন তিনি জনসমাজে প্রচারিত করিবার জন্ত যত্ন করেন। “নবযুগের নূতন আলোক” বলিয়া যাহা এখন কথিত হইতেছে, ভাড়া যে “আলোক” নহে—তাহা যে আগুন, সেই কথা বুঝাইবার জন্তই, আমার সেই আগুনে পুড়িয়া মরিবার ইতিহাস আমি লিপিবদ্ধ করিয়া যাইতেছি ; ইহা পাঠ করিয়া, যদি বাঙ্গালী গৃহস্থ ঘরের একটি মেয়েও, ভুলপথে পা দিতে দিতে, পা উঠাইয়া লইয়া ফিরিয়া আসে, তবে পরলোকে আমার আত্মা কথঞ্চিৎ সান্ত্বনালাভ করিবে।

অদৃষ্ট-পরীক্ষা



প্রথম পরিচ্ছেদ ।

চোগা চাপকান-পরিয়া, শামলা মাথায় দিয়া, নব্য উকীল শ্রীযুত হেমন্তকুমার বন্দ্যোপাধ্যায় এম-এ, বি-এল একটি ক্ষুদ্র ব্যাগ হাতে করিয়া ভগলি ষ্টেশনের প্ল্যাটফর্মে পৌঁছিতেই ট্রেনখানি আসিয়া দাঁড়াইল । তিনি তাড়াতাড়ি দ্বিতীয় শ্রেণীর দিকে অগ্রসর হইয়া দেখিলেন, একটি কামরায় দুইজন ইংরাজ বসিয়া আছে, অগ্ৰাট খালি । স্তত্রাং সেই খালি কামরাটিতেই তিনি উঠিয়া পড়িলেন । জানালাগুলি খুলিয়া, ক্রমাল দিয়া চামড়ার গদির ধূলা ঝাড়িয়া মনোমত স্থানটিতে বসিতেই ঘণ্টা হইল, গাড়ির সবুজ নিশান উড়িল, এঞ্জিনের বাঁশি বাজিল, ট্রেনখানি চলিতে আরম্ভ করিল । হেমন্ত বাবু তখন পাদ্রের জুতা খুলিয়া, ছিদ্রবহুল মোজা-সংযুক্ত চরণ দু'খানি বেক্সির উপর ছড়াইয়া দিয়া, আরাম করিয়া বসিয়া, মক্কেলের উপহার সিগারেটের একটি আধখালি প্যাকেট বাহির করিয়া সিগারেটে অগ্নিসংযোগ করিলেন ।

হেমন্ত বাবু বর্দ্ধমানে ওকালতী করিয়া থাকেন । আজ তিনি বৎসর কাল আদালতে যাতায়াত করিতেছেন, কিন্তু উপার্জন

আশানুরূপ হইতেছে না। অথচ গৃহে স্ত্রী, দুইটি কন্যা, একটি বিধবা ভগিনী এবং বৃদ্ধা মাতা। বাড়ীখানি পৈতৃক, ভাড়া দিতে হয় না, তিন মাস অন্তর মিউনিসিপ্যাল টেক্স দিয়াই খালাস—ঐ যা একটু সুবিধা। কিন্তু কঠোর মিতব্যয়িতা অবলম্বন করিয়াও, মাসে একশোটি টাকার কমে সংসারটি কিছুতেই চলে না। মাঝে মাঝে পুঁজি ভাঙ্গিয়া খাইতে হয়। পরিবারস্থ কাহারও পীড়াদি হইলে, অথবা অল্প কোনওরূপ অভাবিতপূর্ব্ব দায় উপস্থিত হইলেও পুঁজিতে হাত পড়ে। এই প্রণালীতে সেই পুঁজিও ক্রমে ক্ষয়প্রাপ্ত হইয়া ক্ষুদ্রাকার ধারণ করিয়াছে। হুগলিতে একটি মোকদ্দমা পাইয়া আজ এখানে আসিয়াছিলেন। একদমে পঁচিশটি ট্রাক, ফী পাইয়া মুনটি 'আজ বেশ প্রকুল। দশদিন পরে আবার তারিখ পড়িয়াছে, আবার আসিতে হইবে। মোকদ্দমাটি এখন কিছুদিন চলিলেই মঙ্গল।

ট্রেন, ছোট ছোট স্টেশনকে গ্রহণ না করিয়া, নিজ আভিজাত্য গর্বের ছুটিয়া চলিয়াছে। হেমন্ত বাবুর সিসগারেট শেষ হইল, গোটা দুই ছোট স্টেশনও পার হইয়া গেল। তিনি উঠিয়া গোসল কামরায় প্রবেশ করিলেন। হাতে মুখে জল দিয়া রুমালে মুখ মুছিতেছেন, এমন সময় উপরে জালতি র্যাকের দিকে তাঁহার নজর পড়িল। দেখিলেন, ময়লা মোটা কাপড়ে বাঁধা একটি পুলিন্দা। “কাহারও মোকদ্দমার কাগজপত্র নাকি?”—মনে এই ভাবিয়া পুলিন্দাটি তিনি নামাইলেন। গোসল কামরা হইতে বাহির হইয়া, স্বস্থানে আসিয়া বসিয়া, সেটি উল্টিয়া পাল্টিয়া দেখিতে লাগিলেন। পুলিন্দাটি খুলিবেন, অথবা বন্ধমানে নামিয়া স্টেশনে মাষ্টারের জিন্মা

করিয়া দিবেন, ইহাই মনে মনে চিন্তা করিতে লাগিলেন। মনে হইল, ষ্টেশন মাষ্টারের জিম্মা করিয়া দেওয়ায় একটা বিপদ আছে। নিজ নামধাম লিখাইয়া দিতে হইবে। পরে, যাহার পুলিশ সে যদি বলে, উহার মধ্যে আমার এত টাকা ছিল, অথবা অমুক মূল্যবান দ্রব্য ছিল, তাহা নাই, তখন কি করিয়া আমি প্রমাণ করাইব যে, আমি উহা আত্মসাৎ করি নাই? কামরায় এমন একজন সহযাত্রীও নাই যে, আমার সাধুতার বিষয় সাক্ষ্য দিবে। অবশ্য প্রনাগের ভার বাদীর উপরে, আদালতে না হয় আমি বেকসুর খালাস পাইয়াই আসিলাম। কিন্তু বদনামটা যাইবে কোথায়? স্মরণ্য কি করা যায়?—এ আপদ যেখানে ছিল, সেই খানেই রাখিয়া দিব কি? কিন্তু তাহাতে ফল কি হইবে? শেষ ষ্টেশনে পৌছিয়া গাড়ী সাইডিং-এ গেলে, মেথর ঝাড়ু দিতে আসিয়া উহা কুড়াইয়া পাইবে, এবং ভিতরে কি আছে দেখিবার জন্ত গোপনে বাড়ী লইয়া যাইবে। টাকা কড়ি যদি কিছু থাকে তবে তাহা অপহরণ করিবে; কাগজপত্র যাহা আছে, যথার্থ অধিকারীর কাছে সেগুলি যতই দরকারী হউক, ছিঁড়িয়া নষ্ট করিবে অথবা পোড়াইয়া ফেলিবে। আহা, যে বেচারী ইহা ফেলিয়া গিয়াছে, তাহার সর্বনাশ হইবে। আমি যদি ইহা খুলি, তবে খুব সম্ভব প্রকৃত অধিকারীর নাম ধামের সন্ধান পাইব—যাহার জিনিষ তাহাকে ফিরাইয়া দিতে পারিব। স্মরণ্য খুলিয়া দেখাই উচিত হইতেছে।

পকেট হইতে আর একটি সিগারেট বাহির করিয়া ধরাইয়া,

হেমন্তবাবু দপ্তরের দড়ি খুলিতে লাগিলেন। বস্ত্রাবরণ উন্মুক্ত হইলে দেখা গেল, আদালতের নীলাম ইস্তাহারী বৃহৎ মোটা ফরমে পুলিন্দাটি জড়ানো এবং আবার দড়ি দিয়া বাঁধা। তাহা খুলিয়া সবিস্ময়ে দেখিলেন নোট—কেবল নোট—সমস্তই নোট, অল্প কাগজপত্র কিছুই নাই। নোটগুলি থাকবন্দি করিয়া সাজানো, এইরূপ দশটি থাক, প্রত্যেকখানি নোট ১০০ টাকার করিয়া। দেখিয়া হেমন্তবাবুর মাথা বন্ বন্ করিয়া ঘুরিতে লাগিল। নিশ্বাস যেন বন্ধ হইয়া আসিতে লাগিল। ভয় হইল এখনই হয়ত অজ্ঞান হইয়া পড়িবেন। নোটগুলি সেই অবস্থায় বেঞ্চির উপর ফেলিয়া, হেমন্তবাবু টলিতে টলিতে আবদরগোসলখান্যর প্রবেশ করিলেন, এবং জলের নল খুলিয়া পাগলের মত মাথায় জল দিতে লাগিলেন। কলার ভিজিল, চাপকান ভিজিল, কতক জল কামিজের ফাঁকে প্রবেশ লাভ করিয়া পৃষ্ঠে গিয়া পৌঁছিল।

কিছুক্ষণ এইরূপ জলসেকের পর নল বন্ধ করিয়া হেমন্তবাবু রুমালে মাথা মুখ মুছিতে লাগিলেন। ক্ষুদ্র রুমাল ভিজিয়া যায়, জল গালিয়া ফেলিয়া, আবার হেমন্তবাবু মাথা মুছেন। আয়নার নিকট দাঁড়াইয়া দেখিলেন, চক্ষু দুইটি লাল, টক্‌টক্‌ করিতেছে। চুলের টেড়ি বিলুপ্ত হইয়া মাথাটি অসভ্য বগ্‌জাতির মত হইয়াছে। অঙ্গুলি সাহায্যে চুলগুলি যথাসম্ভব ঠিক করিয়া লইয়া হেমন্তবাবু স্বস্থানে ফিরিয়া আসিয়া বলিলেন। নোটের একটি থাক গণনা করিয়া দেখিলেন একশো খানি আছে, দশহাজার টাকা। অল্প থাক গুলিও সমান মোটা। দশটি থাক—লক্ষ টাকা।

নোটগুলি সেই নীলাম ইস্তাহারি কাগজে জড়াইয়া হেমন্ত নিজের ব্যাগের মধ্যে ভরিলেন। ময়লা মোটা কাপড়খানা জানালা দিয়া বাহিরে ফেলিয়া দিলেন।

ট্রেন যথা সময়ে বর্ধমানে আসিয়া দাঁড়ইল। হেমন্ত বাবু নামিয়া, ঠিকাগাড়ী ভাড়া করিয়া বাড়ী চলিয়া গেলেন।

দ্বিতীয় পরিচ্ছেদ।

আজ প্রায় একমাস কাল পরে হেমন্ত বাবু রোগশয্যা ত্যাগ করিলেন, পথ্য পাইলেন। 'হুগলি হইতে ফিরিয়া বাড়ী পৌছিয়া সেই রাত্রেই তাঁহার জ্বর হইয়াছিল, প্রবল জ্বরে কয়েক দিন তিনি অচেতন অবস্থায় ছিলেন। দিন পনেরো ঘোল অবস্থা খুবই খারাপ গিয়াছিল। যমে গান্ধুঘে টানাটানি বলিলেই হয়। তাহার পর হইতে একটু সুরাহা হইয়াছিল। বর্ধমানের সমস্ত বড় বড় ডাক্তার—মায় সিভিল সার্জন “সাহেব” পর্য্যন্ত—আসিয়া-ছিলেন। বিস্তর টাকা ব্যয় হইয়া গিয়াছে—তা যাউক, প্রাণটা যে বাঁচিয়াছে ইহাই পরম ভাগ্য বলিতে হইবে।

শিশুি মাছের ঝোল সহ পুরাতন চাউলের চারিটি ভাত খাইয়া হেমন্তবাবু বিছানায় উঠিয়া তাকিয়া ঠেসান দিয়া বসিয়া পাণ চিবাইতেছেন, এমন সময় তাঁহার জননী আসিয়া বলিলেন, “বাবা, এতদিন তোমায় বলি নি, এই অস্থুখে আমার হাতে পুঁজিপাটা যা ছিল, তা সমস্তই প্রায় খরচ হয়ে গেছে। এখন দিন চলবে কি করে”

আমি সেই ভাবনাতেই অস্থির হয়ে পড়েছি। কি যে হবে আমি ত কিছুই বুঝতে পারছি নে।”—বলিয়া তিনি মুখখানি গম্ভীর করিয়া রহিলেন।

“গায়ে একটু বল পেলেই আদালতে বেরুই আবার।”—বলিয়া হেমসুবাবু ঘরের কোণে আলমারিটির পানে চাহিলেন। হগলি হইতে সেদিন বাড়ী আসিয়াই ব্যাগটা আলমারির ভিতর তুলিয়া রাখিয়াছিলেন। কয়েক দিন পরে একটু জ্ঞান হইলেই, স্ত্রীর দ্বারা আলমারি খোলাইয়া ব্যাগটি বাহির করাইয়াছিলেন, এবং স্ত্রী কার্য্যান্তরে গেলে সেটি খুলিয়া দেখিয়াছিলেন, পুলিশ্‌টাটি খেমন ছিল তেমনই আছে। এ কয়দিন শুইয়া শুইয়া তিনি ভাবিয়াছেন, যাহার টাকা, সে নিশ্চয়ই দুই একদিন পরে সংবাদপত্রে বিজ্ঞাপন দিয়াছে, পুরস্কার ঘোষণা করিয়াছে, সে বিজ্ঞাপনটি দেখিতে পাইলে পুরস্কারের টাকাটা পাইবার উপায় হয়। কিন্তু বাড়ীতে খবরের কাগজ নাই, পাড়ার বন্ধু বান্ধবদের বাড়ীতে এতদিনের পুরাতন কাগজ এখন খুঁজিয়া পাওয়াও দায়। উকীল লাইব্রেরীতে বড় বড় তিন খানি দৈনিক কাগজের ফাইল আছে, যথাসম্ভব শীঘ্র লাইব্রেরীতে গিয়া সেগুলির মধ্যে অনুসন্ধান করিতে হইবে। টাকাগুলি আত্মসাৎ করিবার প্রলোভনও তাঁহার মনের মধ্যে বিষম উৎপাত করিয়াছে—১০০ টাকা নোটের নম্বর রাখা হয় না, ধরা পড়িবার তেমন আশঙ্কাও নাই। কিন্তু এ পর্য্যন্ত হেমসুবাবু সে প্রলোভনকে দমন করিয়া রাখিতে সমর্থ হইয়াছেন। ভাবিয়াছেন ছি ছি, পবিত্র ব্রাহ্মণকুলে জন্মিয়া, এত লেখাপড়া শিগিয়া, শেষে কি চোর হইব ?

তবে পুরস্কারের টাকাটা লইতে হইবে বৈ কি ! সেই বিজ্ঞাপিত পুরস্কারের টাকাটার পরিমাণ কি হইতে পারে, ইহাই শুইয়া শুইয়া এ কয়দিন তিনি চিন্তা করিয়াছেন। যদি কোনও বিজ্ঞাপন নাই বাহির হইয়া থাকে, তবে টাকা সম্বন্ধে কি করা উচিত, পুলিশা কুড়াইয়া পাওয়া সম্বন্ধে কাগজে কোনও বিজ্ঞাপন দেওয়া তাঁহার কর্তব্য হইবে কি না, ইহাও তিনি মনে মনে আলোচনা করিয়াছেন। কিন্তু মস্তিষ্ক এখনও দুর্বল, কোনও সিদ্ধান্তে উপনীত হইতে পারেন নাই।

অল্প পথ্য পাইবার চার দিন পরে আদালতে যাইবার জন্ত হেমন্ত প্রস্তুত হইতে লাগিলেন। ইহা শুনিয়া তাঁহার মা আসিয়া নিষেধ করিলেন ; বলিলেন, “এখন এই দুর্বল শরীর, হয় ত মাথা ঘুরে পড়ে যাবে ; নাই বা কাছারি গেলে বাবা ! আরও দু’চার দিন যাক্, শরীরে একটু বল পাও, তারপর বেরিও।” জী কামলিনী আসিয়া অনেক মিনতি করিলেন। হেমন্ত অনেক করিয়া তাঁহা-দিগকে বুঝাইয়া, অভয় দিয়া, কাছারি যাত্রা করিলেন।

উকীল লাইব্রেরীতে পৌছিলে তাঁহার বন্ধু বান্ধব তাহাকে ঘিরিয়া বসিয়া আরোগ্য লাভের জন্ত তাঁহাকে অভিনন্দিত করিতে লাগিলেন। কিয়ৎক্ষণ পরে একটু ফাঁক পাইয়া, হেমন্ত লাইব্রেরী ঘরে গিয়া একখানা চেয়ার টানিয়া, খবরের কাগজ গুলির ফাইলের নিকট বসিলেন। যে তারিখে জগলি হইতে ফিরিয়াছিলেন, সেই তারিখ হইতে ৮।১০ দিনের কাগজের বিজ্ঞাপন স্তম্ভগুলি তন্ন তন্ম করিয়া এক ঘণ্টা কাল খুঁজিলেন, কিন্তু সে সম্বন্ধে কোনও বিজ্ঞাপন

দেখিতে পাইলেন না। এই পরিশ্রমে তাঁহার মাথা ঘুরিতে লাগিল, শরীরটা বিম বিম করিতে লাগিল। মুখে কাণে জল দিয়া, এক গেলাস জল পান করিয়া, গাড়ী ডাকাইয়া বাড়ী ফিরিয়া আসিয়া নিতান্ত নিষ্জীবের মত বিছানায় পড়িয়া রহিলেন।

হেমন্তের স্ত্রী আসিয়া কাছে বসিয়া তাঁহাকে পাখা করিতে লাগিল, মাথায় হাত বুলাইতে লাগিল, এইরূপ ঘণ্টাখানেক শুশ্রূষার পর সে কতকটা চাঙ্গা হইয়া উঠিলেন।

কয়েকদিন পরে পুনরায় কাছারি গিয়া পুলিশ গেজেটের ফাইল, কলিকাতা গেজেটের ফাইল, অল্লসন্ধান করিলেন, কিন্তু কোনও সন্ধান মিলিল না। টাকা হারাণোর কোনরূপ বিজ্ঞাপন কেহ দেয় নাই। মাসখানেক পরে হেমন্ত কলিকাতা চলিয়া গেলেন। ব্যাঙ্কে ব্যাঙ্কে ঘুরিলেন, কারেন্সি আপিস, রয়্যাল এক্সচেঞ্জের নোটস বোর্ডগুলি খুঁজিলেন, কিন্তু কোথাও কোনরূপ সূত্র পাইলেন না।

অদ্যশেষে নিজের কষ্টার্জিত অর্থ ব্যয় করিয়া একখানি প্রধান ইংরাজি সংবাদ পত্রে এই মর্মে সে বিজ্ঞাপন দিলেন—“রেলগাড়ীতে ভ্রমণ কালে আমি একটি পুলিশ্‌দা কুড়াইয়া পাইয়াছি। হারাইবার তারিখ, স্থান, পুলিশ্‌দায় কি ছিল ইত্যাদি বিষয় বর্ণনা সহ আবেদন করুন।”—ইত্যাদি।

উপর্যুপরি ছয়দিন ধরিয়া এই বিজ্ঞাপন প্রকাশিত হইল, কিন্তু একখানি পত্রও হেমন্তের নিকট আসিল না।

তখন তিনি এ বিষয়ে একান্ত হতাশ হইয়া একদিন তাঁহার জননীর নিকট আশ্রয়পাশ্চ সমস্ত কথা জানাইয়া, টাকাটা

এখন কি করা উচিত সে বিষয়ে তাঁহার পরামর্শ জিজ্ঞাসা করিলেন।

মা সমস্ত শুনিয়া অনেকক্ষণ স্তব্ধ হইয়া বসিয়া রহিলেন। অবশেষে বলিলেন, “অতগুলি টাকার লোভ, তুমি যে বাবা সংবরণ করতে পেরেছ, তাতে আমি বড় সুখী হয়েছি। বান্ধগের ছেলের উপযুক্ত কাযই তুমি করেছ। এত করেও যখন টাকার মালিকের সন্ধান তুমি পেলেনা, তখন একটা কায কর। টাকাগুলি কলকাতায় কোনও ভাল ব্যাঙ্কে গচ্ছিত রেখে এস। ব্যাঙ্ক থেকে ঐ টাকার সুদ যা পাওয়া যাবে, তা তুমি স্বচ্ছন্দে নিজে ভোগ করতে পার, তাতে কোনও দোষ নেই, আমি তোমায় অনুমতি দিচ্ছি। যদি ভবিষ্যতে কোনও দিন টাকার যথার্থ মালিক এসে উপস্থিত হয়, ঐ সমস্ত টাকাটা তাকে তুমি ফিরিয়ে দিও।”

হেমন্ত জননীর আদেশ অনুসারেই কার্য করিলেন। কয়েকদিন পরে কলিকাতায় গিয়া বেঙ্গল ব্যাঙ্কে টাকাটা গচ্ছিত রাখিয়া আসিলেন।

ছয় মাস অন্তর ২৫০০ টাকা সুদ আসিতে লাগিল। সেই টাকায় এবং নিজের উপার্জনে হেমন্ত স্বচ্ছন্দে সংসার যাত্রা নির্বাহ করিতে লাগিলেন।

বৎসরের পর বৎসর কাটিতে লাগিল; ক্রমে ওকালতীতে হেমন্তের পশার জমিয়া গেল; আরও কয়েকটি নাতি নাতিনীর মুখ দেখিয়া তাঁহার জননী স্বর্গারোহণ করিলেন; বড় মেয়েগুলির বিবাহ হইল; বড় ছেলেরা পাশ করিয়া কলেজে প্রবেশ করিল; হেমন্তের

দেহখানি স্থল হইল, মস্তকের অগ্রভাগে টাক পড়িল ; পৈতৃক বাড়ীখানি ভাঙ্গিয়া তিনি নূতন ইমারৎ প্রস্তুত করিলেন । এইরূপে সুদীর্ঘ ২৫ বৎসর কাটিয়া গেল, কিন্তু ব্যাঙ্কে জমা সেই লক্ষ টাকার দাবীদার কেহ উপস্থিত হইল না ; কিংবা তাহাকে আবিষ্কার করিবার কোন সূত্রও হেমন্ত পাইলেন না ।

তৃতীয় পরিচ্ছেদ ।

আজ রবিবার । বেলা ৭টার সময়, অন্তঃপুরে বসিয়া হেমন্ত বাবু চা-পান করিতেছিলেন, ভূত্য আসিয়া সংবাদ দিল, আপিসঘরে একটি বাবু দেখা করিবার জন্ত অনেকক্ষণ বসিয়া আছেন । হেমন্ত জিজ্ঞাসা করিলেন, “মকেল ?” ভূত্য বলিল, “বগলে ত কাগজ পত্র কিছু দেখলাম না ।”—“আচ্ছা, বসতে বল”—বলিয়া হেমন্ত বাবু চা-পানে রত হইলেন ।

চা-পানান্তে কিয়ৎকাল তামাকু-সেবন করিয়া, হেলিতে ছলিতে মস্তুরপদে তিনি আপিসঘরে আসিয়া প্রবেশ করিলেন । এক জন খর্ব্বকায় প্রৌঢ়বয়স্ক ব্যক্তি বেঞ্চির উপর বসিয়া ছিলেন, তিনি উঠিয়া দাঁড়াইয়া যুগ্মকরে ললাট স্পর্শ করিয়া বলিলেন, “প্রাতঃ-প্রণাম ।” হেমন্ত বাবু আশীর্বাদ-সূচক হস্তসংস্পর্শ করিয়া বলিলেন, “দেওয়ানজী, কলকাতা থেকে কবে এলেন ? বাবু ভাল আছেন ত ? বসুন বসুন ।”

উভয়ে উপবেশন করিলে আগন্তুক বাবুটি বলিলেন, “আজ্ঞে, আজ ভোরের ট্রেনেই এসে পৌছেছি। আবার আজই ফিরে যেতে হবে। বাবুজী একটা বিশেষ কাযে আপনার কাছে আমায় পাঠিয়েছেন।”

হেমন্ত বাবু হাসিয়া বলিলেন, “স্বয়ং দেওয়ানজীকে পাঠিয়েছেন, কাযটা তা হলে গুরুতর বলুন!”

লোকটির নাম হরিহর দত্ত,—ইহার মনিব শ্রীযুক্ত বাবু ইন্দ্রভূষণ চট্টোপাধ্যায়, এই জেলার নরেন্দ্রপুর গ্রামের জমিদার। আসলে ইহার জমিদার নহেন, বর্দ্ধমান রাজ-এষ্টেটের পত্তনীদার—কিন্তু লোকে জমিদারই বলিয়া থাকে। আজ প্রায় বিশ বৎসর হইতে ইন্দ্রবাবু কলিকাতায় গৃহনির্মাণ করিয়া সেইখানেই বসবাস করিতেছেন। ম্যালেরিয়ার ভয়ে জমিদারীতে আসা প্রায়ই ঘটে না।

হেমন্ত বাবু ইহার এষ্টেটের বাঁধা উকীল। শুধু উকীল নহেন,—বন্ধু। বাল্যকালে উভয়ে যখন একত্রে স্কুলে পড়িতেন, সেই সময় হইতেই দুই জনে অকৃত্রিম প্রণয়। যৌবনেও সেই বান্ধবতা অব্যাহত ছিল। ওকালতীর প্রথম অবস্থায়, সেই দুঃখের দিনে, হেমন্ত কতবার ইন্দ্রবাবুর নিকট হইতে টাকা কৰ্জ্জ লইয়াছেন। তাহার পর ইন্দ্রবাবু কলিকাতাবাসী হইলেন। তখন হইতে দেখা-সাক্ষাৎ কমিল। হেমন্ত বাবু এখনও কলিকাতা গেলে, মামলা-মোকদ্দমা-সংক্রান্ত কোনও পরামর্শনা থাকিলেও, ইন্দ্রবাবুর বাটীতে গিয়া মাঝে মাঝে দুই এক ঘণ্টা যাপন করিয়া থাকেন।

দেওয়ানজী বলিলে, “আপনি ত জানেনই, দেনাপত্রে আমরা

এদানী বড়ই জড়ীভূত হয়ে পড়েছি। বাবুজী এতদিন খরচপত্র খুব দরাজ হাতেই করে এসেছেন। এষ্টেটের যা আয়, তার চেয়ে অনেক বেশী খরচ করতেন। টাকাকে টাকা জ্ঞান করতেন না। আমি মাঝে মাঝে বুঝিয়েছি, কিন্তু চাকর ননিব সম্বন্ধ, বেশী কিছু বলতেও পারতাম না। ফলে—যা হবার তাই হয়েছে। মেরে কেটে বড় জোর লাখ দেড়েক টাকা ত আয়; তাতে আর কত সয় বলুন! দেনার জ্বালায়, মাথার ঘায়ে কুকুর পাগল হবার যোগাড়। কিন্তু এইটুকু স্মৃতির বিষয় যে, এত দিনে বাবুর স্ববুদ্ধি হয়েছে। খরচপত্র একদম কমিয়ে দিয়েছেন। বাড়ীতে ‘সাহেব’ ভোজন বন্ধ হয়েছে; তিনখানা মোটর গাড়ী ছিল, তার দু’খানা বেচে ফেলেছেন; বাড়ীতে রাণীমা’র, কুমারদের আটপৌরে ব্যবহারের জন্তে এখন মিলের কাপড় কেনা হচ্ছে,—অধিক আর কি বলবো,—নিজ্ঞে এখন O. H. M. S. খাচ্ছেন!”

শুনিয়া, হেমন্ত বাবুর মুখে একটু হাসির রেখা দেখা দিল। তিনি বলিলেন, “এ সব ত গেল ভূমিকা। আসল কথাটা কি?”

দত্তমহাশয় বলিলেন, “বলছি। আসল কথার জন্তেই ত এসেছি। পাওনাদারেরা ঘোট বেঁধে এখন নালিশ করা শুরু করেছে। তিনটে ডিগ্রী হয়ে গেছে—এখনও টাকা দাখিল করতে পারা যায় নি। আরও গোটা চার পাঁচ মামলা ঝুলছে। এরা সব দোকানদার—বেশীর ভাগই ‘সাহেব’ দোকানদার। কিছু হ্যাণ্ডোনেটও আছে—কেউ কেউ উকীলের চিঠিও দিয়েছে। কিছুদিন হ’ল, এক জন ‘ত বাড়ী বয়ে এসে, চাকরবাকর কর্মচারীদের সাম্নেই বাবুজীকে

অপমান করে গেছে। সেই দিন বাবুজী প্রতিজ্ঞা করেছেন, ‘এক শালার এক পয়সাও আর বাকী রাখবো না—সমস্ত মিটিয়ে দেব—তাতে যদি আমার সমস্ত এষ্টেট বিক্রী করতে হয়, সো ভি আচ্ছা’।”

হেমন্ত বাবু জিজ্ঞাসা করিলেন, “দেনার পরিমাণ সবসুদ্ধ কত হবে?”

“আমরা হিসেবে করে দেখেছি, এক লক্ষ বিশ হাজার টাকা হলেই সমস্ত দেনা মিটে যায়—কান্নুর এক পয়সাও আর বাকী থাকে না। সেই টাকাটার এখন প্রয়োজন। টাকাটা তোলবার জন্তে, বাবুজী স্থির করেছেন, তাঁর জমিদারীর দুই একটা মহাল বিক্রী করে ফেলবেন।”

হেমন্ত বাবু বিস্মিত হইয়া বলিলেন, “একেবারে বিক্রী করে ফেলবেন? তার চেয়ে বন্ধক রেখে—”

“আমরাও সেই পরামর্শই বাবুজীকে দিয়েছিলাম। আগে আগে কোনও পাওনাদার এ রকম নালিশ টালিশ করে ব্যতিব্যস্ত করলে, আমরা অন্য কোথাও থেকে টাকাটা ধার করে এনে সেটা মেটাতাম। কিন্তু বাবুজী সে দিন ঐ রকম অপমানিত হওয়ার পর, পৈতে ছুঁয়ে শপথ করেছেন, ধার আর তিনি করবেন না—তাতে যদি ছেলেপিলে নিয়ে উপবাস করতে হয়, সো ভি আচ্ছা। সুতরাং, কিছু সম্পত্তি বিক্রী করা ছাড়া আর উপায় নেই।”

হেমন্ত বাবু কিয়ৎক্ষণ নীরবে বসিয়া ধূমপান করিলেন। শেষে বলিলেন, “খন্দের কেউ ঠিক হয়েছে?”

“আজ্ঞে না। কল্‌কাতার ধনীরা, পাড়াগাঁয়ের জমিদারী বড় কিন্তে চায় না। চাইলেও, দর অসম্ভব কম বলে। বাবুজী এই কাঁচটির জন্তে আপনার উপরেই ভার দিতে চান। এ জেলায় আপনার ত অনেক বড় বড় মক্কেল আছে—কোথাও যদি—”

হেমন্ত বাবু ধীরে ধীরে বলিলেন, “খদ্দের—অবশ্য—আমি ঠিক করে দিতে পারি। কিন্তু, এটা যে বড়ই ছঃখের বিষয় হ’ল দেওয়ানজী!”

দেওয়ানজী একটি দীর্ঘ নিশ্বাস ফেলিয়া বলিলেন, “আজ্ঞে সে ত বটেই! কিন্তু উপায় কি? বছরে সাত আট হাজার টাকা—হয় ত আরও বেশী—আয় কমে যাবে। কিন্তু আবার এও ভাবি, শরীরের যে অঙ্গে দুষ্ট ক্ষত হয়েছে, সে অঙ্গটা কেটে ফেলে, বাকী দেহটা যদি সুস্থ নিরাময় হয়, প্রাণটা যদি বাঁচে, —তবে সেই কি একটা কম লাভ? দুই একটা মহাল গিয়ে বাকী সম্পত্তিটি যদি বজায় থাকবার উপায় হয়—এই ঘটনা থেকে বাবুজী যদি স্থায়ীভাবে নিজেকে সংশোধন করতে পারেন, —তা’লে ছঃখ করবার কিছু নেই।”

হেমন্ত বাবু জিজ্ঞাসা করিলেন, “কোন্‌ কোন্‌ মহাল বিক্রী হবে, কিছু স্থির হয়েছে কি?”

“না, স্থির এখনও কিছু হয় নি। যে কিন্বে, তার সুবিধার উপর কতকটা নির্ভর করছে ত! এই একটা লিপি আমি এনেছি।”—বলিয়া দেওয়ানজী তাঁহার পকেট হইতে একখানি কাগজ বাহির করিয়া উকীল বাবুর হাতে দিলেন। অতঃপর

দুই জনে মহালগুলির সম্ভাবিত মূল্যাদি সম্বন্ধে আলোচনা করিতে লাগিলেন।

বেলা দশটা বাজিলে দেওয়ানজী উঠিলেন। হেমন্তবাবু তাঁহাকে সান্নাভোজনের জন্ত নিমন্ত্রণ করিলেন। আহা়াস্তে হেমন্ত বাবুর গাড়ী তাঁহাকে ষ্টেশনে পৌছাইয়া দিবে; তিনি কলিকাতায় ফিরিয়া যাইবেন।

চতুর্থ পরিচ্ছেদ।

সেদিন মধ্যাহ্ন-ভোজনের পর, আপিস-কক্ষে বসিয়া তামাকু সেবন করিতে করিতে জন দুই মক্কেল বিদায় করিয়া, রবিবাসরিক দিবানিদ্রার জন্ত হেমন্ত বাবু শয়নকক্ষে প্রবেশ করিয়া দেখিলেন, তাঁহার পত্নী তাম্বুল চর্কণ করিতে করিতে টেবলের উপরকার বহি কাগজগুলি সাজাইয়া রাখিতেছেন। কমলিনী এখন আর সেই পঁচিশ বৎসর পূর্বেকার ক্ষীণকায় যুবতী নাই। অবয়বে প্রোঢ়া জননীর লক্ষণগুলি প্রকাশ পাইয়াছে। দেহখানি, বড় উকীলের গৃহিণীর যেরূপ স্থূল হওয়া উচিত, সেইরূপই ইহা আছে। হেমন্ত বাবু পালকে বসিয়া, জিজ্ঞাসা করিলেন, “তোমার খাওয়া হল?”

“হ্যাঁ, এই কতক্ষণ খেয়ে উঠলাম”—বলিয়া গৃহিণী স্বামীর নিকটে আসিয়া দাঁড়াইলেন।

কর্তা বলিলেন, “বস তবে। যতক্ষণ ঘুম না আসে, একটু কথাবার্তা কওয়া যাক্।”

আদালত খোলা থাকিলে, পশারওয়ালা উকলীগণের পত্নীরা, ছুটির দিনের মধ্যাহ্ন ভিন্ন স্বামীর সহিত বিজ্ঞানভাষ্যের আর বড় স্বেচ্ছা পান না। প্রাতে কাক ডাকিবার সঙ্গে সঙ্গেই আপিসগৃহে মক্কেলের আবির্ভাব; বেলা দশটা বাজিলে অন্তরে আসিয়া তাড়া-তাড়ি স্নানাহার সারিয়া বাবুর আদালত-যাত্রা; আদালত হইতে ফিরিয়া সন্ধ্যাকালে কিঞ্চিৎ জলযোগের পর আবার মক্কেলের উপদ্রব, তাহাদের ‘বয়ান’ শুনিতে শুনিতে ও কাগজপত্র দেখিতে দেখিতে বাবুর রাত্রি দশটা বাজিয়া যায়—এগারোটাত্ত বাজে; তাহার পর অন্তঃপুরে আসিয়া ঠাণ্ডা লুচি ভোজনের পর শ্রান্তদেহে ক্রান্তমনে শয্যালিঙ্গন—দাম্পত্য আলাপের একান্ত সম্মান্যতাব।

পুত্র, কন্যা, জামাতা প্রভৃতির প্রসঙ্গ কিঞ্চিৎ আলোচনা করিবার পর গৃহিণী বলিলেন, “আজ সকালে নরেন্দ্রপুরের দেওয়ান এসেছিল, ওঁদের জমিদারী নাকি কিছু বিক্রী হবে?”

“হ্যাঁ। তুমি কোথায় শুনলে?”

গৃহিণী একটু হাসিয়া, মাকড়ি ছলাইয়া বলিলেন, “আমার কি চর নেই? ঘরে বসে বসেই আমি অনেক খবর রাখি গো! কত টাকায় বিক্রী হবে?”

“লাখ টাকার উপর। এক লাখ বিশ হাজারের কম নয়। কেন, কিন্বে না কি? কেনো ত কঙলা মুসাবিদা বাবদ আমার ফীজের টাকা এই বেলা বায়না দাও।”—বলিয়া হেমন্ত হাসিলেন।

গৃহিণী এদিক্ ওদিক্ চাহিয়া, নির্জনে দেখিয়া, ‘এই নাও’ বলিয়া একটি পাগ স্বামীর মুখে গুঁজিয়া দিলেন।

দাম্পত্য-স্নীলা শেষ হইলে গৃহিণী বলিলেন, “দেখ, ঐ জমিদারীর আমাদের কিছু কিনে নিলে হয় না? আমার অনেক দিনের সাধ, কিছু জমিদারী সম্পত্তি আমাদের হয়। ছেলেরা বড় হয়ে উঠলো, ওরা বেঁচে থাক্, সকলেই যে বেশী লেখাপড়া শিখে টাকা রোজগার করতে পারবে, এমন ভরসা কি? কিছু ভূসম্পত্তি থাকলে খাওয়া-পরার ভাবনাটা থাক্বে না।”

হেমন্ত গড়গড়ার নল মুখ হইতে খুলিয়া বলিলেন, “সে ত সব বুঝি। কিন্তু অত টাকা কোথা পাব? এতদিন যা রোজগার করলাম, মেয়েদের বিয়ে দিতে আর এই বাড়ীখানি কর্তেই ত গেল!—খানকতক কাগজ যা আছে, তাতে কি আর জমিদারী খরিদ হয়?”—বলিয়া হেমন্ত বাবু গড়গড়া টানিতে লাগিলেন।

গৃহিণী বলিলেন, “কেন, ব্যাঙ্কে আমাদের যে লাখ টাকা জমা রয়েছে, সেই টাকা, আর ঘরে যে কাগজ আছে, তাতে ত হয়ে যায়।”

হেমন্ত জ্বর মুখ পানে চাহিলেন।

কমলিনী একটু অপ্রতিভ হইয়া বলিলেন, “দেখ, ও টাকা ভগবান্ তোমাকে দিয়েছেন, ও তোমারই টাকা। নইলে আজ পচিশ বছর কেউ কি তার খোঁজ করত না? ও টাকা স্বচ্ছন্দে তুমি নিজের ব’লে মনে করতে পার, তাতে কিছু অশ্রায় হবে না।”

হেমন্ত বলিলেন, “কিন্তু—কিন্তু—মা যে ব’লে গেছেন, ও টাকা রেখে দিতে,—যার টাকা, সে যদি কোনও কালে উপস্থিত হয় ততক্ষণ দিতে।”

গৃহিণী বলিলেন, “মা বলেছিলেন, তাঁর আজ্ঞা পঁচিশ বছর তুমি ত পালন করলে! যথের ধন ত নয় যে, চিরজীবন ঐ টাকা তোমায় আগলে বসে থাকতে হবে?”

‘হেমন্ত বাবু নীরবে গড়্গড়া টানিতে লাগিলেন। কিয়ৎক্ষণ পরে বলিলেন, “কিন্তু ধর, কেউ যদি এসে টাকাটা দাবী করে?”

গৃহিণী বলিলেন, “শুধু দাবী করলেই ত হবে না। ভাল রকম প্রমাণ ত চাই। আমি মূর্থ মেয়েমানুষ, আইনকানূনের কিছুই বুঝিনে, কিন্তু তোমাদের মুখেই ত শুনি যে, দিন যত যায়, কতন বিষয়ের প্রমাণ পাওয়া ততই কঠিন হয়ে দাঁড়ায়। এক অব্যবচ্ছিন্ন নয়, পঁচিশ পঁচিশ বছর কেটে গেছে!”

“তা ঠিক।”—বলিয়া হেমন্ত গড়্গড়ার নল ফেলিয়া চক্ষু মুদ্রিত করিলেন। গৃহিণী শয্যাপ্রান্তে বসিয়া, তাঁহার পায়ে হাত বুলাইয়া দিতে লাগিলেন। প্রায় দশ মিনিট পরে, হেমন্ত মুদিতনয়নে বলিলেন, “আশ্চর্য্য! এক লক্ষ টাকা যার হারিয়ে গেল, পঁচিশ বৎসরকাল সে ‘টু’ শব্দটি পর্য্যন্ত করলে না!—এ রকম আশ্চর্য্য ঘটনা আমি ত কখনও শুনিও নি।”

গৃহিণী বলিলেন, “ও কি? তুমি এখনও যুমোও নি বুঝি? আমি ভেবেছিলাম, ঘুমিয়ে পড়েছ।”

হেমন্ত উঠিয়া বসিয়া বলিলেন, “ঘুমের পথ কি আর তুমি রেখেছ, গিন্নি?”

“কেন, আমি কি করলাম?”

“মাথায় প্রলোভনের আগুন জ্বলে দিয়েছ যে!”

গৃহিণী একটু সঙ্কুচিত হইয়া বলিলেন, “অন্ডায় ত আমি কিছু বলিনি। আমার কি দোষ?”

হেমন্ত হাসিয়া বলিলেন, “তোমার দোষ কিছু না। বাইবেলের গল্প শোন নি? সর্পরূপী শয়তান ইডেন্ বাগানে এসে, বহু কষ্টে মানব-মাতা ঈভকে নিষিদ্ধ ফলটি খাইয়েছিল। তার পর ঈভ কিন্তু অতি সহজেই, আদমকে সেই ফল খেতে রাজী করেছিলেন। সেই ঈভের বংশেই তোমার জন্ম ত!”

গৃহিণী বলিলেন, “পোড়া কপাল আর কি! আমি ব্রাহ্মণের মেয়ে, ঈভের বংশে আমার জন্ম হতে বাবে কেন? তুমি শোও, ঘুমোও।”

হেমন্ত বলিলেন, “সে হবে এখন; লোহার সিঁদুক খুলে ব্যাক্সের বইখানা বের করে আন ত।”

গৃহিণী বই আনিয়া দিলেন। হেমন্ত বাবু চশমা চোখে দিয়া দেখিলেন, কয়েকদিন হইল, সেই লক্ষ টাকার শেষ ডিপজিটের মেয়াদ উত্তীর্ণ হইয়াছে; পুনরায় ডিপজিটের পত্র লেখা হয় নাই—অর্থাৎ টাকাটা যেদিন খুসী তুলিয়া লওয়া যায়।

ব্যাক্সের বহি সিঁদুকে ফেরৎ পাঠাইয়া হেমন্ত বাবু আবার শয়ন করিলেন। কিন্তু ঘুম আসিল না, বিছানায় পড়িয়া এপাশ ওপাশ করিতে লাগিলেন। তাঁহার কেবলই মনে হইতে লাগিল, “কি করি? দারিদ্র্যের অবস্থায় এই প্রলোভন থেকে আত্মরক্ষা করিতে

পেরেছিলাম, এখন স্বচ্ছলতার দিনে সেই প্রলোভনের হাতে আত্ম-সমর্পণ করব কি?”

এইরূপ নানা চিন্তায় বেলা তিনটা অবধি কাটিল। হেমন্ত বাবু তখন উঠিয়া, আপিস-কক্ষে গিয়া দেওয়ানজী-প্রদত্ত সেই বিক্রয় গ্রামগুলির তালিকাখানি দেরাজ হইতে বাহির করিলেন। প্রত্যেক গ্রামের হস্তবুদ জমা, আজামী খরচা, বর্দ্ধমানরাজকে দেয় বাৎসরিক খাজনা, মুনাফা প্রভৃতি তাহাতে লেখা আছে। বর্দ্ধমান জেলার সার্ভে ম্যাপ দেওয়ালে টাঙ্গানো ছিল, তিনি তাহাতে বিভিন্ন গ্রাম-গুলির অবস্থান পর্য্যবেক্ষণ করিতে লাগিলেন।

সন্ধ্যাকালে দেওয়ানজী পুনরাগত হইলে, হেমন্ত বাবু তাঁহাকে বলিলেন, “দেখুন, খন্দের আর কোথায় খুঁজে বেড়াব? আমি নিজেই কিনে নেবো মনে করছি। (তালিকা বাহির করিয়া) এই বাঁশডাঙ্গা আর খামবেড়িয়া গ্রাম দুখানি লাগাও আছে—এই দুখানি, যদি এক লাখ বিশ হাজারে আপনারা দেন ত আমি কিনে নিতে রাজী আছি।”

এত শীঘ্র খরিদার স্থির হইবে, দেওয়ানজী তাহা স্বপ্নেও ভাবেন নাই। একটু সঙ্কোচের সহিত বলিলেন, “সব টাকাকাটা—কিস্তি নগদ চাই। কেন না—”

হেমন্ত বাবু বলিলেন, “সে জন্তে চিন্তা নেই। সব টাকাকাটা এক সঙ্গেই দেবো।”

দেওয়ানজী বিস্মিত-নয়নে হেমন্ত বাবুর পানে চাহিয়া রহিলেন। প্রথম প্রথম সেই দুই টাকা ফীজের অবস্থা হইতেই উকীল বাবুকে

তিনি দেখিয়া আসিতেছেন ; বৎসরের পর বৎসর অল্পে অল্পে কেমন করিয়া পশার বাড়িয়া বর্তমান অবস্থায় উপনীত হইয়াছেন, তাহাও তিনি জানেন ; কিন্তু এক সঙ্গে এক লক্ষ বিশ হাজার টাকা বাহির করিয়া দিবার ক্ষমতা যে ইহার হইয়াছে, এটা দেওয়ানজীর জানা ছিল না ।

পক্ষকাল পরে গৃহিণীর আশা পূর্ণ হইল । হেমন্ত বাবু জমিদার হইলেন—বাঁশডাঙ্গা ও খাসবেড়িয়া গ্রামদ্বয়ের মালিক হইলেন । এই উভয় গ্রামে অনেক ঘর গোয়ালার বাস । অল্প মূল্যে খাঁটি গব্যস্বত, ক্ষীর, ছানা, দধি সেখান হইতে আসিতে লাগিল—গৃহিণীর স্থূলদেহ-স্থূলতর হইয়া উঠিল ।

আরও পাচ বৎসর কাটিয়াছে । এক দিন প্রাতে হেমন্ত বাবু হঠাৎ টেলিগ্রাম পাইলেন, কলিকাতায় তাঁহার বন্ধু ও মকেল ইন্দ্রভূষণ বাবু মৃত্যুশয্যায় শায়িত ; হেমন্ত বাবুর সহিত তিনি অস্তিম-সাক্ষাৎ কামনা করেন ।

হাতের মোকদ্দমাগুলির কাগজপত্র জুনিয়র উকীল বাবুকে বুঝাইয়া দিয়া, আহা-রাস্তে সেই দিনই হেমন্ত বাবু কলিকাতা যাত্রা করিলেন ।

পঞ্চম পরিচ্ছেদ ।

দীর্ঘকাল অত্যাচারের ফলে, ইন্দ্রভূষণবাবু কঠিন রোগগ্রস্ত হইয়া পড়িয়াছেন । সহরের ডে বড় “সাহেব” ডাক্তার, বাঙ্গালী

ডাক্তার, কবিরাজ আজ মাসাধিককাল চিকিৎসা করিলেন, কিন্তু কিছুতেই একটু সুস্থিরা হয় নাই, রোগ উত্তরোত্তর বাড়িয়াই চলিয়াছে। অবস্থা দেখিয়া, নিতান্ত আত্মীয় ভিন্ন, অন্য সকলেই তাঁহার বাঁচিবার আশা এক প্রকার ছাড়িয়াই দিয়াছিল :— গত কল্যা ডাক্তারেরাও জবাব দিয়াছেন। অনেক সময় ইন্দ্রবাবু সংজ্ঞাহীন অবস্থাতেই থাকেন, মাঝে মাঝে দুই এক ঘণ্টার জ্ঞান জ্ঞান হয় মাত্র। গত কল্যা অপরাহ্নকালে এইরূপ অবস্থায়, হেমন্তবাবুর সহিত সাক্ষাতের অভিলাষ তিনি দেওয়ানজীর নিকট ব্যক্ত করিয়াছিলেন, তদনুসারে বর্ধমানের তাঁহাকে তার করা হইয়াছিল।

বেলা পাঁচটার সময় হেমন্তবাবুর গাড়ী আসিয়া ইন্দ্রবাবুর ফটকের কাছে দাঁড়াইল। ভিতরে প্রবেশ করিয়া, নিম্নতলেই দেওয়ানজী ও অন্তঃ কক্ষচারীর সঙ্গে সাক্ষাৎ হইল। দেওয়ানজী সজলনয়নে তাঁহার প্রভুর অবস্থা সমস্তই হেমন্তবাবুকে জানাইলেন। হেমন্ত দুঃখ প্রকাশ করিতে লাগিলেন। জিজ্ঞাসা করিলেন, “আজ্ঞা, আমার সঙ্গে দেখা করবার জন্তে দাদা এত ব্যাকুল হয়েছেন কেন, তা কিছু আপনি শুনেছেন? কোনও বিশেষ কারণ আছে কি?”

দেওয়ানজী বলিলেন, “আপনি তাঁর বাল্যকালের বন্ধু, সেই জন্তেই বোধ হয়। তা ছাড়া কোনও কারণ যদি থাকে, সেটা আমি জানতে পারি নি।”

দেওয়ানজী হেমন্তবাবুর মুখাধি ধাবনের বন্দোবস্ত করিয়া

দিয়া তাঁহার আগমনসংবাদ দিবার জন্ত উপরে গেলেন। কিয়ৎক্ষণ পরে ফিরিয়া আসিয়া বলিলেন, “আপনার চা দেওয়া হয়েছে, উপরে চলুন।”

হেমন্ত জিজ্ঞাসা করিলেন, “দাদা কি জেগেছেন?”

“না”—বলিয়া দেওয়ানজী অগ্রবর্তী হইলেন।

একটি কক্ষে হেমন্তবাবুর জন্ত জলযোগ সাজানো ছিল। তিনি জলযোগে বসিলেন। যুবা সুরেন্দ্রভূষণ, ইন্দ্রবাবুর একমাত্র পুত্র, “কাকাবাবু, ভাল আছেন ত?” বলিয়া কাছে আসিয়া বসিল; চিকিৎসা ও চিকিৎসকগণ সম্বন্ধে কথা কহিতে লাগিল।

জলযোগ শেষে হেমন্ত বলিলেন, “যাও দেখি বাবা, আর একবার দেখে এস জেগেছেন কি না।”

কিয়ৎক্ষণ পরে সুরেন্দ্র ফিরিয়া আসিয়া বলিল, “না, বাবা এখনও জাগেন নি। মা একবার আপনার সঙ্গে দেখা করবেন। আপনি ভিতরে আসুন।”

ইন্দ্রভূষণ দুই তিন বছরের বড় বলিয়া হেমন্ত তাঁহাকে দাদা ও তাঁহার স্ত্রীকে বউঠাকরুণ বলিতেন। পূর্বকালে, যখন ইন্দ্রবাবু নূতন কলিকাতায় আসিয়াছিলেন, হেমন্ত কখনও কখনও আসিয়া দেবরের শ্রায় বধুঠাকুরাণীর উদ্দেশে হাত-পরিহাস, আমোদ-আক্কার করিতেন, তিনিও তাহার জবাব দিতেন,—কিন্তু অন্তরাল হইতে। সাক্ষাৎভাবে এ পর্য্যন্ত কখনও বাক্যালাপ হয় নাই। তাই হেমন্তবাবু অনুমান করিলেন, যে বিশেষ কারণ জন্ত ইন্দ্রভূষণ

অন্তিম-শয্যায় তাঁহাকে দেখিতে চাহিয়াছেন, সম্ভবতঃ সেই প্রসঙ্গেই বউঠাকুরাণ তাঁহাকে কিছু জিজ্ঞাসা করিবেন।

স্বরেন্দ্র তাঁহাকে লইয়া গিয়া একটি ঘরে বসাইয়া, মাকে আনিতে গেল। ক্ষণকাল পরে অর্দ্ধাবগুষ্ঠিতা এক জন প্রৌঢ়া কক্ষে প্রবেশ করিলেন। “বউঠাকুরাণ?” বলিয়া হেমন্ত তাঁকে প্রণাম করিয়া, তাঁহার বিষাদখিন্ন স্ফীত অবনত চক্ষু দুইটির পানে চাহিলেন।

গৃহিণী মাথার কাপড় একটু তুলিয়া, পুত্রকে বলিলেন, “যাও বাবা, তুমি ওঘরে গিয়ে ব’স।”

হেমন্ত সবিস্ময়ে তাঁহার মুখের পানে চাহিলেন। কি এমন কথা ইনি বলিবেন, যাহা উপযুক্ত পুত্রেরও অশ্রাব্য? ইহাই তাঁহার বিস্ময়ের কারণ।

স্বরেন্দ্র চলিয়া গেলে গৃহিণী অশ্রুভরা কণ্ঠে কহিলেন, “ব’স ঠাকুরপো, ব’স।”

“আপনি বসুন” বলিয়া হেমন্ত চেয়ারখানিতে বসিলেন।

গৃহিণী বসিলেন না; তিনি নীরবে দাঁড়াইয়া রহিলেন। হেমন্ত তাঁহার এই সঙ্কোচ দেখিয়া বলিলেন, “আমাকে কি বলবেন, বউঠাকুরাণ?”

গৃহিণী সঙ্কোচের সহিত বলিলেন, “ঠাকুরপো, কর্ত্তা তোমায় কেন ডেকে পাঠিয়েছেন, তা কিছু তুমি জান কি?”

“না, আমি তা কিছু জানিনে। আপনি জানেন?”

গৃহিণী বলিলেন, “না, আমি বিশেষ কিছু জানিনে। তবে

এইটুকুমাত্র তিনি আমায় বলেছেন, তোমার নাম করে' 'এক সময়ে আমি তার একটা ভয়ানক অনিষ্ট করেছি। সে আমাকে ক্ষমা না করলে, পরলোকে আমার সদগতি হবে না।' এইটুকুমাত্র তিনি আমায় বলেছেন, আর কিছুই বলেন নি।' আমি জিজ্ঞাসা করেছিলাম, কিন্তু তিনি উত্তর দেন নি, চুপ করে ছিলেন। হয় ত তাঁর মনে কষ্ট হচ্ছে, এই ভেবে আমি আর পীড়াপীড়ি করি নি। খুব সম্ভব, সেই বিষয়ে তোমার কাছে ক্ষমা চাইবার জন্তেই তিনি তোমায় ডেকে পাঠিয়েছেন। ঠাকুরপো, আমি ত আজ ত্রিশ বছর তোমাদের দেখছি, সব খবরই জানি; কিন্তু তিনি তোমার প্রতি কোনও দিন কোনও অশ্রায় যে করেছেন, তা তো আমি জানিনে! কি অশ্রায় তিনি করেছেন, যদি বলতে কোনও বাধা না থাকে, তবে তুমি আমায় তা বল, ঠাকুরপো!"

হেমন্ত বিস্মিত হইয়া বলিলেন, "তিনি আমার প্রতি অশ্রায় করেছেন? আমার অনিষ্ট করেছেন? কবে? কি অনিষ্ট করেছেন? কৈ, আমিও ত কিছু ভেবে পাচ্চিনে!"

গৃহিণী বলিলেন, "এ ত আশ্চর্য্য কথা। তিনি বলেন, তোমার তিনি ঘোর অনিষ্ট করেছেন, অথচ তুমি বলছ তুমি কিছুই জান না?"

"জরের ঘোরে তিনি ভুল বকেছেন বোধ হয়!" বলিয়া হেমন্ত বাবু মুখ অবনত করিয়া রহিলেন।

গৃহিণী কয়েক মুহূর্ত্ত নীরবে চিন্তা করিয়া, মুখখানি তুলিয়া,

অশ্রু-গদগদ স্বরে বলিলেন, “আজকে ছ’তিন বার, যখনই
 তাঁর জ্ঞান হয়েছিল, জিজ্ঞাসা করেছেন, ‘হেমন্ত এসেছে?’
 আমরা বলেছি, তাঁকে ‘তার’ করা হয়েছে, আজ কোনও সময়ে
 তিনি এসে পৌছবেনই। এখন অঘোরে ঘুমুচ্ছেন, আবার জ্ঞান
 হলেই তিনি তোমায় ডেকে পাঠাবেন। তোমায় তিনি কি বলবেন,
 তা জানিনে,—তোমার কি ক্ষতি করার কথা বলে’ তোমার কাছে
 মাপ চাইবেন, কিছুই আমি অনুমান করতে পারচিনে। তুমি
 নিজেই যখন এর বিন্দুবিসর্গ জান না, আমি কি ক’রে জানব?
 কিন্তু দোহাই তোমার ঠাকুরপো”—(গৃহিণী গলবস্ত্র হইয়া
 ঘোড় হাত করিলেন)—“তিনি তোমার প্রতি যে অগ্ন্যায়ু-কথার
 কথাই বলুন, যে ক্ষতি, যে অনিষ্ট করার কথাই বলুন, তুমি
 প্রসন্ন মনে তাঁকে ক্ষমা কোরো। নইলে, এই অন্তিম
 সময়ে—”

তাঁহার কণ্ঠস্বর রুদ্ধ হইয়া আসিল, তিনি আর কিছু বলিতে
 পারিলেন না।

হেমন্ত বাবু ব্যস্ত হইয়া বলিলেন, “আপনি হাতঘোড় করেন
 কেন, বঠাকুরুণ? করেন কি! আমায় অত ক’রে বলতে হবে
 না। খুব সম্ভব জরের ঘোরে একটা কোনও কাল্পনিক অনিষ্টের
 কথাই তাঁর মাথায় ঢুকেছে। যদি বাস্তবিকই কিছু হয়, আমি
 আপনার কাছে কথা দিচ্ছি, আমি এমন ভাবে উত্তর করব, যাতে
 তাঁর মনে কোনও ক্ষোভ, কোন অশান্তি আর না থাকে। আপনি
 ‘সে সম্বন্ধে নিশ্চিন্ত থাকুন বউঠাকুরুণ!’”

ষষ্ঠ পরিচ্ছেদ :

এক ঘণ্টা পরে ইন্দ্রভূষণ বাবুর পুনরায় জ্ঞানসঞ্চার হইল। গৃহিণী যেরূপ বলিয়াছিলেন, জাগিয়াই তিনি হেমন্ত বাবুর খোজ করিলেন। হেমন্ত বাবু অনতিবিলম্বে তাঁহার শয্যাপার্শ্বে নীত হইলেন।

ইন্দ্রভূষণ ক্ষীণস্বরে কহিলেন, “হেমন্ত, এসেছ ভাই? আমার মেয়াদ ত শেষ হয়ে এসেছে। তোমাকে আমার কিছু বলবার আছে, সেইটি না বললে আমার প্রাণ বেরুচ্ছে না। ওগো, তোমরা সদা এই কবাব ও ঘরে যাও।”

উপস্থিত সকলে ধীরে ধীরে তথা হইতে প্রস্থান করিলেন। যাইবার সময় গৃহিণী মিনতিপূর্ণ দৃষ্টিতে হেমন্ত বাবুর পানে চাহিয়া গেলেন।

নির্জর্জন হইলে, ইন্দ্রভূষণ বাবু বলিলেন, “বেশী কথা কবার সময় নেই, শক্তিও নেই। হেমন্ত, মনে আছে, তোমার ওকালতীর সেই প্রথম অবস্থা? বড় কষ্টে তোমার দিন যাচ্ছিল।”

হেমন্ত বলিলেন, “হ্যাঁ দাদা, মনে পড়ে বৈকি! তোমার কাছে সে সব দিনে অনেক সাহায্য আমি পেয়েছি; জীবনে তা কি ভুলবো?”

ইন্দ্রভূষণ ধীরে ধীরে বলিলেন, “যাক্। তখন তিন বছর না চার বছর তোমার প্র্যাক্টিস হয়েছে। জাম্বাঙ্গীতে যে লটারী খেলা হয়, আমি সেই লটারির দুখানি টিকিট কিনেছিলাম। এক খানি তোমার জন্তে, একখানি আমার নিজের জন্তে। তোমার

গ্লাস ঠিকানাটি না দিয়ে, আমার কেয়ারেই লিখে দিয়াছিলাম।
উঃ, গলা শুকিয়ে যাচ্ছে, একটু জল।”

হেমন্ত মঙ্গুমুগ্ধবৎ এই কাহিনী শুনিলেন। তাঁহার মনে হইতে
আরম্ভ হইয়াছিল, ইহা ত জরের প্রলাপের মত শুনাইতেছে না।
পাশের টেবিলে জলের গেলাস ছিল। দুই তিন চামচ জল রোগীকে
তিনি পান করাইয়া দিলেন।

জল পান করিয়া একটু সুস্থ হইয়া ইন্দ্রভূষণ বাবু ধীরে ধীরে
বলিতে লাগিলেন, “উভয়ের অদৃষ্ট-পরীক্ষার জন্তে, টিকিট দুখানি
কিনেছিলাম। কত দিন হ’ল, সে আজ বোধ হয় ত্রিশ বছরের
কথা, নয়?—আজ ত্রিশ বছর পরে তোমায় জানাচ্ছি, তোমার
টিকিটখানি এক লক্ষ টাকা প্রাইজ পেয়েছিল।”

হেমন্ত অশ্রুট স্বরে বলিয়া উঠিলেন,—“অ্যা!”

ইন্দ্র বাবু বলিয়া যাইতে লাগিলেন—“যখন চিঠি এল, তখন
আমি দেশের বাড়ীতে। তোমার নামে, আমার কেয়ারে রেজেষ্ট্রী
করা চিঠি, তার ভিতর তোমার নামে লক্ষ টাকার একখানি ক্রশ-
করা চেক। কলকাতায় যে জার্মানীর ব্যাঙ্ক আছে, সেই ব্যাঙ্কের
উপর চেক। আমার টিকিটে শূন্য উঠলো, তোমার টিকিট লক্ষ
টাকা প্রাইজ পেলে, দেখে আমার বকের ভিতরটায় যেন আগুন
জ্বলতে লাগলো। আমি যে এত ক্ষুদ্রমনা, তা আগে জান্তাম না।
বকের সেই আগুন বকে চেপে রেখে, ভাবলাম, তোমায় গিয়ে
খবরটা দিই, চেকখানা তোমায় দিয়ে আসি। উঃ—আর একটু
জল।”

হেমন্ত আবার তাঁহাকে জলপান করাইলেন। পানাস্তে ইন্দু বাবু বলিতে লাগিলেন, “তার পর, শয়তান আমার স্বন্ধে এসে ভর করলে। ভাবলাম, আমিই আত্মসাৎ করবো। আমিই ত টাকা দিয়ে টিকিট কিনেছিলাম, সুতরাং তোমার ও টাকায় কিসের অধিকার? এই কুযুক্তি শয়তানই আমার মাথায় এনে দিলে। কিছুতেই লোভ সংবরণ করতে পারলাম না। ক্রশ-করা চেক, কোনও ব্যাঙ্কের মারফৎ ভিন্ন ভাঙ্গানো হবে না। চেকের পিঠে তোমার নামটি আমি জাল করলাম। কলকাতায় গিয়ে, আমার ব্যাঙ্কে সেই চেক জমা দিয়ে, পরদিন লক্ষ টাকা বের ক’রে নিলাম। সেই সময় জয়রামপুরের বাবুদের একখানা খুব ভাল মহাল দেনার দায়ে বিক্রী হচ্ছিল, সে মহালটা কিনে নেবার জন্তেই টাকাটা ব্যাঙ্ক থেকে তুলে নিয়ে, বাড়ী আসছিলাম।

“আমি যে নিতান্ত ক্ষুদ্রমনা, তা নয়—আমি যে এত লোভী, এমন শঠ, প্রবঞ্চক,—পূর্বে আমি তা জানতাম না। যা হোক, টাকাটা নিয়ে বাড়ী আসছিলাম—কিন্তু মাথার উপরে ঈশ্বর আছেন যে! আর, অদৃষ্ট ব’লে একটা জিনিষ আছে,—সেটা ভুলেই বা চলবে কেন? ঐ লক্ষ টাকা যদি আমার অদৃষ্টে থাকতো, তা হ’লে আমার টিকিটেই ত উঠতে পারতো! তা তো ওঠেনি। লক্ষ টাকার নোটের সেই বাণ্ডিল নিয়ে ট্রেনে বদ্ধমান যাচ্ছিলাম; সঙ্গে ছইঞ্চি ছিল; গাড়ীতে বসে ঢালছিলাম আর খাচ্ছিলাম। এক সময় বাথরুমে যাই। নোটের বাণ্ডিলটি ব্যাঙ্কের উপর রেখে মুখ ধুচ্ছিলাম। এমন সময় গাড়ী জয়রামপুরে এসে দাঁড়ালো। সোড

ফ্রিয়ে গিয়েছিল, তাড়াতাড়ি নেমে, আইস ভেণ্ডারকে সোডা আনতে বলতে গিয়েছিলাম—হঠাৎ ট্রেন ছেড়ে গেল। লক্ষ টাকার নোটের বাণ্ডিল, গাড়ীতে গোসল-খানার সেই র্যাকেই পড়ে রইল। চলন্ত গাড়ীতে লাফিয়ে ওঠবার জন্তে আমি ছুটলাম। স্টেশনের লোকেরা হাঁ হাঁ করে আমার পিছু পিছু ছুটে আমায় ধরতে এল। টানাটানিতে আমি ধড়াস্ করে প্ল্যাটফর্মে পড়ে গেলাম। একখানা ইট না পাথর কি ছিল, মাথায় আঘাত পেয়ে অজ্ঞান হয়ে পড়লাম। পরমাণু ছিল, তাই গাড়ী আর প্ল্যাটফর্মের ফাঁকের মধ্যে পড়িনি। স্টেশনের লোক, অজ্ঞান অবস্থায় আমায় হাঁসপাতালে পাঠিয়েছিল। সেখানে আট দশ ঘণ্টা পরে আমার চৈতন্য হয়। পরদিন বাকী আসি।”

এই কাহিনী শুনিয়া হেমন্তের, বুদ্ধি-শুদ্ধি সমস্তই যেন গোলমাল হইয়া যাইতে লাগিল। মাথার দুই রগ আঙ্গুলে টিপিয়া তিনি নীরবে বসিয়া রহিলেন। তাঁহার মনে হইতে লাগিল,—“তাই কি? তাই কি?”

ইন্দ্র বাবু বলিলেন, “হাঁসপাতালে জ্ঞান হতেই টাকার খোঁজ নেওয়ার কথা আমার মনে হয়েছিল। কিন্তু ভারলাম, তাতে ফল কি হবে? কেউ না কেউ সেটা পেয়েছে। সে কখনই দেবে না, বা স্বীকার করবে না। যদি এই নিয়ে এখন একটা গোলমাল বাধাই, তা হলে আমার জাল করাটি ধরা পড়ে যাবে, সকল ব্যাপার খবরের কাগজে উঠবে—কেলেঙ্কারির একশেষ! হয় ত আমায় জেলেও যেতে হবে। তাই চুপ করে গেলাম।”

“এবার এই ব্যারামে পড়ে, প্রায়ই আমার মনে হয়েছে, তোমার আমি এই যে মহা ক্ষতিটি করেছি, এই যে প্রবঞ্চনাটি তোমায় করেছি, তার পাপ কি আমায় লাগবে না? তার প্রতিফল, পরলোকে গিয়ে কি আমায় নিতে হবে না? দিন যতই এগিয়ে আসছে, এই চিন্তা আমার মনে ততই প্রবল হয়েছে। তাই তোমায় ডেকে পাঠিয়েছি, ভাই! সে সময়, এই টাকা পেলে তোমার কষ্ট ঘুচে যেত। কিন্তু ঈশ্বরের ইচ্ছায়, এখন তোমার কোনও অভাব নেই। এক লক্ষ বিশ হাজার টাকা দিয়ে তুমি সম্পত্তি কিনেছ। ত্রিশ বছর আগে, তোমার এই যে ক্ষতিটি আমি করেছি, আজ তুমি তার জন্ত আমায় মাপ কর, ভাই! বল, আমায় ক্ষমা করলে!”

ইন্দ্র বাবু দুই চক্ষু হুইতে বর্ষ বর্ষ ধারে অশ্রু ঝরিতে লাগিল।

হেমন্ত বাবু তাঁহার হাত দুইখানি নিজ হস্তে লইয়া বলিলেন, “দাদা, শান্ত হও, শান্ত হও। অদৃষ্ট ছাড়া পথ নেই, তুমি যে বলেছ, সেই কথাই ঠিক। সেই টাকা আমারই অদৃষ্টে ছিল, আমিই তা পেয়েছি।”

ইন্দ্র বাবু প্রায় উঠিয়া বসিয়া বলিলেন, “তুমিই সে টাকা পেয়েছ? বল কি? কোথা পেলে? অসম্ভব।”

হেমন্ত তাঁহাকে শোয়াইয়া দিয়া বলিল, “দাদা, উত্তেজিত হোয়ো না। তোমার মনের সমস্ত ক্ষোভ, সব সন্তাপ দূর কর। তোমার দ্বারা আমার কোনও অনিষ্ট হয় নি। সেই লক্ষ টাকার বাণ্ডিল, সেই ট্রেণে আমিই কুড়িয়ে পেয়েছিলাম।”

ইন্দ্র বাবু ফ্যাল ফ্যাল করিয়া হেমন্তের মুখের পানে চাহিয়া

রহিলেন ; বলিলেন, “মৃত্যুকালে আমায় সাঙ্ঘনা দেবার জন্তে মিছে কথা বোলো না, ভাই। তুমি আমায় অকপটচিত্তে ক্ষমা করেছ, এইটুকু জানতে পারলেই আমার যথেষ্ট সাঙ্ঘনা।”

• হেমন্ত বলিল, “না, দাদা, তোমায় ভোলাবার জন্তে আমি মিছে কথা বলি নি। তোমার দুখানি গ্রাম আমি যে এক লক্ষ বিশ হাজার টাকা দিয়ে কিনলাম, সে টাকার মধ্যে লক্ষ টাকা সেই টাকা।”

কোথায়, কবে হেমন্ত বাবু বাঙাল পাইয়াছিলেন, বাঙাল কিরূপ ভাবে জড়ানো ছিল, কত কত টাকার নোট তাহাতে ছিল, সমস্তই ইন্দ্র বাবু খুঁটিয়া খুঁটিয়া হেমন্তকে জিজ্ঞাসা করিলেন। সমস্ত কথার উত্তর পাইয়া বলিয়া উঠিলেন, “জয় শ্বেপীন্দ্রজি ! তোমার অসীম দয়া। মহাপাপ থেকে তুমি আমায় রক্ষা করলে !” — বলিয়া তিনি চক্ষু মুদ্রিত করিলেন। দেখিতে দেখিতে মুখখানি প্রসন্নভাব ধারণ করিল, দুই চোখের কোণ হইতে আনন্দাশ্রু বরিতে লাগিল।

ইহার কিয়ৎপরে, ইন্দ্রবাবুর স্ত্রীর সহিত হেমন্ত নিৰ্জনে সাক্ষাৎ করিয়া, সমস্ত বিষয় তাঁহাকে জানাইয়া তাঁহার উৎকণ্ঠা দূর করিলেন। পরামর্শ হইল, ছেলেকে বা অন্ত কাহাকেও এই পুরাতন কলঙ্কাহিনী জানাইবার কোনও প্রয়োজন নাই।

পরদিন প্রাতের ট্রেণে হেমন্তবাবু বর্দ্ধমানে ফিরিয়া আসিলেন। দুইদিন পরে ইন্দ্র বাবুর মৃত্যুসংবাদ তাঁহার কাছে পৌছিল।

শ্রাদ্ধের দিন, নিমন্ত্রণ রক্ষা করিবার জন্ত হেমন্ত বাবু কলিকাতায় গেলেন। মুণ্ডিতমস্তক, সুরেন্দ্রভূষণ শ্রাদ্ধকাৰ্য্য সম্পন্ন

করিয়া, জলযোগান্তে আসিয়া হেমন্ত বাবুর সহিত সাক্ষাৎ করিয়া কঁাদিতে লাগিল। হেমন্ত বাবু সন্নেহে তাহার গায়ে হাত বুলাইয়া, তাহাকে নানা মিষ্ট বাক্য বলিয়া, অবশেষে পকেট হইতে একখানি বড় লেফাফা বাহির করিয়া তাহার হাতে দিয়া বলিলেন, “বাবা এইটি আমার লৌকিকতাস্বরূপ তুমি গ্রহণ কর।”

“কি এ?”—বলিয়া সুরেন্দ্র খামখানি খুলিয়া ফেলিল। দেখিল, ষ্ট্যাম্প ও রেজিষ্ট্রী আপিসের মোহরযুক্ত একখানি দলিল। জমীদারের ছেলে, অন্নদূর পড়িয়াই বুঝিতে পারিল, ইহা একখানি দানপত্র,—চারিবৎসর পূর্বে পিতার নিকট হইতে ক্রীত দুইখানি গ্রামের একখানি (বাঁশডাঙ্গা) পুত্রকে, পিতৃ-শ্রদ্ধে লৌকিকতাস্বরূপ হেমন্ত বাবু দান করিতেছেন।

সুরেন্দ্রনাথ সবিস্ময়ে হেমন্তবাবুর মুখের পানে চাহিয়া বলিল, “এ কি, কাকামহাশয়!—এ আপনি কি করেছেন? এর নাম কি লৌকিকতা দেওয়া? না না—এ আমি কোনমতেই নিতে পারিনে।”

হেমন্ত বাবু বলিলেন, “না, বাবা, তুমি মনে কোনও সন্দোহ করো না। যে টাকা দিয়ে তোমাদের ঐ গ্রাম দু’খানি আমি কিনেছিলাম, সে টাকার অধিকাংশই তোমার বাপের অনুগ্রহেই আমার পাওয়া—তোমার বাপের টাকাও বলা যেতে পারে এক হিসাবে। বাঁশডাঙ্গা আমি তোমায় দান করছি, ও ত তোমারই, তোমার বাবাই বরং খাসবেড়ে আমায় দান করে গেছেন।”

সুরেন্দ্র ফ্যাল ফ্যাল করিয়া হেমন্ত বাবুর মুখের পানে চাহিয়া

'রহিল ; শেষে বলিল, “আপনি কি বলছেন ?—এ যে প্রহেলিকার মত । আমি ত কিছুই বুঝতে পারছি নে কাকা মহাশয় ।”

হেমন্ত বলিলেন, “এর মধ্যে অনেক কথা আছে, বাবা, সে সব তোমার শুনে কাষ নেই । তোমার মা সমস্তই জানেন । তুমি বিনা দ্বিধায় বাঁশডাঙ্গা গ্রামখানি ফিরিয়ে নাও । তাতে কোনও দোষ, কোনও অত্যায হবে না ।”

“আচ্ছা, মাকে তা হ’লে জিজ্ঞাসা ক’রে আসি । তিনি যদি অনুমতি করেন ত নেবো ।” বলিয়া সুরেন্দ্র চলিয়া গেল ।

মাতা শুনিয়া অনুমতি দিলেন । সুরেন্দ্র আসিয়া হেমন্তবাবুকে তাহা জানাইয়া, তাঁহার পদধূলি গ্রহণ করিল ।

জ্যোতিষী মহাশয়



১

কলিকাতা দর্জিপাড়ার কোনও ক্ষুদ্র দ্বিতল বাটীর একটি কক্ষে, সন্ধ্যার প্রাক্কালে, মুণ্ডিত-গুচ্ছশ্রদ্ধ প্রৌঢ়বয়স্ক কৃষ্ণকায় শ্রীযুক্ত কমলাকান্ত জ্যোতির্বিজ্ঞানমহাশয় মহাশয় বসিয়া ধূমপান করিতেছিলেন। গৃহিণী ও কন্যা নিম্নতলে গৃহকার্যে ব্যস্ত, ছেলেরা ফুটবলের ম্যাচ দেখিতে গিয়াছে। জ্যোতিষী মহাশয় একাকী বসিয়া ধূমপান করিতেছেন, আর আকাশ-পাতাল চিন্তা করিতেছেন।

আজ প্রায় ২০ বৎসরকাল এই কলিকাতা শহরে তিনি জ্যোতিষ ‘প্র্যাকটিস্’ করিতেছেন, কিন্তু এমন দুর্বৎসর কখনও হয় নাই। খবরের কাগজে তাঁহার বিজ্ঞাপন ছাপা হইতেছে—সে সকল বিজ্ঞাপনের বিলের তাগাদায় তিনি অস্থির,—কিন্তু কি আশ্চর্য্য, একটি কোষ্ঠী প্রস্তুতের অর্ডারও আসিতেছে না। গরদ পরিয়া, কপালে রক্তচন্দনের ফোটা কাটিয়া, তিনি তাঁহার দ্বারলগ্ন সাইন-বোর্ডের ঘোষণা অনুসারে প্রতিদিন প্রাতে ৭টা হইতে বেলা ১০টা পর্য্যন্ত বৈঠকখানায় বসিয়া হত্যা দিতেছেন, কিন্তু একটি লোকও হাত গশাইতে আসিতেছে ন! বাড়ীর ভাড়া, ভৃত্যের বেতন,

‘বিজ্ঞাপনের বিলের অনেক টাকা বাকী পড়িয়া গিয়াছে; প্রতি দিনকার বাজার-খরচ চলাই কঠিন, এ কি উপায় করিলে কিছু টাকা আসে, এই চিন্তাতে তিনি মুহূমান ছিলেন, এমন সময় নিম্ন হইতে শব্দ উত্থিত হইল—“জ্যোতিষী মশায় বাড়ী আছেন?”

শ্রবণমাত্র, হুঁকাটি দেওয়ালের কোণে ঠেস দিয়া রাখিয়া, জ্যোতিষী মহাশয় উঠিয়া দাঁড়াইলেন; সন্তুর্পণে রাস্তার ধারের বারান্দায় গিয়া, চিক ফাঁক করিয়া লোকটাকে দেখিলেন। বুঝিলেন, বাড়ীওয়ালার লোক নহে, বিজ্ঞাপনের বিল আদায়কারী দ্বারবানও নহে—মক্কেল হইলেও হইতে পারে। তখন নির্ভয়ে হাঁকিলেন—
“কে ও?”

নিম্ন হইতে স্বর উত্থিত হইল, “জ্যোতিষী মশায় বাড়ী আছেন কি? তাঁর কাছে একটু দরকারে এসেছি।”

“আচ্ছা দাঁড়ান”—বলিয়া জ্যোতিষী মহাশয় চট করিয়া তাঁহার মিলের ধুতি ছাড়িয়া গরদ পরিলেন, চট জুতা ছাড়িয়া খড়ম পায়ে দিলেন। আশান্বিত হৃদয়ে খট খট করিতে করিতে সিঁড়ি নামিয়া গিয়া, সদর দরজা খুলিয়া তিনি প্রশ্নপূর্ণ দৃষ্টিতে আগন্তকের পানে চাহিলেন।

লোকটির বয়স আন্দাজ ৪৫ বৎসর; পরিধানে ধুতির উপর আধময়লা চাপকান, তাহার উপর পাকানো চাদর বিস্তৃত—আফিসের বেশ। তিনি বলিলেন, “একটু দরকারে এসেছিলাম।”

“আমুন”—বলিয়া জ্যোতিষী মহাশয় তাঁহাকে বৈঠকখানায় আনিলেন। অয়েলরুথ মোড়া একটু টেবিলের তিন দিকে তিন

খানি চেয়ার এবং এক দিকে একখানি বেঞ্চি। জ্যোতিষী মহাশয় একখানি চেয়ারে বসিয়া অপর একখানিতে আগন্তুককে বসাইলেন।

আগন্তুক, আসন গ্রহণ করিয়া, যেন বড় ক্লান্তস্বরে বলিলেন, “জ্যোতিষী মহাশয়, শারীরিক কুশল ত?”

জ্যোতিষী তীক্ষ্ণদৃষ্টিতে আগন্তুকের পানে চাহিলেন। যাহারা গণাইতে আসে, তাহারা কেহ ত কৈ এরূপভাবে কথাবার্তা আরম্ভ করে না। যাহা হউক, তিনি শিরশ্চালনা ও একটা অক্ষুট ধ্বনির বাক্সে নিজ কুশল জ্ঞাপন করিলেন।

লোকটি অর্ধমিনিটকাল নীরব থাকিয়া, দ্বিতীয় প্রশ্ন করিলেন, “তার পর—কায়-কর্ষ চলছে কেমন?”

এই প্রশ্নে জ্যোতিষী মহাশয়ের মনে একটু রাগ হইল। কেন রে বাপু? তোর সে খোঁজে দরকার কি? গণাইতে আসিয়া থাকিস, তাই বল, টাকা বাহির কর। কিন্তু এই বিরক্তিবাব মনেই গোপন করিয়া তিনি উত্তর করিলেন, “চলছে মন্দ নয়। আপনার নামটি কি?”

আগন্তুক বলিলেন, “আমার নাম?—নামটা, আচ্ছা—সেটা পরে জানানাব না হয়। এখন যে কাযের জন্ত এসেছি, সেইটে প্রথমে নিবেদন করি।” বলিয়া চুপ করিলেন।

নিজ নাম বলিতে লোকটির এই অনিচ্ছা দেখিয়া জ্যোতিষী যেন একটু সন্দেহযুক্ত হইলেন, মুখে বলিলেন, “সেই ভাল।”

বাবুটি তখন ধীরে ধীরে বলিতে লাগিলেন, “আপনি বল্লেন, আপনার কায-কর্ম মন্দ চলছে না। তা হ’লেই বোঝা যাচ্ছে, যতটা ভাল চলা উচিত, তা চলছে না। কেমন কি না?”

লোকটা যে গণাইতে আসে নাই, ইহা জ্যোতিষী মহাশয় এবার নিঃসংশয়ে বুঝিতে পারিলেন। বুঝিয়া, বড় রাগ হইল। তিনি আর ধৈর্য্যরক্ষা করিতে পারিলেন না। বলিয়া ফেলিলেন, “আঃ ও সব ভূমিকা যেতে দিন না, মশায়! কি জন্যে আপনি এসেছেন, সেইটে খোলসা ক’রে বলুন। সন্দেহ হয়ে এল, আমার পুজো-আহ্নিকের সময় ব’য়ে যাচ্ছে।”

বাবুটি এই মুহূর্ত্তে ভৎসনাটুকু মোটেই গায়ে মাখিলেন না। পূর্ব্ববৎ ধীর শাস্তস্বরে বলিতে লাগিলেন, “দেখুন, যে ব্যবসাই বলুন, আজকাল যে রকম দিন-সময় পড়েছে, বিনা বিজ্ঞাপনে—”

জ্যোতিষী মহাশয় বাধা দিয়া বলিলেন, “আপনি কি কোনও খবরের কাগজের বিজ্ঞাপন ক্যান্ডাসার? তা-হ’লে বুঝা আপনার সময় নষ্ট করবেন না। আমি ছ’খানা কাগজে বিজ্ঞাপন দিই থাকি। আর নূতন কোনও কাগজে—” বলিয়া তিনি দাঁড়াইয়া উঠিলেন।

লোকটি শাস্তভাবে বলিলেন, “আহা, চট্টছেন কেন? আমি বিজ্ঞাপন ক্যান্ডাসার নই। বসুন বসুন।”

জ্যোতিষী মহাশয় বসিয়া বলিলেন, “তবে আপনি কি? ডিটেক্টিভ?”

“আজ্ঞে না, তাও নই। আমার, চৌদ্দপুরুষে কখনও পুলিশের

ছায়া মাড়ায় নি। আমি বল্ছিলাম কি, আপনার নামে আমি খবরের কাগজে একটা বিজ্ঞাপন দিতে চাই। আপনার এক পয়সাও লাগবে না ; খরচ আমার।”

এতক্ষণে জ্যোতিষী মহাশয়ের সন্দেহ হইল, লোকটা বোধ হয় পাগল। যাহা হউক, বিনামূল্যে বিজ্ঞাপনের কথা শুনিয়া তাঁহার একটু কৌতূহলও হইল। আবার তিনি বসিয়া, আগন্তকের পানে চাহিয়া রহিলেন।

বাৰুটি বলিলেন, “আপনি বোধ হয় ভাবছেন, কোথাকার কে তার ঠিক নেই, নিজের খরচে বিজ্ঞাপন দিয়ে আমার উপকার করতে-আসে কেন ?” বিজ্ঞাপনটির দ্বারায় পরোক্ষভাবে আপনার কিছু উপকার হবে বটে, কিন্তু আসলে সেটি আমারই একটা অভিপ্রায়-সিদ্ধির জন্তে। অত কথায় কায কি, বিজ্ঞাপনটি পড়েই দেখুন না।”—বলিয়া ভদ্রলোক পকেট হইতে একখানা হস্তলিখিত কাগজ বাহির করিয়া, জ্যোতিষী মহাশয়ের সম্মুখে স্থাপন করিলেন।

জ্যোতিষী মহাশয় টেবিলের দেওয়াল টানিয়া তাঁহার চশমাটি বাহির করিয়া চোখে দিলেন। তাহার পর বিজ্ঞাপনটি পাঠ করিলেন—

হিন্দু জ্যোতিষ ! ফলিত জ্যোতিষ !

আমি বহুকালাবধি প্রাচ্য ও পাশ্চাত্য ফলিত জ্যোতিষ এবং সামুদ্রিক শাস্ত্রের সম্যক আলোচনায় ব্যাপ্ত থাকিয়া, উভয় প্রণালীর

সময়সাধনে যত্নবান্‌ আছি। আমার রিসার্চের (গবেষণার) সুবিধার জন্য জাতি ও বয়স নির্বিশেষে কয়েকজন পলিউমস্‌ চাইল্ড (ভূমিষ্ঠ হইবার পূর্বেই বাহাদের পিতৃ-বিয়োগ ঘটয়াছে) তাঁহাদের শারীর স্থান ও হস্তরেখা পরীক্ষার নিমিত্ত আবশ্যক। আজন্ম পিতৃহীন যে সকল যুবকের চক্ষে এই বিজ্ঞাপনটি পড়িবে, আমার সালুনিয় অনুরোধ, দেশীয় তত্ত্ববিজ্ঞার উন্নতিকল্পে তাঁহারা যেন অবিলম্বে পত্র দ্বারা নিজ নিজ জন্ম-তারিখ-সমন্বিত পারিবারিক ইতিহাসটুকু সজ্জাপে আমায় লিখিয়া পাঠান; আমি অবসরক্রমে একে একে তাঁহাদের আলায়ে উপস্থিত হইয়া স্বকৰ্ম সাধন করিব। ইতি—

শ্রীকমলাকান্ত জ্যোতির্বিজ্ঞানমহার্ণব।

৮নং বেণী দত্তের লেন, দর্জিপাড়া, কলিকাতা।

বিজ্ঞাপনটি পড়িয়া জ্যোতিষী মহাশয় সন্দিগ্ধভাবে আগন্তকের পানে চাহিয়া রহিলেন। শেষে বলিলেন, “ব্যাপারখানা কি বলুন দেখি? আপনার উদ্দেশ্যটা কি?”

বাবুটি বলিলেন, “উদ্দেশ্যটা বুঝতে পারলেন না? কোনও কারণে একটি লোকের আমি সন্ধান করছি; সে লোকটি আজন্ম পিতৃহীন। কিন্তু কোথায় যে সে আছে, তাও জানিনে, তার নাম কি, তাও জানিনে। তবে পারিবারিক ইতিহাসটুকু পেলেই আমি বুঝতে পারবো, ঠিক সেই লোক কি না।”

জ্যোতিষী বলিলেন, “কেন, তাহাে খুঁজছেন কেন?”

“সে কথাটি এখন প্রকাশ করা ঠিক হবে না। যদি সে লোককে পাওয়া যায়, তা হ’লে আপনি তখন সবই জানতে পারবেন। এখন আপনি অনুগ্রহ ক’রে অনুমতি দিলেই, এই বিজ্ঞাপনটি আমি কয়েকখানি কাগজে ছাপতে দিই। আপনার এতে কিছুই লোকসান নেই, বরং দেশ-বিদেশে নামটা আরও জাহির হয়ে যাবে। বিশেষ, যারা কোনও রকম রিসার্চে প্রবৃত্ত, আজকাল লোকে তাঁদের খুব সম্মানের চক্ষে দেখে। এতে পরোক্ষভাবে, আপনার কাযকর্মের সুবিধাই হবে। বলুন, আপনার অনুমতি আছে ত?”

জ্যোতিষী বলিলেন, “আচ্ছা, তা যেন হ’ল। সে লোকটিকেই যখন আপনার দরকার, তখন তার পারিবারিক ইতিহাসটুকু দিয়ে, নিজের নামেই বিজ্ঞাপন ছাপাচ্ছেন না কেন?”

বাবুটি বলিলেন, “কেন জানেন? সে লোক যদি এখন বেঁচে না থাকে, অল্প কেউ যদি জাল সেজে এসে তার নাম নিয়ে ঠকাতে চেষ্টা করে, এই জন্তে আর কি! বলুন, আপনার অনুমতি আছে ত?”

জ্যোতিষী ক্ষণকাল কি ভাবিলেন। শেষে বলিলেন, “অনুমতি দিতে পারি, কিন্তু বিজ্ঞাপনে আমি আরও ৩৪ লাইন যোগ ক’রে দিতে চাই।”

“কি যোগ করবেন বলুন।”

জ্যোতিষী মহাশয় তখন কলম লইয়া, বিজ্ঞাপনের শেষ ভাগে যোগ করিয়া দিলেন,—

“নিভুল ও অকাটা কোষ্ঠী প্রস্তুত করিবার পারিশ্রমিক ১০০ হইতে ৫০০ মাত্র। প্রতি দিন প্রাতে সাতটা হইতে দশম ঘটিকা পর্যন্ত সমাগত নরনারীগণের হস্তরেখা বিচারে ফলাফল বর্ণনা করিয়া থাকি, পারিশ্রমিক ২০ মাত্র।”

বাবুটি দেখিলেন, ইহা যোগ করিতে হইলে ৩৪ লাইনের মূল্য বাড়িয়া যার। তথাপি তিনি স্বীকৃত হইলেন। বলিলেন, “আচ্ছা, তা বেশ। এই বিজ্ঞাপনের উত্তরে চিঠিপত্র যা আসবে, তা সব রেখে দেবেন, আমি মাঝে এসে সেগুলি দেখে যাব।”—বলিয়া তিনি উঠিলেন।

জ্যোতিষী মহাশয় বলিলেন, “আশনার নাম ঠিকানা রেখে যান, সেগুলো চাকর দিয়ে আপনাকে পাঠিয়ে দেবো এখন। আবার কষ্ট করে রোজ রোজ আপনি আসবেন!”

বাবুটি বলিলেন, “না না, কষ্ট কিছুই নয়। চাকর দিয়ে পাঠাতে হবে না, আমি নিজেই মাঝে মাঝে এখানে এসে দেখে যাব। আজ হ’ল গিয়ে বুধবার ত? বিজ্ঞাপন বেরুতে, তার জবাব আসতে, অন্ততঃ ৩৪ দিন লাগবে। রবিবারে এই সময় আবার আমি আসবো। আচ্ছা, এখন উঠি তবে—প্রণাম।”—বলিয়া বাবুটি প্রস্থান করিলেন।

জ্যোতিষী মহাশয় ভাবিতে লাগিলেন—“কে লোকটা? নাম-ধাম কিছুই বল্লে না। যাবার সময় প্রণাম ব’লে গেল, তা হ’লে ব্রাহ্মণ নয়। কোনও মন্দ উদ্দেশ্য আছে কি না, তাই বা কে জানে!”

সন্ধ্যা হইল দেখিয়া, সদর বন্ধ করিয়া, জ্যোতিষী মহাশয় খট খট করিতে করিতে উপরে উঠিয়া গেলেন।

৩

রবিবার দিন যথাসময়ে বাবুটি আসিয়া দর্শন দিলেন। এখনও পর্য্যন্ত কোন চিঠি আসে নাই জানিয়া, ক্ষুণ্ণমনে তিনি প্রশ্ন করিতেছিলেন, জ্যোতিষী আগ্রহ করিয়া তাঁহাকে বসাইয়া, কথা-বার্তা আরম্ভ করিলেন। কথার কোশলে তাঁহার পরিচয়, এবং বিজ্ঞাপন দিয়া লোক খোঁজার উদ্দেশ্য জানিতে চেষ্টা করিলেন; কিন্তু তাহাতে কোনও ফল হইল না। বাবুটি জ্যোতিষী মহাশয়ের মনের ভাব বুঝিয়া, হাত ছুটি ঘোড় করিয়া কহিলেন, “আমার পরিচয় দিলাম না ব’লে, সব কথা খুলে বললাম না ব’লে, আপনি আমার অপরাধ নেবেন না। কোনও বিশেষ প্রতিবন্ধকতা আছে বলেই এ সব কথা এখন প্রকাশ করতে পারছি। যদি সে লোককে আমি খুঁজে পাই, তা হ’লে আমার যথাসাধ্য প্রণামী আপনাকে দিয়ে, আপনাকে খুসী করবার চেষ্টা করবো।”

“না না, তার জন্তে আর কি, তার জন্তে আর কি! ওটা একটা কথার কথা জিজ্ঞাসা করছিলাম বৈ ত নয়। সে যাক্।”—বলিয়া জ্যোতিষী মহাশয় অল্প প্রসঙ্গ উত্থাপন করিলেন। জিনিষপত্রের মহার্ঘতা, রাজপথে গুণ্ডার উপদ্রব, “স্বদেশহিতৈষি”গণের ভণ্ডামী প্রভৃতি বিবিধ বিষয়ে দুই জনে আলোচনা চলিতে লাগিল।

, কিয়ৎক্ষণ পরে জানালার বাহিরে, “পেনছুট” চূলে টেড়িকাটা, চক্ষু-বসা, খালি গা’ এক যুবক দেখা দিল। জ্যোতিষী মহাশয় ইসারায় তাহাকে কি জানাইতেই সে তখনই সেস্থান পরিত্যাগ করিল। আগন্তুক সে দিকে পশ্চাৎ ফিরিয়া বসিয়া ছিলেন, তিনি যুবককে দেখিতে পান নাই, বা তাহার প্রতি জ্যোতিষী মহাশয়ের ইঙ্গিতও লক্ষ্য করেন নাই।

অবশেষে সন্ধ্যা হয় দেখিয়া বাবুট উঠিলেন; বলিলেন, “আচ্ছা, তা হ’লে, পশু—পশু বিকেলে আর একবার খবর নিয়ে যাব। এখন আসি তা হ’লে—প্রণাম।”

“জয়োহস্ত” বলিয়া জ্যোতিষী মহাশয় তাঁহার সঙ্গে সঙ্গে সদর দরজার বাহির হইয়া দাঁড়াইলেন। পূর্বোক্ত টেড়িকাটা চক্ষু-বসা যুবক, রাস্তার অপর পারে পাণের দোকানের নিকট দাঁড়াইয়া বিড়ি টানিতেছিল। জ্যোতিষী মহাশয়ের সহিত চোখোচোখি হইতেই সে একটু হাসিল। বাবুট অল্প দূর অগ্রসর হইলে, জ্যোতিষী মহাশয় একটা ইঙ্গিত করিলেন। সেই যুবক তৎক্ষণাৎ বাবুটের পিছু লইল। জ্যোতিষী মহাশয় দরজা বন্ধ করিয়া উপরে গেলেন।

প্রায় এক ঘণ্টা পরে সেই যুবক ফিরিয়া আসিয়া জ্যোতিষী মহাশয়ের সদর দরজার কড়া নাড়িল। জ্যোতিষী মহাশয় লষ্ঠন হস্তে নামিয়া দরজা খুলিয়া দিয়া যুবককে ভিতরে ডাকিলেন। সে ভিতরে আসিলে, দরজাটি ভেজাইয়া দিয়া নিয়ন্ত্রণে জিজ্ঞাসা করিলেন, “কি রে কেব্‌লা, কিছু সন্ধান পেলি?”

যুবকের নাম কেবলরাম। সে দস্তবিস্তার করিয়া হাসিয়া বলিল, “আজ্ঞে, সব সন্ধানই লিয়ে এলাম। আপনার ছিচরণ আশীর্বাদে, এই কেবলরামের অসাধ্য কি কিছু আছে?”

“কি সন্ধান পেলি বল্ দেখি!”

কেবলরাম মাথাটি এক ধারে নত করিয়া বলিল, “আজ্ঞে, টাকা ছটো!”

জ্যোতিষী একটু বিরক্তির সহিত বলিলেন, “আগে টাকা নিয়ে তবে কথা বল্বি? পাড়ার ছেলে তোরা, আমাকে এত অবিশ্বাস?”

‘কেবল্’ বলিল, “হেঁহেঁ, অবিশ্বাসের কথা কে বল্ছে? তবে আজ টাকা ছটোর বিশেষ প্রিয়জন, ঠাকুর মশায়। আগে রাত লটা অবধি খোলা থাক্ত, আজকাল আবার শালারা চটা বাজলেই দোকান বন্ধ ক’রে দেয়। তখন পানওয়ালার দোকান থেকে ডবল দাম দিয়ে জলমিশানো কিন্তে হয়। সাতটা বেজে গিয়েছে কি না, তাই বল্ছি।”

কেবলরামের এই স্পষ্ট ও নির্ভীক উক্তি শ্রবণ করিয়া, একটু হাসিয়া, তাহাকে অপেক্ষা করিতে বলিয়া জ্যোতিষী মহাশয় উপরে চলিয়া গেলেন। ফিরিয়া আসিয়া কেবলরামের হস্তে দুইটি টাকা দিয়া বলিলেন, “এই ঘরটার মধ্যে আয়।”—বলিয়া তাহাকে বৈঠকখানায় ডাকিলেন।

কেবলরাম টাকা দুইটি টেঁকে গুঁজিতে গুঁজিতে বৈঠকখানা-ঘরে প্রবেশ করিল। জ্যোতিষী মহাশয় লণ্ঠনটি টেবিলের উপর

রাখিয়া, চেয়ারে বসিয়া বলিলেন, “কি কি জেনে এলি বল দেখি। খুব আস্তে আস্তে কথা কোন্।”

কেবল তাঁহার অতি নিকটে গিয়া দাঁড়াইয়া ফিস্ ফিস্ করিয়া রলিল, “তার নাম হরিহর মিত্র। টল্লি বাড়ীতে চাকরী করে। ১০০ মাইনে পায়। শ্রামবাজারে ৩২নং কালু ঘোষের লেনে থাকে। নিজের বাড়ী নয়, ভাড়া বাড়ী। যা যা জানতে চেয়েছিলেন, দেখুন, সবই জেনে এসেছি।”

জ্যোতিষী বলিলেন, “ঠিক খবর পেয়েছি ত? ভুলটুল হয় নি?”

কেবল বলিল, “আজ্ঞে না, ভুল হবার যো কি? সেই পাড়ার ৩৪ জন লোককে জিজ্ঞাসা ক’রে জেনে এসেছি।”—ইঠাৎ কক্ষস্থিত ঘড়ির দিকে নজর পড়ায় বলিল, “উঃ, সাড়ে সাতটা বে! এখন আসি তবে ঠাকুর মশায়—প্রণাম।” বলিয়া দ্বারের দিকে অগ্রসর হইয়া, আবার ফিরিয়া নিকটে আসিয়া চুপি চুপি বলিল, “একটা কথা জিজ্ঞাসা করি। তাকে প্রেহার ট্রেহার দিতে হবে কি? তা যদি দরকার হয় ত বলবেন। কিন্তু সে ১০ টাকার কমে হবে না, আরও ২।১ জন সঙ্গে নিতে হবে কি না!”

জ্যোতিষী বলিলেন, “না, সে সব এখন কিছু দরকার নেই।”

“আচ্ছা—যদি দরকার হয় ত পরে জানাবেন। আমরা আপনার হুকুমের চাকর। চলুন তবে, প্রণাম।”—বলিয়া কেবল-ঋতপদে প্রস্থান করিল।

পরদিন অপরাহ্নকালে জ্যোতিষী মহাশয়ের গৃহিণী, চৈতন্ত লাইব্রেরীর একখানি উপত্যাস হস্তে প্রবেশ করিয়া, স্বামীকে নিভুতে পাইয়া বলিলেন, “হ্যাঁগা, কাল থেকে দেখছি সর্বদাই তুমি অল্পমনস্ক হয়ে থাক, মনে মনে কি যেন ভাবছ। কি হয়েছে গা?”

জ্যোতিষী মহাশয় প্রথমে তাঁহার চিন্তার বিষয় জ্ঞাকে বলিতে ইতস্ততঃ করিয়াছিলেন, কিন্তু পীড়াপীড়িতে বাধ্য হইয়া অবশেষে ব্যাপারটা জানাইতে হইল। শুনিয়া গৃহিণী কিছুক্ষণ মৌন রহিলেন। শেষে উপত্যাসখানি কুলুঙ্গিতে তুলিয়া রাখিয়া, তিনি স্বামীর নিকট আসিয়া বসিয়া বলিলেন, “দেখ, আমার কিন্তু একটা কথা মনে হচ্ছে।”

“কি বল দেখি?”

“লোকটি ত এটর্নি আফিসের বড়বাবু?”

“বড়বাবু কি না, তা জানি নে, ১০০ মাইনে পায় তাই শুনেছি।”

“আচ্ছা ধর, যদি এই রকম হয়?”

জ্যোতিষী মহাশয় সোৎস্রুকে তাঁহার জ্ঞীর মুখপানে চাহিয়া রহিলেন।

জ্ঞী কহিলেন, “মনে কর, এক জন লোক, তার জ্ঞীর গর্ভাবস্থায় জ্ঞীকে বাড়ীতে রেখে, অর্থোপার্জনের জন্তে কোনও একটা দূরদেশে চলে গেল। সেখানে গিয়ে কোনও অভাবনীয় উপায়ে, তার বিপুল অর্থলাভ হল। সেই অর্থ নিয়ে সে বাড়ী ফিরছে, পথে তার আসন্ন

কাল উপস্থিত। সে হিসেব করে দেখলে, তার সম্ভান তখনও জন্মায় নি। কোনও সাধু বা সচ্চরিত্র বন্ধুলোকের কাছে টাকাগুলি সে গচ্ছিত রেখে বসে, আমি ত মরছি, আমার যে সম্ভান এখনও তার মাতৃগর্ভে আছে, সে যেন আমার এই টাকাগুলি পায়, তুমি তার ব্যবস্থা কোরো। এই রকম অনুরোধ করে' টাকা গচ্ছিত রেখে, লোকটি মরে গেল। সেই সাধু বা বন্ধুলোক, কার্যগতিকে অনেকদিন বাঙ্গালা দেশে আসতে পারেন নি। এখন এসেছেন। এটনি বাবুর সাহায্যে সেই ছেলেকে আবিষ্কার করতে চেষ্টা করছেন। তাকে পেলে, টাকাগুলি তাকে দিয়ে তিনি আবার স্বদেশে ফিরে যাবেন।”

জ্যোতিষী মহাশয় অবাক হইয়া কিয়ৎক্ষণ স্ত্রীর মুখপানে চাহিয়া রহিলেন। শেষে বলিলেন, “গিন্নী, কি বুদ্ধি তোমার! অন্ধকারে অন্ধকারে ঠিক বোঝা যাচ্ছে না, কিন্তু তবু বোধ হচ্ছে, ঠিক যায়গা-টিতে না হোক, তার অনেকটা কাছাকাছি তুমি পৌছেছ। কিন্তু একটা কথা থেকে যাচ্ছে যে!”

“কি কথা?”

“তা হলে সে বন্ধু বা সাধুলোক, ছেলের বাপের নাম কি, তার বাড়ী কোথায়, এ সবই ত জানতো। সেই গ্রামে গিয়ে খোঁজ নিত। এটনির শরণাপন্ন হবে কেন? হরিহর ত বলে, সে কোথায় আছে, তাও তারা জানে না!”

গৃহিণী বলিলেন, “এত বছরের পরে, সেই বাবুটির নাম, তাঁর গ্রামটির নাম বন্ধু লোক যদি ভুলে গিয়ে থাকেন? সম্ভবতঃ সে

বন্ধুটি নিজে বাঙ্গালী নন, সুতরাং বাঙ্গালীর নাম, বাঙ্গালা গ্রামের নাম মনে রাখা তাঁর পক্ষে কঠিন নয় কি ?”

“তা বটে !”—বলিয়া জ্যোতিষী মহাশয় অবনতমুখে চিন্তা করিতে লাগিলেন। অল্পক্ষণ পরে, গৃহিণী বলিলেন, “কিংবা”—বলিয়া তিনি চুপ করিলেন।

জ্যোতিষী জিজ্ঞাসা করিলেন, “কিংবা কি ?”

“কিংবা ধর, বাঙ্গালা দেশের কোনও রাজা বা জমীদার লোক, অবিবাহিত, ছদ্মবেশে দেশভ্রমণে বেরিয়েছেন। কোনও দূর-জিলার পল্লীগ্রামে গিয়ে, স্বজাতীয়া একটি সুন্দরী মেয়ে দেখে, তাকে বিবাহ করে, কিছুদিন সেইখামেই খাস করছিলেন। ক্রমে জানতে পারলেন, তাঁর স্ত্রীর সন্তানসন্তাবনা হয়েছে। তখন তিনি মনে ভাবলেন, দেশে ফিরে যাই, আত্মীয়স্বজনকে এ বিবাহের কথা জানাই, তার পর ফিরে এসে স্ত্রীকে বাড়ী নিয়ে যাব। কিন্তু পথে, কিংবা বাড়ী পৌছেই তাঁর মৃত্যু হল। এ দিকে তাঁর স্ত্রীও জানে না যে, তার স্বামী কে, কোথাকার রাজা বা জমীদার। সুতরাং স্বামী ফিরে না আসতে, সেইখানে প’ড়ে প’ড়েই সে হা হতাশ করতে থাকলো। এ দিকে বহুকাল পরে সেই রাজা বা জমীদারের ভাই কিংবা ভাইপো, দাদা কিংবা খুড়োর বাসল থেকে পুরাণো কাগজপত্র বের করে পড়তে পড়তে, আসল ব্যাপারটা জানতে পেরেছে। তখন সে শিউরে উঠেছে—অ্যাঁ !—কার বিষয় এতদিন আমি ভোগ করছি ! সেই গর্ভে দাদার যদি ছেলে হয়ে থাকে, তা হলে সেই ত এই সম্পত্তির মালিক। অথচ সে কাগজপত্র থেকে, দাদার শব্দরবাবাদীর

ঠিকানা সে আবিষ্কার করতে পারে নি ; তাই কলকাতায় এসে, এটর্নির শরণাপন্ন হয়েছে, আর এটর্নি ঐ বিজ্ঞাপণের কোশল খাটিয়ে তার হেড বাবুকে তোমার কাছে পাঠিয়েছিল ।”

শুনিয়া জ্যোতিষী মহাশয় প্রশংসমান নেত্রে, স্ত্রীর মুখের দিকে চাহিয়া বলিলেন, “দেখ, প্রথমে তুমি যেটা বলেছিলে, তার চেয়ে এইটেই যেন বেশী সম্ভব বলে আমার মনে হচ্ছে ! কি বুদ্ধি তোমার ! এ যেন একেবারে আস্ত উপস্থাসের মত শোনাচ্ছে । আচ্ছা, এত উপস্থাস ত তুমি পড়লে, একখানা লেখ না কেন ?”

গৃহিণী মনে মনে খুসী হইয়া, মুখে বলিলেন, “যাও যাও, আর ঠাট্টা করতে হবে না । আচ্ছা, তুমিও একটা কিছু ভাবছিলেন ত ? তুমি কি ভাবছিলে শুনি ।”

জ্যোতিষী বলিলেন, “আমি এটর্নির কথা শুনে পর্য্যন্ত, একটা উইল-টুইলের ব্যাপার এর মধ্যে কিছু আছে, তাই ভাবছিলাম ।”

গৃহিণী বলিলেন, “একটা উইল-টুইল ষাটতাই হউক, আর যাই হোক, একটা সম্পত্তির ব্যাপার এর ভিতর আছেই আছে । নইলে দেখছ না, পাছে সে লোক মরে গিয়ে থাকে, আর কেউ জাল সেজে এসে দাঁড়ায়, সে বিষয়ে এত সাবধান হওয়া দরকার কি ? নিশ্চয়ই দশ বিশ লাখ টাকা এর ভিতর আছে ।”

জ্যোতিষী বলিলেন, “আমারও তাই মনে হয় ।”

সন্ধ্যা সমাগত দেখিয়া গৃহিণী গৃহকার্য্যের জন্ত এবং জ্যোতিষী মহাশয় সন্ধ্যা বন্দনার জন্ত প্রস্তুত হইয়া উঠিয়া গেলেন ।

মঙ্গলবারে হরিহরবাবু আসিয়া দেখিলেন, একখানি মাত্র পত্র আসিয়াছে। তিনি সেখানি পাঠ করিয়া, তাহা ছিঁড়িয়া ফেলিলেন। জ্যোতিষী মহাশয় জিজ্ঞাসা করিলেন, “কি হল? এ নয়?”

“না।”

“বিজ্ঞাপনটি চালাচ্ছেন ত? কোন্ দেশে সে আছে, তা ত ঠিক নেই। কিছুদিন ধরে বিজ্ঞাপন চলে, ক্রমে তার চোখে পড়বেই পড়বে। বিজ্ঞাপনটি আরও কিছু দিন চলুক।”

“হ্যাঁ, তা ত চালাতেই হবে। পশু' আবার আসবো” বলিয়া তিনি প্রস্থান করিলেন। . .

জ্যোতিষী মহাশয় যে বিজ্ঞাপনটি চালাইবার জন্ত উৎসুক হইয়াছেন, তাহার কারণ, আজন্ম পিতৃহীনের পত্র যত আসুক আর নাই আসুক, এই বিজ্ঞাপনগুলির ফলে কোণ্ঠী প্রস্তুতের অর্ডার কিছু কিছু আসিতে আরম্ভ হইয়াছে। আজকাল তিনি উদয়াস্ত পরিশ্রমে সেগুলি প্রস্তুত করিয়া একে একে ভি-পি করিতেছেন।

বৃহস্পতিবার ডাকে আর একজন আজন্ম পিতৃহীনের পত্র আসিল। পূৰ্ব্ব পত্রখানি হরিহর বাবু ছিঁড়িয়া ফেলাতে, জ্যোতিষী মহাশয় এই পত্রখানি গোপনে নকল করিয়া লইয়া, মূলপত্র হরিহর বাবুর জন্ত রাখিয়া দিলেন। সন্ধ্যাবেলা আসিয়া, সে পত্রখানি পাঠ করিয়া হরিহরবাবু অত্যন্ত খুসী হইয়া উঠিলেন। বলিলেন, “ঠাকুর, আপনার আশীর্বাদে ঠিক লোকটি পেয়েছি এবার। এতদিনে আমার চেষ্টা সফল হ'ল।”—বলিয়া ভদ্রলোক, জ্যোতিষী মহাশয়ের

টেবিলের উপর পাঁচ টাকার একখানি নোট প্রণামী স্বরূপ অর্পণ করিয়া, হাসিমুখে প্রস্থান করিলেন।

জ্যোতিষী মহাশয় দেবাজের গুপ্তস্থান হইতে নকলটা বাহির করিয়া একবার তাহা পাঠ করিলেন। তার পর, সেখানি হাতে লইয়া উপরে গিয়া, ডাকিলেন, “ওগো, একটা কথা শুনে যাও।”

গৃহিণী আসিয়া দাঁড়াইতেই চুপি চুপি বলিলেন, “হরিহর যাকে খুঁজছিল, তার চিঠি এতদিনে এসেছে। এই দেখ।”—বলিয়া নকলখানি তাঁহার হস্তে দিলেন।

পত্রখানি এই : -

• বেঙ্গলী মেস—মোরাদপুর
বাঁকীপুর।

মহাশয়,

বিশ্বদূত সংবাদপত্রে আপনার প্রদত্ত বিজ্ঞাপনটা পাঠ করিলাম। তদন্তরে লিখিতেছি, আমি আজন্ম পিতৃহীন। আমার পিতা ৬৭বরদারোগ ঘোষ মহাশয় সিমলা-শৈলে বড় লাট সাহেবের দপ্তরে চাকরী করিতেন, আমার মাতাঠাকুরাণী নদীয়া জিলায় মুকুন্দপুর গ্রামে আমার মাতুলালয়ে ছিলেন, আমি ভূমিষ্ঠ হইবার দুই মাস পূর্বে সিমলা শৈলে জ্বর ও নিউমোনিয়া রোগে আমার পিতৃদেবের দেহান্ত হয়। আমার জন্ম তারিখ জানি না, সন ১৩০০ সাল বৈশাখ মাস, এইটুকু মাত্র জানি। ১০ বৎসর বয়ঃক্রম কালে আমি মাতৃহীন হই। পরে আমার মাতুল মহাশয় ও মাতুলানী ঠাকুরাণীও স্বর্গারোহণ করেন। ১৫ বৎসর বয়সে আমি প্রাতঃস্মরণীয়া মহারাণী

স্বর্ণময়ীর আশ্রয়লাভ করিয়া বহরমপুর কলেজে পড়িয়া তথা হইতে বি-এ পাস করিয়া, এখন বাঁকীপুরে ৫০৮ বেতনে শিক্ষকতা করিতেছি ও সঙ্গে সঙ্গে আইন পড়িতেছি। আমার আত্ম-বিবরণ সংক্ষেপে আপনাকে জানাইলাম। ইতি

বিনীত

শ্রীমুখীকুমার ঘোষ।

পত্রখানি গৃহিণী নিবিষ্ট চিত্তে পাঠ করিয়া, স্বামীকে বলিলেন, “উঃ, দেখ একবার কাণ্ড! ৫০৮ টাকা মাইনের মাষ্টারি করছে,—কোথাও কিছু নেই—হঠাৎ একটা মন্ত বড়লোক হয়ে যাবে। একেই বলে অদৃষ্ট!”

জ্যোতিষী বলিলেন, “কিন্তু আমরা যে ছুটো অনুমান করেছিলাম, কৈ, তার কোনওটার সঙ্গে ত মিলছে না!”

গৃহিণী বলিলেন, “তা, কি করে জানলে মিলছে না? অবিশ্বি, ঠিক ব্যাপারটা কি হয়েছে তা আমরা জানিনে। ধর, ঐ সিমলা পাহাড়ে বেড়াতে গিয়ে তার বাপ যদি মন্ত একখানা হীরেই কুড়িয়ে পেয়ে থাকে, যার দাম দশ বিশ লাখ, সেই হীরে হয় ত কারু কাছে গচ্ছিত আছে, সে এখন উত্তরাধিকারীকে খুঁজছে। কিংবা মরবার আগে ওর বাপ হয় ত কোনও রাজা মহারাজার বিশেষ কোন উপকার করেছিল, সেই রাজা, সেই উপকারের পুরস্কার স্বরূপ কোনও জায়গীর টায়গীর দেবার জন্তে ছেলেকে এখন খুঁজছে। ঠিক কি, তাতো আমরা জানিনে।”

জ্যোতিষী মহাশয় একটু চিন্তা করিয়া বলিলেন, “একটা

সিঁশেষ রকম প্রাপ্তিযোগ তার আছে ব'লে আমারও বিশ্বাস হচ্ছে।
তা হলে, এখন কি করা যায় বল দেখি ?”

“যা পরামর্শ ছিল, তাই কর। আজই রওয়ানা হয়ে তুমি
বাঁকীপুরে যাও। তার সঙ্গে দেখা ক'রে, যে রকম বলেছিলে সেই
রকম একথানা দলিল তার কাছে লিখিয়ে, কালই রেজিষ্টারি করে
নাও। তার পর যা আছে অদৃষ্টে। কি রকম দলিল লেখাবে আর
একবার বল দেখি।”

জ্যোতিষী বলিলেন, “লেখাব—আপনার প্রদত্ত বিজ্ঞাপন-মূলে
এবং আপনার উপদেশে চালিত হইয়া, আমি যাহা কিছু ধন-সম্পত্তি
লাভ করিতে পারিব, তাহার অর্দ্ধাংশ আপনার পারিভ্রমিক ও
পরামর্শের মূল্য স্বরূপ, বিনা ওজরে আপনাকে দিতে আমি বাধ্য
রাহিলাম।—উকীলে সব ঠিক ক'রে লিখে দেবে এখন।”

স্বামীজীতে আরও কিছুক্ষণ গোপন পরামর্শ চলিল। রাত্রি
সাড়ে নয়টার পঞ্চাব মেলে, দুর্গানাম স্মরণ করিয়া, জ্যোতিষী
মহাশয় বাঁকীপুর যাত্রা করিলেন।

পরদিন প্রাতে, একটি ক্যাম্বিশের ব্যাগ হাতে করিয়া জ্যোতিষী
মহাশয় পদ্মব্রজে বাঁকীপুর সহরের মধ্যে প্রবেশ করিলেন। মোরাদ-
পুরে গিয়া “বেঙ্গলী মেস” অন্বেষণ করিতে লাগিলেন, কিন্তু প্রথমে
পথচারী কেহই তাহার সন্ধান বলিতে পারিল না। অবশেষে এক
জন বাঙ্গালী বাবু বলিলেন, “ওঃ, বুঝেছি, কাউ-লজ,—আসুন,

দেখিয়ে দিচ্ছি।” নির্দিষ্ট স্থানে নীত হইয়া জ্যোতিষী মহাশয় দেখিলেন, মেস বাড়ীটির সম্মুখে খানিকটা খোলা যায়গায় বিস্তৃত গরু বাঁধা রহিয়াছে। পথপ্রদর্শক বাবুট বলিলেন, “এটিই বেঙ্গলী মেস, তবে ঐ গরুগুলো সামনে থাকার জন্যে লোক এটাকে কাউলজ বলে। যান, ঐ দরজা দেখা যাচ্ছে।”—বলিয়া বাবুট প্রস্থান করিলেন।

জ্যোতিষী মহাশয় সাবধানে গরুর ভিড় ঠেলিয়া, সদর দরজায় দাঁড়াইয়া দেখিলেন, নিম্নতলের বারান্দায় ২১৩ জন বাবু চলাফেরা করিতেছেন। তখন তিনি ভিতরে প্রবেশ করিয়া জিজ্ঞাসা করিলেন, “মশাই, সুধীর বাবু এখানে আছেন কি?” বাবুরা বলিলেন, “ছাদে ঐ তেতালার ঘরে আছেন। ঐ সিঁড়ি দিয়ে উঠে যান।”

জ্যোতিষী মহাশয় তেতালায় উঠিয়া দেখিলেন, তথায় একখানি মাত্র ঘর, বাকী সমস্ত ছাদ। সুধীর তখন নিদ্রাভঙ্গে শয্যাভ্যাগ করিয়া, মুখ-হাত ধুইতে যাইবার আয়োজন-স্বরূপ, নিজ তক্তপোষে বসিয়া সিগারেট সেবন করিতেছিল। “বাবাজী, তুমিই সুধীর-কুমার?”—বলিয়া ব্রাহ্মণপণ্ডিতবেশী প্রবীণ ভদ্রলোকটিকে প্রবেশ করিতে দেখিয়া, সুধীর সিগারেটটি লুকাইয়া ফেলিয়া, তক্তপোষ হইতে নামিয়া জিজ্ঞাসা করিল, “আপনার কোথা থেকে আসা হচ্ছে?”

প্রশ্নের উত্তর দিয়া জ্যোতিষী মহাশয় বলিলেন, “বাবাজী, তুমি মুখ-হাত ধুয়ে এস, তোমার সঙ্গে আমার কিছু বিশেষ কথা আছে। এ ঘরে কি তুমি একাই থাক?”—বলিয়া কক্ষটির অপর দিকে

চাহিয়া দেখিলেন, আর একখানি তক্তপোষে কক্ষলে ঢাকা বিছানা শুটানো রহিয়াছে।

সুধীর বলিল, “আপাততঃ একলা বটে। আর এক জন থাকেন, তিনি সম্প্রতি বাড়ী গেছেন।”

“তোমার ইস্কুল কখন?”

“সাড়ে দশটা থেকে।”

“ল-কলেজ?”

“বেলা ৪টা থেকে ৫টা।”—বলিয়া সুধীর সবিস্ময়ে আগন্তকের পানে চাহিয়া রহিল। ভাবিতে লাগিল, লোকটিই বা কে, আমার সকল খবর জানিলই বা কোথা হইতে? ‘বিবাহের ঘটক নাকি?’ জিজ্ঞাসা করিল, “মশাইয়ের নামটি কি?”

জ্যোতিষী মহাশয় বলিলেন, “বাপু, তুমি মুখ-হাত ধুয়ে এস, পরে সে সমস্তই জানতে পারবে।”

“আচ্ছা, আপনি বসুন তা হ’লে।”—বলিয়া সুধীর বাহির হইয়া গেল। জ্যোতিষী মহাশয় তখন সেই তক্তপোষের উপর জাঁকিয়া বসিলেন।

কিছুক্ষণ পরে সুধীর ফিরিয়া আসিয়া জিজ্ঞাসা করিল, “আপনি কি মুখ-হাত ধোবেন?”

“না, আমি সে সব ইষ্টিশান থেকেই সেরে এসেছি।”

“আপনার স্নানাহার—”

“সেটা, এইখানেই করতে পারলে ভাল হয়। সে সব হবে এখন, ব’স দেখি, সব কথা তোমায় বলি।”

সুধীর উপবেশন করিলে, জ্যোতিষী মহাশয় তাঁহার ব্যাগ খুলিয়া, একখানি খবরের কাগজ বাহির করিয়া পূৰ্বোক্ত বিজ্ঞাপনটি দেখাইয়া বলিলেন, “আমিই কাগজে কাগজে এই বিজ্ঞাপন দিয়েছিলাম; আর, তুমি তাই প’ড়ে, আমায় যে পত্রখানি লিখেছিলে, এই তার নকল।”—বলিয়া নকলখানিও সুধীরের হস্তে দিলেন।

দেখিয়া সুধীর বলিল, “ওঃ, বুঝেছি। আপনি হস্তরেখাটোখা দেখতে এসেছেন।”

জ্যোতিষী বলিলেন, “হ্যাঁ, তোমার হাত দেখি, দাও।”

সুধীর হাত বাড়াইয়া দিল। জ্যোতিষী মহাশয় ব্যাগ হইতে চশমা বাহির করিয়া চক্ষুতে দিয়া, কিছুক্ষণ ধরিয়া, বিশেষ মনোযোগের ভান করিয়া সুধীরের করাক পরীক্ষা করিলেন; শেষে বলিলেন, “যা গণনা করেছিলাম, ভুল হয় নি, ঠিকই সমস্ত মিলে যাচ্ছে।”

সুধীর সবিস্ময়ে জিজ্ঞাসা করিল, “কি মিলে যাচ্ছে? প্রাচ্য আর পাশ্চাত্য—”

জ্যোতিষী হাসিয়া বলিলেন, “না হে না, সে সব কিছু নয়; ও প্রাচ্য আর পাশ্চাত্য রিসাচ-ফিসাচ নয়, বিজ্ঞাপনের ও সমস্তই বাজে কথা। আসল কথা তোমায় বলি, শোন। আমি গণনায় জ্ঞানতে পেরেছিলাম যে, সম্ভ্রতি কোনও আজন্ম পিতৃহীন যুবকের একটা বিশেষ রকম প্রাপ্তিযোগ আছে। কিছু ধনরত্ন সে পাবে। সে যুবকটি যে কে, তাই আবিষ্কার করবার জন্তে আমি ঐ বিজ্ঞাপনটি ছাপিয়েছিলাম। তোমার জন্ম সন ও মাস

তোমার চিঠিতে পেয়ে বুঝলাম যে, সে ভাগ্যবান যুবা তুমিই।

তোমার কর-রেখাতেও সেই কথা মিলে যাচ্ছে।”

যুবক বলিল, “তা, কবে আমার সে প্রাপ্তিযোগ ঘটবে? কি পাব?”

জ্যোতিষী বলিলেন, “ঠিক কবে, তা’ বলতে পারিনে, বাবাজী, তবে অধিক বিলম্ব নেই। আর কত, তাও শাস্ত্রে লেখেনা। দশ টাকাও হ’তে পারে, দশ লাখ হতেও আটক্ নেই। তবে, ধনরত্নপ্রাপ্তি যোগটা ধ্রুব। কিন্তু তার জন্তে একটি বিশেষ কষ্টসাধ্য দৈবকর্ম করা আবশ্যিক, এবং সে দৈবকর্মটি আমি ছাড়া অপর কারুর দ্বারা হবে না।”

কথাটা শুনিয়া স্তম্ভীর কয়েক মুহূর্ত্ত স্তব্ধ হইয়া বসিয়া রহিল। শেষে তাহার মুখে ব্যঙ্গপূর্ণ একটা হাসি ফুটিয়া উঠিল।

জ্যোতিষী মহাশয় তাহা লক্ষ্য করিয়া বলিলেন, “বাবাজী! ভাবছ, বাম্‌না এই ব’লে ভুজং দিয়ে, দৈবকর্ম করার নাম করে কিছু টাকা ফাঁকি দিয়ে নেবার মতলবে এসেছে? তা নয় বাবাজী! কি মতলবে আমি এসেছি, তা বলি শোন। আমি কলির ব্রাহ্মণ, লোভটা পুরোমাত্রাতেই আমার আছে; তুমি আমার সহায়তায় যা কিছু ধনরত্ন লাভ করবে, তার অর্দ্ধেক আমায় দেবে, এই অঙ্গীকার করে যদি তুমি রীতিমত দলিল লিখে রেজেষ্টারি করে দাও, তবেই আমি সেই দৈবকর্মটি করব। নচেৎ নয়। এই জন্তেই গাড়ীভাড়া খরচ করে এত দূর এসেছি। বস, সমস্ত খোলাখুলি তোমায় বললাম।”

সুধীর অবাচ্ হইয়া জ্যোতিষীর মুখপানে চাহিয়া রহিল

জ্যোতিষী বলিলেন, “ভেবে দেখ কথাটা। এই যে দলিলের কথা বল্লাম, এর সমস্ত খরচ—ইষ্টাম্পের মূল্য, রেজিষ্টারি খরচা, উকীলের ফী—সমস্ত আমি বহন করব, তোমার এক পয়সা লাগবে না। যদি আমার গণনায় কিছু সত্য না থাকে, দৈবকর্মের কিছু শক্তি না থাকে, তোমার তাতে সিকি পয়সারও লোকসান নেই। যদি থাকে, আমার পারিশ্রমিকস্বরূপ বল, গুণের পুরস্কারস্বরূপ বল, যা পাবে, তার অর্ধেক আমায় দেবে। যদি ১০টা টাকা পাও, ৫টা আমায় দিও! যদি ১০ লাখ পাও, ৫ লাখ দিও।”

“সুধীর বলিল, “পাঁচ লা—থ!”

জ্যোতিষী হাসিয়া বলিলেন, “কি ছেলেমানুষ তুমি! যখন আমার বিনা সাহায্যে তুমি মোটেই কিছু পাচ্ছ না, তখন তুমি অর্ধেক হোক, সিকি হোক, যা পাবে, তাই ত তোমার লাভ। কথাটা ভেবে দেখ।”

সুধীর কথাটা ভাবিয়া দেখিয়া, জ্যোতিষী মহাশয়ের যুক্তির সারবত্তা স্বীকার করিতে বাধ্য হইল; শেষে বলিল, “আচ্ছা, টাকা যা পাব, তার অর্ধেক না হয় আপনাকে দিলাম। আপনি বলেছেন ধনরত্ন। যদি একটি রত্ন পাই, তার অর্ধেক আপনাকে ভেঙ্গে কি ক’রে দেবো?”

“তার উচিত মূল্যের অর্ধেক আমায় দেবে। সে সব কথা দলিলে স্পষ্ট করেই লেখা থাকবে।”

সুধীর জিজ্ঞাসা করিল, “লেখাপড়া কোথায় হবে?”

জ্যোতিষী উত্তর করিলেন, “যে কোনও একজন ভাল উকীলের দাড়ীতে। বড় রাস্তার মোড়ে যে এক জন বাঙ্গালী উকীলের দ্বাইনবোট দেখে এলাম, উনি কেমন?”

সুধীর বলিল, “কেশব বাবু? ভাল উকীল।”

“তবে, বাবাজী, যদি রাজি থাক, এখনই ওঠ। চল, কেশব বাবুর বাড়ী যাই। আর বিলম্ব নয়। রাজি না থাক, বল, আমি বিদায় হই।”—বলিয়া জ্যোতিষী মহাশয় ব্যাগ-হস্তে উঠিয়া দাঁড়াইলেন।

সুধীরও উঠিয়া দাঁড়াইয়া বলিল, “চলুন, আমি রাজি।”

এই সময় ভৃত্য সুধীরের চায়ের পেয়ালা হস্তে প্রবেশ করিল। সুধীর মুখ পুড়াইয়া সেই গরম চা এক নিশ্বাসে পান করিয়া লইল, জ্যোতিষী মহাশয়ের সহিত উকীলবাড়ী গেল।

সেই দিন অপরাহ্নের ট্রেণে, রেজিষ্টারি দলিলখানি ব্যাগে ভরিয়া জ্যোতিষী মহাশয় কলিকাতা রওয়ানা হইলেন। যাইবার সময়, সুধীরকে নিজ যজ্ঞোপবীত স্পর্শ করাইয়া শপথ করাইয়া লইলেন যে, প্রাপ্তিযোগ্যটি সফল হইবামাত্র সে স্বতঃপ্রণোদিত হইয়া জ্যোতিষী মহাশয়কে সে সংবাদ প্রদান করিবে।

৭

কলিকাতায় ফিরিয়া, জ্যোতিষী মহাশয় গৃহিণীকে সকল সংবাদ জানাইলেন এবং আশাবিত্ত হৃদয়ে উভয়ে দিনযাপন করিতে লাগিলেন।

সপ্তাহ কাটিল, পক্ষকাল কাটিল, কিন্তু সুধীরের নিকট হইতে কোনও প্রকারের সংবাদ নাই। এ দিকে এটর্ণিরা তাহাকে লইয়া কি করিল না করিল, তাহা জানিবারও কোনও উপায় নাই।

তখন নিতান্ত উদ্বিগ্ন হইয়া জ্যোতিষী মহাশয় পুনরায় বাঁকীপুর যাত্রা করিলেন। বেঙ্গলী মেসে গিয়া শুনিলেন, সপ্তাহখানেক হইল, ইস্কুলের চাকরীতে ইস্তফা দিয়া সুধীর চলিয়া গিয়াছে। কোথায় যাইতেছে, তাহা কাহাকেও কিছু বলিয়া যায় নাই।

কলিকাতায় ফিরিয়া আসিয়া কৰ্ত্তা-গৃহিণীতে আলোচনা করিয়া স্থির করিলেন, যে রাজা জায়গির দিবে, সেই রাজার নিকটেই সুধীর বোধ হয় গমন করিয়াছে। গৃহিণী বলিলেন, “শেষে কি ফাঁকি দেবে আমাদের?”

জ্যোতিষী বিমর্ষভাবে বলিলেন, “পৈতে ছুঁইয়ে শপথ করিয়ে নিয়েছি, ফাঁকি দেন, নরকে প’চে মরবেন।”

গৃহিণী বলিলেন, “তাতে ত আমাদের ভারি লাভ! আচ্ছা, এই ছ’বার বাঁকীপুর মাতায়াতে, দলিল-টলিলে, কত খরচ হ’ল?”

জ্যোতিষী বলিলেন, “সেই হিসেবই সে দিন দেখছিলাম। ৪০।। খরচ হয়েছে।”

গৃহিণী বলিলেন, “ঐ ৪০।। টাকাই জলে গেল!”

আরও এক সপ্তাহ কাটিল। সে দিনও অপরাহ্নে জ্যোতিষী মহাশয় দ্বিতলের সেই কক্ষটিতে বসিয়া আপন মনে ধূমপান করিতে ছিলেন, এমন সময় নিম্ন হইতে শব্দ উঠিল—“জ্যোতিষী মশায়! জ্যোতিষী মশায়!”

বারান্দায় দিয়া চিক ফাঁক করিয়া জ্যোতিষী মহাশয় দেখিলেন—সুধীর। কিন্তু সে নিজস্ব মোটরগাড়ীতে বা ল্যাণ্ডো হাঁকাইয়া আসে নাই--সাপারণ গৃহস্থের সাজে পদব্রজে আসিয়াছে, দেখিয়া জ্যোতিষী মহাশয়ের বুকটা দমিয়া গেল।

জ্যোতিষী মহাশয় ভগ্নমনে নামিয়া গেলেন; দ্বার খুলিয়া বলিলেন, “এই যে সুধীর বাবাজী, এত দিনে মনে পড়ল? এস এস, ভিতরে এস।”—বলিয়া তাহাকে বৈঠকখানায় আনিলেন।

সুধীর তাঁহার পদধূলি লইয়া বলিল, “আপনার কৃপায়, ধনরত্ন আমি লাভ করেছি। আমার সর্ন্ত অনুসারে, তার অর্দ্ধভাগ আপনাকে আমি দেবো ব’লে ডাক্তে এসেছি।”

যুবকের অঙ্গে লক্ষপতির পোষাক না থাকিলেও, তাহার মুখে আনন্দের উজ্জ্বল দেখিয়া জ্যোতিষী মহাশয়ের একটু ভরসা হইল। ভাবিলেন, ‘লাখ-লিখ’ না হউক, তবু বোধ হয়, বেশ ভাল রকমই কিছু প্রাপ্তিযোগ ঘটয়াছে। নিজে বসিয়া, সুধীরকে বসাইয়া জিজ্ঞাসা করিলেন, “কি রকমটা কি হ’ল, সব বল দেখি বাবাজী!”

সুধীর হাসিতে হাসিতে বলিল, “আজ্ঞে আগে কিছু বল্‌বো না; —আমার সঙ্গে আসুন, একবারে দেখাব। —আপনাকে নিতে এসেছি, চলুন।”

জ্যোতিষী জিজ্ঞাসা করিলেন, “কত দূর?”

“কাছে। গ্রামবাজার।”

“আচ্ছা, ব’স বাবা, আমি কাপড় বদলে আসি।”—বলিয়া জ্যোতিষী মহাশয় উপরে চলিয়া গেলেন। কি ধনরত্ন সুধীর লাভ

করিয়াছে, যাহার অর্ধেক তিনি এখনই পাইবেন, জানিবার জন্ত ব্রাহ্মণ এতই উৎকণ্ঠিত হইয়াছিলেন যে, স্ত্রীকে সংবাদটা জানাইয়া আসিবারও অবসর হইল না।

যুবকের সহিত শ্রামবাজারে আসিয়া তিনি দেখিলেন যে, ইহা ত সেই হরিহর মিত্রেরই ঠিকানা—৩২ নং কালু ঘোষের লেন।

সুধীর, বৈঠকখানায় লইয়া গিয়া তাঁহাকে বসাইল। সেখানে তখন আর কেহই ছিল না। তাঁহাকে বসাইয়া, পার্শ্বদ্বারের পর্দা সরাইয়া সুধীর বাড়ীর ভিতর চলিয়া গেল।

ক্ষণকাল পরে ফিরিয়া আসিয়া বলিল, “জ্যোতিষী মহাশয়, আপনাকে রূপায় আমি নগদ ১০১ টি টাকা পেয়েছি। এই নিন আপনার ভাগ।”—বলিয়া দশ টাকার পাঁচখানি নোট এবং একটি রূপার আধূলি সে জ্যোতিষী মহাশয়ের পায়ের কাছে রাখিয়া, বলিল, “নগদ এই। আর পেয়েছি, একটি রত্ন। ওগো, এস।”

বলিতেই—পর্দা সরাইয়া, ১৪১৫ বৎসরের একটি সুন্দরী মেয়ে, একখানি আসমানী রঙের শাড়ী পরিয়া, সভয়-পদক্ষেপে অবনত-বদনে প্রবেশ করিল। সুধীর, হাত ধরিয়া তাহাকে কাছে টানিয়া আনিয়া বসিল—“আর—এই স্ত্রীরত্ন।”—বলিয়া যুগলে জ্যোতিষী মহাশয়কে প্রণাম করিল। তাহার পর, হাসিতে হাসিতে বলিল—“রত্ন অবিভাজ্য। মূল্যের অর্দ্ধাংশ আপনার প্রাপ্য হ’লেও, কোনও উপায় নেই—কারণ, আমার এ রত্নটি অ-মূল্য।” বলিয়া সুধীর হাসিতে লাগিল।

জ্যোতিষী মহাশয় মুহূর্ত্তমধ্যে ব্যাপারটা অনুমান করিয়া

লইলেন। সূধীরের দেওয়া পাঁচখানি নোট হইতে একখানি তুলিয়া লইয়া, মেয়েটির হাতে দিয়া আশীর্বাদ করিয়া বলিলেন—“আহা, তা বেশ হয়েছে, বেশ হয়েছে। বেঁচে থাক মা, সুখে থাক। মেয়েটি কার হে সূধীর?”

বধূকে প্রশ্নান করিতে ইচ্ছিত করিয়া, সূধীর তক্তপোষের উপর বসিয়া বলিল, “এটি হরিহর বাবুরই মেয়ে। হয়েছে কি জানেন? আমার বাবা, আর হরিহর বাবু, এঁরা বালাবন্ধু ছিলেন; একসঙ্গে পড়তেন। তাঁরা পঠদশাতেই আমোদ করে পরস্পর বেহাই সম্বন্ধ পাতিয়েছিলেন। আমি যখন মাতৃগর্ভে, তখনও বাবা সিয়া থেকে হরিহর বাবুকে চিঠি লিখেছিলেন, ‘আমার যদি ছেলে হত তবে সে তোমার জামাই হয়ে রইল।’ তাহার পর বাবা ত মারা গেলেন। হরিহর বাবু প্রথম প্রথম আমার মা’র খোঁজ-খবর নিয়েছিলেন, তার পর সে সব আর হয়নি। ক্রমে তাঁর ছেলে-মেয়ে হ’তে লাগলো। ১০০ টাকা মাইনের চাকরী, কলকাতা সহরের খরচ, বুঝতেই তা পারছেন। তার উপর, এর পূর্বে ছুটি মেয়ের বিয়ে দিয়েছেন—এইটি তৃতীয় এবং শেষ মেয়েও। মেয়েটি বড় হ’ল। মনের মত পাত্রের দর ওঠে ৫ হাজার—১০ হাজার। অথচ এ দিকে একটি পয়সা সঞ্চয় নেই। তখন সেই বালা ও ঘোবনের কথা তাঁর মনে পড়ল। আমি যদি বেঁচে থাকি, কোথায় আছি, তা জানেন না, তাও বটে, আর লেখাপড়া শিখে ভদ্রভাবে আছি, না চোর-শুণ্ডা হয়েছে, তাও জানেন না, তাই ঐ কৌশল করে আপনার নামে বিজ্ঞাপন ছাপিয়েছিলেন।

আপনি বাঁকীপুর থেকে চ'লে আসবার পরের রবিবারে, হরিহর বাবু আমার বাসায় গিয়ে উপস্থিত। সব কথা আমায় ভেসে বস্লে, বাবার চিঠিপত্র আমায় দেখালেন। পিতৃ-আজ্ঞা—আমি পালন করতে প্রস্তুত আছি জেনে বস্লে—‘বাবাজী, তবে এখানকার চাকরী ছেড়ে দিয়ে চল। সেখানে ল-কলেজে ভর্তি হবে, এবং আমি যে এটর্নি বাবুদের বাড়ী চাকরী করি, সেখানে তোমায় আটকেল করিয়ে দেবো, আমি বাবুদের ব'লে রেখেছি। সেই আফিসে তুমি কায়-কর্মেও করবে, পকেট থরচ স্বরূপ গোটা ৫০ ট.কা বাবুরা তোমায় দেবেন, স্বীকার করেছেন।’—এই কথা শুনে, বাবাজী ছেড়ে দিয়ে চ'লে এলাম। এই এক হ'প্তা হল বিবাহ হয়েছে।”

শুনিয়া জ্যোতিষী মহাশয় মৌখিক সম্ভাষণ প্রকাশ করিতে লাগিলেন। সন্ধ্যা সমাগত দেখিয়া তিনি উঠিলেন। নোটগুলা ও আধুলিটা সেইখানেই পড়িয়া রহিল। বলিলেন, “বাবাজী, টাকা-গুলা তুলে রাখ।”

স্বধীর বলিল, “সে কি জ্যোতিষী মহাশয়! টাকা রেখে যাচ্ছেন কেন? আপনার ভাগের টাকা ব'লে রহস্ত করেছি বৈ ত নয়! ঐ টাকা দিয়ে আমরা দুজনে আপনাকে প্রণাম করেছি! নি—নি—নি!”—বলিয়া স্বধীর নোটগুলা জ্যোতিষী মহাশয়ের পকেটে ফেলিয়া দিল।

“আচ্ছা, তবে তাই!”—বলিয়া জ্যোতিষী মহাশয়, ধীরে ধীরে প্রস্থান করিলেন।

